

# 目錄

卷一	有巢燧人時社會狀況……………	一一—三
卷二	伏羲神農黃帝時社會狀況……………	五—一六
卷三	五帝時社會狀況……………	一七—二二
卷四	三代以來首服……………	二三—四七
卷五	身服……………	四九—七八
卷六	足服……………	七九—九〇
卷七	飲食……………	九一—一二〇
卷八	周時車馬……………	一二一—一三六
卷九	漢以來車馬……………	一三七—一五六
卷十	屋室……………	一五七—一六六
卷十一	燈燭……………	一六七—一七五
卷十二	城郭……………	一七七—一八〇

卷十三	都城街衢	一八一—一八六
卷十四	市肆	一八七—一九五
卷十五	閭里	一九七—二〇三
卷十六	祠祭	二〇五—二一五
卷十七	學校	二一七—二二四
卷十八	農田	二二五—二三二
卷十九	嫁娶	二三三—二四八
卷二十	喪事	二四九—二六二
卷二十一	葬	二六三—二七一
卷二十二	墳墓	二七三—二七九
卷二十三	坐席	二八一—二九一
卷二十四	拜跪	二九三—二九九
卷二十五	訟獄	三〇一—三〇八
卷二十六	筆墨紙硯之沿革	三〇九—三一八

卷二十七	迷信	禁忌	三一九—三三三
卷二十八	廁溷		三三五—三四〇
卷二十九	取水	取火 取材木	三四一—三五〇
卷三十	官吏休沐	佩印 受杖 多姦	三五一—三五七
卷三十一	古貴賤之觀察		三五九—三六七
卷三十二	歷代物價		三六九—三七九
卷三十三	歷代稱呼		三八一—三九〇
卷三十四	奴婢傭賃		三九一—三九七
卷三十五	治病 離疫		三九九—四〇五
卷三十六	賦稅	力役 戶籍	四〇七—四一六
卷三十七	行旅		四一七—四二五
卷三十八	兵事		四二七—四三一
卷三十九	歲時伏臘		四三三—四四八
卷四十	各種遊戲		四四九—四七五

卷四十一	家庭狀況	四七七—四八八
卷四十二	社會雜事雜物	四八九—五〇六
卷四十三	平民仕進	五〇七—五一六
卷四十四	妓	五一七—五二七



# 歷代社會風俗事物攷

## 卷一

行唐尙秉和著

### 上古 無父時代

社會狀況歷代不同。自黃帝至今四千餘年。其世次略可考。由黃帝溯炎帝。由炎帝溯伏羲。當又有千餘年。合黃帝以來。共五千餘年。此五千餘年中。社會嬗變之情狀。豈惟古之人不能料今。今之人苟不追研推測。亦不能見古也。孔子贊易。始述伏羲。刪書斷自堯典。太史公作史記。首黃帝。後儒輒因以爭論。豈知書經乃孔子古文之選本。而非史記。史記必詳世次。自黃帝以上。世次尤不明。非謂盡無稽也。茲編所述。重在社會狀況。凡可考見者。著於篇。故斷自伏羲。其伏羲以前。人羣狀況。散見百家。無事實可徵者。皆理想之詞。並不取。惟有二氏。有事實功德在民。故附及以爲卷首。

#### 上古穴居有巢氏始架屋

禮運。昔者先王未有宮室。冬則居營窟。疏營累其土而爲窟。地高則穴於地下。則窟於地上。又莊子。古者

禽獸多而人民少。於是民皆巢居以避之。始學篇。上古皆穴處。有聖人教之巢居。號有巢氏。三墳云。有巢氏俾人居巢。積鳥獸之肉。聚草木之實。天下九頭。咸歸有巢。始君也。按始學篇。人皇九頭。九頭者九酋長也。按穴居之苦。不得光。一也。暑濕。二也。不得空氣。三也。易爲猛獸所害。毒虫所螫。四也。而民智未啓。雖睢肝。無如之何。有巢氏出。架木巢居。出幽谷。遷喬木。置身高曠。諸害盡除。以此功德。民盡歸之。宜矣。後之宮室。亦巢也。進而益精耳。有巢氏之巢。不必在樹上。壘土石上。架以木。簡陋有賴於巢。實卽屋也。

燧人氏始造火始炮食

尸子。燧人上觀星辰。下察五木。以爲火。拾遺記。遂明國有大樹名遂。屈盤萬頃。後有聖人。遊至其國。有鳥啄樹。燦然火出。聖人感焉。因用小枝鑽火。號燧人氏。古史考。太古之初。人吮露精。食草木實。山居則食鳥獸。衣其羽皮。近水則食魚鼈蚌蛤。未有火化。腥臊多。害腸胃。於是有聖人出。以火德王。造作鑽燧出火。教人熟食。鑄金作刃。民人大悅。號曰燧人。三墳。燧人氏教人炮食。鑽木取火。有傳教之臺。有結繩之政。按火自無而有者也。其發明至爲難能。燧皇感森林自焚。知木實藏火。不知幾經政治。幾經試驗。始鑽木得之。其功又進於有巢。而卽以是爲帝號。可見當時之詫爲神聖。而利賴之深矣。或謂火化而食。始於庖羲。故以爲號。豈知燧人既發明出火。其智慧豈尙不知炮食。况炮者裹肉而燒之。燎其毛使熟耳。在熟食中。爲至粗之法。燧人去伏羲近。伏羲益發達美備耳。其創於燧人無疑也。

由今追想未有火之先。凡肉皆生食。其有害於人而夭折者。不知凡幾。且不知味。及得熟食。肉之腥臊者。忽馨香矣。草木實之淡泊寡味者。忽甘腴脆美矣。水之冰者可煖飲。居之寒者可取溫矣。至黑夜燭柴。以禦虎豹。猶後也。當夫登臺傳教。廣播火用之時。萬民之感戴慶幸爲何如。真驚天動地之偉業矣。既有火。則可冶金作刃。及他器用。未有火之先。凡器皆以石爲之。今所謂石器時代也。

上古之時。無所謂風俗。無所謂綱常。人但知有母。不知有父。食住略有基礎。衣服尙未慮及。亦生活之程序然也。至於廉恥禮義。相去尙遠。其情狀略與南洋諸島之土人同。尙不及滇黔之苗蠻。於此之時。有能於衣食住生活上。創一新法。以利生民者。民自然歸之。而奉以爲君。聽其號令。此時之君。殊無所利于民。以無富貴榮華之念。故亦無爭帝位者。如有巢。如燧人。皆以功致帝也。



## 卷二

行唐尙秉和著

### 伏羲

有父時代之始

#### 始制嫁娶有夫婦

白虎通云。古之時。未有三綱六紀。民人但知有母。不知有父。衣能覆前。不能覆後。臥之誅誅。起之吁吁。饑卽求食。飽卽棄餘。茹毛飲血。而衣皮革。於是伏羲仰觀象於天。俯察象於地。因夫婦正五行。始定人道。又古史考。伏羲制嫁娶。以儷皮爲禮。

按儷者並也。偶也。自太昊以前。男女隨遇匹配。初無定偶。朝暮更易。或女棄男。或男棄女。棄則相仇。其姦而艾者。或女爭男。或男爭女。爭則相殺。不見夫犬乎。春秋婚媾之際。日夜鬪爭。獮狎牙之聲。中夜不絕。何況於人。當時社會。因此相仇相殺者。日不知幾千百起。不惟於禮教有傷。且於治安有礙。太昊仰觀天。俯察地。首定夫婦一倫。而禮教基矣。

#### 自開闢至伏羲人始知有父

新語云。先聖仰觀天。俯察地。圖畫乾坤。以定人道。民始開悟。知有父子。禮郊特牲。男女有別。然後父子親。

父子親然後義生，義生然後禮作。

由開闢至太昊，其年雖不可考，然據百家所常稱道者，有天皇、地皇、人皇、女媧氏、大庭氏、赫胥氏、葛天氏、無懷氏、有巢氏、燧人氏。中間不顯著之氏，尚不知凡幾，而夫婦一倫，訖未有定。無夫婦則無父子，只有母子。太昊制爲嫁娶，以禮迎聘，於是男女別而夫婦定，其非夫婦而相悅者，則必有禁矣。且必以爲恥矣。夫婦定而生子，然後父子一倫，相因而生。若以前則婦無定夫，子無定父。

始創罔罟以佃以漁

易曰：伏羲作結繩而爲網罟，以佃以漁。蓋取諸離。漢書云：作網罟以佃，漁取犧牲，故天下號曰炮犧氏。尸子：宓犧氏之世，天下多獸，故教民獵。

按此時雖火化而食，然五穀尙未發明，仍以動物爲主要食料，而動物之獲頗艱。獵獸之器，雖有兵刃，而無弧矢，佐之以罟，獲獸易矣。至水中動物，非網不得。太昊由結繩而爲網罟，爲謀食之唯一利器。

始創陶器

拾遺記：均土爲埴，世本：暴辛公作埴。通志：伏羲作埴，按埴者樂也。詩所謂吹埴吹簫也。銳上平底，以土爲之，燥以火，音大如叫呼，且既能作盆，其他日用之陶器必多矣。記載失之耳。

始名事物

春秋命歷序，伏羲始名物蟲鳥獸。按凡事凡物，須皆有名，然後能識別。草昧之世，甲歷未作，人知有寒暑而已，年之名無有也。知月盈虧而已，月之名無有也。推之天空地上，山登之而悚其高，水盪之而駭其流，金石草木，虫魚鳥獸，日月星辰，風雲雨露，日相見相接相用而不可離，不有定名，胡由取携？胡由指目？太昊知之，凡百事物，皆與以名，由少及多，由甲推乙，以定民志，以一民稱，由是談虎而色變，說梅而舌津矣。則名之効也。

### 更創八卦以代結繩

易繫：古者庖羲氏之王天下也，仰則觀象於天，俯則觀法於地，觀鳥獸之文，與地之宜，近取諸身，遠取諸物，於是始作八卦，以通神明之德，以類萬物之情。拾遺記：伏羲和八風，以畫八卦，分六位而正六宗。古史考：庖羲氏作卦，始有筮。

按結繩爲識，其變化甚難，代以八卦，則肆應不窮，較結繩進矣。三墳云：命飛龍氏造六書，三墳號稱僞書，難盡信。然以理揣之，太昊始名草木禽獸蟲魚，後神農嘗百艸，必有詳細紀載。若六書至黃帝始有，將無法以紀物名及百艸之味矣。故謂六書至黃帝改造增修，則可。謂黃帝以前無書契，則不可。矧太昊既能作八卦以爲筮，必能再由八卦增造六書，以紀事無疑也。

### 始創爲音樂

世本庖羲氏作瑟五十絃。瑟，潔也。清潔於心，淳一於行。史記：太帝使素女鼓五十絃瑟，悲帝，禁不止，故破其瑟爲二十五絃。拾遺記：太昊立禮教以導文，造干戈以飭武，絲桑以爲瑟，均土以爲埴，禮樂於是興。律歷志八音：曰埴大如雁卵。

按樂也者，心之所樂者也。蓋所以平和性情，宣導抑鬱，發於心之所不容已。太昊首創絲土二音，後八音以次生矣。

由今追思伏羲之世，人羣狀況，居處則由巢穴，漸進爲廬室矣。飲食則由炮燔，漸進而燔炙矣。至衣服既可以蠶絲製爲瑟絃，編爲網罟，則必能織爲衣服。史失之耳。而最大之更革，在能對男女淫亂無別之狀況，制爲夫婦。易曰：有夫婦然後有父子，有父子然後有君臣上下，故夫夫婦者，人道之起源，風化之根本也。春夏秋冬，孰界之哉？東西南北，孰定之哉？自太昊定名，凡百事物，昭著名晰，無隔闕之虞。蓋至是世，稱謂大定，文明之啓，十已五六矣。

## 神農

始藝五穀，不專肉食。始作耒耜。

白虎通：古之人民，皆食禽獸肉。至於神農，人民衆多，禽獸不足，於是神農因天之時，分地之利，制耒耜，教



民農作易繫云伏羲氏沒神農氏作斲木爲耜，揉木爲耒。按月令季冬之月，命農計耦耕，修耒耜。注耜者耒之金也。周禮冬官考工記耜廣五寸，二耜爲耦。疏耜謂耒頭金，金廣五寸。釋名耜者似也，似齒之斷物也。是耜者金器，戴於耒足以耕地，故云似齒。今北方民猶用之。神農之時，金器尙未大行，故斲木爲之，後方易以金也。

又新語民人食肉飲血，衣皮毛。至於神農以爲行虫走獸，難以養民，乃求可食之物，嘗百艸之實，察酸苦之味，教民食五穀。

又淮南子古者民茹艸飲水，采樹木之實，食羸蠃之肉，時多疾病毒傷之害。於是神農乃始教民播種五穀，相土地，宜燥溼，嘗百艸之滋味，水泉之甘苦，令民知所避就。當此之時，一日而遇七十毒。

按由太昊至神農，不知若干年，而人民日益衆者，勢也。禽獸爲人所害，必日益寡，其不能供給於人者，亦勢也。且謀食而必獵，獵有獲有不獲，何其難哉！故嘗百艸，擇其可久食而無病者，種而食之，又不知試驗比較若干年，而始得五穀之最良也。因嘗艸之故，一日遇七十毒，是直以身殉民也。後世思其功，血食數千年，宜矣。

### 時織布已大盛

文子神農之法曰：丈夫丁壯不耕，天下有受其飢者；婦人當年不織，天下有受其寒者。故其耕不強者，無

以養生其織不力者無以衣形按呂氏春秋漢書皆引此教而呂氏織作績績績麻也並曰身親耕妻親績男女工作似此時已分章身之具至此已大有進步蓋已不衣皮韋彬彬有文矣

始教民鑿井

本艸經神農問於太一曰鑿井出泉五味煎煮口別生熟蓋古聖所居皆在大河左右不能處處有水泉故必鑿井以濟其窮水經注曰神農既誕九井自穿是亦鑿井之證當時之人必甚駭怪神之曰自穿耳

始有醫藥以救人

本艸經神農從太一嘗藥以救人命上藥一百二十種爲君久服不傷中藥一百二十種爲臣有毒無毒斟酌其宜欲遏病補虛羸者本之下藥一百二十種爲佐使不可久服欲除寒熱邪氣破積聚愈病者本之按所謂上藥無毒可久服必五穀之屬也中藥下藥卽今日藥肆所有之藥也既有藥必有醫爲民診治疾病

時市政益發達

易曰神農日中爲市致天下之民聚天下之貨交易而退各得其所按此時百姓於衣食住既日臻美備嗜欲亦日益多交易有無生活始便而錢幣未興祇以物易物耳日中爲期路遠者可往返也法實創於伏羲但其時未大盛耳

### 時已有城

漢書神農之教曰有石城十仞湯池百步帶甲百萬而無粟不能守也按人有欲必有爭爭則戰故築城以爲衛惟創於神農或神農以先卽有之無從考也

按帝王世紀神農在位百餘年此百餘年中救濟人民生活者甚衆發明穀食救肉食之窮一也穿井汲水濟自然水之窮二也夫耕婦織救衣皮之窮三也嘗百草醫民疾四也創耒耜以便耕耨五也大市政以便民六也由是百姓非獵不得食之苦免既有井則無河流之地亦可移居以前地無泉水卽無居民之困亦免未有藥之先百姓有疾任其夭折神農殞身製藥於是疾始有醫農器以耒耜爲最重織績以機杼爲最繁耒耜人知爲神農所創機杼紡車亦必創自神農史失紀耳衣食備而不通工易事則有匱乏積滯之患爲之市以通有無濟困乏民皆得所矣蓋自開闢至神農其間聖哲皆致力於衣食住之創造至是已大備在今日視之而覺爲尋常者在創造之始皆列聖焦神勞思而後有此效果也

## 黃帝時代

### 始造舟車始役使牛

漢書黃帝作舟車以濟不通古史考黃帝作車引重致遠少昊時略加牛禹時奚仲加馬呂氏春秋舟車

之始見也。三世然後安之。世本黃帝臣骸作服牛。

按易剡木爲舟。剡木爲楫。及服牛乘馬之事。不專屬之黃帝。蓋黃帝創之於始。堯舜增修於後也。始有車時。必先以人力推輓。既而牛馬漸馴。更用牛馬也。自黃帝以前。無役使牛馬之紀錄。亦無牧蓄雞犬羊豕明文。疑其時皆爲野獸。尙未馴熟。至此時役使之事。始及於牛。尙未及馬。遲至禹時。始以馬引車。以此見馬之馴熟。難於牛也。今之談中國古史者。自黃帝以前。輒曰游牧時代。吾疑中國古時。並未游牧。何言之。神農之時。民族人口。雖漸增多。而地皆荒蕪。到處皆牧場。若其時牛羊犬豕之屬。可以牧蓄。足可供給民食。而無匱。胡以神農遽代以五穀哉。可見此時牛羊皆爲野獸。不服於人。非佃獵不能得食。故必以五穀濟其窮。觀役使牛馬。至黃帝時始試驗。而馬尙不能引車。是其證已。

凡今之以游牧時代談中國古史者。皆未詳考。而服從於發達最晚民族之理想學說。須知晚起民族之必有游牧時代者。乃我民族馴服禽獸。既成功以後之事也。

### 始修官道

史記黃帝披山通道。未嘗寧居。按披者開也。或刈榛莽。或移土石。以利交通。交通利則文明易於傳播。

### 始造年歷起甲子

史記正義黃帝命大撓造甲子。容成造歷。按炎帝既教民藝五穀。五穀之生。與天時有莫大關係。其時春

夏秋冬節氣寒燠必已明晰至黃帝更作歷頒之民所謂教授民時也既有歷則宜有甲子以爲標識六十年一更六十日一易計算便矣

### 時男女始有別

淮南子黃帝治天下別男女異雌雄按神農時始盛織布當時之民由衣皮進而衣布既便且觀美然其服制必男女爲一往來動作社會上必有許多誤會或因以召亂別雌雄異服式風俗易以整齊矣

### 時宮室已有棟宇

易繫云上古穴居野處聖人易之以宮室上棟下宇新語天下人民與鳥獸同城黃帝乃伐木構材築作宮室上棟下宇按說文棟極也爾雅釋宮郭注棟卽屋脊也卽今日屋式也宇卽今日之廊簷也詩八月在宇箋宇簷下也蓋自有巢創爲屋室苟簡樸陋至黃帝則上有屋脊以壯觀瞻旁爲廊簷以爲掩護以便憩息至於今四千餘年仍而不改則其制之大備可知矣

### 始服垂衣冠履

拾遺記黃帝始垂衣服冕又世本黃帝作旃冕伯余作衣裳於刑作屣履通典上古衣毛帽皮黃帝始用布帛按神農始織布帛其時尚貴祇短衣蔽體尙無威儀至黃帝始講求儀式襟袖寬博彬彬下垂矣百姓化之漸褻衣博帶也黃帝以前祇努力於衣服之構造至冠履則未聞至黃帝衣服垂垂既已完備遂

漸及於首足。帝旣服冕，人民必冠幘矣。足無衣則寒，且不利行走，於是以艸製屨，以皮製履，蓋足衣之發明爲最後，較衣服更難也。

時字已大備

拾遺記：軒轅始造書契。淮南子：倉頡作書，天雨粟，鬼夜哭。荀子：故好書者衆矣，而倉頡獨傳者壹也。按書契斷非一時所能造成，諸書多言始於軒轅，余以爲伏羲能畫八卦，必能造書契，神農若無字，百艸之名，胡從而記？不過初尙少，至軒轅增修大備耳。軒轅時有史官紀錄其事，後人不察，以爲軒轅命倉頡始創耳，觀荀子可證已。

又倉頡不定爲黃帝時人。馬氏逸史引外紀曰：倉帝名頡，始創文字，在伏羲前。又按春秋元命苞：倉帝史皇氏，名頡，姓侯，仰觀奎星圖曲之勢，俯察龜文鳥羽山川指掌而創文字，天爲雨粟，鬼爲夜哭，治百有一十載，都於陽武，是則倉頡爲古之皇帝，史皇乃其號，而在伏羲前，是說也頗可信。倉頡惟在伏羲前，所以能開伏羲易學，又自伏羲至神農事漸詳，足徵有紀錄，其稱曰史皇者，以能造字爲史所自起耳。猶燧人造燧，卽曰燧皇也。

時八音已大備

漢書律歷志：黃帝命令洽。呂氏春秋作洽倫，疑後世伶人本此。爲律，自大夏昆侖之陰，取竹之嶰谷，生其竅厚均者，斷兩節，間

而吹之以爲黃鐘之宮。注律之最長。制十二簡以聽鳳之鳴其雄鳴爲六雌鳴亦六比黃鐘之宮而生之是爲律本禮樂記咸池備矣莊子帝張咸池之樂注咸池者黃帝樂也

按黃帝既創爲律管以候氣六陰六陽上下相生陽謂之呂故亦曰十二律曰黃鐘十一月太

簇正月姑洗三月蕤賓五月夷則七月無射九月六律也大呂十二月夾鐘二月中呂四月林鐘六月南呂

八月應中十月六呂也律以黃鐘爲最尊而黃鐘之宮聲實五音之本帝既定律於是諸樂備作金石絲

竹匏土草木八音咸備承用至今

### 始以黍粒創度量衡

漢書律歷志度者分寸丈引也所以度長短本起黃鐘之長以子穀秬黍黑黍中者一黍之廣度之九十

分此字隋書引作黍黃鐘之長言九十黍爲黃鐘之長一爲一分言一黍爲一分黃鐘長九寸

量者侖合升斗斛也所以量多少本起於黃鐘之侖以子穀秬黍千二百黍實其侖以井水準其概合侖爲合十合爲升十升爲斗以次量也

衡者稱桿平也權稱錘重也所以稱物知輕重分銖兩斤鈞石也本起於黃鐘之重侖容千二百黍重十

二銖兩之即二十銖爲兩十六兩爲斤

按說苑云度量權衡以粟生一粟爲一分一粟者一黍也時市政久已發達交易繁多不有度量衡胡由

交易而度量衡不有根本。胡能齊一。黃鐘與黍。皆永久不變者也。故以爲本。古人立法之精如此。晉荀勖作樂。自謂諧調。獨阮咸心不謂然。無一言勸忌。咸出爲始平太守。後田父耕得周玉尺。勖持以校。已所作鐘磬。覺皆短一黍。始服阮神識。周尺卽律尺也。是千百世後。仍可以黍正誤也。

時陶器木器益大備

通攷神農作甕餅缶。黃帝作釜甑盤樛。按自伏羲燒土作器。爲陶之始。炎黃繼作。器用益備。利賴至今。蓋中國社會之製造。至黃帝時。不惟衣食住皆備。且有文有章矣。而其最大最深之創作。爲年歷。爲甲子。爲律。萬世賴之。而六律尤能辨陰陽之氣。謹造化之微。武王伐紂。吹律聽聲。便知吉凶。師曠知南風之不競。亦以律知。周禮所謂太史執同律以聽軍聲是也。又歷代制作之不能決定者。則以律攷定之。而其源實創于黃帝。其深微奧妙。爲何如哉。



## 卷三

行唐尙秉和著

### 五帝時代

太史公列黃帝爲五帝首。而減少昊氏。後人頗議其輕信大戴禮。致舜禹世次。杈枒不合。然觀太史公後敘。不謂無疑。特以大戴禮文尙雅馴。故依據之耳。後世重行論定。大概以少昊顓頊帝嚳帝堯帝舜爲五帝。今從之。

#### 始以斗杓指寅爲正月

逸史。顓頊以斗杓建寅爲歲元。古史攷。顓帝以孟春正月爲歲元。按建者指也。寅東北方也。蓋自黃帝以來。攷定星歷。建立五行。起消息。正閏餘。節四時之度而已。無正月之名。正月者政教之始。故不曰一月。而曰正月。元者長也。首也。卽以正月爲歲首也。正月之名始此。卽夏時也。

#### 時男女之別益嚴。女遇男須避。行不避則辱之

淮南子。帝顓頊之法。婦人不避男子於路者。拂之於四達之衢。按黃帝之時。但曰別男女而已。此云婦人須避男子。不云男子避婦人。不公甚矣。拂之者。以手摩其肌膚。四達之衢。人衆之地。以女既不避男。卽令

男子拂其肌膚。又何妨哉。罰太酷矣。

時始有祭祀

史記。顓頊依鬼神以制義。治氣以教化。潔誠以祭祀。按顓頊以前。無祭祀之名。至顓頊始以神道設教也。第所祭爲何。尙不詳耳。

堯時以華表

今牌樓 標識都城衢路

古今注。堯立誹謗之木。今之華表木也。以橫木交柱頭。若花也。形若桔槔。大路交衢悉施焉。或謂之表木。以表王者納諫也。亦以表識衢路也。又尸子。堯立誹謗木於四達之衢。按古今注所言。古華表之形。與今之牌樓無以異。然則今北平城內之東四牌樓。西四牌樓。仍唐虞之制也。

時父母喪三年

書堯典。二十有八載。帝乃殂落。百姓如喪考妣。三載四海遏密八音。史記。堯崩。百姓悲哀。如喪父母。三年四方莫舉樂。孟子。堯崩三年之喪畢。是可證唐虞時。父母之喪。行之三年。已成定禮。故書以父母喻君也。

始有流刑鞭刑扑刑贖刑

通攷。自黃帝以來。不用命者。則征之以兵。無所謂刑。刑之作。始於唐虞。虞書。流宥五刑。鞭作官刑。扑作教刑。金作贖刑。流者。流之遠方。今所謂充軍也。鞭扑者。撻也。贖刑者。以金贖罪也。史記集解。以墨劓剕。是即則

宮大辟當五刑。或謂此時祇有大辟。尙無上四刑。不知果如何耳。

### 時商賈已發達

孟子。舜遷於負夏。益稷謨。懋遷有無化居。尙書大傳。舜販於頓丘。就時負夏。按就時者。逐時射利。卽益稷謨所謂懋遷有無化居也。時民尙愚魯。祇知耕田爲農。至爲賈爲商。則不能也。觀舜之所爲。則當時社會商賈之狀況可知矣。

### 時已有繪畫

書。予欲觀古人之象。日月星辰。山龍華蟲。作會。按注會者。繪也。畫六章於上衣也。六章者。卽日月星辰。山龍雉蟲也。又孟子。及其爲天子。被袞衣。注。袞衣。畫衣也。是可證當時畫學已盛。

### 時已有刺繡

書。宗彝藻火粉米黼黻絺繡。以五采章施於五色。按絺繡者。以絺繡六章於下裳也。六章者。宗彝藻火粉米黼黻也。五采者。言無論繪衣繡裳。色皆有五也。

自黃帝制爲垂衣。卽長衣。較以前進化矣。然至堯時尙服素衣。未有服色。史所謂黃收純衣也。至舜則加以五色。繪繡兼施。上衣下裳。文采彪炳。而六章之制。承用至清末。抑可謂久矣。

### 時葬用瓦棺始不用薪

禮檀弓有虞氏瓦棺注始不用薪按易繫云古之葬者厚衣之以薪不封不樹喪期無數後世聖人易之以棺槨蓋有虞氏有棺而無槨鄭注蓋以進化程序攷之故曰始不用薪

時學校已大備

書命汝典樂教胥子直而溫寬而栗剛而無虐簡而無傲詩言志歌永言此言學校教學子之宗旨也禮王制有虞氏養國老于上庠養庶老於下庠鄭玄云上庠右學大學也在西郊下庠左學小學也在國中周之小學爲有虞氏之庠制是以名庠云觀此則舜時之學制實已大備故至周猶采用其法而虞書但言教胥子之法不詳其制由是知唐虞遺法爲後世所知者百不及一也

時五禮咸備

虞書修五禮五玉三帛二生一死贊按五禮者注云吉凶軍賓嘉各禮也修者言舊有此五禮舜巡狩所至攷察其是否舉行也史五帝紀三帛注云鄭玄曰帛所以薦玉高陽氏後用赤緇高辛氏後用黑緇是高辛高陽時已有此禮故其後沿用之然則謂五禮至唐虞咸備則可謂始於唐虞則不可也唐虞以前皆失紀耳

始以詳歷授民以日月星辰鳥獸爲識時標準

堯典乃命羲和欽若昊天歷象日月星辰敬授民時按此時識時之法尙不能如夏小正月令之詳而以

春分秋分夏至冬至爲定四時之最大關鍵。詳仲春仲夏仲秋仲冬。其孟季則不詳。因仲月定。其孟季亦定也。

其定仲春之法曰日中星鳥。以殷仲春。厥民析。鳥獸孳尾。按日中者春分也。星鳥者言至春分。昏則鳥星畢見。此一識也。乳化曰孳。交接曰尾。言至春分。則鳥獸自然孳乳交接。此又一識也。殷者定也。仲春定則孟季可知。

其定仲夏之法曰日永星火。以正仲夏。厥民因。鳥獸希革。按日永者夏至。星火者言至夏至。則昏時火星正中也。希革者言夏時熱。鳥獸毛羽脫落也。亦以星辰鳥獸爲識。

其定仲秋之法曰宵中星虛。以殷仲秋。厥民夷。鳥獸毛毳。

按宵中星虛者。注云。虛星見則正秋分也。毳者理也。言毛更生若整理然。

其定仲冬之法曰日短星昴。以正仲冬。厥民隤。鳥獸氄毛。按日短者冬至也。昏昴星中。則冬至到矣。氄毛者言溫柔也。時天寒鳥獸氄以自溫。

按此時識時。尚未及於草木。不能如夏小正月令之詳。然以閏月定四時成歲。歲歷之成。至堯已大備。虞書紀事簡。想尙有其他標識。未備舉耳。

然其時歷法實略遠方日月不免錯誤故中央常爲訂正

虞書協時月正日同律度量衡。按自黃帝以來用甲子紀日月年每六十則一周。史記稱紂爲長夜之飲忘其日辰。春秋時各國月日亦每有錯誤。况簡略如唐虞遠方節候差錯不齊。因以誤民者多矣。舜因巡狩協同時日使之齊一。非爲奉行正朔亦利民要政也。至於度量衡之製造皆原本於律。執黃鐘律隨所至而同之。不愛不齊一矣。

蓋唐虞之時社會狀況其屬於風俗者夫婦父子尊卑上下已秩然有章。其屬於政教者已五禮五刑定有常制。其屬於音樂者已聲律克諧八音咸備。其屬於技藝者則繪畫刺繡黼黻文章。孔子曰大哉堯之爲君巍巍乎其有成功煥乎其有文章。惜其詳細狀況皆失載。僅禮記中溯各事源流偶爾及之爲可惜耳。

又唐虞時洪水爲災當其未平草木暢茂禽獸逼人獸蹄鳥迹遍於中國人與獸雜處水與人爭地觀禹鼎所鑄及山海經所述魑魅罔兩及殊形詭狀不可名言害人之禽獸如巫支祁屬者不可勝數蓋極恐怖之時代也。及夫大禹疏導注之東海萬派順流益更烈山澤以與逼人之禽獸戰然後稷播百穀益釀興禮樂唐虞之邦治乃成。

## 卷四

行唐尙秉和著

### 首部

#### 三代社會狀況

夏殷禮俗，摭拾所得，不及周之十一，僅名物制度，散見於三禮而已。社會狀況，欲窺其全要難。雖然，孔子云：周監於二代，郁郁乎文哉！又曰：周因於殷禮，殷因於夏禮，其損益可知也。孟子述三代井田學校名異實同，是周之禮俗，卽夏殷禮俗，夏殷社會，與周無大異也，故並述之。

#### 三代首服狀況

欲知古人首服，須先明古人留髮狀況。古人髮皆上挽，約之以笄。雞音說文笄，簪也。所以連冠於髮，使不墜也。然其詳至漢鄭康成作注時，已云不能盡詳，茲所述者，特其形狀之概略耳。

#### 一大禮冠狀況

王制云：夏后氏收而祭，殷人髡而祭，周人冕而祭，似夏殷無冕。然論語云：禹致乎黻冕，書太甲：惟三祀十有二月，伊尹以冕服奉嗣王歸於亳，是夏殷亦冕也。特異其名曰收髡耳。至冕之形象，據後漢書引大小

夏侯說皆廣七寸長尺二寸前圓後方前垂四寸後垂三寸係白玉珠爲十二旒通攷云冕惟卿大夫以上得服之以旒數多寡爲等差天子十二旒大夫三旒大夫以下不得服卽今俗所謂平天冠也民國初年常採用其制以爲祭服而無垂旒蓋冕之制起於黃帝至周而大備故孔子取之曰服周之冕冕之制至明尙承用中國冠服沿襲至數千年之久者惟此耳

冕之表裏顏色及其高低

按周禮夏官弁師掌王之五冕皆玄冕朱裏延紐注延之覆在上故名延皆玄表覆之在冕上也疏云爵弁前後平故得弁稱冕則前低一寸餘故得冕名冕則僂也以低爲號也由上說攷之是冕之上色玄裏則色朱前簷較後簷低一寸餘也

一常禮冠狀況

按通攷云弁亞於冕郊特牲所謂周弁殷爵夏收是也自天子至於士皆得服之周禮夏官弁師疏云爵弁前後平故得弁稱觀經傳所載國君及卿士大夫除大朝大祭外皆御弁弁固爲常禮服通攷謂爲冕之亞者信矣

弁之物質及其形狀之顏色

弁之形前後平前旣言之矣至其物質顏色據白虎通云皮弁者何謂也所以法古至質冠名也弁之言



髮也。所以樊持其髮也。以鹿皮者。取其文章也。又左傳僖二十八年。初子玉自爲瓊弁玉纓。杜注。弁以鹿皮爲之。次瓊玉爲飾。是古之弁皆以鹿皮爲之。且必以鹿皮之帶毛者爲之。鹿毛斑駁可愛。故曰文章。又釋名云。弁如兩手相合。扑時也。形象以爵章爲之。謂之爵弁。以鹿皮爲之。謂之皮弁。以韎色赤章爲之也。按釋名之說。與白虎通稍異。白虎通謂必以鹿皮者。取其文章。明皮而有毛也。釋名則謂以韎章爲之。似用赤色之皮。而去毛者。是韎也。韎則何必鹿皮。又爵弁。後漢書謂象形。釋名謂以爵章。疑釋名或誤也。

### 一燕居冠服狀況

按通攷云。冠亞於弁。所謂委貌章甫。毋追是也。按郊特牲云。委貌周道也。章甫殷道也。毋追夏道也。士冠禮鄭注云。委安也。言所以安正容貌。章明也。言所以表明丈夫。毋發聲追猶堆也。皆言冠之形。道者言常所服以行道之冠也。正義曰。行道謂養老燕飲燕居之服。若視朝則皮弁也。按晉書輿服志云。委貌形如覆杯。與皮弁同制。清時夏日服委貌。形正如覆杯。殆採周制歟。

通攷云。周以前冠冕之制。其詳不可得聞。惟虞書言章服。戴記言冠制耳。然冠之制有三。曰冕。曰弁。曰冠。弁與冠自天子至於士皆得服之。冕則卿大夫以上服之。而可以兼服弁。弁則士以下服之。而不可以僭服冕。

### 春秋時視冠極重去冠則失禮以爲大恥

韓非子。齊桓公飲酒醉。遺其冠恥之。三日不朝。按韓詩外傳。齊景公縱酒醉而解衣冠。鼓琴以自樂。顧左右曰。仁人亦樂此乎。晏子曰。自齊國五尺以上。力皆能勝嬰與君。而不敢者畏禮也。今君先失禮矣。據此。雖燕居不冠。亦非禮也。

古製冠有模至求之於外國以爲冠法

左傳昭二十三年。晉范獻子求貨於叔孫。使請冠焉。取其冠法而與之。兩冠注。冠法者。作冠模法也。以是爲國際交際品。其重可知矣。

春秋弔用白冠

說苑。楚孫叔敖爲楚令尹。一國吏民皆來賀。有一老父衣赭衣冠白冠而弔。

冠若非法可至殺身

左傳僖二十八年。楚子玉自爲瓊弁玉纓。人知其將得禍。後果然。然其殺身之故。不盡在冠也。僖二十四年。鄭子華之弟子臧出奔宋。好聚鵠冠。鵠聚鳥羽可爲飾鄭伯聞而惡之。使盜誘而殺之。則直以冠殺身矣。

春秋戰國時冠樣可隨意製有獬豸冠

左傳成九年。南冠而縶者誰也。正義曰。南冠楚冠。卽今獬豸冠也。獬豸觸不直。故法冠象其形。按後漢書。獬豸神羊。能別曲直。楚王常獲之。故以爲冠。秦滅楚。以其君服。賜執法近臣。御史服之。夫獬豸旣爲羊。則

有兩角冠狀如是怪甚矣。而春秋時楚人全國服之。故一望而知爲南冠也。楚滅祇法官服之。沿至漢唐不改。蓋冠式以此爲最久矣。

### 有鷄冠

史記弟子列傳子路性鄙好勇力志伉直冠雄鷄佩玃豚。是又以雄鷄爲冠取其勇猛其形狀之可畏亦獬豸之亞。

### 有鶚冠

真隱傳鶚冠子楚人隱居幽山衣被屢空以鶚爲冠著書言道家人謂鶚常師事之後顯於趙鶚冠子懼其薦己乃與鶚絕。又坊記云趙武靈王製鶚冠以表武士按正字通鶚色黃黑而褐首有毛角有冠性愛儕黨有被侵者直往赴鬪雖死不置是亦鳥之勇猛者取其狀以爲冠亦猶鷄冠之義也狀愈奇矣。

### 其固冠之法則有紐武貫之以笄而以纒約其髮

周禮夏官弁師延紐注云紐者小鼻在武冠卷也禮玉藻編冠玄武上笄所貫也。今時冠卷當簪者廣袤以冠纒同纒。綰髮者前漢江充傳冠纒纒步搖注云纒織絲爲之即今方目紗也蓋未冠之前先以纒約束其髮也其舊象歟疏古之紐武笄貫之處若漢時冠卷當簪所貫者於上下之處及隨纒之表傳推長也以冠纒者貫簪之處當冠纒之中央云舊象者是周冕垂紐於武貫纒之舊象也按十冠禮纒纒廣終幅長六尺是纒長之度也。

然服冠亦有不用笄貫者但必圍以組

儀禮士冠禮緇布冠缺項又詩小雅有頍者弁鄭康成直讀頍爲缺以爲弁貌六書通云冠無笄者用頍以組圍頭以繫冠缺其當項處以俟繫束也據此是以組圍頭以期冠固而組之兩端蓋當腦後冠缺處使下垂以爲繫束若有笄之弁則屈組爲紒冠垂爲飾不用頍

而繫冠之法纓尤爲重

士冠禮緇布冠缺項纓屬於缺左傳子玉爲瓊弁玉纓說苑楚莊王與羣臣夜宴盡醉燭滅有人牽王之夫人夫人絕其纓語王云頃有人無禮于妾妾斷其冠纓請罰之莊王遂令於羣臣曰今日飲須盡斷冠纓以爲樂於是羣臣盡斷其纓按說文纓冠係也釋名纓頸也自上而係於頸也以故左傳哀十五年以戈擊之斷纓子路曰君子死冠不免結纓而死結纓於頸則冠固故曰不免戰國策淳于髡仰天大笑冠纓索絕頭仰後則纓急急則絕也莊子曾子居衛緼袍無表正冠而纓絕冠久則纓敝敝而頓之故亦絕也愈見纓與冠所係之重已

纓上有飾

左傳楚子玉爲瓊弁玉纓是飾纓以玉也儀禮士冠禮其綏也注云綏纓飾也是纓上更綴以纓以爲美觀

### 周庶人首服狀況

以上所言弁冕皆士以上所服。庶人不與。然則古庶人首服果何如乎？案蔡邕獨斷云：「幘古者卑賤執事不冠者之服。」又釋名云：「巾者謹也。二十成人士冠。庶人巾。據是則厮役幘而庶人巾。巾爲普通商民之首服。然庶人有事亦冠。郊特牲黃衣黃冠而祭是也。」

### 周庶人亦露髻髻在項後不在頂

莊子支離疏者背駝肩高於頂。會撮指天。注：會撮髻也。古人髻在項中。脊曲頭低。故髻指天。據是則古人或露髻髻在項後不似後人之在頂也。

### 漢冠服狀況 冕仍周制

後漢書輿服志：冕廣七寸，長十二寸，前圓後方，朱綠裏，玄上，前垂四寸，後垂三寸，係白玉珠爲十二旒，是仍周制也。惟周冕裏朱，漢增以綠爲小異。又周制大夫以上方服冕，漢志未言限制，然據趙喜傳，不得已解巾之郡，注云：「旣服冠冕，故解幅巾。」是太守即可服冕也。

### 有爵弁爵同雀

後漢書輿服志：爵弁一名弁，廣八寸，長尺二寸，如爵形，前小後大，繪其上，似爵頭。按周弁純以鹿皮爲之，不言加繪帛其上，亦未云後大前小，蓋漢弁親周，小異其狀矣。

時仍有獬豸冠

後漢書法冠。或稱獬豸冠。又淮南王傳。作漢使節法冠。又張敞傳。且當以柱。後惠文冠。彈治之耳。注漢法冠。也是獬豸神羊之象。至漢仍存也。

有劉氏竹皮冠

史記高帝紀。高祖爲亭長。乃以竹皮爲冠。時時冠之。及貴常冠。所謂劉氏冠也。後詔曰。爵非公乘以上。不得冠劉氏冠。卽此。但史祇言其質。未詳其形。

有高山冠

後漢書高山冠。蓋齊王冠也。注以其形似山。

時學者皆服進賢冠

後漢輿服志。進賢冠。文儒者之服也。前高七寸。後高三寸。以梁多少別貴賤。自博士以至私學弟子。皆一梁。是凡學者皆服之。魏晉六朝。承用不改。

漢仍重視冠

汲黯傳。丞相弘燕見。上或時不冠。至如黯見。不冠不見也。

漢冠卷

周禮弁師延紐疏云。古之紐武。弁其之處。若漢時冠卷。當簪所貫者。

### 漢幘狀況

後漢輿服志。古者有冠無幘。至戰國時。秦雄諸侯。乃加其武將首飾爲絳帟。帟同以表貴賤。其後稍稍作顏題。也。顏漢輿續其顏。却探也。探之。施巾連題。却覆之。至孝文乃高其顏。題續之以耳。崇其巾爲屋。合後施收。上下羣臣貴賤皆服之。文者長耳。武者短耳。又蔡邕獨斷云。幘古者卑賤不冠者之服。元帝額有壯髮。不欲令人見。始服之。羣臣皆隨焉。然尙無屋。至王莽內加巾。故言王莽禿幘施屋。又劉玄傳。俠卿爲制絳單衣。半頭赤幘。注。幘巾所以覆髻也。續漢書曰。童子幘無屋。示未成人也。半頭幘卽空頂幘也。其上無屋。廣韻。弁缺四隅爲恰。夫既有四隅。則形方也。

按幘之起。獨斷謂始於元帝。後漢書謂始於戰國。盛於文帝。並謂崇其巾爲屋。獨斷則謂至王莽始加巾。微有不同。然幘之始起。以絳帟首。蓋與巾無異。後始加顏加耳爲屋。形狀又略同於冠矣。然前漢時不多見。至東漢末則大盛。集異記云。漢延熹中。京師幘額短耳長。短上長下。時中常侍單超徐璜左悺。至於家貧不能自辦。自號無頭。就人借頭。此其沿革之大略也。

屋者隆起而空上。今戲劇之冠。色青。頂後半隆起。有兩耳橫於左右者。殆卽幘之遺制也。續漢書謂半頭幘卽空頂幘。其上無屋。然則幘之平頂者。雖空其上。不得謂之屋。屋則有脊高起。前後漸低如屋形也。

漢卷幘及幘梁狀況

士冠禮。緇纁。廣終幅。長六尺。皮弁筭。爵弁筭。緇組紃。鄭康成注云。纁。今之幘梁也。又云。今未冠筭者。著卷幘。疑其形與冠卷類也。

漢頭巾貴賤前後不同

正韻云。巾。蒙頭衣也。玉篇云。佩巾。本以拭物。後人著之於頭。急就篇注云。巾者。一幅之巾。所以裹頭也。釋名云。巾者。謹也。二十成人。士冠。庶人巾。當自謹修於四教也。在兩漢時。巾純爲庶民所服。郭泰傳注云。巾以葛爲之。居士野人所服是也。朱博傳。皆罷斥諸病吏。白巾走出府門。馮衍傳。乃共罷兵。幅巾降于河內。是甫罷官。卽須白巾。不得服官幘。趙喜傳。詔書迫切。不得已。解巾之郡。是旣爲官吏。卽須脫去白巾。不得仍庶人服。趙咨傳。太尉楊賜特辟咨。使飾巾出入。請與講議。是旣非官吏。須特許其服巾。然後能出入府門。是兩漢四百年間。祇庶人服巾。其界甚嚴。至東漢末。雖王公學士。亦服之。遂無區別。魏武紀。注云。傅子曰。漢末王公。多委王服。以幅巾爲雅。是以袁紹之徒。雖爲將帥。皆著緇巾。王公且然。官吏可想。郭泰傳。常於梁陳間。行遇雨。巾一角墊。下也時人乃故折巾一角。以爲林宗巾。其見慕皆如此。孔融傳。融幅巾奮袖。談詞如雲。名士且巾。儒雅風流。效慕益衆。於是自周迄漢。以下等社會之頭服。至此乃遍於朝野。而周代禮秩之等差。遂泯然莫辨矣。彼晉書輿服志。謂巾古尊卑共服者。非也。



漢官吏謝罪則免冠士庶則脫巾

周亞夫傳景帝視而笑曰此非不足君所乎條侯免冠謝後漢高鳳傳鄰里有鬪者解之不已乃脫巾叩頭固請是無論貴賤皆以脫冠巾表示待罪之意且服過也

漢以前士庶盡白巾不忌白色

漢以前祇官吏冠服有色或青或玄或緇淺黃餘士庶盡白巾成爲風俗不似後世必持服而後服白也觀漢末妖賊以黃爲巾亦所以別於白自爲標識

魏晉六朝冠服狀況

天子冕旒歷代皆然故不更詳茲所重者燕居之服及社會具狀也故略於冠冕而詳於帽幘

魏晉時帽幘大行

幘玉篇云帽也廣韻云弁缺四隅曰幘類篇幘或作幘幘玉篇云帽也同幘然則幘也幘也帽也一物也魏志太祖紀注云漢末公卿多委王服以幅巾爲雅魏太祖擬古皮弁裁縑帛以爲幘以色別其貴賤是爲幘之所自始

晉書輿服志幘本未有歧荀文若名巾之行觸樹枝成歧謂之爲善因而弗改接觸樹枝而成歧者中陷

魏幘有歧六朝尙白幘

兩邊高也。晉因之。輿服志云。漢儀立秋日獵服緇淺黃幘。後哀帝改用素白幘。又咸和九年制。聽尙書八座承郎門下三省侍官乘輿白。幘低幘出入掖門。又二宮直官著烏紗幘。然往往士人燕居皆著幘矣。又隋書禮儀志。宋齊之間。天子燕私著白高帽。太子在永福省著白紗帽。南齊桓崇祖守壽春著白紗帽。肩輿上城。至隋以白幘通爲慶弔之服。國子生亦服白紗巾。是六朝至隋。上自天子。下至士庶。皆白巾帽之證也。

晉時以幘爲禮服帽爲便服

世說。王鎮西往尙書墓還。葬後三日反哭。諸人要之。便回駕。把臂下車。裁得脫幘。著帽酣宴。乃覺未脫。衰是幘爲禮服。帽爲燕服。故脫幘著帽。又晉書謝安傳。安爲桓溫司馬。溫詣謝。值謝梳頭。遽衣幘。溫命以帽見。是亦以幘爲禮服。帽爲便服。故溫令帽見。以示優異。

晉幘質勁帽質軟

世說。時庾頴然已醉。幘墮几上。以頭就穿取。可證幘爲勁質。故可以頭穿取。又桓宣武少家貧。戲大輪。求教於袁耽。耽遂變服。懷布帽。隨溫去。可證帽爲軟質。故可懷也。

晉帽無纓

世說。孟參軍九月九日。從桓公遊龍山。風吹落帽。是晉帽無纓。有纓則不至風吹落也。

### 六朝至隋帽有裙

南史和帝紀。百姓皆著下屋白紗帽。而反裙覆頂。又隋書禮儀志。帽自天子下至庶人皆服之。以白紗者名高頂帽。又有繒皂雜紗爲之高屋。下裙。又云其制不定。或爲卷荷。或有下裙。按帽有裙爲古所未見。五代史補云。僧謙先飲酒食肉。嘗曰。但願鵝生兩掌。鼈留兩裙足矣。是以鼈邊下垂者爲裙也。又釋名云。裙連接裾幅也。六朝至隋時。或於帽簷下綴橫幅以爲飾。故反裙可覆頂也。

### 唐尙烏紗帽

唐書車服志。烏紗帽者。視事及燕見賓客之服也。是官吏視事及燕居皆烏紗帽也。又雲溪友議。李回謂魏謩曰。如今脫却紫衫紗帽秀才。僕爲試官。依前不送公。是秀才亦服紗帽也。

### 唐宋頭巾形尖爲美

聞奇錄。又覆巾子射之云。近來好裹束。各自競尖新。秤無三五兩。因何號一斤。是唐庶人仍以巾裹頭。而以尖新爲美觀。又歸田錄。陶穀詩云。尖簷帽子卑凡厮。是宋初帽子亦尖形。

### 宋頭巾帶垂前

老學菴筆記。予童子時。見前輩猶繫頭巾帶於前。作胡桃結背子。是頭巾之裹束。亦以帶爲固。且必垂帶於前。以爲飾也。蓋至宋已以帽爲禮服。巾爲便服。與六朝時之以幘爲官服。以帽爲便服者異矣。

周以來笠之狀況

詩小雅彼都人士臺笠緇撮傳云臺所以禦暑笠所以禦雨也鄭箋臺夫須也都人之士以臺皮爲笠按小雅云南山有臺傳臺夫須也疏夫須莎草也可爲簔笠是笠之質以草織成也

笠無貴賤皆服之

左傳注兵車無蓋籛人執笠依轂而立以禦寒暑名曰笠轂是貴人用笠也詩小雅何簔何同笠是下至牧人亦服笠也然後世之笠皆用以禦風日及雨夏秋用之冬日則否而杜注兼云禦寒則不得其義矣

古笠有柄

史記平原君傳虞卿者游說之士也躡蹻擔簦說趙孝成王徐廣曰笠有長柄者謂之簦又篇海簦笠以竹爲之無柄曰笠有柄曰簦

古簦笠卽今之傘

急就篇注云簦笠皆所以禦雨大而有把手執以行謂之簦小而無把手戴以行謂之笠是以古逸詩越謠云君擔簦我跨馬他日相逢爲君下由是證之左傳笠轂之笠旣云籛人手執亦必爲有柄之簦簦較笠大而廣形蓋與今傘無異惟今傘能開闔簦能開闔與否載籍未言不知果何如耳

暫時有曲柄笠

世說新語。謝靈運好戴曲柄笠。按急就篇。笠有柄。手執以行。笠無柄。方戴於首。茲雖曲柄而仍戴之。其真狀不能明也。

#### 唐以笠禦雪

唐宋以來詩歌言笠者極多。太白云。飯夥山頭逢杜甫。頭戴笠子日卓午。又云。竊笠青茫茫。竊亦竹類。以無異義並不錄。惟柳子厚云。千山鳥飛絕。萬徑人蹤滅。孤舟笠翁獨釣寒江雪。是以笠禦雪。左傳注所謂禦寒者。或卽此歟。

#### 清時草帽

古爲笠或以臺草。或以竹。或以簞。至清時以麥莖編爲辮。盤綴成笠。光澤輕鬆。柔輭廣約二尺。極爲外國所羨。於是草帽辮爲出口大宗。

#### 周時沐髮義意

韓非子爲政猶沐也。雖有棄髮必爲之愛。愛棄髮之費。而忘長髮之利。不知權者也。又淮南子。今沐者墮髮而猶爲之不止。以所去者少。所利者多。夫曰忘長髮之利。曰所利者多。則沐者不惟去垢取潔。亦所以沃髮使舒長也。

#### 周沐髮狀況

左傳僖二十五年。頭須求見。公辭焉。以沐。謂僕人曰。沐則心覆。心覆則圖反。是沐時須平身。低頭平身。故心覆也。又叔武將沐。聞君至。喜捉髮走出。前驅射而殺之。是沐時須解髮。髮已解而迎客。故捉以出也。

周沐髮洗面盥手去垢之法。惟恃米汁至漢猶然。

左傳哀十四年。陳氏方沐。使疾而道之。潘沐。備酒肉焉。注潘米汁。可以沐頭。又內則云。沐稷而醕梁。注沐髮用稷汁。取其滑也。醕洗面。洗面用梁汁。取其潔也。蓋古時髮之上覆以緹。緹之上加以冠。不勤沐。則髮垢膩。垢膩多則蟻蝨生矣。滑則去垢易也。又史記外戚傳。丐沐沐我。請食飯我。乃去。注沐米潘也。是漢仍以米汁沐也。

古櫛髮盥沐醕面次數

內則子事父母。鷄初鳴。咸盥漱。櫛縱筭。總拂髦。然則每日晨起。須理髮一次也。又內則云。日五盥。盥者以手沃水取淨也。手操作多。則生垢易。故日五盥手。又云。三日具沐。其間面垢。燂溫也潘。請醕。蓋髮沐而乾。乾而櫛。須時甚久。故不能日日爲。須隔三日。至面垢。則隨時可洗。釋經義。或日一爲之。其間者。言三日之間也。

晉時澡豆

世說王敦初尙主。如廁還。婢擎金澡盤盛水。琉璃盃盛澡豆。因倒箸水中而飲之。謂是乾飯。羣婢莫不掩

口而笑。

唐宋人用澡豆者仍少

酉陽雜俎貶誤云。予門吏陸暢娶童溪女。羣婢捧匳。以銀奩盛澡豆。陸不識。輒沃水服之。其友生問君爲貴門女婿。幾多樂事。陸云。貴門禮法。甚有苦者。日俾予食辣麵。殆不可過。又漁隱叢話。王荊公面黑。夫人爲置澡豆。公曰。天生黑於予。澡豆其如予何。以是證唐宋人沐浴。不盡用澡豆。尙與今異也。

古沐後晞髮狀況

莊子。孔子見老聃。老聃新沐。被髮而乾。俟。慤然似非人。蓋古人髮多而長。被髮下垂。形狀詭怪。故曰非人。又淮南子。今沐者墮髮。而猶爲之不止。以所去少。所利者多。

晉唐晞髮狀況

世說。謝萬造王恬。坐少時。王便入門內。謝以爲厚待己。良久乃沐。頭散髮而出。亦不坐。仍據胡牀。在中庭。曬頭。神氣傲邁。了無酬對意。唐杜甫詩云。當風晞白髮。是亦沐後。欲髮得風易燥也。

周櫛髮器

內則。櫛用櫛。注曰。櫛。注梳。理木也。髮晞用象櫛。注。沐髮爲除垢膩。故用澀木以爲梳也。晞燥也。沐已乾。則髮澀。故用象梳以取滑也。

漢唐理髮用梳

說文梳理髮也。釋名梳言其齒疏也。長楊賦頭蓬不暇梳。唐書吳兢傳朝有諷諫猶髮之有梳。

若周時越人則剪髮不冠

韓詩外傳越王勾踐使稽廉獻民於荆王。荆王使者曰越夷狄之國請欺其使者。荆王曰勾踐賢人也其使者必賢。子慎之。使者出見稽廉曰冠則得以俗見不冠不得見。稽廉曰夫越亦周室之列封也。處江海之陵與鮪鱣魚鼈爲伍。文身剪髮而后處焉。今來至上國必曰冠得以俗見不冠不得見。如此則上國使適越亦將刺墨文身剪髮而后得以俗見乎。荆王聞披衣出謝。

周以來重鬚狀況

左傳昭七年楚子享公於新臺使長鬣者相。是以長鬣爲美。故使相。君行禮又昭十七年吳公子先謀藉取餘皇。名船衆許之使長鬣者三人伏於舟側詐爲楚人尤足證楚人長鬣之多。

周時以無鬚爲恥

孔叢子子思適齊齊君之嬖臣美鬚眉立乎側齊君指之而笑且言曰假貌可相易寡人不惜此之鬚眉於先生也。子思曰非所願也。人之賢聖在德不在貌。吾性無鬚眉天下侯王不以此損其敬。彼患德之不昭美也不病毛髮之不茂也。此可證子思無鬚。齊王以爲可恥故欲以其嬖臣之鬚移於子思則當時之



風。尚。可。想。矣。

### 漢仍以鬚多爲美

後漢書光武紀是美鬚眉者耶。又東平王傳爲人美。須頤。要帶十圍。趙壹傳美鬚豪眉。蜀志關羽傳猶未及髯之絕倫也。羽美須頤故云。又史記張良傳贊觀其像乃如婦人女子。是子房無鬚故太史公譏之也。

### 六朝人之保護鬚法

南史劉文仲嘗獻齊高帝纒須繩一枚。世說陸雲詣張華。華爲人多姿制。又好帛纏鬚。雲見大笑不已。夫以繩纏以帛纏者。恐鬚或著汗而點塵土也。又後漢溫序傳。序受劍銜鬚於口。顧左右曰。旣爲賊所迫殺。忽令鬚汙土。是將死而仍護鬚也。

### 六朝時面脂

世說江淮以北。謂面脂爲面澤。按面爲風日所吹曝。塗以脂則光澤。

### 漢以來口脂

釋名唇脂以丹作之。象唇赤也。正字通燕脂以紅藍花汁凝脂爲之。燕國所出。後人用爲口脂。

### 漢初男子傅粉

史記佞倖傳。孝惠時郎侍中皆冠駿驥。貝帶。傅脂粉。

周以來婦女首飾狀況 周婦人不冠

內則婦事舅姑。鷄初鳴。咸盥漱。櫛。縱。笄。總。按釋名。總。束髮也。總而束之也。詩齊風。總角。卯兮。注。總。束其髮。以爲兩角。又儀禮喪服。總六升。注。首飾象冠。縱。注。云。韜髮者也。蓋婦每日晨起理髮。既韜之以縱。更以笄也。總。約其髮。使整齊也。與男無異也。所異者男冠。女則否耳。內則婦事舅姑禮節。與子事父母同。惟男冠綬纓。婦則否。故知周婦不冠。

周婦笄衡頭上飾以玉

詩衛風。君子偕老。副笄六珈。傳。副者首飾。編髮爲之。笄。衡。笄也。垂於副之兩旁。珈。笄飾之最盛者。所以別尊卑。既笄而加飾。如今步搖上飾。孔氏曰。珈。加也。王后之衡。笄皆以玉爲之。垂於副之兩旁。當耳。其下以紃繫。瑱。由副既笄而加此飾。故謂之珈。據此。見周時婦人。雖王后祭祀亦不冠。祇以笄。衡於副之兩旁。繫之以玉。垂於耳際。以爲瑱。此女最盛禮服之狀況也。

周時以髮黑爲美

詩衛風云。鬢髮如雲。傳。黑髮也。又左傳昭二十八年。有仍氏生女。髮黑而甚美。注。服虔云。髮美爲鬢。是古以髮多而黑者爲美觀。

古又以斂髮爲莊重

曲禮。斂髮毋髻。注。毋垂餘如髻。詩經。注。髮益髮也。言取他人之髮。以益己之髮。卽假髮也。垂餘則有假髮。

之嫌不莊雅故禮以爲戒。

### 然周初貴婦人已有假髮

禮少牢饋食禮主婦被楊注被楊讀爲淺髮古者或剔賤者刑者之髮以被婦人之紒同結爲飾故名髻髻焉是周初貴婦人已以假髮爲飾曲禮之言不必拘也。

### 至春秋婦人假髮盛行

詩衛風鬢髮如雲不屑鬢也言己髮甚美不屑以假髮爲飾又哀十七年初公自城上見己氏之妻髮美使髡之以爲呂姜鬢音剃注鬢髮也假髮也是竟以暴力剔賤者之髮而益其妻髮其重視假髮爲何如哉。

### 古以油沐髮使光澤

詩衛風自伯之東首如飛蓬豈無膏沐誰適爲容按膏者油也以油塗髮髮卽光澤至今猶然。

### 春秋貴婦人時髻樣

詩小雅彼君子女卷髮如蠶又匪伊卷之髮則有旃通俗云蠶蠟也箋蠶尾上翹婦髮卷起如蠶尾也旃箋云揚也蓋髻樣卷起如旃之揚空生動飛舞也茲二語寫當時婦髮結束狀況可謂神妙入微而髮則有旃四字能意會不可言傳尤奇絕爲後人百思所不到經文之可貴如此。

### 古婦人理髮器

詩。衛風。玉之瑱也。象之揅也。箋。揅所以摘髮也。卽今之梳也。有齒以象牙爲之。取其潔而滑。然此祇貴婦人能辦。若庶人則以木爲梳。所謂櫛櫛也。

周時妾不得笄

國語。司馬子期欲以其妾爲內子。訪之左史倚相曰。吾有妾而愿欲笄之。其可乎。按笄者簪也。士昏禮。女子許嫁。笄而醴之。又內則。十有五年而笄。女之有笄禮。猶男之有冠禮。妾賤故終身不得笄。笄則可衡。於首。繫六珈以爲飾。服最貴之首服矣。司馬子期以其非禮。故訪於左史倚相。古人之不敢放肆如此。

漢婦首上步搖

詩。副笄六珈傳。云。旣笄而加飾。如今步搖上飾。錢氏曰。今人步搖加飾以珠飾之。小者六多者倍蓰至三十六。疏云。步搖副之遺象。又周禮天官追師鄭注。副以覆首。若今步釵釋文。釵本作搖。據是則漢之步搖周副之遺也。

漢步搖狀況

前漢江充傳。冠禪纓步搖。注云。冠禪纓。故行步則搖。由是證之。步搖女飾。以行步顫動爲美。故以爲名也。

漢假髻

宋書禮制。皇后謁廟。首飾假髻步搖。八雀九華。假髻者卽詩所謂髢也。

漢婦人畫眉

漢書張敞傳。又爲婦畫眉。長安中傳張京兆眉嫵。蘇林云。嫵媚也。媚也。按詩云。螓首蛾眉。眉與目自周以來。爲婦容所最重。眉欲其細而長。或廣而短。疏而薄。則以黛畫之。令其濃翠。轉長以增嫵媚。遠望之與真無異。觀蛾眉之語。殆自周時已畫眉。不然無由與蛾類也。而至今未已。以些微之事。傳之數千年。可謂久矣。

周婦人以粉黛爲飾

韓非子。故善毛嬙西施之美。無益吾面。用脂澤粉黛。則倍其初。

漢美人傅粉狀況

廣川王傳。延畫工畫舍望卿。王姬名袒裼傅粉其旁。傅者塗也。塗粉於面及項也。凡美人晨起梳洗妝飾。須灑去長衣。方動作靈敏。故袒裼也。

晉婦人仍重假髮

世說陶公也。侃也少有大志。家酷貧。同郡范逵舉孝廉。投侃宿。時冰雪積日。室如懸磬。母湛氏曰。汝第出外留客。滿頭髮。委地下爲二髻。賣得數斛米。斫諸柱割半爲薪。剉諸薦以爲馬草。逵感其意。到洛稱薦。終得其力。

後齊時婦人至貴假髮賤真髮髻狀如飛鳥

集異記後齊時婦人皆剪剔以著假髻而危邪之狀如飛鳥至於南面則髻心正西始自宮內被於四遠蓋不剪剔真髮則假髮礙於安放飛鳥之狀殊不易得也

春秋時美人頰頰眉目口齒姿態

詩衛風碩人其頰頰如螭螭齒如瓠犀螭首蛾眉巧笑倩兮美目盼兮此詩狀美人首上之姿態可謂千古絕調矣螭螭者爾雅注木中虫白而長故詩人以比婦人之頸犀堅也前漢馮奉世傳器不犀利言堅利也瓠犀者言美人齒如瓠子之潔白而堅利也螭首者傳云螭類廣而方蛾眉者前漢楊雄傳何必颺桑之蛾眉師古云影若蠶蛾眉也倩者明媚盼者分明言目黑白分明也讀此詩千載下如睹其貌如面其人矣

戰國美人眉目朱唇姿態

宋玉神女賦眸子爛其精朗兮瞭多美而可觀眉聯娟以蛾揚兮朱唇的其若丹

東漢時美人首部時妝姿態

集異記漢桓帝元嘉中京都婦女作愁眉啼妝墮馬髻折腰步顰齒笑愁眉者細而曲折啼妝者薄拭目下若啼痕墮馬髻者作一邊折腰步者足不在體下顰齒笑者若齒痛樂不欣欣始自大將軍梁冀家所

爲京師翕然諸夏皆放。

唐時美人粉黛之重致印眉痕

北里志顏令賓傳令賓卒諸客挽詞頗多其一章云昨日尋仙子轎車忽在門人生須到此天道竟難論客至皆連袂誰來爲鼓盆不堪襟袖上猶印舊眉痕又妝樓記徐州張尙書建封也諸妓多涉獵書史人有借其書者往往粉指痕印於青編夫以黛畫眉而痕能印於襟上雖今日演劇之女裝其濃無以過之而指尖塗粉則今日之所無想見古美人塗抹濃重狀態駭人也

自周以來婦女穿耳

莊子爲天子侍御不剪爪不穿耳又吳志諸葛恪傳注母之於女恩愛至矣穿耳附珠何傷於仁夫曰不穿耳可見普通穿耳者多耳有孔可綴物故可附珠





## 卷五

行唐尙秉和著

### 身部

三代以來衣服狀況。殷尙白衣。禮王制。殷人罍而祭。縞衣而養老。傳。殷尙白。而縞衣裳。按詩。縞衣綦巾。傳。縞衣白色。是殷時以白色爲極重。故以養老也。

#### 周時單衣

禮玉藻。禪爲綱。注。有衣裳而無裏曰禪。按說文。禪。衣不重也。卽今所謂單衣也。詩曰。衣錦尙綱。言錦外覆以單衣。卽今所謂袍罩也。

#### 周時夾衣

按急就篇。衣裳施裏曰袷。玉篇。袷。衣無絮也。韻會。袷。夾衣也。詩。衛風。綠衣黃裏。既有裏。則袷同衣矣。又禮以帛裏布。非袷也。尤周御夾衣之明證。

#### 周時綿衣

左傳宣十三年申公巫臣曰師人多寒王巡三軍拊而勉之三軍之士皆如挾纊注纊綿也古時無棉皆以蠶絲爲絮挾纊者言於夾衣之中絮以蠶絲輕而暖故巫臣取以爲喻然此祇富人能爲之一般軍民蓋不能也

周時裘服之雜等級之分

中論救寒莫如重裘周禮天官司裘掌爲大裘以供王祀天之服詩小雅彼都人士狐裘黃黃爾風取彼狐狸爲公子裘玉藻君衣狐白裘戰國策千金之裘非一狐之腋是最貴者狐白裘也故云士不衣狐白玉藻云君之右虎裘厥左狐裘君子狐青裘羔裘是士大夫次貴之裘也詩小雅舟人之子熊羆是裘玉藻云犬羊之裘不文飾也是最次之裘庶人所服也

周時裘服毛外向

禮玉藻大裘不裼裼者袒而有衣大裘以黑羊皮爲之雖祇天子服以祭天然黑黯無文采故無庸裼以增美是可證文外向也詩曰狐裘黃黃蓋狐皮惟腋純百餘黃色者多惟毛外向故視之有黃黃之色論語羔裘玄冠不以弔弔主哀不以美爲敬羔裘鮮潔華美炫人瞻視故於弔不宜又周時以裘分等級毛若不外向級何由分哉

惟裘毛外向故服有裼襲之分

禮玉藻。君衣狐白裘。錦衣以裼之。君子狐青裘。玄縮衣以裼之。麕裘褕衣以裼之。羔裘緇衣以裼之。狐裘黃衣以裼之。裘之裼也。見美也。注云。裘上加裼衣。裼衣雖加他服。猶開露裼衣。見裼衣之美。以爲敬也。又云。袒而有衣曰裼。示威猛之衛也。蓋裘美矣。更稱裘之色。加以裼。裨飄揚飛舞。以助其美。其制今劇場猶有之。披於肩上而無袖。但於領處結項以爲固。披拂威風。裏衣盡露。故注曰袒而有衣。又曰猶開露也。是於裘之外。裼以助裘美也。吉服也。

襲者玉篇云。重衣也。禮玉藻。服之襲也。充美也。注充。覆也。充美者。掩塞其美也。又玉藻云。弔則襲。不盡飾也。是襲者即今之衣罩。清時弔喪。以石青罩褂罩於外。使內美不著。是其遺制也。

又檀弓。曾子襲裘而弔。子游裼裘而弔。曾子指子游而示人曰。夫夫也。爲習於禮者。如之何其裼裘而弔也。主人旣小斂。袒括髮。已威子游趨而出。襲裘帶經。今率而入。曾子曰。我過矣。我過矣。夫夫是也。注主人始喪。未變服之前。弔者吉服。故裼裘。及主人變服後。弔者雖著朝服而加武以經。故襲裘。是衣裘者當弔。則以襲掩覆其裘之美。使不著也。

### 周時暑衣狀況

詩周南。爲絺爲綌。注。精曰絺。麤曰綌。疏。煮葛爲之。蓋古時皆以麻布爲尋常衣品。夏日禦暑。則以葛。葛布較麻布尤爽健也。若今日則棉布盛行。至夏日則以麻衣禦暑。而兼用葛。麻布較棉布亦清爽。故今日冬

春無衣麻者。又周禮天官內司服。綠衣素紗。注素紗者。今之白縛也。漢時俗名。今不知其義。按玉篇。紗。縠也。縠。紗曰縠。紡絲而成之。又宋玉神女賦。動霧縠以輕步。是周時禦暑之衣。葛縠織品有絺。絺。絲織品有紗。縠已大備也。

周時大禮服狀況 國君禮服

按玉藻云。玄端而朝。日於東門之外。周禮春官。其齋服有玄端素端。縠梁僖三年。桓公委端。摺笏而朝。諸侯。注端玄端之服。疏其色玄而制正幅。無殺。故謂之玄端。

卿大夫禮服

左傳昭元年。劉子曰。吾與子弁冕端委以治民。又昭六年。晏平仲端委立於虎門之外。服虔云。禮衣端正無殺。文德之衣。尙褻長。故曰委。

大禮服形狀如帷

由上攷之。是君臣大禮服。皆曰端委。服虔所謂端正無殺者。按論語云。非帷裳。必殺之。注殺者。削也。剪也。帷裳。禮服以正幅製。不剪縫。端正若帷。蓋禮服既以整幅製。則上下寬狹如一。不能如深衣下畔之寬倍上畔也。

周深衣狀況

深衣者。疏衣裳相連。被體深邃。故謂之深衣。經云。古者深衣。蓋有制度。以應規矩準繩權衡。蓋大禮服之外。卿士大夫最重要之服也。

### 深衣去地高度

深衣云。短毋見體。長毋被土。蓋周時下體之衣未備。衣太短則下體露矣。太長則拖地。觀漢時朱博令掾史衣去地三寸。則周時衣去地至多不過寸耳。

### 深衣袖口尺寸

禮玉藻云。袂尺二寸。注。袂。袂口也。又鄭風摯執子之袂兮。疏。袂是袂之本。袂是袂之末。玉篇云。袂。袖也。袂末者。袖口也。寬尺二寸。圍之則二尺四寸也。

### 深衣腰深尺寸

玉藻云。深衣三袂。注。三袂者。謂要中之數也。袂尺二寸。圍之爲二尺四寸。三之七尺二寸。古腰同要深之度也。

### 深衣下擺尺寸

玉藻縫齊倍要。注。齊者。裳下畔。下今名要者。裳上畔。其廣度卽上文所云深衣三袂七尺二寸也。倍之則一丈四尺四寸。又深衣云。要縫半下。注。裳下畔一丈四尺四寸。是古衣下擺之寬度也。惟今之所謂腰深下

擺祇度其半。此則其全度也。

### 深衣袖長尺寸

深衣云。袂之長短。反詘之及肘。注。衣幅自肩下垂。及肘而盡。接之以袂。長二尺二寸。自肘至腕。長一尺一寸。而袖長二尺二寸。爲自腕以下。袂尙餘一尺一寸也。故回詘之。袂可及肘也。

按今日度袖長。自領起至袂末。共尺寸若干。古則命肘以下者爲袖。肘以上仍謂之衣。所以然者。古衣當腋處最肥。望之仍與上衣爲一。於自肘以上。不謂爲袖。若今衣則當腋處。衣與袖分。故度之起不同也。

### 深衣抬肩寬窄尺寸

禮玉藻云。袂可以回肘。深衣云。袂各音之高下。可以運肘。注。袂衣袂當腋之縫也。即今拾肩運肘者。袂當腋處。使稍寬。可以回轉其肘。按身體或須抑騷。必肘能回轉入內。然後如意。古人袂口。旣一尺二寸。以今例。古則常腋處必二尺。始可回肘。然無明文。不能臆斷。

### 古袖下餘衣尺寸

禮玉藻。袂可以回肘。長中繼揜尺。注。長衣中衣。繼袂之末。揜餘一尺。疏言袂下尙餘衣一尺也。

### 深衣前後幅交接處皆在旁

玉藻。衽當旁。注。衽裳幅所交接處也。又深衣。續衽鉤邊。注。衽在裳旁者也。鉤邊若今曲裾也。言漢時疏。深衣

裳一旁則連之相著。一旁則有曲裾掩之。與相連無異。鄭以後漢之時。裳有曲裾。故以續紆鉤邊。似漢時曲裾。是古人前後裳之連結。皆在兩旁。而連接處。又有鉤邊。以爲掩護。使若相連。至爲美觀也。

### 周時衣方領其高二寸

玉藻。袷二寸。注。曲領也。又深衣。曲袷如矩以應方。注。袷交領也。古者方領。如今漢時小兒衣領。疏。漢時領皆向下交垂。故鄭云古者方領。似今唐時擁咽。今俗名故云若今小兒衣領。但方折之也。是周時衣領其高二寸。形方。故云如矩。如矩則曲矣。

### 周蔽膝狀況

說文。韠。蔽膝也。所以蔽前。以韠。禮玉藻。韠下廣二尺。上廣一尺。長三尺。其頸五寸。是蔽膝之廣狹。於裳之上。下畔數倍也。蔽膝尺寸。

### 蔽膝異名

詩小雅。采芣箋。芣。太古蔽膝之象。冕服謂之芣。其他服謂之韠。疏云。韠同芣。俱是蔽膝之象。是蔽膝因事而異名。實則一也。

### 蔽膝顏色以貴賤而分

禮玉藻。韠君朱。大夫素。士爵韠。註。爵韠者。爵色之韠也。又詩檜風。庶見素韠兮。又說文。一命緹韠。再命赤

韓又玉藻一命緼紱幽衡再命赤紱幽衡三命赤紱蔥衡注緼赤黃之間色所謂緼也衡者佩玉之衡按詩小雅緼裼有視傳緼裼者茅蒐染草也其色蓋亦赤黃佩玉之衡者按周禮冬官玉人大璋中璋九寸邊璋七寸衡四寸注衡勺柄龍頭也蓋以衡繫玉佩之使不墜也是蔽膝以朱色爲最貴赤與素次之蘊又次之爵色之韋爲最次也

古衣不定身長尺寸之故

凡經傳所記衣裳尺寸皆有廣狹而無長度蓋以人身高矮不同人人各異故不能預定也

周時束帶高下之度

禮深衣帶下毋厭髀骨上毋厭脅骨當無骨者按漢書杜鄴傳注厭壓也髀脅皆有骨帶壓於骨則不固且不適故戒之

周帶之顏色等級及緣飾等級

禮玉藻天子素帶朱裏終辟諸侯素帶終辟大夫素帶辟垂士練帶率律音下辟居士錦帶弟子綳帶注辟緣也終竟也天子終此帶盡緣之也辟垂者言帶之下垂者緣飾之由紐及末盤束于腰者爲盤則否也下辟者緼緣飾帶末卽紳也

周帶結束眞象



禮玉藻弟子縞帶並紐約用組三寸長齊於帶注紐謂帶之交結之處約者以物穿紐約結其帶也三寸者組之廣也蓋古者帶不自結自結則兩端或參差不美觀而紐有定處外用組約之以爲固而組之長復與帶齊故又曰紳繹結三齊也又列子管夷吾射中小白帶鉤孟子豈謂一鉤金注帶鉤也是春秋時又以鉤爲帶結也

### 周垂紳尺寸

論語子張書諸紳疏以帶束腰垂其餘以爲飾謂之紳玉藻云紳長制士三尺有司二尺有五寸

### 紳下垂過裳

玉藻凡侍於君紳垂足如履齊蓋侍君以罄折爲敬紳下垂及足則出裳之下畔矣

### 周時觀衣裳緣飾卽知父母存否

士冠禮服纁裳純衣注純衣緣衣也曲禮父母存冠衣不純素注純緣也又深衣具父母大父母言俱在純以纁具父母衣純以青如孤子衣純以素是無論父母在否衣皆有緣飾特以色爲別望卽知之

### 古庶人布衣

史記田單傳王蠋布衣也義不北面於燕況在位食祿者乎又蘭相如傳臣以爲布衣之士尙不相欺按古所謂布麻布也純爲庶人服不染後世謂之白衣亦謂之褐

春秋時紫色衣最貴僭服則殺身

左傳哀十六年良夫紫衣狐裘至袒裘不釋劍而食太子使人數以三罪而殺之杜注紫衣君服按論語惡紫之奪朱也可見紫非正色杜所謂君服者必春秋之時尙非周制也

春秋六國時惟儒服寬大守周制

禮儒行魯哀公問於孔子曰夫子之服其儒服與孔子曰某少居魯衣逢掖之衣注逢大也肘腋之所特寬大也又孔叢子子高衣長裾振袂袖見平原君平原君曰子亦儒服乎蓋時代久則服式改獨儒者仍守周舊制寬博異衆故咸異之是儒服之寬博特異於衆也

周以灰水洗衣

禮內則冠帶垢和灰請漱衣裳垢和灰請澣又禮深衣完且弗費注鍛濯灰治疏鍛濯謂打洗用灰治理使和熟也按以灰水洗衣今鄉民猶然蓋以灰水風滑去垢而不知仍周遺法也

周時雖不忌白衣然事若可哀則白衣而不采衣

曲禮大夫去國踰境爲壇位嚮國而哭素衣素裳素冠徹緣又史記荊卿傳太子及賓客知其事者皆白衣冠以送之是凡凶事皆衣白也

周時內衣

深衣之內必有裏衣。近身取煖。無古今一也。禮內則衣不帛褊袴。急就篇注。短而施要。腰曰褊。說文短衣也。釋名褊。裏也。言溫裏也。又單褊如褊無絮也。據是則褊純爲裏衣。裏衣不外露。故不帛。此上身之裏衣也。

袴者急就篇注。脛衣也。釋名。跨兩股各跨別也。蓋上身長有深衣。短有褊。既足取煖。而兩股無所衛。深衣雖長。仍不能禦下體之風寒。故著袴以衛兩脛。脛以上至膝卽無矣。故別者不著袴。韓非子。齊有狗盜之子。與別危子戲而相誇。盜子曰。吾父裘有尾。危子曰。吾父冬不失袴。注。別足者不衣袴。雖終其冬夏無所損失。按古脛以上無衣。故別足卽不袴。注曰。脛衣。言脛以上不衣也。其制大概如今之套袴。每股各一。不相連也。然在內不繫觀瞻。故亦不帛也。此下身之裏衣也。

### 周下體無衣故防露下體

周時下體祇有脛衣。脛以上無衣。說苑。晉平公以疾褻布堂上。召師曠。曠至而上堂。平公曰。安有履而上堂者乎。師曠解履刺足。伏刺膝。夫惟膝無衣。故伏而刺膝也。又膝以上無衣。下體易露。故時時防之。曲禮。暑毋褻裳。褻則下體露。論語常暑袷絺綌。必表而出之。蓋絺綌透明露體。表之則實而不露。又曲禮。不涉不褻。注。褻揭衣也。說文揭。高舉也。言涉水揭衣露體。不得不爾。否則忌高舉也。又墨子公孟篇。是猶裸謂。褻者不恭也。裸體全露。褻則祇露下體。故取以爲喻。若褻不露體。而以裸爲喻。則不合矣。是尤下體內衣。

不備，隱微易露之確證也。又呂覽是猶保謂高擢者之不恭，義與墨子同。又拾遺記：蘇秦張儀同志好學，遇見墳籍，行路無所題記，以墨書掌及股裏，夜還而寫之。夫惟股無衣，故不書於臂而書於股。若有衣服，如何書？又三國志：賈逵傳注：逵貧，冬常無袴，過其妻兄柳孚宿。天明著孚袴去。是漢時貧者有時不著袴，尙與周同也。

### 古振衣致敬狀況

說苑：田忌至舍，王北面正領，齊袂。按：袂者袖末也。將致敬於人，使兩袖或有參差，則不莊。故既正領，復齊兩袖，想見古人振衣鵠立情形也。

### 漢單衣紗衣夾衣

前漢江充傳：初充召見犬臺宮，衣紗縠單衣。師古曰：襜衣若今之朝服之中襜也。按：中襜者於朝服之內，著一單衣。清時謂之趁衣，卽單衫也。衣紗縠襜衣，卽紗衫，必夏日也。又史記匈奴傳：服繡袷綺衣。注：言繡表綺裏。又賈誼傳：白縠之表，薄紈之裏。夫既有表裏，則夾衣也。

### 漢絮衣

前漢文帝紀：九十以上，帛人二匹，絮三斤。師古曰：絮，綿也。按：急就篇注：漬繭擘之，精者曰綿，粗者曰絮。今則謂新者爲綿，故者曰絮。帛二匹，絮三斤，言以帛製夾衣，中置絮以禦寒，所謂挾纊也。

### 漢衣青紫最貴

漢書夏侯勝傳。經術苟明。其取青紫。如拾芥耳。又後漢耿弇傳。弇兄弟六人。並垂青紫。省侍醫藥。當代以爲榮。可證兩漢貴人。皆服青紫。故俗尙榮之。

### 漢白衣賤

漢書龔勝傳。聞之白衣。戒君勿言也。師古曰。白衣官府趨走賤人也。

### 漢士夫衣仍寬博

雋不疑傳。不疑褻衣博帶。師古曰。言著褻音岫大之衣。廣博之帶。按自周以來。儒者皆褻衣博帶。與世俗殊。故平原君見孔子高衣長裾。振褻袖。卽曰。子亦儒服乎。是儒者之服。自古寬大。故一望而知。漢仍如此也。

### 漢官吏衣長拖地

漢書朱博傳。敕功曹官屬。多褻衣大裾。不中節度。自今掾史。皆令去地三寸。師古曰。裾大袴也。夫特敕令去地三寸。則未敕之先。衣袴之拖地。可想也。又朱雲傳。有薦雲者。召入攝齋登堂。師古曰。齋衣下裳也。攝之。使離地。以防失足。又蓋寬饒傳。初拜司馬。未出殿門。斷其禪衣。令短離地。此又漢官吏衣拖地之確證也。

### 漢學者猶方領餘則圓領交而下垂

後漢馬援傳。援兄況。勃衣方領。能矩步。注。前書音義曰。頸下施衿。領正方。學者之服也。是兩漢士人皆方領也。餘則皆圓領。禮深衣。曲袷。鄭注云。古者方領。既云古方領。以見漢圓領多也。圓領者。自項後交於前。下垂。今僧道衣領。其遺象也。

漢官吏不吏服則罰

景帝紀。六年詔曰。夫吏者民之師也。車駕衣服宜稱亡度者。或不吏服。出入閭里。與民亡異。長吏二千石。朱兩轡。千石至六百石。朱左轡。車騎從者。不稱其官衣服。出入閭里。無吏體者。二千石上其官屬。三輔舉不如法令者。是官吏不吏服。則必罰也。

漢仍有蔽膝

史記武安侯傳。坐衣襜褕入宮不敬。注云。爾雅今蔽前謂之襜。郭璞云。蔽膝也。然古冕服尙有蔽膝。名是蔽膝亦禮服之一。茲云不敬。似漢時已爲燕居操作之服矣。

西漢朝服尙單衣

江充召見犬臺宮。衣紗縠禪衣。蓋寬饒拜司馬。未出殿門。斷其禪衣。俱見是皆朝天子也。而皆禪衣。按說文。禪衣不重也。禮玉藻。禪爲絢。注云。有衣而無裏曰禪。蓋西漢朝服未有定制。故見天子者多以禪衣。禪衣蓋與周深衣同也。

### 東漢朝服狀況

晉書輿服志。西漢二百餘年。未能制立。中興後明帝始採周官尙書禮記。及諸儒記說。制天子三公九卿特進之服。衣皂上絳下。前三幅後四幅。衣畫而裳繡。凡十二章。素帶廣四寸。朱裏。以朱綠裨飾其側。中衣以絳緣其領袖。赤皮爲韍。絳袴襪。亦舄。按前三幅者。古人忌胸前衣縫。當中後四幅者。又深衣所謂負繩及踝。使衣縫正當正中也。六朝皆用之。

### 漢時裏衣 單襦

揚子方言。汗襦。或謂單襦。按今則曰汗褂。夫曰汗。則爲親身內衣。可知。然至後漢則又有長襦。後漢書李忠傳注。上使忠解滌長襦是也。夫旣曰長襦。則爲外衣。與袍蓋同。

### 漢袴開檔如今日小兒

漢書上官皇后傳。帝時體不安。左右及醫。皆阿意言宜禁內。雖宮人使令。皆窮袴多其帶。服虔曰。窮袴有前後當不得交通也。可證未窮袴之時。袴檔皆開。密如今日小兒。多其帶以爲約束。則交通絕矣。雖欲施無禮不得也。由此推之。周時祇有袴以衣脛。自膝以上卽無衣。故禮戒暑月褰裳。孔子絺綌必表。誠以下體祇有外衣遮護。若高揭外衣。或外衣透明。固不便。卽漢時之開檔袴。衣服若不寬博穩重。有時亦或露不雅也。又以證周時雖欲禁內而無術也。舊說解褰裳爲不敬。不敬之事多矣。胡獨注意於此。固別含深

意也。特其故不可明言耳。

漢時之褌

玉篇：褌，褌衣。說文：褌，私處所服也。急就篇注：合褌謂之褌。釋名：褌，貫也。貫兩腳上繫腰中也。余嘗詳攷之，急就篇所言既云有褌，則犢鼻褌也。釋名所言則一直筒無褌，故貫兩腳上繫於腰，而兩股則承以袴也。皆周時所無，以下證明之。

犢鼻褌

史記司馬相如傳：相如身自著犢鼻褌。共傭保雜作。劉奉世曰：犢鼻穴在膝上，爲褌財令至膝。習俗因以爲名，非以其形似也。余按劉說非也。鼻者褌褌，急就篇所謂合褌者也。鼻之旁有兩孔，兩股穿之，短而在膝上，與當中之褌褌齊，以便動作。形正與犢鼻相似，胡言非乎？試觀今日學生運動時所著之褌，音正其制也不過古肥今瘦耳。

貫腳褌與袴不連非若今日之爲一

若釋名所謂貫兩腳上繫腰中之褌，亦有一事可證明其形象。攷魏志裴潛傳注：黃初中，韓宣爲尙書郎，嘗以職事常受罰於殿前，已束縛，杖未行，文帝輦過，問此爲誰，特原之，遂解其縛。時天大寒，宣前以當受杖，豫脫袴纏褌面縛，及其原褌腰未下，乃趨而去。按小袴若今之套褌而長，以礙於受杖，故脫之，而褌則



上繫於腰，下覆乎臀，受杖仍礙，故纏向上，使臀露可受杖，故不須脫。以是知尋常褌無襠，惟襠有爲一直筒，故能貫兩腳上繫腰中，如有襠則不能纏向上矣。惟能纏向上，故旣原宥，乃曰褌腰不下而去也。其形大概如今之褌襖，特垂下者長，不與袴連，以便私溺耳。

### 漢時袍大行

按袍之見於經者，皆爲裏衣。禮玉藻：縕爲袍。喪大記：袍必有表。注云：褻衣。在內爲褻衣，故以縕爲之。縕者敗絮也。論語衣敝縕袍是也。是袍在周時雖有其名，純爲內衣，與襦無異。至漢時則著於外。後漢李忠傳注：上使忠澣長襦，忠更作新袍小單衣以上之，則爲長袍也。故釋名云：袍，丈夫著之至跗者也。跗者，據鄭士喪禮注：足上也。袍長而至足，則爲外衣矣。釋名又云：袍者苞也。苞，內衣也。尤爲外衣之證。是袍之名與周同，實則異也。釋名爲漢人劉熙作，則當時所尙也。

### 漢禁賈人衣錦

高帝紀詔曰：賈人不得衣錦繡綺縠絺紵。按賈人惟利是視，漢初重農，故爲是苛禁以抑末。令財多無所屑之。

### 魏晉時之裙

魏志管寧傳：常著布襦袴布裙。世說：王子敬爲人書練裙。按裙卽下裳，蓋襦之下接以裙，取美觀。若袍則

連衣裳爲一矣。

魏晉時袴褶

吳志裴注。呂範釋韓著袴褶。詣闕下。按講者史記張耳傳。趙王祖韓蔽自上食。注臂捍也。以縛左右手。於事便也。褶喪大記注。袷也。又急就篇注。褶謂重衣之在最上者也。其形若袍。短身而廣袖。類篇云。袴褶戎服。夫短身而廣袖。則便於騎射。故曰騎服。晉書輿服志。弓弩隊各五十人。黑袴褶。然則範之著袴褶詣闕下。是以戎服見也。又以證其時戎服皆短身而廣袖也。其形大概如今馬褂。

晉時單衣夾衣

世說。晉孝武年十二時。不著複衣。但著單練衫五六重。是晉時天雖寒。不著綿衣。殆以綿衣不如單衣之飄揚適體。且美觀。不然以天子尙不能挾纊哉。

晉時之複幘複襦

世說。韓康伯數歲。家酷貧。大寒祇得襦。母殷夫人自成之。令康伯捉熨斗。謂康伯曰。且著襦。尋作複幘也。兒云。已足。不須複幘也。母問其故。答曰。火在熨斗中而柄熱。今旣着襦。下亦常煖。故不須幘耳。按母曰尋作複幘。知襦亦複襦也。大寒祇得複衣取煖。知當時貧家得絮衣之難。

六朝時衣服寬博

顏氏家訓。梁世士大夫。皆尙褻衣博帶。大冠高屐。出則輿馬。入則扶持。按周時祇儒者褻衣博帶。梁則士大夫無不然。此又文之過也。

### 六朝時尙白衣冠

南齊豫章文獻王傳。宋元嘉時。諸王出入。得白衣翬帽。見人主。上與嬖友想。令依元嘉。嬖固辭不奉勅。唯上幸第。乃白服烏紗帽。以待宴焉。又程大昌演繁露曰。隋志宋齊之間。天子燕私。著白高帽。太子在永福省。則白紗帽。隨時以白帽通爲慶弔之服。國子生亦服白紗巾也。晉著白接離。接離巾也。南齊桓崇祖守壽春。著白紗帽。肩輿上城。今人必以爲怪。古未有以白色爲忌也。郭林宗遇雨。墊巾。李賢注云。巾以葭爲之。本居士野人所服。魏武造帽。其中乃廢。今國子學生服焉。以白紗爲之。是其制皆不忌白也。今世人麗妝。必不肯以白紵爲衣。古今之變。不同如此。

由是證之。宋齊時燕服。必白色者多。故帝特令白服。依元嘉故事。是六朝燕居之服。尙白之證也。又觀程氏所述。宋齊天子燕居。皆著白高帽。至隋以白帽通爲慶弔之服。是六朝迄隋。士庶皆服白巾。天子燕居亦白帽之證也。至唐祇國子學生白紗。可見唐時雖不忌白。而服白帽者已少。不與隋同也。程大昌宋人曰。古今之變。不同如此。又以證伊時已忌白也。

### 唐官服顏色

隋唐嘉語舊官人所服。惟黃紫二色。貞觀中始令三品以上服紫。五品以上朱。六品七品綠。八品九品青。

隋唐士庶白衣

隋書禮儀志。隱居道素之士。被召入見者。白單衣。又李泌外傳。時號白衣宰相。又獵狐記。盧龍節度使張直方。欲令秀才張知古。同出獵。時方雪。知古有祁寒意。直方出皂袍令服之。知古乃加麻衣其上焉。按麻衣者。白衣也。皂袍爲八品官服。知古秀才不敢僭服。故加麻衣其上。又沈蕃夢遊錄。顯宦三十年。忽然夢覺。仍著白衣。亦其證也。

唐皂袍短後

獵狐記。知古脫麻衣。露皂袍短後。保姆曰。豈有逢掖之士。而服短後之衣乎。蓋袍之短後。原以便騎射。武士所服。故姆訝之也。

唐宋以袍爲朝服

唐書天子袍衫。皆用赤黃。朝野雜記。大臣奪情者。服慘紫袍。歸田錄。陶穀爲學士。常晚召對便殿。穀望見上將前而卻者再。太祖笑曰。此措大索事。顧左右取袍帶來。上已束帶。穀遽趨入。是君臣皆以袍爲朝會之禮服也。

漢庶人以索韋爲帶

後漢張霸傳玄子霸自田廬被褐帶索。要說張溫。又周盤傳。乃解韋帶。就學廉之舉。是士人常以索爲帶。又以韋爲帶也。索者麻繩。韋者熟皮。然此自庶人無常之服。若士夫以上之帶。自周以來。皆以帛爲之。以迄六朝。皆寬四寸朱裏。故有錦帶。繡帶。縞帶。諸名。至唐而以堅韌之物爲帶。

### 唐宋有犀帶玉帶金帶

撫言。裴晉公質小眇小。有相者云。觀公形神。不大貴則當餓死。一日遊香山寺。見一婦人。致一緹縹於僧伽蘭楯上。祈祝良久。擲筊而去。少頃見緹縹在故處。知其遺忘。度追已不及。乃守至暮不至。次晨仍至其處俟之。俄見前婦人來。公問卽與之。蓋有玉帶二。犀帶一。假於人。遣要津以救父。欲以一遺公。不顧而去。後見相者曰。公必有陰德及物。前程未可量。又五燈會元。東坡留玉帶鎮山門。老學菴筆記。靖康末。括金賂虜。詔羣臣服金帶者。權以通犀帶易之。按犀帶者。以犀角製爲板。玉帶者。上嵌以玉。金帶者。鏤金爲之。陸游云。執政正透。從官倒透。皆牆而堅韌。其約束皆在背後。而前不垂紳。今戲劇所服者。是也。

### 宋時猶以不束帶爲不敬

歸田錄。陶穀夜召見。却望不前者。再。太宗笑曰。此措大索事。願左右取袍帶來。上已束帶。穀遽趨入。是君不束帶。則失見大臣之禮。故不敢進。老學菴筆記云。散腰則謂之不敬。蓋古人於袍之外。不再加衣。而袍又寬博。散腰則衣襟汗漫矣。故曰不敬也。

宋時裹肚今云兜兜

老學菴筆記。裹肚則紫地皂繡。按襦袴不帛。以其爲褻衣也。裹肚則愈褻矣。施之以繡。殆非古也。

宋時背心

老學菴筆記云。往時執政籤判文書。衣盤領紫背子。又云。冷則著背心。背子背心蓋一物。今俗所謂坎肩是也。盤領者卽圓領也。

周以來服劍狀況

禮玉藻必佩劍。又少儀云。君子之衣服。服劍弗賈。同又左傳哀十六年。良夫袒裘不釋劍而食。是貴者皆服劍也。史記孟嘗君傳。馮先生甚貧。猶有一劍耳。又蒯縵。裴駰曰。蒯茅類。可爲繩。縵劍把。蒯縵者言其劍無物可裝飾。但以蒯縵纏其把也。是貧賤者亦服劍也。蓋古人尙武。必佩劍以防身。亦所以壯其威儀。故貴賤皆服之。

古佩劍在左

禮少儀執君之乘車則坐。僕者右帶劍。按古人立乘。僕居中。君居左。右佩劍。則無妨於君。然由此可證佩劍者之皆左。左佩所以便右手拔劍也。

春秋時佩劍爲必須之禮飾

新序季札西聘晉，帶寶劍以過徐君。徐君不言而色欲之。季札爲有上國之使，未獻也，使歸。徐君已死，乃以劍帶徐君墓樹而去。夫以使上國未獻，可知劍在當時爲威儀所必須，與衣裳而並重矣。

#### 漢人仍帶劍成俗

史記蕭相國世家：乃令蕭何賜帶劍履上殿，入朝不趨。又史記補傳：魏相好武，令諸吏帶劍前奏事，或有不帶劍者，至，借劍而後敢入。又蕭望之傳：當見者露索去刀兵，雋不疑傳：門下欲使解劍，又龔遂傳：民有帶劍者。又後漢趙喜傳：自王莽篡亂，舊章不存，皇太子與東海王等，雜止同席，憲章無序，喜乃正色橫劍殿階，扶下諸王，以明尊卑。是漢四百年，無論官吏庶民，皆佩劍也。

#### 晉佩木劍

晉書輿服志：漢制自天子至百官，無不佩劍。其後惟朝帶劍。晉世始代之以木。六朝因之，則純爲裝飾品矣。於是古人帶劍之風，從此遂絕。

#### 周以來摺笏狀況

禮玉藻：凡有指畫於君前，用笏。造也。往受命於君前，則書於笏。又將適公所宿齋，戒居外寢，沐浴，史進象笏，書思對命，是笏有二用。一則受君命備遺忘，暫書於笏；一則將入朝有所敷奏，亦書於笏，備臨時遺漏也。釋名云：笏，忽也，備忽忘也。

周時子事父母亦搢笏

禮內則子事父母。鷄初鳴。冠纓綏端。搢紳搢笏。搢者插也。插於腰帶。備受親命。過時遺忘。立書於笏。

周笏等級以質爲差

禮玉藻。笏天子以珠玉。諸侯以象。大夫以魚須文竹。士竹。本象可也。竹本象者。言以象牙飾竹也。

周笏尺寸

禮玉藻。笏度二尺有六寸。其中博三寸。其殺六分而去一。然今所傳之古笏。大概宋明物爲多。實微作弧形。以便搢而不墜。禮但言其尺寸。不知周制果如何也。疑亦微弧

漢晉名手版謁長官用之

後漢范滂傳。滂執公儀詣陳蕃。蕃不止之。滂懷恨投版。棄官而去。注版。笏也。又風俗通。陳蕃上冢。令劉子與會其家上。蕃持版迎之。長跪。令徐下車坐。不令去版。辭意又不謙讓。蕃深忿之。又吳志凌統傳。統將精兵萬餘人。過本縣。步入寺門。見長吏懷三版。恭敬盡禮。是皆以長官禮待本縣吏。故執版。

漢時謁官持版不許垂臂入門

三國志趙岐傳注。常侍唐衡弟爲京兆虎牙都尉。初之官。不修敬於京兆尹。入門不持版。郡功曹趙息呵廊下曰。虎牙儀如屬城。何得放臂入府門。促收其主簿。衡弟顧促取版。按不持版。則垂臂。故曰放臂入府。



門若持版入門，則以兩手奉版，鼻間偃僂，鞠躬狀至恭謹。卽范滂傳所謂執公儀也。滂嫌陳蕃不辭公儀，示優禮，故恚而去官。

### 晉時笏頭有筆

晉書輿服志：笏，古者貴賤皆執笏。有事則搢之於腰帶，所謂搢紳之士者，搢笏而垂紳帶也。紳垂長三尺，笏者有事則書之，故常簪筆。今之白筆，是其遺象。又手版卽古笏矣。尙書令僕射尙書手版頭，復有白筆，以素皮裹之。按簪筆者，以筆簪於頭也。至晉，不簪筆，安筆於笏頭，以便記事，惟名曰白筆，則不得其義也。六朝皆如此。

### 三國及晉時又名笏曰簿

蜀志秦宓見太守，以簿擊頰，注簿手版也。版故能擊，則爲笏明矣。又左傳桓二年：「衰冕黻珽。」杜預注：「珽，玉笏也。」若今吏之持簿，是晉初亦謂笏爲簿也。

### 晉時參謁長官仍以執笏爲公儀

世說：趙王倫爲相國，羊忱爲長吏，乃版以參相國。又桓溫止新亭，大陳兵衛，王入失厝，倒執手版，是晉時謁長官公儀，仍與漢同也。

### 唐時在家庭仍搢笏

韓愈曹成王碑出則囚服就辯入則擁笏垂魚坦坦施施是處家亦笏與周時同

五代時執笏有筆無筆之分

輿服雜事五代以來惟八座尙書執笏以筆綴手版頭紫囊裹之其餘王公卿士但執手版主於敬不執筆示非記事官也按此與六朝制正同惟裏筆用紫囊不用皮較六朝稍進然仍無今日之銅冒又王公貴人版而不筆唐以前亦未聞有此區別

宋外官亦執笏

宋史孔道輔傳爲泉州軍事推官有蛇出天慶觀眞武殿中一郡以爲神州將率官屬往奠拜之欲上其事道輔逕前以笏擊蛇碎其首觀者初驚後莫不嘆服是不惟參謁持笏尋常出入亦笏也

明笏之等差

正字通明制笏四品以上用象牙五品以下用木以粉飾之歸有光項脊軒記云頃之持一象笏至此吾祖太常公宣德間執此以朝他日汝當用之按明太常寺卿正四品故用象笏然自元明以來似祇官吏用笏尋常已不執亦猶晉時佩木劍祇入朝佩之以爲禮飾餘則否也至清雖入朝亦不用矣然參謁長官仍云執版其實遞紅紙手本耳非古手版也

周以來之重長爪

韓非子韓昭侯握爪而佯亡其一爪求之甚急左右或割其爪而效之昭侯以此察左右之臣不忠據此是侯之左右皆長爪也不惟昭侯昭侯如此則其國之風尙可想矣又莊子爲天子侍御不剪爪是亦以爪長爲貴也

### 漢末仍重長爪

神仙傳漢末仙人王方平降東海蔡經家俄麻姑亦至其爪甚長經私念以麻姑爪搔背癢良佳而方平已知大怒命跪於庭數而笞之夫蔡經爲仙人弟子乃猶羨長爪而至於受笞其重爲何如

### 周以來婦女衣服狀況

詩鄭風縞衣綦巾傳縞衣白色綦巾蒼艾色是庶女所服也然則周庶民婦女盡白衣也又衛風衣錦褰衣裳錦褰裳箋云褰褻也中衣錦爲其文之太著上加褻縠庶人之嫁服也然則庶民女嫁時亦可衣錦但須加以縠耳則周時婦女社會之服色可推想而可知

### 周女衣表裏之色

詩邶風綠兮衣兮綠衣黃裏綠兮衣兮綠衣黃裳傳美莊姜也是周時貴婦人衣綠色裳黃色而衣之裏亦黃也與庶女異矣

### 周士人妻服色

士儀禮女次紵衣纁繡。注次首飾也。紵衣絲衣。繡緣也。纁玄色。士較庶人爲貴。故其妻可衣絲衣。且可以玄色緣飾其四周。而中仍縞色。不能如貴婦之衣黃綠衣也。

古婦人尙長袖

宋玉神女賦。奮長袖以正衽兮。立躑躅而不安。又史記貨殖傳。趙女鄭姬。揄長袂。袂袖末也。古深衣之袖。自腕下餘尺餘。想女衣亦然也。

古袿衣以肩瘦爲美

宋玉神女賦。振繡衣。被袿裳。又漢書元后傳。是時政君坐近太子。又獨衣絳緣諸子。師古曰。諸子大腋衣。卽袿衣。又後漢皇后紀。簪珥光采。袿裳鮮明。釋名云。婦人上服曰袿。其下垂者。上廣下狹。如刀圭也。按劉熙說非也。曹子建洛神賦云。肩若削成。唐畫訣曰。美人莫畫肩。蓋古婦人以無肩爲娟秀。圭正上狹下廣。故袿字從衣從圭。純以形似。且衣亦無下狹於上之理。今戲劇所衣宮衣。猶彷彿近之。故知釋名誤也。

西漢時貴婦衣曳地

史記文帝常衣綈衣。所幸慎夫人。令衣不得曳地。是可證妃嬪衣皆曳地也。又漢書王莽傳。莽母病。公卿列侯遣夫人問疾。莽妻迎之。衣不曳地。布蔽膝。見之者以爲僮。是可證公卿列侯之夫人衣皆曳地。故見莽妻不識。以爲僮婢。近法國前數十年。侯伯爵夫人衣皆曳地。長丈餘。正與我漢代同也。

漢婦衣尚緣飾

漢書賈誼傳。今民賣僮者。爲之繡衣。絺履。偏諸緣。是古天子后服。而庶人得以衣婢妾。服虔曰。偏諸緣者。加牙條以爲緣也。按牙條者。卽今日婦女所用之縑帶。俗所謂縑子也。而漢卽有之。想見當時女飾之大備已。

唐宋婦人著裙之風盛於古

李娃傳。容貌妍麗。宛若生平。著舊石榴裙。紫襪。襪紅綠帔子。又張泌小金傳云。有婦人年四十餘。著瑟瑟裙。又唐人雜句。紅裙妬殺石榴花。新換霓裳月色裙。白妝素袖碧紗裙。又宋蘇軾詩。從來不解醉紅裙。以紅裙爲娼妓之代名詞。是宋時婦人。殆無不服裙者。沿至明清。更以裙爲禮服。於是蝴蝶裙。九霞裙。柳絲裙。百褶裙等名。不可勝數矣。自裙行而袿衣遂廢。此婦女衣服沿革之大略也。

周以來婦人下體之裏衣

周之時。男女衣無甚區別。男下體裏衣不全。旣詳於前矣。女亦然也。故衣服不得不寬博。不寬博則護下體不密也。彼夫桑間濮上。野田草露之詠。時有者。勢使然也。誠以其時下體祇有脛衣。兩股間無內衣。故外衣不可褻舉。禮以爲戒。晉平公以蒺藜布地。師曠步則刺足。伏則刺膝。則則不袴。其故可想也。

唐女袴仍開襠。如今日小兒

漢書上官皇后傳。雖宮人使令。皆窮袴多其帶。師古曰。窮袴。卽今之緹襠袴。按詩秦風。竹閉緹。毛傳。緹。繩也。說文。繡帶也。集韻。緹。縫也。是唐之緹襠袴。中有縫。但結以帶。使不開。張。以便私溺。若漢則兩襠雖合。尙開。拆。如今日小兒。故多其帶。以防強暴。若唐則平時皆如此也。故曰緹襠。今俗語縛物。猶曰緹物。緹襠者。卽將襠縫結以繩。使不開露。唐以後何時成今制。則不可致也。



左傳哀二十五年，衛侯與諸大夫飲酒，褚師聲子韞而登席，公怒戟其手曰：「必斷而足！」呂氏春秋：「齊王疾疢，使人之宋迎文摯，文摯至，不解履登牀，問王之疾，王叱而起，將生烹文摯，夫因不脫履而至於斷足，遭烹，古人之重視爲何如哉！」

周時處室內皆跣足

左傳宣十四年，楚子聞之，投袂而起，履及於室，注寢門也。古人處室皆跣足，言王出不及履，履人追及於室，皇始進履也。又襄三年，公讀其書，跣而出，注恐絳死，故不及履。又列子：「賓者以告列子，列子提履跣而走，是古人燕居無不赤足也。」

周無襪之證

說苑：「晉平公不悅於師曠，置酒祁廐臺，使郎中馬章布裘藜於階上，令人召師曠，曠至而上堂，平公曰：「安有履而上堂者乎？」師曠解履刺足，伏刺膝，仰天而歎，夫惟無襪，故刺足難忍。又左傳哀二十五年，衛侯爲靈臺於藉圃，與諸大夫飲酒焉，褚師聲子韞而登席，公怒，辭曰：「臣有疾。」疾足異於人，若見之，君將設却也之，是以不敢。解韞韞者仍履，褚師之足，時有惡創，潰爛汚穢，解履則全露矣，故云不敢，是益可證解履則赤足也。或者謂周人於威儀最尙恭敬，赤足不褻乎，豈知古人衣服寬博，下垂及地，坐作皆不露足，無不敬也，或又謂冬月不寒乎，豈知人手常外露，雖冬月不寒，足亦如此耳，況覆衣於上乎？」



古戶外解履著履狀況

曲○纒○解○履○不○敢○當○階○升防後就○著○履○跪○而○舉○之○屏○於○側○又○君○賜○爵○卒○飲○退○則○坐○取○履○隱○辟○同避而○後○履○坐○左○納○右○坐○右○納○左○按○古○人○之○坐○皆○跪○而○坐○於○足○雖○納○履○亦○如○此○若○兩○股○前○伸○而○納○履○則○箕○踞○矣○古○最○忌○之○

古履有綦束縛取固今謂鞋帶

禮○內○則○云○履○著○綦○鄭○玄○曰○綦○履○繫○又○冠○禮○云○黑○履○青○鉤○鄭○云○鉤○之○言○拘○也○以○爲○行○戒○狀○如○刀○衣○鼻○在○履○頭○疏○即○用○物○穿○履○頭○爲○鉤○相○連○爲○行○戒○也○又○曲○禮○解○履○注○云○即○解○繫○也○古○者○履○頭○鼻○綦○繩○相○連○結○之○將○升○堂○解○之○也○又○莊○子○盜○跖○篇○丘○得○幸○於○季○願○望○見○履○綦○按○古○人○履○狀○大○概○如○今○日○皮○鞋○於○腳○面○用○繩○連○結○之○使○固○而○不○墜○故○鄭○云○以○爲○行○戒○也○韓○非○子○文○王○伐○崇○至○鳳○黃○虛○履○繫○解○因○自○結○又○晉○文○公○與○楚○戰○履○繫○解○自○結○之○是○其○證○也○

古人飾履之侈

晏○子○春○秋○景○公○爲○履○黃○金○之○綦○飾○以○銀○連○以○珠○良○玉○之○鉤○其○長○尺○冰○月○服○之○以○聽○朝○晏○子○朝○公○迎○之○履○重○僅○能○舉○足○又○史○記○春○申○君○傳○其○上○客○皆○踞○珠○履○按○後○世○女○子○常○以○珠○飾○履○男○則○無○有○然○其○狀○可○想○像○得○之○至○於○黃○金○爲○綦○良○玉○爲○鉤○則○頗○不○得○其○真○狀○或○曰○黃○金○可○爲○索○纁○婦○女○纏○足○時○常○以○小○連○環○金○索○爲○鞋○絆○景○公○之○綦○或○亦○如○之○而○玉○鉤○訖○不○能○得○其○彷彿○也○

秦時脫履狀況

新序秦二世胡亥之爲公子也。昆弟數人。詔置酒。饗羣臣。諸子賜食先罷。胡亥下階。視羣臣陳履。狀善者。因踐敗而去。見者莫不太息。是秦時解履於階下也。

西漢時仍脫履戶外

漢書雋不疑傳。勝之躡履出迎。師古曰。履不著跟曰躡。躡謂納履未正。曳之而行。言其遽也。按暴勝之時。爲直指使。居傳舍中。而不疑有盛名。故見不疑來。曳履而出。惶遽不及著跟也。是雖居傳舍室中。仍脫履也。

西漢時仍無襪脫履後卽赤足

史記滑稽傳。東郭先生貧困。衣敝履不完。行雪中。履有上無下。足盡踐地。道中人笑之。東郭先生應之曰。誰能履行雪中。令人視之。其上履也。其履下處。乃似人足者乎。按履無底。又無襪。趾印雪中。足跡宛然。與履印異。故曰似人足。是可證西漢仍赤足著履。與周同也。

西漢多以革爲履

漢書貢禹傳。孝文皇帝衣絺革履。又鄭崇傳。每見曳革履。上曰。吾識鄭尙書履聲。按師古注。革生皮。不用柔韌。示儉。生皮堅韌。故有履聲。

西漢履仍有係

漢書張釋之傳王生老人曰吾鞵解願謂釋之爲我結鞵釋之跪而係之既退或讓生曰奈何廷辱張廷尉使跪係鞵乎又哀帝紀成帝令中山王誦尚書又廢及賜食於前後飽起下鞵係解又王莽傳受句同履禮鄭注紉之言拘也是自漢初至漢末履皆有係也

西漢有罪則徒跣不履

漢書匡衡傳衡免冠徒跣待罪天子使謁者詔衡冠履又董賢傳詣闕免冠徒跣謝是可證漢罪人不履故待罪者皆跣足

西漢有織履如今之毛繩鞋

漢書翟方進傳方進辭後母至京師受經母憐其幼隨之長安織履以給方進按後世之履皆裁布帛爲之卽漢時有革履韋履皆不用織茲言織履必以絲繩爲之周禮所謂絲履也疑與今日冬月所服之毛繩鞋相類或曰草屨亦織

東漢末有鞋

劉熙釋名鞋解也著時縮其上如履然解其上則舒解也按既曰縮約也曰解則鞋亦有係也卽文義揣之似鞋之制較履爲輕便故曰舒解然著之者不數見也

東漢末男女皆著木屐

王褒僮約云。若殘當作俎。機木屐及毳盤。是以殘木屑爲屐。其賤可知。蓋祇盛人服之。至後漢戴良傳。初良五女並賢。有求姻者。便許嫁。疏裳布被。竹筍木屐以遺之。又高士傳。袁閔身無單衣。足著木屐。按木屐見中國人服者少。惟日本人服之。前後有齒。行則托托有聲。而婦人尤多。其狀殊不莊。故自東漢以前服之者。皆窮寒下士。富貴則否也。

魏晉仍入室脫履赤足

魏書曹真傳。賜劍履上殿。是可證上殿者皆脫履也。又邴原傳注。太祖北征歸。原至通謁。太祖大驚喜。擊履而起。遠出迎原。是旅行亦入室脫履。世說王子猷子敬兄弟共坐一室。上忽發火。子猷遽走避。不惶取履。子敬徐扶侍者出。又謝遏夏月嘗仰臥。謝公清晨卒來。不暇著衣。跣出戶外。方躡履。夫曰戶外方躡履。是入室時卽脫履戶外也。曰不惶取履。是入室必跣足也。又會稽典錄。賀循與人交久而敬。在官常著屣。人鮮見其足。是尤爲脫履赤足之證。

晉時屐大行

世說王子敬兄弟見郗公。也。情躡履問訊。是不在室內。甚修外生禮。及嘉賓死。皆著高屐。儀容輕慢。命坐。皆云有事不暇坐。又阮遙集好屐。或有詣阮。見自吹火蠟屐。因歎曰。未知一生當着幾兩屐。又謝公開淮上捷報。

面無喜色。惟入室屐齒忽折。又謝家賓客登山則去屐前齒。下山則去後齒。是晉時亦以屐爲不莊而高。屐則尤輕慢。然當時卿大夫盡著之者。則以晉時風俗輕佻。人物高曠。故獨喜之也。

### 劉宋時尚著赤舄

宋書輿服志。絳袴赤舄。是舄之制。至六朝尙存。唐以後則不見矣。

### 自南北齊始有長鞣韠古履制一變

南齊書。豫章文獻王傳。性汎愛。不樂聞人過失。有投書相告。置韠中。竟不視。取火焚之。夫韠若無鞣。胡能置書。又夢溪筆談。中國衣冠自北齊以來。全國窄袖緋綠短衣。長鞣韠。按周秦以來。祇有履。履有係。無鞣。據釋名。趙武靈王好着短鞣韠。蓋武靈胡服。胡服之履有鞣。並脛裝入。名曰韠。不用係。一可取。煖一自然穩固。然武靈之鞣。短甚。且偶爲之。歿則已。當時未行。北齊之祖高歡。亦胡種。故有長鞣韠。鞣長益煖。益不用係。然至隋仍不通行。隋書輿服志云。長鞣韠田獵豫遊則服之。可知非田獵仍不長鞣也。豈非以其違古制而不莊雅哉。然後世遂因而不改矣。

### 隋唐鞋始大行。然非官服且有帶

隋書輿服志。紫絲鞋田獵服之。田本遊戲。故可服鞋。隋唐嘉話。鄭愔爲吏部侍郎。賊汚狼籍。有選人係百錢於鞋帶上。愔問其故。答曰。當今之選。非錢不行。愔默然不語。又杜甫詩。青鞋布襪從此始。是唐時常著

者。蓋鞋也。惟鞋有帶以爲固。似今日小兒式也。

唐時仍登堂脫履

國史補章陟有疾。房尙書瑄使子弟問之。延入臥內。行步悉藉茵毯。房氏子韞而登階。侍婢皆笑之。是笑其不脫履也。又西陽雜俎。明皇於便殿召見李白。時白方醉。因召納履。白遂展足與高力士曰。脫靴。力士失勢。遽爲脫之。是白醉不知脫靴履上故召之也。白著官服入見。明皇令去韉而納履耳。

唐以長韉韉爲官服

唐書韋絨傳。朝會常大雪。在廷者皆振裾更立。絨不徒足。雪甚。幾至韉。按有韉。方謂韉。幾至韉者。言幾至韉口也。謂雪深也。不然。韉已著地履雪矣。胡云。幾至。又唐書李光弼傳。將戰。納刀於韉。曰。戰危事也。吾位三公。不可辱於賊。夫韉。不長。那能容刀。又西陽雜俎。張許事。摸韉得銀一銚。是可見唐時無論朝服軍服。凡官家皆著長韉。已與清時同。清時固常裝置雜物於韉內也。

唐韉皆黑色

燕言會。高力士終以爲李翰林脫烏皮六縫爲恥。因譖之於貴妃。又唐人詩。趁朝把笏著烏韉。又靈鬼志。詔自外入。著黑介幘。幽履是韉。純爲黑色。自唐而已然也。

唐時製韉狀況

顏真卿詩。縫鞵蠟線油塗錐。急逢龍背須且騎。夫線蠟則滑而易抽。以油塗錐亦取其滑而易入。以今日視之。似爲迂拙。然古人工藝之堅實可想。

#### 唐時避雨濕不用舄用釘鞋

通鑑。德宗出幸奉天。天大雨。從者皆著釘鞋。按釘鞋今日尙有之。一則不滑。一則底高。遇泥水不畏。惟皆以桐油敷布上。使水不能侵入。故名曰油鞋。茲名曰釘鞋。似尙未知以油浸也。

#### 唐木屐仍大行

唐摭言。京師長者皆著木屐。夫長者皆著。少年可知。想見長安街上。橐橐之聲盈耳也。

#### 五代及宋以鞵爲朝服鞋爲便服鞋仍有帶

歸田錄。馮道與和凝同在中書。一日和問馮曰。公靴新買。其值幾何。馮舉左足曰。九百。和性褻急。遽回顧小吏曰。我鞵何得一千八百。因詬責久之。馮徐舉右足曰。此亦九百。於是烘堂大笑。又老學菴筆記。淳熙己酉。車駕幸候潮門。從駕臣僚皆擲帶子著靴。是自五代至南宋皆以靴爲朝服。又歸田錄。往時學士循唐故事。見宰相不具靴笏。繫鞋坐玉堂上。是言惟學士清貴可著鞋坐玉堂。見宰相他人須具靴笏也。是以鞋爲便服。靴爲禮服。自宋初而已然。至清不改。又宋陶穀詩云。短鞵鞵兒末厥兵。是宋靴之有鞵益明。又鞋而曰繫。是宋鞋之有帶殆與唐同。

周以前足無裏衣有之自漢始

周以前不履則跣前已詳之矣。至漢初履之內復加裏衣。淮南子說林訓鈞之稿也。一端以爲冠。一端以爲絛。冠則戴致之。絛則躡音展也。履之。又後漢禮儀志絛袴絛。按集韻絛所以束衣也。類篇絛足衣也。依兩訓詁之。絛亦有約束意。似卽急就篇注所謂裹足之巾也。是爲足上裏衣之創始。

至後漢而有襪仍之至今

後漢書李忠傳注。光武衣垢。使忠解滌。忠更作新袍小單衣襪以上之。又蔡文姬傳。時且寒。賜以頭巾履襪。又宋書輿服志。絛袴絛襪。唐人李娃傳。特爲生製新履襪。又靈鬼志。韶自外入。著白襪幽履。又杜甫詩。青鞋布襪從此始。蓋至是而足之裏外衣皆備。

周以來婦女足服

周之時男女履舄。蓋無殊異。是以周官屨人所掌。王及后之赤舄黑舄。素履葛屨。句繖皆同。卽下至命夫命婦之命屨功屨散屨亦同。其他經傳言及婦足服者甚少也。

古婦女仍上堂脫履跣足

淮南子。古者家老異飯而食。殊器而享。子婦跣足上堂。跪而斟羹。是周時婦女入室亦脫履也。

秦漢時婦女履始有銳形



史記貨殖傳。今夫趙女鄭姬。榆長袂。躡利屣。目挑心招。出不遠千里者。爲富厚也。說者謂利屣爲婦人纏足之始。此不然。自古女體弱於男體。而女子服飾。貴輕纖。忌重拙。惟屣亦然。利屣者。不過較方形之男履稍狹。以期妍媚耳。與後世之錐形異也。

#### 六朝時男女靴可換著

北齊書。任城王潛爲并州刺史。有婦人臨汾水浣衣。有乘馬人。換其新靴而去。婦人持故靴詣州言之。潛召城外諸嫗。以靴示之。給曰。有乘馬人於路被劫。遺此靴。一嫗撫膺哭曰。兒昨著此靴向妻家。如其語捕獲。時稱明察。據此則男子與婦人靴可換著也。是六朝時男女履尙無異。亦何怪魏武賜蔡文姬履襪。不以爲褻哉。

#### 六朝時之女皮履

南齊書。高帝令宮人著紫皮履。

#### 唐時女著木屐皮履

據言京師婦女始嫁。作漆畫履。五色采爲系。又張泌小金傳。蓬髮曳漆履。夫可漆。可畫。則木屐也。雲溪友誼。崔涯吳楚狂士。與張祜齊名。每題詩倡肆。舉之則車馬盈門。毀之則杯盤失措。常嘲一妓云。布袍皮襖。火燒氈。紙補篋。篋麻接弦。更著一雙皮屐子。紇梯紇榻到門前。今日日本婦女。在街上行。隔數十武。卽聞。

紇梯紇榻聲者木屐子也。豈知其爲唐制哉。讀此詩。唐時婦女步履音聲如耳聞目睹。

宋時婦人鞋底已成尖形與清無異

老學菴筆記。宣和末婦人鞋底尖。以二色合成。名錯到底。夫鞋而有尖。非纏足不如此也。是確證已。又劉改之詠美人足云。襯玉羅襪。銷金樣窄。載不起盈盈一段春。又有時自度歌聲。悄不覺微尖點拍頻。又知何似似一鉤新月。淺碧籠雲。味此詞是宋時女足形。已與清時無異。蓋自隋唐以來。婦女妝飾。以纖厲爲尙。變本加麗。至宋而已極。必謂纏足起於某時者。固執之論也。袁子才隨園隨筆。辨之甚詳。茲從略。

# 卷七

行唐尙秉和著

## 飲食部

### 周時製造食物之法炮豚

膾內則炮。取豚若將同祥也。剗之剗之。實棗於其腹中。編萑以苴之。苴也。塗之以墮塗。炮之。塗皆乾。擘之。也。濕手以摩之。去其皸。音展膜也。爲稻粉糲。音修汁也。溲之。溲也。之以爲醢。粥也。以付豚。糊也。煎諸膏。膏必滅之。深油。沒豚。鉅鑊湯。以小鼎薶脯於其中。使其湯毋滅鼎。三日三夜毋滅火。而後調之以醢醢。按說文。炮。毛炙肉也。廣韻。裹物燒也。經言造炮肉。先取豚若羊殺之。實棗於腹肉。再裹之以葦。塗之以泥。炮之使乾。擘而摩去其油膜。再以稻米粉爲糊。糊豚四周。煎於油鑊中。使乾。置小鼎中。再將小鼎置大鑊沸湯中。湯毋滅鼎者。懼水浸入小鼎。敗肉味也。煮三日三夜。而后調醢醢食之。可謂費矣。然不知發明若干年。而後能製法繁複若此也。

### 周製雞肉糜法名搗珍

禮內則。搗珍。取牛羊麋鹿麇之肉。必胾。注夾脊肉也。今所謂裏脊也。每物與牛若一。捶反側之。去其餌。注筋髓也。孰出之。去

其醃柔其肉。按擣珍者。擣取牛羊等肉。使爛。必厭者。厭肉肥美也。每物與牛若一者。言四者肉之多寡與牛等也。反側捶之。其筋可去。筋去則肉和。熟而去其膜。調以醃醢。則肉柔矣。此製法甚奇。不用刀切。椎擣使爛。和五種肉爲一。且筋膜盡去。均勻和合。調而食之。其有異味可知也。

周食生牛肉法 古名曰漬

禮內則漬。取牛肉。必新殺者。薄切之。必絕其理。漬同沈諸美酒。期朝而食之。以醢若醃醢。按必絕其理者。言切肉時。橫斷其文理也。橫斷則生肉易嚼。漬以美酒。至明朝方食。則美味生。而臠味去矣。更調以梅醬。注醃梅醬。適口可知。

周製乾肉糜法 古名熬

爲熬。捶之。去其醃。編萑布牛肉焉。屑薑與桂。以灑諸上。而鹽之。乾而食之。施羊亦如之。施麋。施鹿。施麇。皆如牛羊。欲濡。溼也。肉則釋。以鹽水。而煎之。以醃。欲乾。肉則捶而食之。按說文。乾煎曰熬。爲熬者。言爲熬肉之法也。亦不刀切。擣之。使爛。晾於萑簾之上。諸者。菹也。洒以薑桂鹽菹。俟其乾。煎食之。然亦可濡食。煎以醃。則潤而釋矣。此種食法。有類於今日之醃肉。可久存。不過古人擣肉。使爛。今則塊醃。古較今尤精耳。

周煎肉餅法 名穠

禮內則穠。說文。以來和羹也。取牛羊豕之肉。三如一。小切之。與稻米。稻米二。肉一。合以爲餌。煎之。按今日用麥粉

和肉煎爲餅，餅卽餌也。見說文。茲用稻米，必煮米使極爛，然後能和肉爲餌。惟今日煎時用油，古則無之，是今較古勝也。

### 周製炙肝法 名肝膏

禮內則：肝，管取狗肝一，蠔之，以其膏。脂膏卽油。濡炙之，舉燠其膏，不蓼。按蠔之者，覆之也。言獲肝於鑪，再以脂油炙之，舉者皆也。皆焦然後食之。蓼者辛菜，不蓼者不用辛也。經不言用醢醢，且不刀切，或食時割之，和醬食也。

### 周製薄粥法

禮內則：黍醢，又曰：醢醢，注：醢厚粥，醢薄粥。賈逵曰：醢爲粥清，清者粥而去米也。又曰：取稻米舉糲，漉之，小切狼臠。臠，脂也。膏以與稻米爲醢，是又於薄粥內加狼膏以益其味。其製法大概與今之牛油茶相類也。

### 周人拌飯之香料 名淳熬、淳母

禮內則：淳熬，煎醢加於陸稻上，沃之以膏，曰淳熬。淳母，煎醢加於黍食上，沃之以膏，曰淳母。是蓋以稻米黍米爲飯，既加以煎醢，復以膏沃之，味厚極矣。故曰淳。

### 周配置食味之法

禮內則：膾。說文：細切肉爲膾。春用葱，秋用芥。芥，醬。豚春用韭，秋用蓼。辛菜。脂用葱，膏用薤，和用醢。獸用梅，鵝羹，鷄

羹。鴛。釀之。蓼。魴。饌。蒸。雞。燒。雉。薺。無。蓼。雉。薺。無。蓼。者。言。食。雉。但。可。投。以。薺。不。可。和。以。辛。菜。也。其。配。置。之。法。有。用。之。至。今。者。在。當。時。亦。可。謂。精。矣。

周食物所忌

禮。內。則。不。食。雛。鼈。狼。去。腸。狗。去。腎。狸。去。正。脊。兔。去。尻。狐。去。首。豚。去。腦。魚。去。乙。乙。形。鼈。去。魂。癢。也。牛。夜。鳴。則。屠。同。屠。羊。冷。毛。而。羹。膾。狗。赤。股。而。躁。臊。烏。曠。色。而。沙。鳴。鬱。與。也。豕。望。視。而。交。睫。腥。馬。黑。脊。而。般。臂。漏。觀。以。上。之。研。究。亦。可。謂。精。細。矣。不。過。狗。兔。狐。狸。等。物。自。隋。唐。以。來。已。不。食。而。馬。尤。爲。粗。品。然。周。時。人。皆。食。之。似。不。如。後。人。檢。擇。之。精。也。

周人製酸菜泡菜之法 名菹

周。禮。天。官。醢。人。掌。四。豆。之。實。韭。菹。菁。菹。注。薑。莖。菹。菁。莖。菹。注。即。薺。葵。菹。即。白。菜。芹。菹。蓴。菹。注。水。中。魚。衣。筍。菹。注。竹。萌。或。稱。蒲。按。侯。鯖。錄。細。切。曰。藟。全。物。曰。菹。又。釋。名。菹。阻。也。生。釀。之。遂。使。阻。於。寒。溫。之。間。不。得。爛。也。即。今。之。泡。菜。鹹。菜。也。又。今。之。酸。菜。也。親。醢。人。掌。七。菹。醢。者。醢。也。故。知。菹。亦。爲。酸。菜。也。詩。小。雅。疆。場。有。瓜。是。剝。是。菹。是。也。

周時肉醬種類之多 今祇遺蝦醬一法

禮。曲。禮。毋。獸。醢。疏。肉。醬。也。周。官。醢。人。掌。四。豆。之。實。醢。醢。注。肉。醬。羶。醢。注。蟻。醢。羶。醢。注。小。蜃。蜃。醢。大。蛤。蜃。醢。魚。醢。兔。醢。雁。醢。注。凡。作。醢。者。必。先。膊。乾。其。肉。然。後。莖。之。雜。以。粱。鞠。及。鹽。漬。以。美。酒。塗。置。瓶。中。百。日。而。成。有。骨。爲。醢。無。

骨爲醢。按周醢共有八種之多。其見於詩者大雅云。醢醢以薦是也。醢尙充祭品。其珍貴可知。蓋古人食肉。淡煮者多。殺蒸是也。故食時醬最需要。孔子所以不徹也。今祇有蝦醬。是其遺法。餘則不數見矣。

### 周時純以豆米所爲之餅餌

周官籩人掌籩之實。糗餌粉養。注糗豆米所爲。餌養皆餅也。按是三物。蓋皆以豆米之粉爲之。如今日之小米麵餅。雜花麵餅。皆蒸熟食之。

### 周專置調和食味之官名曰食醫

周禮天官食醫。掌和王之六食六飲六膳。百羞百醬八珍之齊。同劑凡和春多酸。夏多苦。秋多辛。冬則鹹。調以滑甘。凡會膳食之宜。牛宜稌。羊宜黍。豕宜稷。犬宜粱。雁宜麥。魚宜苽。注食醫和其劑者。酌天時與王體氣之宜也。然則周時調和五味。皆有專門之學。以爲之宜其精矣。

### 周時製造糖菓之法

禮內則。棗栗飴蜜以甘之。萑苳粉榆兔薨。兔薨生而乾者滹醢以滑之。按今日製糖菓之法。皆漬以冰糖及蜜。無庸再沃以粉榆等汁。周時不爾者。冰糖沙糖等物。皆尙未有。取甘之法。祇用飴。飴者餹也。黍汁造今臘月之糖瓜是也。

### 周時置食次序

曲禮。凡進食之禮。左殺殺音曰右載切肉也。食音換飯居人之左。羹居人之右。膾細切肉會炙處外。醯醢處內。  
葱音蔥漆音漆處末。酒漿處右。古人尚右。故取食皆以右手。其數取者。置在右爲便也。而醯醢每食必用。故  
置在內俾尤近。以便濡滯。

古弟子尚食侍食徹食禮節

管子弟子職。先生將食。弟子饌饋。注饋謂進其食。攝衽盥漱。跪而坐饋。置醬錯食。陳膳毋悖。凡置彼食。烏獸魚  
鼈。必先菜羹。注先菜後肉。羹載中別。愚按別疑列之訛。載在醬前。注遠載近醬。其食要方。注陳設食器要令成方。飯是爲卒。左酒右漿。  
告具。備也。而退。奉手而立。按載在醬前者。即曲禮膾炙處外。醯醢處內之意也。陳設食器要方者。貴整齊  
也。飯是爲卒者。言最後具飯也。注言既飯而食則卒者。誤也。此皆言陳設食物先後次序。至陳設既畢。故  
下云告具也。告具者。言食品具備。請先生食也。故知注非也。此尚食之禮節也。

又云三飯二斗。注三食飯二餐斗。吳云。方本作叶。叶當爲汁。即所謂殮也。左執虛豆。右執挾匕。注挾匕以載肉。周還而貳。注再益。云惟嚙之視。同  
嚙以齒。注類也。周則有始。柄尺不跪。是謂貳紀。注豈有柄。長尺則立而進。此是再益之綱紀也。先生已食。弟子乃徹。趨走進漱。  
拊前板。祭按前三句。謂侍食者應備之器。二斗者。備既飯而汗。更替取潔。猶今之食番菜。必易器也。左執  
虛豆者。豆有柄。左手執之。而中空。備食時承接淋漓也。右執挾匕者。言以二匕載殽肉。右手所執侍食者  
須預置二斗。並置虛豆挾匕於左右也。周還而貳。惟嚙之視者。盡也。盡則益之。同嚙以齒者。齒者序。



也言數食若同時並盡則按次序益之也。拊掃也前板祭者板者斂食之器。公羊傳所謂賤而刻其板者是也。古食必祭。食能則以板斂其祭掃而清潔之。此侍食徹食之禮節也。

### 周賓主食時禮節

曲禮侍食於長者主人親饋進食則拜而食。主人不親饋則不拜而食。

曲禮客若降等

注大夫食於

執食興辭

注欲食於堂下

主人興辭於客然後客坐

主人阻客客復坐也

主人延客祭

注古食

必祭先農延導也

祭食祭所先進穀之序徧祭之三飯

注三食也禮食三殮而告飽領勸乃更食

主人延客食馘然後辨穀

注凡食穀初有辨于

肩至肩乃飽也

### 若君賜食則禮節益謹

禮玉藻豆去席尺

注恐汙席

若賜之食而君客之則命之祭然後祭

注祭敵體方得

先飯辯嘗羞飲

啜飲以利喉非飲酒

以俟

若有嘗羞者則俟君之食然後食飯飲而俟君命之羞羞近者命之品

徧也

嘗之然後唯所欲凡嘗遠食必順近食

按今日會食食遠者主人必推致之不然客不遠取又初尙一羹主人不導客客輒不先嘗猶古禮之遺

### 侍食於尊長禮節

禮玉藻侍食於先生異爵者後祭先飯

注若爲尊者嘗食

客祭主人辭曰不足祭也

注祭者盛主人之饌

客殮主人辭以

疏。

古將食罷最重殮禮

禮玉藻侍食於君君未覆手不敢殮按覆手者注云以手循口邊殺粒恐汙着也殮者謂用飲澆飯於器中也禮食竟更作三殮以勸助令飽實使不虛也又玉藻侍食於先生客殮疏云殮是已食飽飽猶美食故作三殮示仍欲食也飽仍欲食則食之美可知由前解則殮助腹內飽實由後解則兼以悅主人是殮有爲己爲人二義也

若食於敵體者主人失禮客可不食而殮

禮雜記孔子食於少施氏而飽少施氏食我以禮吾祭作而辭曰疏食不足祭也吾殮作而辭曰疏食不敢以傷吾子玉藻孔子食於季氏不辭不食肉而殮疏凡禮食先食戴次食殺乃至肩至肩則飽乃殮不食肉而殮由主人不辭故也不辭則失禮家語云從主人也主人不以禮客不敢盡禮主人盡禮客不敢不盡禮也按今日食罷恆對主人言食太飽猶有殮之遺意而祭禮之亡則久矣

古食罷以酒漱口禮節

曲禮主人未辯食穀未畢客不虛口注虛口謂酌也疏食罷以酒盪口曰酌敵以上可不俟主人主人恆讓客不自先飽故客須俟主人辯乃漱口也又儀禮公食大夫禮賓卒食會飯三飲注三漱漿也食竟漱口

也。按曲禮客不虛口。疏云。謂食竟飲酒盪口。使清潔及安居也。用漿曰漱。用酒曰醕。然公食雖設酒優賓。不得用爲醕。但以漿漱口而止也。若私客則可用酒醕。按今日食罷漱口。用清水而略溫。太寒則漱齒。不惟不以酒。亦不以漿。而古人不爾者。今則漱而吐之。古似漱而下之也。古蓋以吐爲不敬。

### 古食能徹饌情景

曲禮卒食。客自前跪徹飲齊。注。齊。醬屬也。卑。以授相者。主人贊。主人興。起也。辭於客。不聽自。然後客坐。是食於尊者之前。主人不聽自徹。可復坐也。玉藻云。君既食。又飯殮。飯殮者三飯也。君既徹。執飯與醬。乃出授從者。注。授己之從者。食於尊者之前。當親徹也。是主人益尊。聽自徹。出授己之從者也。又玉藻。主人自置其醬。則客自徹之。注。敬主人也。徹奠於序端。是食於敵。平等者之家。主人敬客。自尙食。故客亦自徹。以敬主人。所謂禮因地異也。

### 古極重禮食不能食

左傳宣十六年。王享有體薦。宴有折俎。注。半解其體而薦之。所以示儉。折俎者。體解節折。升之於俎。物皆可食。所以示慈也。按古者饗。同享禮最盛。宴禮次之。示儉示慈。卽左傳所謂饗以訓恭儉。宴以示慈惠也。示惠故可食。示儉不可食。猶大羹不調。用以祭神。禮益恭也。

### 古燕食共器以手取飯

曲禮共食不飽注：共羹飯之大器。共飯不澤手注：古禮。飯以手不用箸。毋搏飯注：共器若以飯作搏則多得不得。毋放飯疏：手就器中取飯若粘着不得拂放。

本器中。毋反魚肉注：同器食已。留殘不反器中。為人嫌。然燕食如此若禮食則不共器也。

古食時所忌犯則不恭

曲禮毋流歆注：飲也。大獸若流水嫌疾。毋咤食注：若嫌薄。毋齧骨毋授與狗骨毋固獲毋揚飯注：揚之使涼。飯黍毋以箸注：嫌速。

七。以。毋噍音踏不噍也。羹毋絮羹加鹽嫌。毋歆醢為嫌。客絮羹主人辭以不能烹客歆醢主人辭以簋。

古食須釋劍

左傳哀十六年衛君召渾良夫食至袒裘不釋劍而食太子數以三罪而殺之按古者劍不去身獨食時不脫則不敬况又袒裘乎然以此為罪可見古威儀關係之重。

古禮食不共器器之多少以爵秩而分

禮禮器上大夫八豆下大夫六豆又鄉飲酒六十者三豆七十者四豆八十者五豆九十者六豆又左傳昭五年季孫宿如晉晉侯享之有加籩武子退使行人告曰得貺不過三獻今豆有加下臣弗敢是古禮專器而食故器有多寡因年爵而異也。

古貴人燕食每食奏樂

禮檀弓知悼子卒未葬平公飲酒師曠李譎侍鼓鐘注：君食則樂。是國君食時必奏樂也又左傳哀十四年左

師每食擊鐘聞鐘聲公曰夫子將食既食又奏是大臣食亦奏樂也不惟食時奏罷食亦奏清時督撫提鎮署外輒有鐘鼓樓峙列東西然日久成具文祇督撫出時鳴炮吹笛食時無奏樂者而邊荒提鎮衙署建樹威嚴食時輒吹笛三聲播鼓三聲俾市民聞知俗所謂三吹三打豈知仍成周遺意哉

### 春秋時貴人盡肉食

左傳襄二十八年公膳曰雙鷄饗人更以鷺子雅子尾怒注謂公家供卿大夫之常膳是不宴會常食亦肉也又左傳莊十年齊人伐我公將戰曹劌請見其鄉人曰肉食者謀之又何間焉劌曰肉食者鄙未能遠謀又昭四年肉食之祿米皆與焉又說苑晉獻公時有祖朝者上書公使告之曰肉食者已慮之矣是可見公家皆肉食故以肉食爲代表公卿之名詞也

### 食時祭先禮節

禮內則君賜食命之祭然後祭王藻後祭先飯論語雖蔬食菜羹必祭必齋如也左傳襄二十八年叔孫穆子食慶封慶封汜祭穆子不悅注食有祭示有所先也汜祭遠散所祭不共故穆子惡之然則祭亦有禮節遠散所祭則失禮似將祭品置於食案不以器盛今農家餉南畝食於野者將食必先以勺酌飯灑之猶周禮之遺而士大夫則否孔子曰禮失求諸野豈不然歟

### 古食器類別 載食器 造食器 取食器 箸尙不重

周禮天官籩人掌四簋之實。醢人掌四豆之實。又左傳染指於鼎。論語一簋食。一瓢飲。說苑魯有儉者。瓦鬲煮食而美。盛之士餽以進孔子。孔子如受大牢之禮。弟子曰。瓦甗陋器也。煮食薄膳也。先生何喜如是乎。又攷工記。夫人享諸侯。案十有二寸。是皆載食之器也。籩與簠皆竹製。豆則木製。鼎則金。瓢則瓠。以鼎爲最貴。子路所謂吾親歿之後。南仕於楚。累茵而坐。列鼎而食也。以瓢爲最儉。莊子所謂剖之以爲瓢也。又禮運疏。中古之時。雖有火化。未有釜餽。釜餽與鬲皆造食之器。又曲禮。飯黍毋以箸。易不喪匕鬯。攷工記梓人爲飲器。勺一升。漢書禮樂志。勺椒漿。勺者酌漿而飲之也。匕者載食。箸者挾食。皆取食之器也。又曲禮。羹之有菜者用挾。無菜者不用挾。挾者箸也。是周時箸尙不要也。

周時以魚稻黍爲美食

論語食夫稻。衣夫錦。於汝安乎。孟子曰。魚我所欲也。熊掌亦我所欲也。夫以魚與熊掌並稱。其貴重可知。又漢書地理志。吳楚之民食魚稻。蓋魚稻皆產於水鄉。而中原少水。雖有而不多。然吳楚之民皆食之。志之正異之也。又詩小雅。其饌伊黍。注云。豐年雖農人亦得食黍。可見黍之貴重。田家不常食。

周窮民至食蒺藜實

說苑。由侍二親之時。常食藜藿之實。又晉獻公謂東郭民祖朝曰。食肉者已慮之矣。藜食者尙何與焉。又莊子。孔子窮於陳蔡之間。七日不火食。藜藿不糝。按糝者。說文以米和羹也。不糝者。言祇有藜而無米也。

又按說苑。晉平公布蒺藜於庭。師曠行則刺足。伏則刺膝。仰天歎曰。夫殿庭非生蒺藜之地。由此證之。蒺藜實爲之子路所食者是也。但以蒺藜爲米。煮食之乎。抑春其實爲粉和粟米食之。因後世久不食此。故其詳亦無從揣測也。

又按蒺藜皆旅生。無藝之者。性惡雨。喜旱。旱年五穀焦枯。獨蒺藜益肥茂。沿阡陌蔓生。實繁繁。堅實有粉。固可食也。古荒地多。此物益盛。窮民值歉歲。多收食之。故晉公以藿食爲窮民之代名詞。今則視爲惡草。雖遇荒年。無知其可食者。故備論之。

### 周時已普食百菜

詩豳風。七月烹葵及菽。又儀禮士虞禮。夏秋用生葵。又列女傳。漆室女曰。昔晉客舍吾家。繫馬園中。馬佚馳走。踐吾葵。使我終歲不食葵。按王禎農書。葵爲百菜之主。備四時之饌。又左傳。成十七年。鮑莊子之知。不如葵。葵猶能衛其足。夫葉能衛足。又四時可食。則今日之百菜也。或名曰菰。所謂秋末晚菰也。

### 古食鹽種類之多而以虎形爲尤奇

周禮天官鹽人。祭祀供其苦鹽。散鹽。賓客供其形鹽。王之膳羞。供其飴鹽。注苦鹽出於池。鹽爲顆。不凍治味苦。散鹽卽末鹽。又天官籩人。朝事之籩。其實形鹽。注形鹽。築鹽爲虎形也。按苦鹽出於鹽池。今河東鹽池所出者是也。散鹽者。今海鹽或井鹽。碎爲粉者是也。形鹽者。卽左傳僖三十年。所謂鹽虎形者是也。原

以供賓客禮場用之。取其美觀。今則無矣。

周時男女及小兒食鹽量數

管子凡食鹽之數。一月丈夫五升少半。婦人三升少半。嬰兒二升少半。按小兒食鹽少於大人宜也。至婦人少於男子。則不可解。豈古婦人食量較男子減少幾及半乎。不然。胡食鹽量數相差若是。

古食鹽防身腫

管子無鹽則腫。又民惡食而無鹽則腫。按五味辛苦酸甘。皆可不食。獨不食鹽則身腫生毛。至今猶然。故中國古人於食鹽法。發明最早。說文云。宿沙初作。煮海爲鹽。攷宿沙尙在五帝前。至春秋已數千年。管子治齊。煮海爲鹽。富擅天下。故窮究鹽之利害。俾民知不食則腫。而惡食者腫尤甚也。

周食狗之劇 且以祭神

月令。天子乃以犬嘗稻。以犬嘗麻。先薦寢廟。周禮供其犬牲。又禮內則。狗去腎。狗赤股無毛而躁躁。音騷又史記。聶政傳。家貧客游。以爲狗屠。可以旦夕得甘羹。又荆軻傳。愛燕之狗屠。及善擊筑者高漸離。夫至以屠狗爲專業。則當時社會食狗之風尙可知矣。

漢時食麥飯以葱爲菜

後漢馮異傳。倉猝蕪蕪亭麥飯。又高士傳。陰就請井丹。設麥飯葱菜。按今日爲麥飯者。皆取將熟之麥。而



實未堅實者，煮以爲飯，香嫩可口，無以乾麥爲之者。光武過憚沱時，嘗十月，則無鮮麥，而亦爲之者，可見古人常以麥實爲飯，與粟等也。葱菜者，鹹葱爲菜，以下飯也。

#### 漢時仍貴黍常炊黍餉客

周時黍稷用以祀神，論語子路拱而立，殺鷄爲黍而食之，是以黍餉客也。後漢龐公傳注，司馬德操嘗詣龐公，值上墓，德操便登堂呼德公妻子速作黍，又三國志注，鍾茂嘗詣姊，姊爲殺鷄炊黍而不留也。是至漢時仍以黍餉客，則黍之貴於常食可知。

#### 漢時燒餅販子

三國志注，趙岐遭家禍，詣北海販胡餅，孫寶傾過市，疑其非常人，問曰：自有餅耶？販之耶？岐曰：販之。按胡餅者，卽今日之燒餅，販餅卽叫賣於市者也。漢已與今同。

#### 漢時食品繁於古

漢書孔光傳，太師入省中，用杖賜餐十七物。師古曰：食具有十七種物。按周時雖大宴饗，食品不過數種，茲有十七種之多，較周時已進步矣。

#### 漢時食器箸最要

其盛食之器，據漢書主父偃傳，丈夫生不五鼎食，死則五鼎烹耳。張宴曰：五鼎，牛羊豕魚麋也。又霍后傳，

許后五日一朝皇太后於長樂宮。親奉案上食。又史記張耳傳。敖自持案上食。禮恭甚。又後漢梁鴻傳。妻爲其親。不敢仰視。舉案齊眉。三國魏武傳。及懽悅大笑。至以頭沒杯案中。肴膳沾汚巾幘。按杯者。椀也。案者。上食所用。四邊有矮牆。下有矮足。公羊傳。賦而剗其板。板卽案也。用以斂食器。今朝鮮人款客。席地坐。食時。賓主各一案。猶古制也。今中國人上食之案。有牆無足。祇上食用之。食時則否。因不席地坐也。其取食之器。史記張良傳。臣請借前箸籌之。又周亞夫傳。上召亞夫賜食。獨置大觥。無切肉。又不置箸。亞夫心不平。願謂尙食取箸。又三國志劉先主傳。先主方食。失匕箸。按周時食用箸甚少。至以手奉飯。漢則無不用箸。觀亞夫願尙食。不索他器。獨索箸。可知其重矣。若今日則箸尤要也。

漢食時忌後飽

漢書哀帝紀。及賜食於前。後飽起下。轡係解。帝由此以中山王爲不能。按今日子弟赴宴。父母亦輒以後飽爲戒。後飽令人疑貪食。古人尤重。

漢時炊飯已用簞蒸

世說。賓客詣陳太丘宿。太丘使元方季方炊。客與太丘論議。二人俱委而竊聽。炊忘著簞。飯落釜中。太丘問飯何不饒。元方季方長跪曰。大人與客語。乃俱竊聽。炊忘著簞。今飯成糜。按說文。饒。溜氣卽蒸也。由此可證漢時炊飯之法。與今時同。卽以米置釜煮之。再以簞撈出。置簞上蒸之。元方等忘著簞。及旣覺知。

已成糜矣。糜與粥不同。粥米少而稀。糜則濃厚也。

### 漢魏晉之豆粥粟粥

後漢馮異傳。光武至饒陽蕪蕪亭。異上豆粥。漢書公孫弘傳。食一肉脫粟之飯。世說。石崇爲客作豆粥。咄嗟便辦。許允爲魏明帝見收。舉家號哭。允婦曰。勿憂。作粟粥待。頃之允至。按北方少稻。人常食者曰穀。穀卽粟。脫粟者言去壳不精鑿也。卽今之小米也。

### 晉時仍不共器食

世說。顧榮在洛陽。嘗應人請。覺行炙向食者。人有欲炙之色。因輟已施焉。夫輟已而與他人。則不共器可知。否則不便專主如此也。

### 六朝時食飯多用漆器

六朝時已有瓷器。齊民要術合面脂法云。以綿濾著瓷漆盞中。是其證。然瓷器蓋甚寡。多用漆器。齊民要術種漆云。凡漆器送客之後。須以水淨洗。置牀薄上。於日中晒之。使乾。則堅牢耐久。若不卽洗。鹽醋浸潤。氣微則皴。器便壞矣。觀此是六朝時食飯皆用漆器也。又種榆云。十年之後。蠟作魁椀瓶榼器皿。又以證漆器皆以榆木蠟成也。

### 晉時貴人以五盤盃爲儉食

世說殷仲堪既爲荊州。值水儉食。嘗五盃盤。外無餘肴。夫肴至五盃五盤。下飯亦足矣。而猶以爲儉。甚矣晉人之奢。

晉人已食韭菜花

世說石崇飯客。恆冬天得韭薺。按此卽今日之鹹韭花也。七月採之。加以薑瓜。搗爲泥。漬以鹽。過秋開。氣馨香撲鼻。而晉人則食新製者。觀其合麥苗韭根搗之。因冬月韭無葉。而麥則有苗。可僞韭葉。加韭根。復有韭味。純食鮮者。與今法異矣。

唐貴人猶以鼎食

明皇雜錄李適之既貴且豪。常列鼎於前。以備膳羞。一日庭中鼎躍出。相觸耳足皆落。明日適之罷知政事。

唐人鬻餅狀況

任氏傳行及里門。門扁未發。旁有胡人鬻餅之舍。方張炭熾爐。暫往棲止。按此卽今日之燒餅。張炭熾爐。卽今日燒餅爐之狀況也。

唐時已不食狗

漢書樊噲傳以屠狗爲事。師古曰。時人食狗。亦與羊豕同。故噲專屠以賣。按自六朝以來。不見有以屠狗

爲業者然不敢確定其無有獨師古此注懼讀者不明故曰時食狗與羊豕同云云可見唐時已不屠狗而食矣至鄉曲偷狗盜雞私鬻狗肉者雖至今不免也

### 宋時食品之種類

老學庵筆記集英殿宴金國人使九盞第一肉鹹鼓第二燥肉雙下角子第三蓮花肉油餅骨頭第四白肉胡餅第五羣仙餚太平畢羅第六假團魚第七奈花索粉第八假沙魚第九水飴鹹鼓旋鮓瓜蜆看食聚錮子隨餅白胡餅饅餅按今去南宋時七百年耳其饅品無一與今同者而假團魚假沙魚尤不可解既無其物何必假者且宴外使必係盛饌而只九盞今普通朋友宴會尙不祇此亦足以觀世變矣

### 周以來飲酒狀況 造酒之法

周禮天官酒正掌酒之政令以式法受酒材又月令孟冬乃命大酋秫稻必齊麴蘖必時湛醴必潔水泉必香陶器必良火齊杜云同必得皆所謂酒材授者以其法授酒人也按秫者今之高粱北方以其米釀白酒俗所謂燒酒也醴者黍與黏稻湛醴者煮稻黍爲糜俟涼再加麴蘖盛以甕而釀之也今南方用稻北方用黍黍酒色黃俗曰黃酒而其法周時皆有之

### 古釀酒未熟既熟之識別

周禮天官酒正辨五齊漢杜子春讀同齊之名一曰泛齊二曰醴齊三曰盎齊四曰緹齊五曰沈齊按此

齊應依杜讀爲粢。粢者黍米。言始釀米泛起。繼而滓汁相將。有若醴然。繼而盎然大泛。成緹色矣。緹者黃赤相間也。終而齊沈汁清。酒成熟矣。五者皆釀酒之醴驗。舊注謂祭祀不尙味貴多品。若五齊爲五種酒者。誤也。

### 周時酒名

天官酒正辨三酒之物。一曰事酒。二曰昔酒。三曰清酒。按事酒者有事於祭祀。執事者得飲之。常用之酒也。昔者久也。今所謂陳酒也。清者藏之過久。無幾微滓滓。色愈澄。味愈烈也。

### 周時無燒酒

按五齊之試驗。及所謂湛醴。皆今時以黍爲糜。加麴蘖釀酒法。故屢以清濁及滓汁浮沈爲辨。若燒酒則全恃蒸氣。故其色白。唐李白詩云。呼童烹鷄酌白酒。是唐時已有燒酒也。惟不知始於何時。攷吳志韋曜傳。或密賜茶茱以當酒。茶色黃。故可當酒。是三國時仍無白酒也。

### 周時飲料之多

天官漿人。共王之六飲。水漿醴涼醫。酏。按漿者以水煮米。米汁相載。卽俗所謂米湯也。醴者甜酒。以黍糜釀之。少加麴蘖。釀數日。榨出卽味甘。今所謂甜黃酒。卽古之醴。涼者冰水。醫者梅漿二者。卽今之酸梅湯。而鎮以冰塊也。酏者飴也。卽今所謂餳和。以水而飲之也。五者醴與涼醫。今皆有。漿與飴。專作爲飲料者。

少也。

### 周以冰保持食味狀況

周禮天官淩人春始治鑑。凡內外饗之膳羞鑑焉。凡酒漿之酒醴亦如之。按鑑者注云如甌。大口以盛冰。貯食物以禦溫氣使不腐也。今都會夏日有冰之地仍如此。而開始於周。可謂久矣。

### 周時賣漿者獨多

莊子吾嘗食於十鑾。而五鑾先饋。又信陵君傳薛公藏於賣漿家。按十漿者注云十家並賣漿也。先饋者皆先饋進於己。今所謂競賣也。周時載記不見有賣他食物者。而賣漿者獨多。漿者飲料。古無茶。似以此供過客行旅之用也。

### 周時以酒爲刑 至晉猶然

周禮地官閭胥凡事掌其比。觴撻罰之事。注鄉飲酒有失禮者。則罰以觴酒。重則撻之。按觴者盛酒之器。輕則飲以酒。重則撻以鞭。然則罰飲亦刑之一也。又世說謝奕作剡令。有一老翁犯法。以醇酒罰之。是晉時亦以酒爲罰也。

### 古君臣有過皆可罰以酒

檀弓知悼子卒。未葬。平公飲酒。師曠李調侍。鼓鐘。杜蒧自外來。聞鐘聲。曰安在。曰在寢。杜蒧入寢。歷階而

升酌曰曠飲斯。又酌曰調飲斯。又酌堂上北面坐飲之。降趨而出。平公呼而進之曰黃。曠者爾心或開余。是以不與爾言。爾飲曠何也。曰子卯不樂。知悼子在堂。斯爲子卯也大矣。曠也太師也不以詔。告也是以飲之也。爾飲調何也。曰調也。君之褻臣也。爲一飲一食亡君之疾。是以飲之也。爾飲何也。曰黃也。宰夫也。非刀匕是供。又敢知防。是以飲之也。平公曰寡人亦有過焉。酌而飲寡人。杜蕢洗而揚觶。公謂侍者曰。如我死則必勿廢斯爵也。又晏子春秋。景公慙焉。舉觴自罰。又淮南子。魏文侯觴諸大夫於陽曲。飲酒酣。文侯喟然歎曰。吾獨無豫讓爲臣乎。蹇車舉白而進之曰。請浮君。罰也是君有過可罰以酒也。又晏子春秋。景公飲酒。田桓子侍。望見晏子。復於公曰。晏子衣緇布之衣。麋鹿之裘。乘棧軫之車。而駕駑馬。是隱君賜也。請浮晏子。公曰諾。晏子坐。酌者奉觴而進之曰。君命浮子。是臣有過亦以酒爲罰也。夫酒者人所喜飲。而以是爲罰。且以酒代刑。倘遇嗜飲者不愈得意乎。然其風至今未已。此等習慣殊不可解已。

周時賣酒卽懸旗幟而量酒則以升概

韓非子。宋人有酤酒。賣酒者升概甚平。遇客甚謹。爲酒甚美。懸幟甚高。然不售。怪其故。問長者楊倩。倩曰。汝狗猛也。人畏焉。或令孺子懷錢挈壺甕而往酤。而狗逐而齧之。此所以不售也。按懸幟甚高者。欲使人望而知爲酒家也。升者。所以量酒。概者。橫木過升口。卽知酒滿與否也。今以斗量豆米者。猶用之。謂之斗概。而古之量酒者亦用之。今則否矣。



### 古禮酒必和以水

禮玉藻凡尊必尚玄尊。惟饗野人皆酒。注尊尚玄酒。不忘古也。野人不得依古禮。故有酒無水。按此亦猶大羹不和之意。敬之至也。對野人無所用其敬。反得飲醇酒。此等古禮。於人情不適。故自漢以後無行之者。

### 古飲時安放尊壺規矩

禮少儀尊壺者面其尊。又玉藻惟君面尊。注而尊者尊鼻向君。君宴臣專其恩惠。若兩楹相見。尊鼻向兩楹間。在賓主之間夾之。不得專向君也。按兩楹相見者。兩國之君見於兩楹之間。堂之正中也。既有兩君。故樽壺不得專向國君。

### 古酒尊多以角製

詩曰酌彼兕觥。左傳觴曲沃人。禮揚觶皆酒尊也。而皆從角。今角尊猶有存者。底斂口侈。徑約三寸餘。上有華紋。其遺製也。

### 古盛酒多用皮壺

揚雄酒箴自用如此。不如鸕夷。鸕夷滑稽。腹大如壺。晝日盛酒。人復夜酌。常爲國器。託於屬車。又史記夫差怒盛以鸕夷。投之江中。按鸕夷製以皮。腹大口小。形扁。用以盛酒。旅行携之。絀於車箱。無震宕掃碎失。

酒之患。今出行携酒者仍用之。故子雲云託於屬車也。至夫差以鴆夷盛子胥尸。不過形較大耳。殆如今之酒壘矣。

漢人之賽酒多少須平均

史記灌夫傳。夫與長樂衛尉資甫飲。輕重不得。不平。夫醉搏甫。按此必衛尉飲少。不肯再飲。而灌夫飲多。故云不得其平。恚而搏之也。今飲者猶然。俗名曰對鍾。其黠者驅他人先飲。已則不飲。灌夫之用武。想亦如此也。

漢時貴人恃勢不肯多飲

史記魏其侯傳。灌夫起行酒。至武安。武安膝席曰。不能滿觴。夫怒因嘻笑曰。將軍貴人也。畢之時。武安不肯。按古人跪坐。以臂壓足。故兩膝外向。若致敬於人。身直豎。則膝著席。故謂之膝席。然人爲我酌酒。應避席伏。武安恃勢。祇膝席。又聲言不能滿觴。傲極矣。故夫不悅而責其畢飲也。

漢人行酒時禮節

史記魏其傳。武安起爲壽。坐皆避席伏。已魏其侯爲壽。獨故人避席。餘皆半膝席。灌夫不悅。按是時武安爲相。起爲壽者。爲斟酒畢。飲以祝壽爲名。今所謂敬酒也。避席伏者。言離坐席而伏於地也。今爲人行酒。人起立離坐致敬。古人不爾者。因席地坐。起立反不恭也。人以丞相故。皆避席伏。示不敢當。魏其亦曾爲

丞相則避席者少。膝席者多。膝席較避席傲多矣。夫感世態炎涼。故不悅也。細讀此文。漢時士夫酬酢狀。况有如目覩。

### 古飲酒一飲須一栴不盡則有罰

漢書敘傳。趙李諸侍中。皆飲滿舉白。孟康云。舉白者。見驗飲酒盡不也。卽今日飲罷倒栴示人。以見其盡也。師古曰。一說白者。罰爵之名也。飲有不盡者。則以此栴罰之。魏文帝與大夫飲酒。令曰。不酬者。浮以大白。然則古飲酒一飲須盡一栴。否則受罰。自周末已然。不似今人之可徐飲也。

音醺飲酒盡也。

### 古少者與長者飲亦一飲一栴俱有後先

禮曲禮。長者舉未酬。少者不敢飲。按此。益足證古人飲酒一飲須盡一栴。不然。長者尊未盡。少者先盡。則不恭矣。若如今日習慣。可徐徐飲之。則長者之盡爵。須時。少者永俟之。不敢飲。則不合矣。酬說文云。飲酒盡也。

### 唐時仍一飲一杯故有酒巡

張說虬髯客傳。酒既巡。博異記。食畢命酒。才一巡。王建詩。勸酒不依巡。黃輝詩。玉燭抽看記。飲巡。巡者。徧也。依次盡爵。徧飲爲一巡。蓋一人飲訖。再及一人。非若今日之一齊乾杯。是以靈應傳云。酒至賓主。集異記云。酒至溪神。楚異記云。上爲臨淄王時。遊昆明池。會諸豪家子飲。酒及於上。夫日至日及。則依次也。依次。

次則一飲一杯，非若今日之可任意也。後又讀任蕃夢遊錄，見五六人方宴飲，酒至紫衣，至白面年少，至黑衣，至綠衣，至黑衣胡人，至張妻，敍飲狀尤悉，愈足證前說之不謬。

漢魏人之鬧酒與今同

史記游俠傳，郭解姊子負解之勢，與人飲使之酺，非其任，強灌之。又陳遵招人飲，投轄井中，不使去。至登堂拜太夫人而逃。又吳志韋曜傳，皓每宴饗，坐無能否，率以七升爲限，雖不悉入口，皆澆灌取盡。觀此，則漢時酺酒之風，比今尤烈也。

唐凡宴飲皆設酒糾掌罰籌

玉泉子，昨日坡下郎官集，送某官出牧湖州，飲餞郵亭，人客甚衆，有倉部白員外末至，崔駢郎中作錄事，下籌，自以卑秩，人乘凌競，更固辭，上次酌四大器，白連飲三器，又崔郾爲京兆尹，三司使在永達亭子宴丞郎，崔乘醉突飲，衆人皆延之，時譙公夏侯孜爲戶部使，問曰：尹曾任給舍否？崔曰：無。公曰：若不曾歷給舍，尹不合衝丞郎宴。命酒糾來，要下籌，且喫罰爵，取三大器物，引滿飲之。按杜詩云：罰籌如蝟毛。蓋酒糾掌之酒糾，卽錄事專司。觴政，凡遇應罰者，皆酒糾執行。故皇甫嵩醉鄉日月云：懂之徵有十三錄事。貌毅而法峻人也。此尤足徵凡宴飲必設錄事以司觴政。錄事貌莊罰嚴，不徇私，故懂樂也。又鄭哲才鬼記：翹翹時爲錄事，獨下一籌，罰蔡家娘子。是雖女郎宴會，亦有錄事司罰等也。

漢行酒不用侍從

史記魏其武安傳。魏其侯爲壽。又武安起爲壽。灌夫起行酒。按爲壽者。特敬人酒。宜自斟。灌夫亦客。乃自行酒。又後漢馬武傳。世祖見之甚悅。每勞饗諸將。武輒起斟酌於前。世祖以爲歡。是君臣宴會。亦自起行酒也。

古至尊亦行酒

吳志虞翻傳。權旣爲吳王。歡宴之末。自起行酒。翻伏地陽醉。不持權去。翻起坐。權於是大怒。持刀擬翻。時權爲吳君已二十餘年。以如是尊位。君臣宴會。猶自起行酒。可見古人酒禮。至爲鄭重。故虞翻陽醉。伺權去。而又起坐。以示不醉。致權怒也。

漢時禁三人以上飲酒

漢書文帝紀。賜大酺五日。如淳曰。漢律三人以上。無故羣飲酒。罰金四兩。文帝施恩於民。使民得酺酒。五日以內。可羣飲也。

宋時主人勸酒必冠帶

老學菴筆記。前輩置酒飲客。終席不褫帶。後稍廢。然猶以冠帶勸酬。按勸酒。歡譔事耳。而猶必冠帶。趙宋時士夫威儀。猶敦謹如此。

古皇帝臨幸臣家必爲君具酒食至唐猶然

史記衛皇后傳上被霸上還過平陽公主既飲謳者進又東方朔傳帝過館陶公主主親上食奉觴又世說晉武帝嘗降王武子家武子供饌并用琉璃器食蒸純肥美異於常味又大唐新語房玄齡避位歸第時大旱太宗將幸芙蓉園觀風俗玄齡勸其子畝洒掃具饌曰乘輿必至既而帝果幸其第載入宮按後世人主過臣第既無宿設倉卒具饌必儉而不恭矣即能豐美而非飯時猶不敬也而古人不爾者似當時以飲饌爲一定禮節不然玄齡胡爲亟勸其子哉此等習慣宋以後即不見蓋君威日尊上下之情日益懸隔此亦其一端也

晉時遷官往賀者皆款以酒食

世說羊曼拜丹陽尹客來早者並得佳設日晏漸罄不復及精隨客早晚不問貴賤羊固拜臨海竟日皆美供雖晚至亦獲盛饌按今日賀人遷擢無有具食者祇婚嫁有之疑晉時賀人遷官其周旋禮節與今賀婚嫁同也

古食時不飲酒食後飲酒唐宋猶然

今日宴會皆先飲酒後食古則與今正相反觀曲禮及弟子職魏晉傳記載食事甚多而皆不及酒其飲酒者皆非食時如世說晉武帝幸王武子家武子設蒸豚盛饌而不言飲何酒又如王恭請江慮奴爲長

史晨往詣江，江猶在帳中，王坐不敢卽言，良久乃及。江不應，直喚人取酒，自飲一盃，王笑曰：「那得獨飲？」江曰：「卿亦復須耶？」他紀飲酒事尙多，而皆非食時。

此等習慣，至唐宋猶然。段成式《諸泉記》、許漢陽傳、食訖命酒，又虬髯客傳、公訪虬髯對饌訖、陳女樂二十人列奏於前、食畢行酒，又宣室志、旣設饌共食，食竟飲酒，靈鬼志、食畢命酒，又徐巖物怪錄、六七八人共食，食畢命酒，歎飲，又段成式《異疾志》、烹鷄設食，食畢，貰酒欲飲，是唐時宴會皆食後飲酒。若今之食後飲茶，老學菴筆記、記政和時宴北使，共九盞，每盞盛何食，皆一一詳載，而亦無酒。夫宴外國使，必盛設矣，倘有酒，必與饌名並詳，而竟不及，以是證宋時飲食次序，仍不與今同也。

### 歷代飲食時席地用牀用桌之狀況

此等狀況，可分三期。自漢以前，席地坐，卽席地食，如弟子職所謂坐必盡席者，因不盡席則去食太遠也。又曰：亦有據膝，毋有隱肘，注隱肘則身太伏，太伏則失儀矣。凡此皆席地食之證。此一期也。自漢末至五代，多坐牀，食時卽置飲食於牀。段成式《劍俠傳》：「遂揖客入宴，升牀當席而坐。」二少年列坐兩旁，陳列品味。又虬髯客傳：「行次靈石旅舍，旣設牀，烹羊肉且熟，遂環坐食羊肉。」又墨崑崙傳：「附記彭博通嘗會飲日暝，獨持兩牀降階就月，酒釀之類，略無傾瀉。」又孫願《幻異志》：「板橋三娘子先起點燈，置新作燒餅於食牀上。」又五燈會元：「奉化趨倒餐牀，蓋自唐以前卽置食物於坐牀上。」唐末五代時，別有食牀，略如今之矮方桌。

此一期也。至北宋高座行，有倚子杌子，因又有卓子。俱見後。其飲食時置列狀況，遂與今同。此又一期也。



## 卷八

行唐尙秉和著

### 車馬部一

#### 周馬車箱及輪廣衡長尺寸

今人讀古書至車馬往往不能解由不明其車馬形象也明其形象則豁然矣按攷工記兵車之輪六尺有六寸乘車如之又與人云輪崇車廣衡長三如一注衡者轅端橫木所以扼馬領使不得脫三如一者言三者皆六尺六寸也又參分車廣去一以爲隧注與深也疏隧謂輿之縱輿橫六尺六寸三分取二得四尺四寸以爲縱卽車箱廣六尺六寸長四尺四寸與今制正相反也

#### 周車式高矮寬廣尺寸

周禮輿人參分其隧一在前二在後以揉其式以其廣之半爲式崇注式深尺四寸餘高三尺三寸按車隧箱長四尺四寸三分一則一尺四寸餘也以是爲式之寬度車廣六尺六寸半之則三尺三寸式者憑也高三尺三寸然後可憑然古人立乘必致敬於人方憑式其尋常則憑較輿人又云以其隧之半爲之較崇注較兩轆上出式者式高三尺三寸加較高二尺二寸共高五尺五寸轆者方望溪云植於輿之兩

旁者爲轆，橫於轆間，當車前而爲人所憑者爲式。轆陷於隧間，式關於轆間，而不可動搖，故亦曰揉。按較者亦橫木，高於式二尺餘，立乘憑之，高矮方適宜。故詩云：倚重較兮。惟較在式上，故云重也。詩疏云：較高於軾。同式轆是兩旁植木，較橫轆上。古者立乘，平常立則憑較，及應爲敬，乃俯憑軾。吳淑和云：車箱長四尺四寸，以三分之前一後二，橫設一木，去車床即車底三尺三寸，謂之式。又於式上二尺二寸，橫設一木，謂之較。古人立乘，平常憑較，敬則落手下，憑式而頭得俯由。以上諸說，攷之古馬車制度，如目覩矣。

### 周馬車一轅尺寸及形狀與馬駕車之法

攷工記：轡人爲轡，軌前十尺而策半之。按兩轍之間爲軌，軌前十尺者，言車轅。即轡伸出隧外，當軌者長十尺也。又云：任正者，十分其轡之長，以其一爲之圍。按任正者，古馬車祇一轅，在正中，其後端與後軫齊，下托車床，車床長四尺四寸，合隧前之轅十尺，共長一丈四尺四寸，十分一，即一尺四寸四分。轅周圍之度也。又衡任者，五分其長，以其一爲之圍。注：衡任謂兩軛之間，疏：服馬有二，一馬有一軛，軛者厄馬領使不得出，則當軛頸之處，費力之所也。故其圍加倍，否則易毀。按服馬者，一轅居正中，轅之兩旁各駕一馬，負衡引軛，車始能行。詩所謂兩服上襄也。若駕四馬，則兩服馬之外，各有一馬，謂之騂。詩所謂兩騂雁行兩騂如舞也。左傳哀十七年：良夫乘衷。同中甸。同乘兩牧。注：兵車一轅，二馬夾之，其外更有二騂，是謂駟馬。今止兩牧，蓋以四馬爲上乘，兩馬爲中乘，又家語：孔子一車兩馬，此皆止有兩服，而無兩騂，頸者轅之

前。端。向。上。作。微。弧。形。有。若。頸。車。行。之。力。全。在。此。圍。若。與。前。等。恐。折。也。

### 周車蓋狀況

攷工記。輪人爲蓋。達常圍三寸。注。達常。斗柄。下入杠中者。梃注。同楹。柱也。圓倍之六寸。注。圓倍。故足。以舍達常。信其梃圍。以爲部

斗。注。蓋。廣。部。廣六寸。徑六寸。備四面。鑿孔以納弓。部長二尺。梃長倍之四尺者二。八尺。十分寸之一。謂之枚。所以支弓。鑿

廣四枚。注。弓。骨。鑿上二枚。鑿下四枚。注。上用力小。下用力大。上欲尊而宇下曰。宇。欲卑。上尊而宇卑。則吐水疾而霑遠。

蓋已。太也。尊則難爲門也。蓋已卑是蔽目也。是故蓋崇十尺。良蓋弗冒弗紘。冒。覆布。紘。係繩。般飲而馳不隊。是謂

國工。按王光遠云。蓋之制。上爲部。中爲達常。下爲梃。旁爲弓。所以。達常。小於梃。梃小於部。非部無以納

弓於其旁。非梃無以含達常於其中。蓋古車蓋。鑿於車中。其柄分爲三部。在下者爲楹。中爲達常。達常圍

三寸。楹圍六寸。而有孔。故可含達常於其中。在上者爲部。部徑六寸。長二尺。其上端鑿孔以納弓。以爲蓋

骨。其下端鑿孔以納枚。以支蓋弓。而含達常於其中。以爲張弛。部二尺。楹八尺。故知蓋高一丈。蓋原以避

日雨。故曰上尊字卑。則吐水疾而霑遠。

蓋已崇則難爲門者。門字注疏皆不詳。吾疑卽車板上納楹之穴也。穴之上必更有關以爲固。太高則障

風。關則毀矣。故曰難乎其爲門。

### 古車蓋可解下至漢猶然

周禮夏官道右王下則以蓋從。注蓋以表尊。疏車蓋有二。一禦雨。一表尊。此則表尊也。按古車蓋。櫪之下端。插於車中。而中含達常。故可持下。以達常爲柄。持覆尊者。非貴人不許御。故後世以冠蓋爲卿士之代稱。班孟堅西都賦。所謂冠蓋如雲也。又漢書上官皇后傳。天大風。車不得行。解蓋授桀。桀奉蓋。雖風常屬車。兩下蓋輒御。上奇其材勇。觀是則漢時車蓋。仍能解下。制與周同也。

周車輪狀況 澤行輪如刃

攷工記。輪人凡爲輪。行澤者欲杼。行山者欲倅。杼以行澤。則是刃以割塗也。是故塗不附。倅以行山。則是搏以行石也。是故輪雖敝。不類於鑿。按杼者。注云削薄其踐也。倅上下等也。輪之踐地者。薄。故泥不附。而行速。輪上下等。則堅。故石雖撞而不敝。不類於鑿者。謂不動於鑿中也。

周車輞用火鑄之無鋸故也

攷工記輪人。凡揉牙。車輞外不廉而內不挫。廉絕也。挫折也。外不廉而內不挫。挫折也。旁不腫。實起。謂之用火之善。是故規之以眡其圓。按輪之外圍。古謂之牙。今謂之輞。用以安輻。今製輞之法。用至堅之棗木。鋸解爲片。裁作彎形。銜接爲規。古無鋸。以火烤棘木。使彎。晏子春秋。今夫車輪。山之直木也。良匠揉之。其圓中規。是其證。烤失火。候則外面易崩絕。內易傷折。而旁虞腫起。復恐其不圓度之。以規。今仍如此。則輪成矣。夫鋸者。木作之不可離者。而古無之。至以火彎鉅木成輪。此古木器之所以難歟。

周輪不敷鐵輪末以木爲齒

攷工記輪人。既其綆欲其蚤。同爪之正也。又六尺有六寸之輪。綆三分寸之二。謂之輪之固。注綆者。輪算也。疏凡造車輪。皆向外算。謂輪末出牙外向外算。則車不掉。震動正者。謂爪入牙中。鑿孔必正直。不隨邪也。三分寸之二者。注謂出於輻股鑿之數也。按出於輻股鑿之數者。謂輪末穿出輦外三分寸之二。使輦不親地。用以護輦。故謂之固。且車行穩。故曰不掉。若今世。則以鐵敷輪。固於古遠矣。而山西所產車輪。且以鐵爲齒。護輦四周。殆仍周算之遺意也。

又按綆。注輪外周。注謂輪算曰綆。其形狀至不明了。今釋經義及孔疏。知綆者。並非別一物。敷於輪周。如今世之輪鐵。乃輻之末端。即爪出牙外三分寸之二也。故曰既其綆欲其蚤。同爪之正。明蚤與綆非二物。即輻股末端之牙者。爲爪。爪穿出牙外者。爲綆。故既綆。則知蚤正。然鄭注算之義。仍不明了。按說文云。算者。蔽也。所以蔽飯底。蓋隔飯。使不親飯。今輻末外出六分餘。間一鑿凸出一綆。而牙上未鑿孔之處。則凹六分餘。凹凸相間。有若算形。算著地。使牙不親地。故輪安而固。方望溪謂。今時車牙外。今謂輦以鐵葉裹之。綆之制。疑類此。於注疏之義。全不合。蓋誤以綆與輻爪爲二物。若爲二物。則既綆與爪。正有何關哉。

周牛車兩轅狀況

攷工記車人。柏車。山車轂長一柯。大車。任載平地之車崇三柯。羊車。鄭云。羊善二柯。徹廣六尺。兩長六尺。注兩轅。

端。厥牛領者疏。牛車兩轅。一牛在轅內。故高狹。按轅廣六尺者。言比馬車皆狹六寸也。車狹六寸。因而牛高比馬衡亦皆短六寸。明三者皆牛車也。柯者斧柄。三尺爲柯。馬車輪崇六尺六寸。牛車大則輪崇九尺。羊則輪崇六尺。柏車由渠二柯者三計之。則輪亦崇六尺也。鄭說羊爲善。似有安穩之意。鄭恐人不明。云若今之定張車。而未詳說。至孔作疏。又隔數百年。復不能詳定張之義。故羊車之語。訖不能無疑也。

牛車箱縱長橫狹與馬車相反

攷工記大車崇三柯。綆輪寸。牝服車箱二柯有同又三分柯之二縱八尺。羊車二柯有三分柯之一縱七尺。柏車二柯箱縱六尺。方望溪云。乘車崇六尺有六寸。綆三分寸之二。大車輪加崇九尺。故綆加廣。乘車之軫六尺有六寸。又三分去一以爲隧者。御與左右並乘橫排三。必橫廣乃能容六尺。而縱不必長也四尺。大車徹廣六尺。而牝服則八尺者。橫狹而縱長。然後載物多而車行安也。按牛車之箱與馬車廣狹正相反。所以然者。馬車載人。牛車載物也。方云綆加廣。廣字誤。綆爲爪穿出者耳。綆寸者。乃長一寸也。

牛車之轅長於馬車

攷工記。車人凡爲轅三其輪崇。三分其長。二在前。一在後。以鑿其鉤。按三其輪崇者。柏車羊車輪崇六尺。而轅長則一丈八尺也。大車輪崇九尺。而轅則二丈七尺。若馬車輪崇六尺六寸。轅止一丈四尺四寸。較牛車則短也。一在後以鑿其鉤者。疏云。言以一分託輿板。鉤者轅之鉤心也。就轅鑿孔納杙。以鉤車箱也。

按疏說非也。牛車既兩轅，每轅鑿孔，剡兩杙，下垂以夾車軸，而激輪行，非上鈎車箱，因車箱兩邊盡託於兩轅之上，轅動箱即行，不須鈎心。此其誤皆由富貴人未親觀其物，故說每不合也。

### 牛車轅前端亦曲

攷工記：「轅人凡揉。」

以火煬之，使曲，或使直。

轅

轅也。

欲其孫而無弧深。今夫大車之轅，

同直。

其登又難。既克其登，其

覆車也必易。此无故，轅直且無橈也。

曲也。

是故大車平地既節軒轅之任，

前後輕重相稱。

及其登陴，阪也。不伏其

轅，抑之使

必繮其牛。此无故，轅直且无橈也。按必繮其牛者，因不伏轅則車後仰，後仰則牛吭受羈絆之

絛，不能用力矣。轅曲則无是，又故登陴者，倍任者也，猶能以登。

言任建重，猶能登。

及其下陴也，不援其邸。

同底。

必繮其牛後，此无故，轅直且無橈也。按必繮其牛後者，因下陴時車下行速，故以手援車底之前端，以緩

其行，否則崩奔而下，牛後爲絆。

左傳注：後曰絆。

在所繮而仆矣。轅曲則免。

按古牛車兩轅，牛居中，以鬲被牛領，引車使行，與今同。而轅曲則與今異也。又觀文義，似當時民多有爲

直轅者，故經再三言之。然曲轅難爲，且不堅，故今無曲轅者。

### 周時立乘執綏

論語：「升車必正立執綏，惟立乘故易墮。」史記張儀傳：「張儀至秦，詳曰：『失綏墮車，不朝。』按綏者，升車用之，兩轅所謂并轡授綏也。此云正立執綏，失綏墮車，則乘車時亦手不釋綏也。釋綏則傾跌隨之，是綏有二

用一登車爲引一乘時恃以爲安也。

惟立乘故須有驂乘

古御者居中尊者居左右則驂乘驂乘者所以護持尊者防其危險故亦名車右曲禮云至于大門命車右就車門闔溝渠必步是也又左傳逢丑父命公齊頃公下取飲因丑父先與公易乘公爲車右故僞命公取飲因以逃也又襄二十三年鞅請驂乘持帶遂超乘右撫劍左援帶是范鞅意雖劫魏獻子而持帶援帶皆所以護尊者使不跌則驂乘之職務也又公羊傳陽虎囚季孫將出而殺之以其弟陽越爲右至於孟僖臨南投策而墜之陽越下取策臨南駮捶馬銜焉季孫竟免以此證車右之職不惟護持尊者即御者有事亦車右下車爲役故得遣陽越監季孫而免季孫也

周國君登車時狀況

曲禮君車將駕則僕執策立於馬前已駕僕展視也軛車關效駕白已稽衣由右上取貳綏跪乘執策分轡馳之五步而立先貳君出就車則僕并轡授綏左右攘辟車驅而騶至于大門君撫僕之手而顧命車右就車按并轡授綏者并六轡及策於右手以左手轉身向後授君正綏使上也辟者辟行人攘者攘臂指揮至大門始命驂乘登也

古爲婦人御禮節



曲禮。僕御婦人則進左手。後右手。坊記亦云。御婦人進左手。疏。僕在中央。婦人在左。僕御之時。進左手持轡。使形勢相背。若進右手。則近相嚮。不能別嫌。

### 古乘車尙左

史記。信陵君傳。公子從車騎。虛左自迎侯生。又戰國策。及說苑。秦王乃自駕千乘萬騎。虛左方自迎太后。養陽宮。按古人尙右。獨乘車尙左。所以然者。古乘車橫長而立。乘故尊者須人護持。而御者立於當中。尊者居左。驂乘從右扶持之。其勢順。易置則不順也。若兵車則御者居左。元帥居中。詳見後。

### 古車蓋朱色可傾仄用之

韓非子。管仲出。朱蓋青衣。置鼓而歸。又晏子春秋。擁大蓋。策駟馬。又說苑。孔子將行。無蓋。弟子曰。子貢有蓋。又家語。孔子遇程子於途。傾蓋而語。志林云。傾蓋者。道行相遇。駢車對語。兩蓋相切。小語之義。故傾蓋也。按東坡釋。傾蓋較他書得之矣。而仍不詳。古車蓋可豎可解。此必程子車上無蓋。孔子與駢車對語。解蓋使傾仄。並以蔭程子也。若兩蓋相切。胡云傾哉。

### 古登車時有乘名

周禮。夏官。隸僕。王行洗乘石。注。王所登上車之石也。又詩。小雅云。有扁斯石。履之卑兮。又淮南子。周公踐東宮。履乘石。是不惟君登車履石。臣亦然也。

古在車上行式禮狀況

周禮夏官齊右掌祭祀會同賓客前齊車王乘則持馬行則陪乘凡有牲事則前馬又曲禮國君下宗廟式齊牛按牲事者卽式齊牛也古者祭祀最重牛牲故國君在車上遇齊牛則致敬而式凡式視馬尾當須端拱拱手手不持綏斯時最易傾跌故齊右下車前馬使卻行以免驚奔

古乘車遇人多亦式

魏文侯式段干木之廬是敬其人而式其廬也又韓詩外傳荆伐陳陳西門壞因其降民使修之孔子過而不式子貢執轡問曰禮過三人則下二人則式今陳之修門者衆矣夫子不爲式何也是可證遇稠人廣衆亦式也

周婦人車有衣又不立乘故不外露

曲禮婦人不立乘疏婦人質弱不能立乘須坐乘也又詩衛風翟茀以朝又淇水湯湯漸車帷裳又左傳定九年載蒍蕢寢於中以逃按翟者羽也注婦人乘車不露見車之前後設障以自蔽謂之茀蕢靈者注云輜車名也說文輜駟衣車也是皆婦人之車也惟不外露故可託婦人寢於中以逃婦人車有衣又不立乘故男有車右婦人無驂乘也左傳閔二年歸夫人魚軒魚軒者以魚皮爲飾亦婦車也

古爲國君及婦人御儀式

曲禮。僕御婦人則進左手。後右手。御國君則進右手。後左手。按進左手者。以左手持轡也。婦人在左。左手持轡。則形相背。可別嫌。御國君則反是。又以面君爲敬也。由此證之。婦人不必盡乘衣車也。

### 古御者鞭策之端有鍼

淮南子道應訓。白公慮亂。罷朝而立。倒杖策。鍼音注鍼也上貫頤。血流至地而弗知也。又今有良馬。不待策。鍼而行。驚馬雖策。鍼之不能進。爲此不用策。鍼而御則異矣。又韓非子。延陵卓子乘蒼龍與翟文之乘。前則有錯飾。後則有利鍼。又孔叢子。左手執轡。右手運策。按策者。馬捶端有鍼。曰鍼。倒杖策。故鍼貫頤。流血至地也。蓋古御者以策捶馬。並以策端之鍼刺馬。使速行。虐亦甚矣。左手執轡。右手運策者。左司靜職。右司動職。古與今同也。

### 古以脂油膏車

詩衛風。載脂載膏。旋車言邁。又小雅。爾之亟行。遑脂爾車。箋。臺車軸頭金也。古者車不用則脫其臺。又史記齊世家。淳于髡曰。稀膏棘軸。所以爲滑也。然而不能運方穿。按臺者。以鐵杙插於軸頭。使輪不外脫也。軸與轂相摩處。皆金。得脂則滑。古無植物油。皆用獸油。棘木者。棗木也。性堅。今北人猶以爲軸。

### 古棧車飾車寬狹之不同

攷工記。棧車欲弇。飾車欲侈。注。棧車無革鞅。易壞。飾車謂革鞅車也。弇者。車箱微向內。侈者。微向外。革鞅

者以革覆輿及轂再加漆畫堅而美觀故曰飾車按巾車職云大夫以上乘飾車士乘棧車棧車者柴車也晏子常乘以朝不顯君賜景公欲浮以酒者是也棧車不堅故箱欲狹飾車堅故箱宜闊亦各因其材也

周時已有僱車

新序甯戚欲干齊桓公窮困無以自進於是爲商旅賃車以適齊暮宿於郭門之外桓公郊迎客夜開門辟賃車者執火甚盛從者甚重甯戚飯牛於車下望桓公而悲擊牛角而歌按賃者借傭也史記范雎傳爲人傭賃是也今謂之僱爲商旅賃車者言以租賃牛車爲業爲人載重也周時無客店故宿於門外衢旁公出使辟也呂氏春秋亦載此事作將任車高誘注云任亦將也後儒駁之訓任爲載皆非是任者賃之省字集韻云賃或作任是任賃同義也

周時車箱內鋪席馬身上被衣

韓非子簡主謂左右車席大美吾將何履以履之又左傳或濡馬褐以救之注馬衣也按馬出汗弛駕時懼傷風步馬者因被以衣左傳襄二十六年左師見夫人之步馬者正茲時所用也步馬者恐馬過勞弛御後遽與芻秣飽食致病乃牽行空處徐徐往還以調其氣今謂之溜馬而杜注解步馬爲習馬失其義矣

周時非命民不得乘飾車駢馬

說苑古者必有命民民有能敬長憐孤取士好讓居止方者命於其君然後得乘飾車駢馬未得命者不得乘乘者有罰故其民雖有餘財侈物而無仁義則無所用之故其民皆興仁義

古驚車狀況

荀子定公問於顏淵曰東海子之善馭乎對曰善則善矣雖然其馬將失定公不悅入謂左右曰君子固讒人乎三日而校來謁曰東海畢之馬失兩驂列同裂兩服人廐注兩服馬在中兩驂馬在外擘裂中馬牽引而入於廐也

周末貴人車從之多因是證明數事

說苑子路曰吾親歿之後南仕於楚從車百乘韓詩外傳田子方之魏魏太子從車百乘迎於郊呂民春秋匡章謂惠子於惠王之前曰螻螟農夫得而殺之爲其害稼也今公行多者數百乘步者數百人少者數十乘步者數十人其害稼亦甚矣孟子從車數十乘按古從車若是之多者一以表威一因古無售食物之商店凡旅行皆自持米糧釜鬲自造食物而庖人之屬亦須追隨故須多車載之然亦無須數百乘芻藳雷殷行列數里其狀甚怪而訖不解其義之所在然因是又證出當時社會二事一燃料易隨處皆有人雖多造食不艱一芻秣賤馬雖衆易養也

戰國時賞賚恆以車

莊子宋人有曹商者爲宋王使秦其往也得車數乘王說之益車百乘反於宋見莊子曰夫處窮閭阨巷困窘織席槁項黃馘者商之所短也一悟百乘之主而從車百乘者商之所長也莊子曰秦王有病召醫破癰潰痤者得車一乘舐痔者得車五乘所治愈下得車愈多子豈治其痔耶又有見宋王者錫車十乘以其十乘驕釋莊子此以今社會觀之以一寒士乍得車數十乘其夫馬何以養之又何所用之售於人乎則君賜也置於家乎則虛耗也而得之者反喜而驕人則不得當時社會之眞情况矣

古兵車狀況

古兵車皆以革鞅之使堅所謂革車三千乘也而無蓋尊者則籋人執笠依轂而立以禦寒暑左傳宣三年又射汰鷁以貫笠轂是也而有肩肩者兵闌排置兵器左傳宣十三年晉人或以廣隊不能進楚人恭之脫肩是也肩脫則車輕有旆旆者帥旗豎於車上進居前退殿後左傳少進馬旋楚人又恭之拔旆投衡是也拔旆臥衡上則不帆風車行速而馬亦被甲左傳成元年齊侯曰余姑翦滅此而後朝食不介馬而馳之注介甲也其車制廣狹皆與尋常乘車同

古兵車尊者居中

左傳成二年韓厥代御居中杜注云自非元帥御者皆在中將在左可證兵車元帥及君皆在中也又詩

左旋右抽，鄭箋左左人，謂御者，右車右也。中軍謂將也。兵車之法，將居鼓下，故御者在左。

### 古兵車有樓車

左傳宣十五年，登諸樓車，使呼宋人而告之。樓車，高登之可與城上人語，否則不聞也。又成十六年，楚子登巢車而望晉軍，巢車蓋亦上有樓。若鳥巢然，登之則敵人動靜虛實皆在望中，其高蓋有數丈，不然晉人夷竈塞井設幕，不得清晰如是，惟其高如是，其廣若干，輓以馬乎？推以人乎？如何而後免傾危之患，其詳制則不可攷矣。

### 兵車上建旗狀況

周禮春官司常，交龍爲旂，釋名旂倚也。畫作兩龍相依倚也。又爾雅有鈴曰旂，注懸鈴於竿頭。又說文旂有衆鈴以合衆也。是旂者畫兩龍於上，復於竿頭懸鈴以爲號令也。又春官司常，熊虎爲旗，注畫熊虎者言其猛莫敢犯。又釋名熊虎爲旗，軍將所建，象其猛如虎，與衆期其下，是旗者期也。畫虎以象威，與衆期其下，以聽誓約也。而旗之末曰旂，博雅天子十二旂至地，曲柄者曰旂，而軍帥所建者曰旂，進則居前，左傳桓二十八年，子元御疆闔梧耿之，不比爲旂，注子元自與三子持建旂以居前，疏行軍之次，旂最居前是也。退則殿後，左傳宣十二年，令尹南轅返旂，旂者旂之末，郭璞云旂帛全幅，長八尺，旂帛續旂末爲燕尾，釋名云魚蛇爲旂，建之於後，所以察事宜之兆者是也。

旗之長度有等差

新序司馬子期獵於雲夢載旗之長拖地。天子方至地芋尹文拔劍齊諸軫而斷之。子期曰吾有罪於夫子乎。對曰臣以君旗拽地故也。國君之旗齊於軫大夫之旗齊於軾。

古國君旅行以車爲宮轅爲門

周禮天官掌舍掌王會同之舍設檜板再重設車宮轅門。注凡會同必於野故以車爲宮以轅爲門而於其中設帷幕按以車爲宮者將車環列四周以爲垣以轅爲門者將兩轅豎起於左右上建旗幟中出入以爲門也。而今之衙署兩邊出入之門仍名轅門豈不誤哉。



## 卷九

行唐尙秉和著

### 車馬部二

#### 西漢時車馬狀況

西漢時車馬大致與周同而漸異。周時惟王后得坐乘，雖天子皆立乘。漢則大車立乘，安車坐乘。周時男車無有帷者，漢則男子乘輜車有檐帷。周時馬車一轅，至少駕二馬。漢則可駕一馬，是漢時乘車亦雙轅，與周牛車同也。此其大略也。若東漢末則更異矣，以次述之。

#### 西漢仍立乘

周亞夫傳：天子爲動，改容式車。師古曰：古者立乘，凡言式車者，謂俛身撫式，以禮敬人也。又漢書成帝紀：升車正立，不內顧。又韓安國傳：安國行丞相事，引墮車蹇，如淳曰：爲天子導引而墮車蹇也。按惟立乘則式車，惟立乘則危而易墮。後漢輿服志所謂立車，徐廣所謂高車者是也。若周時皆立乘，則無立車之名。立車者所以別於安車也。

#### 西漢初已乘輜駟車

張良傳。上雖病。彊載輜車。臥而護之。師古曰。輜車。衣車也。又後漢輿服志。舊典傳車。驂駕乘赤帷裳。惟郭賀爲冀州。勅去襜帷。又昌邑王傳。使大奴以衣車載女子。又後漢劉盆子傳。乘屏泥絳襜褕。注。車上施帷以爲屏蔽。交絡以爲飾。是自西漢初。男子已乘帷車。後遂衍成風俗矣。

漢時乘車兩轅漸改周制

漢書鮑宣傳。宣行部乘傳。去法駕。駕一馬。爲衆所非。坐免。按周時乘車。一轅居中。至少兩馬。在轅左右。駕之。若一馬。則衡偏而難用力。茲云。駕一馬。必雙轅。車而馬居中也。與周載重之牛車正同。又後漢江革傳。革以母老。不欲搖動。自在轅中。執車不用牛馬。夫旣曰轅中。則兩轅之間矣。可證一轅立乘車。在漢時。惟法駕及禮車。或有之。尋常乘車。皆雙轅矣。

漢時坐乘之安車開周所未有

漢書申公傳。於是上使使東帛加璧安車。以蒲裹輪。駕駟迎申公。又枚乘傳。始以蒲輪迎枚生。又杜延年傳。賜安車駟馬。罷就第。按後漢輿服志。安車立車。徐廣曰。立乘曰高車。坐乘曰安車。又按晉書輿服志云。按周禮。惟王后有安車。王亦無之。自漢乃有之。有青黃赤白黑五種。是安車創自漢。漢以前無有也。人情好逸而惡勞。自是以後。歷魏晉至齊梁。立車遂絕迹。無不安車矣。

漢安車上有蓍有懸

漢書甯成傳。俱在二千石列。同車未嘗敢均茵憑。又世說汲黯與周陽由共車。未嘗敢均茵憑。又丙吉傳。西曹第忍之。此不過漢丞相車茵耳。又五行傳。或乘小車。御者在茵上。師古曰。車小不得迴避。而在天子茵上也。蘇林曰。在茵上坐也。此皆坐乘之安車也。若立乘之車。則茵憑無所謂。均。惟安車亦廣。故能容二人並坐。其謙抑自下者。斂身偃處。占地遂狹。故曰不敢均。然安車仍有憑者。以古人車上亦跪坐。非若今世之箕踞得憑以爲扶。則安穩不倚。人見人亦可式。惟無重較耳。

#### 漢時貴人皆朱輪

漢書楊惲傳。惲家盛時。乘朱輪者十餘人。又翟方進傳。遣使者以朱輪授孫賢。又李尋傳。將軍門九侯。十二朱輪。按後漢輿服志云。公列侯安車。朱斑輪。是朱之中尙有斑文以爲美。此制相沿最久。自西漢訖清末二千餘年。皆如是。惟後世輪朱而不斑耳。

#### 漢時較軾益華美

後漢輿服志。安車倚鹿較。伏熊軾。皂蓋。注倚鹿較者。畫立鹿於車之前。兩藩外也。伏熊軾者。車前橫軾爲伏熊之形也。按畫立鹿於兩藩外者。因安車無須較。故祇畫其形以爲美觀。而軾則仍舊軾。卽憑也。前謂安車無重較者。以此證明也。

#### 漢時駟馬須一色

漢書食貨志。自天子不能具醇駟。師古曰。謂駟馬雜色也。按此言與匈奴大戰後。馬多物故。雖天子駟馬亦雜色。不能醇一。是可證未戰前。凡乘駟馬者。皆四馬一色也。

西漢時仍有驂乘

史記袁盎傳。上朝東宮。趙談驂乘。又衛綰傳。詔中郎將驂乘。還而問曰。君知所以得驂乘乎。又漢書霍光傳。宣帝始立。謁見高廟。大將軍光從驂乘。上內嚴憚之。若芒刺在背。後車騎將軍驂乘。天子從容肆體。凡此皆禮斗立乘。故仍有驂乘。以爲護持也。

漢時對尊者登車爲不敬

漢書佞倖傳。莽求見太后。具言淳于長驕佚。欲代曲陽侯。對莽毋上車。師古曰。上車當於異處。便於前上。言不敬。按今日登車時。如長者在。前須迴避。長者登之。猶漢之遺俗也。

西漢士夫因貧始乘牛車

漢書食貨志。自天子不能具醇駟。而將相或乘牛車。朱家傳。乘不過輶牛。晉灼曰。輶牛。小牛也。蔡義傳。以明經給事。大將軍幕府。家貧常步行。門下好事者相合。爲買犢車乘之。朱義傳。常居鄴田。乘牛車。又史記五宗世家。其後諸侯貧者。或乘牛車也。是皆因貧而乘。蓋自武帝征匈奴後。馬少。貧者不能置。故乘牛車。而諸侯王尤國之貴族。亦乘牛車。於是社會慕之。乘者漸多。演爲風俗。至魏晉時。雖極富貴人家。亦無不

轎耳矣。

西漢時官吏法駕皆馬

漢書朱買臣傳。買臣既爲會稽太守。有頃長安廐吏乘駟馬來迎。張宴曰。故事大夫乘官車。駕駟。按駕駟者。四馬相並。仍兩服兩轡也。立車也。東海于公令高大門閭。能容高車駟馬。誠以門不廣。四馬不能並入。不高亦不能容立車也。

漢官吏不法駕則免官

漢書鮑宣傳。宣行部乘傳去。法駕一馬。舍宿鄉亭。坐免歸。又韋玄成傳。祀孝惠廟。天雨淖。不駕駟馬而騎至廟下。有司劾奏。削爵爲關內侯。又後漢謝夷吾傳。遷鉅鹿太守。後以行春乘柴車。從兩吏。刺史上其儀序失中。有損國典。左轉下邳令。按古時官威甚肅。蓋以爲人既爲官。卽有官之威儀。若放棄定制。以平民自列。卽爲蔑視法令。故須免官。至於騎行。自周以來無之。至漢時非行陣而騎者。乃騶從耳。若以大官而騎。則有失官儀。况祭廟重禮。尤不可乎。

漢初隨從車乘仍多

漢書酈通傳。武臣以車百乘。騎二百迎徐公。是仍有戰國豪侈之餘習。以騎兵二百迎人。以爲行列威武。雖至今有之。而車百乘。則不得其義矣。

漢賈人不得乘馬車騎馬

漢書高帝紀賈人不得乘騎馬言不得乘馬車並騎馬也。又輿服志賈人不得乘馬車除吏。古以商賈不耕不織惟利是圖故抑之使不得列於良民。然百貨之流通商賈是賴便民利用莫大於是。故先王特創市廛以居商賈。秦漢以來蓋逐末者漸多恐其傷農故爲是虐政。若成周則無是也。

漢車蓋顏色物質

景帝紀中六年詔三百石以上皂布蓋千石以上皂繒覆蓋二百石以上白布蓋按繒者帛也官尊以帛卑以布色則皂爲貴白爲卑。

後漢時車上羽蓋

後漢虞延傳光武到魯還經封丘城門門下小不容羽蓋帝怒使撻侍御史按羽蓋者蓋上飾以羽爲美觀門下不能入按前漢黃霸傳賜車蓋特高一丈天子之蓋蓋亦高一丈車高四尺共高一丈四尺故縣城門不能入然解下則無以表尊故帝怒。

後漢時男子皆乘帷車而賤輶車

後漢書楚王英傳遣大鴻臚護送得乘輶輶蒼頡篇曰衣車也。又袁紹傳士無貴賤與之抗禮輶輶柴轂填接街巷。又趙岐傳岐逃難賣餅北海市中時安丘孫嵩遊市察岐非常人呼與共載岐懼失色嵩乃下。

帷。按帷車在前漢時有。故或乘之而不數見。至後漢無論貴賤。除法駕外。盡用帷車。故晉書輿服志云。漢世貴輜。而賤輶車。晉貴輶車。而賤輜。輶者說文小車也。釋名輶者遙也。可四向遙望也。前漢平帝紀。徵天下能知逸書古記者。在所爲封一輶傳。遣詣京師。注以一馬輶車而乘傳也。蓋輶車甚小而輕。故可一馬駕之。又輶車。靴服淺而無帷。其形略如今火車上之有頂敞車。故乘之可遠望。尤足證漢世車皆雙轅已。

#### 漢輜輶車以平頂圓頂分貴賤

東觀漢紀。梁冀僭侈。作平上輶車。按平上者。平頂也。平上而僭。可知皇帝車平上。臣下皆圓頂也。

#### 漢末輶車風行自是貴人無乘露車者

魏略。孫賓碩乘輶車過市。世說。漢末盧充三月三日臨水戲。忽見一輶車。是城市出入皆輶車也。又後漢書。單超傳。其僕從皆乘牛車而從列騎。是更以牛車爲貴。謂超家雖僕從亦乘也。較西漢之因貧而乘者。風尚異矣。蓋自漢魏以來。貴人車皆有屋。金樓子云。劉義宣就民間僦露車自載。露車無屋。義宣戰敗亡命。始乘之。是其證。

#### 漢末車有後戶。旁戶爲西漢所未有

三國志注引魏略。孫賓碩乘輶車從騎過市。見趙岐販胡餅。疑其非常人。乃開車後戶。顧所將兩騎。令下。

馬扶上之時，岐以爲是唐氏耳目也，甚怖失色，賓領閉車後戶，下前檐。車檐謂之曰終不相負。又世說：漢盧充三月三日臨水戲，忽見一轎車，乍沈乍浮，既上岸，充往開車後戶，又說文：戾音泰，輜車旁推戶也。按車之有戶，不惟西漢無之，卽東漢初亦不見也。漢末始盛行，至晉遂以有戶無戶爲定制矣。

魏晉已無轆乘之名，車特大可容四五人。

世說：晉文帝與二陳同車，過喚鍾會同載。又桓宣武與簡文太宰同載，是一車可乘三人，並御者共四人。而無轆乘之名，蓋皆乘安車，無須轆乘以爲護持。而晉文帝旣與二陳同載，又喚鍾會並御者爲五人，是其車特大，不惟與周異，與後代亦異也。

晉時同車並坐之證

世說：晉武帝時，荀勗爲中書監，和嶠爲令，故事監令共車。嶠性雅正，常疾勸譏諛。後公車來，嶠使登正向，前坐，不復容勗。勗更覓車，然後得去。按此時同車坐，乃並坐，非若今世之有前後也。故漢書甯成傳曰：不敢均茵憑，嶠坐正中，太不均矣。故不能容勗，足徵車隨狹，非止容一人。

漢魏六朝上下車仍在車後

周時上下車皆由後，至六朝不改。世說：范宣未嘗入公門，韓康伯與同載，遂誘俱入郡。范便於車後趨下。按此時之車有后門，故從後下。又梁元帝金樓子云：齊武帝微時，與劉孺不相識，嘗附人車載，至孺門，同



乘者與僞善造僞言畢辭退。僞怪之曰：「與蕭侍郎同車，僞卽至車後請焉，是亦有後門之證也。」

### 晉世因尙牛車故貴人賽牛

世說：石季倫牛形狀氣力不勝王愷牛，而與愷出遊，極晚爭入城，崇牛數十步後，迅若飛禽，愷牛絕走不能及。又王武子有牛名八百駁，又彭城王有快牛，至愛惜之。又王丞相曹夫人妬，禁丞相有侍御，久之丞相不能堪，乃密營別館，衆妾羅列，兒女成行，會夫人登平臺，見數兒甚白皙，謂左右曰：「是誰家兒？」玉雪可念，左右以實告，乃將賣門及諸婢，持食刀自出尋討，丞相亦命駕飛轡出門，猶患牛遲，乃以左手攀車闌，右手捉塵尾，以柄助御者打牛，狼狽奔馳，劣得先至。按晉書輿服志云：「古貴者不乘牛車，漢末諸侯寡弱，貧者至乘牛車，自靈獻以來，天子至士，遂以爲常乘。夫旣以牛爲常乘，則乘馬者必絕迹矣。於是富貴家之賽牛，亦猶周時之賽馬，馬有千里，牛亦有八百里，豈非異聞哉？」

### 牛車之貴至隋男子仍乘之

宋書陳顯達傳：「當時快牛稱陳世子青牛，王三郎烏牛，呂文顯折角牛，可見宋齊之時，士夫之貴牛車，仍與晉同。至隋騎風雖盛，然猶有牛車。牛宏弟射殺其車牛，是其證。是自西漢迄隋，士夫皆乘牛車。至唐宋始易以婦女也。」

### 晉非法駕禮車不立乘

晉書輿服志。自二千石以上。郊廟明堂法出。皆大車立乘。駕馴。他出乘安車。致仕告老。賜安車。元帝時。太子釋奠。制曰。今草創未有高車。可乘安車。按元帝初渡江。禮制未備。故無高車。高車卽大車也。是行大禮時。且或不立乘。他可知矣。而臣民益可知矣。

晉時車有耳

晉書輿服志。諸公給安車黑耳。駕三。其非持節督都者。給安車黑耳。駕二。又尚書令輅車黑耳。有後戶。僕射但有後戶無耳。尚書及四品將軍。則無後戶。并皂輪。按此。則晉世官吏所乘者。盡輅車也。輅車小輕便。不施帷。可遠望。而不見有乘輅者。志所謂晉世重輅車而輕輅者。信然矣。然既有戶。則四周有牆也。特淺耳。故可遙望。惟所謂耳者。爲漢世所無。志亦不詳其制。無從臆說也。

晉士大夫偶游戲騎馬

世說。庾小征西。當出未還。婦母阮。與女共上城樓。俄而翼歸。阮云。聞庾郎能騎。我何由得見。婦告翼。便於道盤馬。始兩轉墜地。是可證士夫騎者絕少。故欲觀也。又王湛停墓所。兄子濟來拜墓。與語極惋愕。自視缺然。濟去。叔送至門。濟從騎有一馬。絕難乘。濟問叔好騎否。叔使馳騁。濟益歎其難測。又杜預之荊州。朝士悉祖。楊濟不坐而去。須臾和長輿來。曰。必大夏門下盤馬。往果然。長輿抱內車共載歸。是可證習騎爲偶然遊戲也。

南北朝時南朝多乘車不能騎北朝多騎馬少乘車

顏氏家訓。梁世士大夫。尙褻衣博帶。大冠高屐。出則車輿。入則扶持。郊郭之內。無乘馬者。周宏正爲宜城王所愛。給一里下馬。常服御之。舉朝以爲曠達。至乃尙書郎乘馬。則糾劾之。及侯景之亂。膚脆骨弱。不堪行步。不耐寒暑。坐死倉卒者。往往而然。按北朝。托跋氏本胡人。胡人自匈奴以來。皆善騎馬。托跋氏起撫有中原。於是卿士大夫。皆能騎馬。北齊北周。又皆胡種。至於隋。因中原之勢。混一南北。於是士大夫乘車之習。尙漸微。騎風大盛。至於唐。中外官吏。遂無不騎馬。惟婦女始乘牛車。此一變也。

唐京官上朝騎馬

朝野僉載。周張衡位四品。退朝。見路旁蒸餅新熟。遂市一校。馬上食之。被御史彈劾。降勅流外。又據言。薛逢晚年。厄於宦途。常策羸赴朝。值新進士綴行而出。團司所由輩。斥令迴避。逢遣一介曰。報道莫乞相。阿婆三五年少時也。曾東塗西抹來。夫官至四品。在唐時亦尊甚矣。而騎馬赴朝。可見當時朝臣。殆無不騎馬也。又王昌齡詩。虢國夫人承主恩。平明騎馬入金門。是婦人入朝亦騎馬也。可見當時之風尙矣。

唐外官亦騎馬

開元天寶遺事。姚崇牧荊州三年。代日民遮道不使去。所乘馬鞭鐙皆留之。以表瞻戀。夫旣曰鞭鐙。則非乘車所用。而騎馬所用也。又韓愈曹成王碑。王卽假爲使者。從一騎。踔五百里。抵良壁。鞭其門大呼曰。我

曹王來受良降。良今安在。是在外大官。亦皆騎馬也。

唐京官貧者無馬至騎驢上朝

杜甫僮人行。自從官馬送還官。行路難行澀如棘。我貧無乘非無足。昔者相遇今不得。實不是愛微軀。又非關足無力。徒步翻愁長官怒。此心炯炯君應識。曉來急雨春風顛。睡美不聞鐘鼓傳。東家蹇驢許借我。泥滑不敢騎朝天。是因泥滑不敢騎驢入朝。若非雨後則騎驢矣。又釋詩意。承平時凡京官所騎之馬。皆官馬也。亂後馬少。收還官。故難得騎。是詩本敘與畢君闊絕之故。然所以闊絕者。非關足無力。實恐徒步訪友。爲長官所見。謂失官體而觸怒也。是又可證唐時京官雖閒暇與朋友過從。亦不可徒步自輕。否則被劾也。是皆史所不載。而其風尙習慣。盡於詩中見之。故後人謂杜詩爲詩史也。又隋唐嘉話。則天稱周心不安。多置裏行拾遺。補闕御史。至有車載斗量之詠。有御史臺令史將入門。值裏行御史數十。聚立門內。令史下驢衝過。諸御史大怒。將杖之。令史云。今日之過在驢。請先數之。然後受罰。御史許之。謂驢曰。汝技藝可知。精神極鈍。何物驢畜。敢於御史裏行。乃羞而止。以是證京官貧者寧騎驢不徒步也。唐盛時已如此也。

唐京官暇日出門必騎

北里志楚兒傳。字潤娘。往往有詩句可傳。近以退暮。爲萬年捕賊官郭鍛所納。嘗一日自曲江歸。與鍛行。

相去數十步。鄭光業時爲補袞，道與之遇。楚兒遂出，簾招之。光業亦使人傳語，鍛知之。曳至中衛，擊以馬筴，聲甚冤楚。觀者如堵。光業心甚悔，且慮其不任矣。明日特過其居偵之，則楚兒已在臨街牕下弄琵琶矣。駐馬使人傳語，潤娘持彩箋送光業詩。光業取筆於馬上答之，是鍛與光業皆騎馬遊行而鍛之眷屬則乘車也。又神女傳梁警善吟詠，每公卿宴集，則遣騎邀之，是送迎朋友亦以騎也。又據言彭伉與湛黃俱宜春人，伉先舉進士及第，湛往賀，不使與官人名士同席。二人有連，其妻甚憤之，未數載，湛一舉登第，時伉方跨驢縱遊郊郭，忽有家僮馳報，伉聞失聲而墜，是出遊郊外亦必騎也。

#### 唐人遠行亦騎馬

宣室志：元和中，青齊計真西遊，長安至陝，陝從事留飲酒，至暮方別。僮僕前去，行未十里，兀然墜馬，及寐已墮黑馬，亦失去。又據言熊執誼赴舉，次潼關，秋霖月餘，滯於逆旅。俄聞鄰舍吁嗟聲，則前堯山令樊澤應制科至此，馬斃囊空，莫能自進。執誼遽輟所騎馬，倒囊濟之，澤遂登科。又雲溪友誼：廖有方元和末下第遊蜀，至寶鷄適公館，忽聞呻吟之聲，潛聽之，見闔室之內一貧病兒，問其疾苦，行止彊而對曰：「辛勤數舉，未遇知音，盼睵叩頭，惟以殘骸相託，擬求疹救，是人已逝。有方遂賤鬻所乘鞍馬於村豪，備棺殮之，恨未知其姓字，題爲金門同人。」又據言咸通末，執政病舉人僕馬之盛，奏請進士咸乘驢，按進士應舉皆數千里赴京師，而皆騎馬，且必有僕人隨之，僕亦乘馬，而少乘車者。蓋唐人尙武，其精神如此，而鬻騎救

友其類全同類俠義又如此。

唐女子亦乘馬

徐凝物怪錄從二女奴皆乘白馬。又白行簡李娃傳忽有人控大宛來迎娃。又沈既濟任氏傳刁細使蒼頭控青驪以迓任氏。又王昌齡詩虢國夫人承主恩平明騎馬入金門。是女子出門常騎行也。又虬髯客傳紅拂女既夜奔衛公乃雄服乘馬將歸太原。又任氏傳任氏不得已遂行。峯以馬借之任氏乘馬居其前鄭子乘而居後是長途遠行女子亦騎馬也。

唐時惟婦女專乘牛車車上有簾

明皇雜錄玄宗將幸清華宮貴妃姊妹競飾轎車飾以金翠間以珠玉費數百萬貫既而甚重牛不能引又幽怪錄隴西李瓊暇遊長安東市見一轎車侍婢數人潛日車中有白衣姝絕代色也遂尾轎車而行又徐凝物怪錄乃遇一車子駕白牛從二女奴又章臺柳傳翊至京師已失柳氏所在歎想不已偶於龍首崗見蒼頭以駁牛駕轎從兩女奴掀簾招之則柳氏也是京師風尚凡婦女皆乘轎車亦猶魏晉時男子之乘牛車且車上必有簾蓋其制已與今略同矣又劉無雙傳郎君可假作理橋官車子過橋時近車子立無雙若認得必開簾子仙客如其言至第三車果開簾子窺見真無雙也是富車亦有簾也。

唐時婦女下車以幃擁人不使人見

唐物怪錄。犢車入中門。白衣姝一人下車。侍者以帷擁之而入。按周時乘車皆露乘。惟婦人乘帷車。然出人尙無以幃壅蔽之舉。至晉時有步幃。石崇作錦步幃。長四十里。見世說。茲所謂幃。蓋亦步幃之類也。

### 唐車有門有鎖

霍小玉傳。李生勒馬欲迴。豪士遽命奴僕數人。抱持而進。急走推入車門。便令鎖却。按此男子車也。既有門可鎖。必成屋形。否則雖鎖仍可逃也。惟門在前在後。抑在旁。是否與漢晉同制。無從詳攷耳。

### 宋時婦女仍乘犢車

老學菴筆記。京師承平時。宗室戚里。歲時入禁中。婦女上犢車。皆令二小鬟持香球在旁。而袖中又自持兩小香球。車過塵土皆香。又成都諸名族婦女。出入皆乘犢車。是京師及外郡婦女乘犢車。仍與唐時同也。

### 宋時士夫仍騎馬與唐同

詞苑叢談。東坡春夜行蘄水中。過酒家飲醉。乘月至一溪橋上。卸鞍曲肱少休。及覺已曉。又東坡與子由別鄭州西門外。馬上賦詩寄子由云。登高迴首坡隴隔。惟見烏帽出復沒。苦寒念爾衣衾薄。獨騎瘦馬踏殘月。又宿南山詩。橫槎晚渡碧澗口。騎馬夜入南山谷。是旅行皆騎馬也。又扈駕詩。病馬羸弱只自塵。是京師卿士出入亦騎馬也。視漢章玄成因雨淖捨法駕而騎。卽被劾失侯。梁士夫偶騎馬。卽目爲放達。或

被劾者異矣。

宋婦女仍騎馬

嬾真子云。文樞密知成都回。姬侍皆騎馬。錦繡蘭麝。溢人眼鼻。是可證宋時婦人仍騎馬也。

宋時轎子

老學庵筆記。徽宗南幸。御棕頂轎子。蓋轎之上。覆以棕。可禦雨也。又童貫既誅。傳死士有欲奪其首者。張御史乃置首函於竹轎中。自坐之。按童貫誅於路中。執法者張御史也。竹轎者。以竹爲之。懼失貫首。故坐於轎底。凡轎皆用人舁。或二人。或四人。或八人。故亦曰肩輿。蘇軾賀朱壽昌得母詩。所謂白簾肩輿簾轎。纔是也。

轎之歷史

古有步輦。不用馬。用人。後漢猶然。後漢井丹傳。就起。左右進輦。丹笑曰。吾聞桀駕人車。豈此邪。夫曰駕。則止推輓而已。非舁。使離地也。至晉有肩輿。世說。謝中郎是王藍田女婿。嘗著白綸巾。肩輿徑至揚州聽事。始用人舁。然不數見。至唐有兜輿。始以人舁。北里志。有府吏李金者。能制諸妓。徑入曲。追天水入兜輿中。至則蓬頭垢面。涕泗交下。舉簾一視。亟使舁回。又劉無雙傳。是夕更深。聞叩門甚急。及開門。乃古生也。領一兒子入。謂仙客曰。此無雙也。今死矣。後日當活。又茅山使者。暨舁兜人。在野外處置訖。門外有檐子一。



十人馬五匹。檐子者卽肩輿。新五代史盧程傳。程拜命之日。肩輿導從。喧呼道中。莊宗聞傳呼聲。左右曰。宰相檐子入門。莊宗登樓望之。笑曰。此所謂似是而非者也。蓋譏檐子之不稱也。是可證肩輿而四周張檐。卽名檐子。若兜子則無檐。惟在唐時無論兜子檐子。皆婦人乘之。若男子不惟不乘輜。且少乘車。古押衙所備之檐子。爲昇無雙馬。則備王仙客騎也。至後唐男子始多乘輜者。新五代史宦者傳。張承業曰。誤老奴矣。乃肩輿歸太原。不食而卒。及宰相檐子。皆其證也。沿至宋則名輜子。明清以來。自縣令以上皆乘輜子。而以帷色分等差。祇武官有乘馬者。民氣之萎靡。去隋唐遠矣。

### 騎之歷史

管子書云。般人之王。立帛牢服牛馬。天下化之。蓋自黃帝以來。卽訓練牛馬使駕車。至夏殷始成功。風行天下也。然仍不能騎。是以春秋時有車戰。步卒而無騎兵。至趙武靈王改胡服。始招國人習騎射。是爲中國有騎兵之始。是以秦始皇駕千乘萬騎。自迎太后於雍。武臣以騎二百迎徐公。貴人騶從。始有騎卒。然卿士大夫。除在行陣間。仍無乘馬者。趙廉頗一飯斗米。肉十斤。被甲上馬。以示可用。武人耳。文臣則否。漢高帝之自鴻門逃歸。捨車獨騎。樊噲等四人則持劍盾步走。而其敗彭城逃也。仍車而不騎。至推墮孝惠魯元公主。以減輕載任。是雖亡命。仍不肯騎。以故兩漢四百年。以迄魏晉六朝。卿士大夫皆乘車無騎者。是不惟畏勞。誠以威儀所關。不宜輕佻。若是漢章玄成祭太廟。以泥淖不能駕馴。騎而往。坐失候。是其證。

至隋滅陳承北朝騎射之餘風。於是卿士大夫。又以騎馬爲能。而以乘車爲恥。自唐迄宋皆然。此其大略也。或謂左傳昭二十五年。左師展將以公乘馬而歸。是爲騎馬之始。是說也。本之劉炫。炫謂此乘馬乃單騎而歸。爲騎馬之漸。而注疏皆不主之。杜注云。欲與公俱輕歸。言輕車而歸。孔疏古以馬駕車不單騎。至六國蘇秦始有車千乘騎萬匹之語。曲禮云。前有車騎者。禮記乃漢世書耳。經無騎字也。是亦不以劉炫之說爲然也。又按論語乘肥馬衣輕裘。皆謂其駕肥馬。此乘馬與論語何以異。炫疑爲單騎者。殆以公潛走。豈知古人最重威儀。公國君何至騎。且傳何以不言騎也。

### 驢之歷史

春秋戰國無驢。至漢初陸賈作新語。始云夫驢騾駝犀象瑇瑁琥珀珊瑚翠玉珠玉山生水藏擇地而居。夫以驢與珠玉珊瑚並列。則驢之在漢初其貴可知。其少可知。又漢書西域傳烏秣國有驢無牛。又敦煌酒泉及南道八國往來人馬驢橐駝食皆苦之。是西漢末中原雖無驢。西方極邊之郡已漸有矣。是以蜀王褒僮約有餽食馬牛驢之語也。至東漢末中原已多。世說王仲宣好驢鳴。既葬文帝臨其喪。顧同遊曰。王好驢鳴。可各作一聲以送之。客皆作驢鳴。是可證驢在中原已習見。三國志諸葛瑾面長。孫權在驢面上書曰。諸葛子瑜。恪卽援筆續書之。驢二字。是江東亦有矣。又世說晉明帝未嘗見驢。謝公云。陛下姑言其狀。明帝以袖掩口曰。吾以爲似豬。是東晉江東仍未多也。至隋唐則策蹇者之多。不可勝數。然東南

述部仍少。柳子厚云：黔無驢，有好事者船載以入，放之山下。虎見之，龐然大物也，以爲神。他日驢一鳴，虎大駭遠遁，是唐時黔尚少。至於今，不惟騎之，駕車曳磨，馱物遍中國矣。

### 羸之歷史

古中國亦無羸。呂氏春秋趙簡子有白驪，亟愛之。其臣陽城渠胥有疾，醫者曰：得白驪肝則生，不得則死。簡子曰：殺畜活人，不亦仁乎？遂殺而取其肝。正韻云：驪同羸。史載此者，見驪之可貴，簡主不愛惜以活人也。又楚辭九歎同篇，羸與桀駟兮。是春秋及戰國時已有羸。然至漢初，仍甚貴。故陸賈新語以驪驪與珠玉並稱。又漢書衛青傳：薄暮單于遂乘六羸，冒漢圍西北馳去。又常惠傳：烏孫貢驪羸。至三國已漸多。吳志諸葛恪傳注：驪驪無知，伏食如故。又晉諸公讚：劉禪乘驪車降鄧艾。蓋羸之爲物，驪父馬母，或馬父驪母。漢初中國驪未多，故難。韋託至六朝已爛驪馬相配之法。齊民要術：驪覆馬生驪，馬覆驪亦生驪。是其證。至唐末驪遂多，聞奇錄：開羸驪。李泌外傳：所乘驪忽驚逸，傳信錄：益州進白驪。然唐時仍甚貴。據言云：咸通中進士及第，過堂後便以驪從。車服侈靡，時蔣泳擢第，家君戒之曰：爾門緒寒微，慎勿以驪從，是其證。至於清代滿蒙與中國混一，於是驪之多過於馬矣。

### 車輪敷鐵之歷史

歷周秦迄兩漢，車輪皆以爪外穿爲算，以降蔽輪牙。輞也，而不敷鐵，皆見前矣。晉書輿服志：輪皆朱斑重

牙。夫既曰重牙，則晉輪之無鐵可知。又拾遺記：因堦國在西域之北，送使者以鐵爲車輪，十年方至晉，及還輪皆絕銳，是益可證晉世車輪尙未敷鐵。

# 卷十

行唐尙秉和著

## 居室

取燧附電附

### 夏宮室修廣丈尺

牧工記夏后氏世室堂修二七

注十四步  
步六尺

廣四修一

注四分  
修加一

五室三四步四三尺注云堂上爲五室

象五行也三四步室深

言有  
四步者

四三尺以益廣也

方三步者  
廣益三尺  
方四步  
廣益四尺

木室於東北火室於東南金室

於西南水室於西北其方皆三步其廣益三尺土室於中央方四步其廣益四尺此五室居堂南北六丈

東西七丈疏云中央之室大一尺者以其在中央號爲大室故多一尺此五室居堂南北六丈東西七丈

者以大室居中四角之室皆於大室外接四角爲之大室四步

二丈  
四角室各三步

一丈  
則南北三室十

步故六丈東西三室六丈外加兩三尺又四尺故七丈也按敝者爲堂隔者爲室堂修十四步共八丈四

尺南北除三室六丈尙餘二丈四尺以爲前後階堂廣十七步半爲十丈五尺東西除三室七丈外餘

三丈五尺以爲堂之東西屋翼蓋堂之廣過於修故室所餘廣亦過於修也世室者宗廟也

### 夏堂階室窗及塗墻之色

攷工記九階四旁兩夾窗白盛。注九階者堂之南面三。三面各二。窗助戶爲明。每室四戶。戶兩旁各有窗。白盛者。注云。屨炭盛之言成也。以屨炭塗牆。所以使成宮室。古無石灰。燒屨殼爲灰色白。以塗牆。取潔。凡三代王宮宗廟之牆皆塗。音惡。以白。民不得用。周禮地官掌屨共白盛之屨。韓非子宮有塗。器有滌則潔矣。是自周初至戰國皆以屨塗牆也。

### 夏門堂廣修之度

攷工記夏門堂三之二。室三之一。注三之二者。言得正堂修廣三之二也。卽正堂修八丈四尺。門堂五丈六尺。正堂廣十丈五尺。門堂七丈也。室三之一者。方望溪云。門之左右各隔其半以爲室。敞其半以爲堂也。

### 殷王宮高度修度

攷工記殷人重屋。堂修七尋。八尺崇二尺。四阿重屋。注重屋者王宮正堂。若大寢也。阿棟也。四阿四面皆注霑也。重屋重簷也。按四面皆注霑者。卽今所謂廊簷。凡宮殿皆四面廊也。

### 周明堂修廣崇度

攷工記周人明堂。度九尺之筵。東西九筵。南北七筵。堂崇一筵。五室。凡室二筵。注明堂者明政教之堂。周堂高九尺。殷三尺。則夏一尺矣。禹卑宮室。謂此一尺之堂歟。疏云。夏言宗廟。殷言王寢。周言明堂。皆舉一

以見其二皆同也。按殷未言廣。周南北七筵合六丈三尺爲修度。東西九筵合八丈一尺卽廣度也。由此證之。凡三代王宮。宗廟明堂同堂上皆五室。中央一室。四隅各一室。其修廣雖不同而規模則無異也。

### 周王宮門高五丈宮角樓高七丈城角樓高九丈

攷工記王宮門阿之制五雉。長三丈高一丈曰雉宮隅之制七雉。城隅之制九雉。注阿棟也。疏謂門之屋兩下爲之。其脊高五丈。宮隅城隅注云浮思也。疏云按漢齊東闕浮思災言災則浮思者小樓也是可證周宮門高五丈。宮城角樓高七丈。如今紫禁城都城角樓高九丈也。

### 古宮室牆皆土築

攷工記牆厚三尺崇三之按崇厚以是爲率。假令牆高二丈七尺厚則九尺。周時尙不能以磚石作牆。雖王宮宗廟皆土築故不得不厚。詩云縮版以載作廟翼翼縮者約也。言約版以築廟牆是古宮室皆土牆之證也。

### 古屋脊坡度之率

攷工記葺屋。草屋三分瓦屋四分。注謂屋南北深一丈二尺三分者峻宜四尺四分者峻宜三尺。方望溪云三分屋之南北深以其一爲屋脊高四分亦然。按古之所謂屋專指屋脊兩邊下垂者而言。故注云深一丈二尺三分者峻四尺四分者峻三尺以是爲率。倘屋更深則峻宜更加也。茅屋與瓦屋所以不同者。

因茅去水。通故其坡度宜下降。下降則去水速。瓦去水疾。故其坡度雖少。尚無妨。專指屋脊言。若今日之平頂房。古謂之無屋也。古幘亦然。其平頂者。雖上空不得謂之屋。屋則有脊高起。前後坡下矣。禮云中屋履危。史記魏世家。使吏捕范痤。痤因上屋騎危。危者屋脊。故可騎。然則今日之屋式。仍與三代同。可謂古矣。

古廟堂亦以茅覆頂

記所謂葺屋者。非必窮民。廟堂亦然。左傳云。清廟茅屋。大戴禮。古明堂以茅蓋屋。上圓下方。是其證也。

周庭中甬路高度

攷工記。堂涂十有二分。注云。堂涂者。令甃。甃。疏令甃者。今之墼。甃。則今之墼道也。釋文云。甃音階。卽墼階也。十有二分者。言堂高九尺。涂高一尺八寸也。按爾雅。堂涂謂之陳。詩曰。胡逝我陳。註陳者。堂下至門徑也。卽今之甬路。惟周堂有三階。此正中階下之甬路。其實階阼階下。是否有涂。禮無明文。又涂廣亦未說。疑十有二分。或兼崇廣言也。

古築牆時狀況

詩小雅。約之閣閣。椽之橐橐。又。揅之揅揅。度之薨薨。築之登登。削屢瀝瀝。百堵皆興。箋云。約。縮版也。椽。擗土也。言以杵築土。而聲橐橐也。削。屢瀝瀝者。言牆築成有凹凸不齊之處。而削之使平也。此宣王考室之



詩。宗廟之牆。尙以土築。他可知矣。

### 古築牆以版計功

呂氏春秋。楚人以兩版垣也。吳起變之而見惡。注。楚人以兩版築垣。起教之用四。用四則工省而築多。又韓非子。宋王築武宮。謳癸倡行者止觀。築者不倦。王聞召而賜之。對曰。臣師射稽之謳。又善於癸。王召射稽使之謳。行者不止。築者知倦。王曰。其謳不如癸美。何也。對曰。王試度其功。癸四板。射稽八版。據其堅。癸五寸。射稽二寸。

### 春秋時有東西廂

左傳昭四年。豎牛曰。夫子疾病。不欲見人。使真饋于个而退。注。个者東西廂也。按公羊傳。路寢者何。正寢也。爾雅釋名。無東西廂有室曰寢。然則凡言寢者皆無廂也。

### 周屋上加塗敷瓦者少

呂氏春秋。高陽應將爲室。家匠對曰。未可也。木尙生。加塗其上。必將橈。以生爲室。今雖善。後必敗。高陽應曰。木益枯則勁。塗益乾則輕。以益勁任益輕。則不敗。匠人無詞。後果敗。又韓非子。虞慶爲屋。謂匠人曰。屋太尊。匠人對曰。此新屋也。塗濡而椽生。是古人爲屋。先架椽。再以泥塗其上。而不言加瓦。蓋周時瓦尙貴。雖卿士家造屋。不盡用之也。

戰國時瓦屋漸多

古史攷夏昆吾作瓦史記龜策傳桀爲瓦屋蓋言其侈以故周詩狀宮室者至多而不及瓦蓋其時瓦屋實少至戰國時趙廉頗與秦兵戰秦兵鼓譟勒兵屋瓦皆震似其時瓦屋已多蓋陶業日益發達雖尋常百姓已力能爲矣

周時已有平房

莊子孔子之楚舍于蟻邱之漿其鄰有夫妻臣妾登極者注極平頭屋也

古貧民門戶狀況

左傳襄十年筆門圭竇之人而皆陵其上其難爲上矣注筆門柴門圭竇小戶穿壁爲戶上銳下方狀如圭也言微賤之人也又韓非子桀十版之牆鑿八尺之牖蓋古人之牆皆以土桀就壁穿戶上銳則不隕牖者助戶取明故亦就壁鑿取形圓賈誼過秦論所謂繩樞甕牖也

周時屋內取暖之法

呂氏春秋衛靈公天寒鑿池宛春諫曰天寒傷民公曰天寒乎宛春曰公衣狐裘坐熊席陬隅有竈是以不寒新序同職作燠是於屋隅築竈燒以取暖也又左傳定三年邾子自投於牀廢鱸炭爛遂卒是裝炭於鱸近牀取暖可移徙也又昭十年初元公惡寺人柳欲殺之及喪柳熾炭于位將至則去之是以炭溫地使元

公坐其處而煖也。

### 古竈突形狀

說苑臣聞客有過主人者見竈直突。橫平旁有積薪謂主人曰曲其突遠其積薪不者且有火患曲突者使煙突曲而向上火不旁溢炊煙出易也。又按今日從漢魏墓中掘出瓦竈之模型皆中置大釜四隅安小釜或四或二而竈門上皆有牆隔煙煤不使落釜內而今竈皆無之殊不如古人也。

### 古戶樞塗油

淮南子人有少言者猶不脂之戶也注不脂之戶難開閉也。按車軸塗以脂則輕戶樞亦然故曰難啓閉。

### 古庶人皆白屋

漢書吾丘壽王傳或由窮巷起白屋裂地而封又蕭望之傳恐非周公致白屋之意王莽傳開門延士下及白屋師古曰白屋謂庶人以白茅覆屋也然則漢時士庶盡居茅屋無瓦屋者故以白屋爲貧賤之名與白衣同也。

### 漢唐謂裏間屋爲箱

漢書周昌傳呂后側耳於東箱聽金日磾傳莽何羅襲白刃從東箱上袁盎傳臣所言人不得知乃屏錯錯趨避東箱此天子正殿之箱也楊敞傳延年起至更衣敞夫人遽從東箱出此卿士家正廳之箱也師

古曰正寢之東西室皆曰箱。言似箱箴之形。按此卽今正廳之東西裏室。俗曰裏古人以其嚴密似箱故名。與廂異。廂者正廳前之東西房。唐會真記所謂待月西廂下者是也。又唐張說虬髯客傳引公入東廳。廳之陳設窮極珍麗。箱中粧奩冠鏡首飾之盛。非人間所有。此箱中卽東廳之裏室也。若世說所云陸機兄弟住參佐廨中。三間瓦屋。士龍住東頭。士衡住西頭。旣未云箱。是無裏室。又官廨故居有瓦也。

後漢始以壑砌牆不純用版築

後漢周紆傳。紆廉潔無資。常築壑以自給。說文云。壑。音激令適也。一曰土壑未燒。按今江北河北人砌牆多以壑。法以木模盛濕土。用石打使堅。晒乾用之下。藉磚石上壑以壑。外壑以石灰。牆堅而觀美。惟極貧者始以土築牆。漢末殆已如此。故紆售壑以自給。說文云。瓴甌。瓴甌者甃也。詩曰。中唐有甃。陶侃所運者是也。陶後之物也。豈尙可築乎。證以紆傳其詁誤矣。許亦以未安。又曰未燒土壑。此詁近之。而仍未允。查未燒之壑曰坯。若土壑則大於壑數倍。乾卽用以砌牆。非燒後始用。禮雜記。三年之喪。居堊室之中。鄭玄注云。堊室。壑壑爲之。不塗。壑是其證。若如許說。壑似待燒始用者。此由古時士人與農分處。不悉農家事物。故雖以許重叔之通博。詁此字不能真確。至宋劉邪注此傳云。壑非築所成。當作塹。是愈不知字義而強說矣。

自三代迄兩漢皆以蜃灰塗牆至漢末蜃竭始代以石灰

攷工記夏后氏九階四旁兩夾窗白盛周禮地官掌蜃掌斂互物蜃物以共白盛之蜃鄭注云白盛蜃灰也。謂飾牆使白。今東萊用蛤謂之又灰蓋至漢時中原之水漸少所產之蜃已用竭故止東萊沿海之地用之而又難以蛤故謂之又灰又者雜也。今匠人以土和石灰仍謂之又灰疏謂蜃蛤在泥中取以爲灰故謂之又灰以又爲又取之又誤之遠矣。

蜃灰既竭至後漢乃代以石灰後漢楊璇傳特制馬車數十乘以排囊盛石灰於車上既與賊戰乃順風鼓灰賊不得視遂敗是可證當時建築用石灰然魏晉時仍不多張華博物志燒白石作白灰既訖著地經日俱冷遇雨及水澆即便然煙焰起云云此可證晉時石灰尙少故以爲異。

#### 唐以麻和石灰泥壁販賣者益多

西陽雜俎乃請後堂廳上掘地爲池方丈深尺餘泥以麻灰汲水滿之夫以麻和石灰泥池爲固則以麻灰泥壁也必矣今名曰麻刀灰然則泥壁之法唐已與今同又云寶曆中荊州有廬山人常販燒朴石灰往來於白汴南草市又五代史唐臣傳安重誨常欲除潞王從珂明宗曰吾爲小校時不能自足此兒爲我擔石灰拾馬糞以相養活此以證自唐以來石灰民間已習用也。

#### 唐住宅臨街有窗牖

北里志楚兒傳性狂逸後以衰退爲汾陽裔孫郭鏐所納避正室置於他所每有舊識過其所居多於窗

牖相呼。後以途中與大理司直鄭光業相語。爲鍛所咎。光業深慮其不任。明日特過其居偵之。則楚兒臨街。屬下弄琵琶矣。又張住住少敏慧。與鄰兒龐佛奴相悅。有結髮之契。及住住將笄。其家拘管嚴。佛奴稀見其面。後因寒食爭球。故偏其窗下以伺之。忽聞住住語。又樂府雜錄。將軍韋青於街牖中聞其歌音寥亮。是無論貧富貴賤。臨街皆有窗也。若今日祇商家臨街有牕。住室皆面向內。無臨街有窗者。古今住室不同若是。

晉唐時屋梁皆可不梯而登

晉干寶搜神記。西江有一宅。住者皆不安。最後買於東鄰劉氏。劉持刀夜於屋梁伺之。唐任蕃夢遊錄。獨孤遐叔自蜀歸。距金光門尙有六七里。天已曠黑。乃宿於廢寺廊下。夜半忽有若貴人宴飲院中。遐叔懼爲所逐。乃潛伏屏氣於佛堂梁上伺之。

按劉氏持刀登屋梁。或由梯登。若遐叔偶宿廢寺。何從得梯。乃亦登梁上。若以今日之屋梁論。不梯不能登也。乃古人不爾者。疑屋制與今異也。又北齊書。蘇瓊傳。遷清河太守。部民趙穎送新瓜一雙。置於聽事梁上。夫梁上可置物。必便於取攜。若今日之梁。能置大瓜乎。又謝朓詩。杏梁寶未散。李嶠詩。嘉賓集杏梁。此詩若在今日。則成笑柄。以此見古屋制梁棟安排。與今大異。

## 卷十一

行唐尙秉和著

### 燈燭

周時以薪爲燭

禮少儀執燭抱燹注未蒸曰燹又周禮春官鹽氏掌共燹契以待卜事注杜子春讀燹爲柴樵之樵是燹者樵也薪也薪之然甚速故親執其旣然者復抱未然者以待續燹又毛詩巷伯傳云昔者顏叔子獨處於室鄰之簷婦又獨處夜暴風雨而室壞婦人趨而至顏叔子納之而使執燭放乎旦而蒸盡縮屋而繼之按蒸者細薪也縮束也言蒸盡束屋上茅然之又周禮司煊庭燎疏云若人所執之燭以荆燹爲之是皆以薪爲燭之確證也

故古亦謂燭爲火

左傳飲桓公酒樂公曰以火繼之又哀十六年良夫代執火者而言晏子春秋晏子飲景公酒日暮公呼具火史記孟嘗君傳夜食有一人蔽火光火者卽燭也因然薪爲燭其光甚大故亦謂曰火漢魏以後始以燈燭爲照夜之專名凡在屋內者無曰火矣

古學校弟子執燭之詳情

管子弟子職昏將舉火執燭隔坐錯總

注燭束

之法橫於坐所櫛

依禮記鄭注當爲櫛

之遠近乃承厥火

注櫛謂燭臺燭同

察其燭之遠近以斷續其火也

居句如炬蒸間容蒸然者處下

注蒸相薪

捧椀以爲緒

注燭燭椀貯緒

右手執燭左手正櫛有墮代

燭交坐毋背尊者乃取厥櫛遂出是去

按古人執燭情形此文可謂詳盡矣居句如炬者言以新燭接然舊燭相交形如矩

舊注誤

而以然者處下

則火易傳也捧椀以爲緒者言以椀承燭使不落地免危險也右手執燭左手正櫛正櫛二字殊不解後

闕禮弓夏后氏聖周鄭注引此文曰右手折聖釋文引則曰左手執燭右手折即

同聖

孔疏引則曰左手

執燭右手正聖乃知今本管子右訛爲左左訛爲右而折聖二字亦以形近之故訛作正櫛此櫛字爲訛

字餘櫛必皆爲訛字以至義意全不明了聖者燭也鄭以弟子職之折聖與聖周聖字同故引以釋禮文

若爲櫛者鄭胡取乎又左右顛倒於理亦不適古今人動作左手常居靜職右手常居動職執燭有定故

左手爲之折聖常動故右手爲之今以形近之故左訛右右訛左義全顛矣折聖者即撥燭使落也燭落

則燭明乃取厥聖遂出是去言弟子將退取燭燭出外棄之也櫛無訓燭者而管子原注訓櫛爲燭可證

房玄齡所見管子仍爲聖與陸孔同也

古宴客必至飲時始然燭



禮少儀其未有燭而後至者則以在者告。按此係召客夜飲而至有先後也。其後至者日暮室闇不能見人。故主人告以某在斯也。某在斯也。此以後世便利狀況例之。何至夜闇不能辨人。室不然燭。古人不爾者。以其害甚多。暑月益熱一也。火大燼多。易有危險二也。費巨貧者不辦三也。不潔四也。須有人執五也。以故非客畢集至飲食時不然。

#### 古夜宴時主人執燭禮節

禮少儀凡飲酒爲獻主者執燭抱燋。客作而辭然後以授人。注未燕曰燋。主人親執燭敬賓。示不倦也。疏既欲留客又取未燕之炬抱之也。又曲禮燭不見跋。注跋本也。疏本把處也。火炬照夜易盡。盡則藏所然殘本恐客見殘本多知夜深。主人厭倦也。

#### 古執燭者必在屋隅

弟子職昏將舉火執燭隅坐。又檀弓曾子病童子執燭隅坐。按執燭必在屋隅者。古人席地坐而薪燭火甚大。屋隅閒曠可不妨人。且防火害也。以故少儀云執燭不讓不辭不歌。誠以執燭而辭讓或歌易致火患也。

#### 古人夜書須人執燭至宋猶然

韓非子郢人有遺燕相書者。夜書火不明。因謂持燭者曰舉燭。又韓愈毛穎傳惟穎與執燭者常侍。又名

臣言行錄韓魏公帥定州時夜作書一侍兵執燭他顧燭然公鬚是古人夜間作事執燭者必在側欲密祕不得也

### 古庭燭狀況

周官司烜氏凡邦之大事其其墳燭庭燎又閭人設門燎又燕禮甸人執火燭於庭注墳大也樹於門內曰庭燎於門外曰大燭皆所以照衆爲明郊特牲所謂庭燎之百由齊桓公始也然遍攷禮經無樹燭明文而甸人則明言執火燭於庭疑凡庭燎墳燭亦皆手執賈疏以鄭注樹燭與執火燭於庭不合乃謂諸侯之燕使人執庭燎天子則樹於庭似爲強說

### 古大燭以葦製

周禮司烜庭燎疏云庭燎所作依墓容所爲以葦爲中心以布纏之飴蜜灌之若今蠟燭又閭人門燎釋文云其所作之狀蓋百根葦皆以布纏之以蜜塗其上若今蠟燭矣按蠟含蜂蜜中周時尙未解蜜與蠟分解之法故以布束葦灌蜜於中又塗蜜於外葦得蠟故質堅而奈久狀有類於唐之蠟燭也

### 其手燭製法

釋文云對人手燕者爲手燭孔疏云用荆樵同樵爲之不惟不塗蜜且不纏布因小燭皆然於室中塗蜜纏布則臭惡人嫌故然甚速至抱樵以俟也

至戰國始有油燈

莊子山木自寇也膏火自煎也。楚辭蘭膏明燭華容備些。按膏者脂也。獸油也。蓋至此時始以蓋盛動物油置炷於中。然以取明不用燋燭。然古無植物油。牛羊等油值昂。蓋非富者不辦。若蘭膏則加香料於其中。貧者不能爲。夫自唐虞三代數千年皆以薪束爲燭。煙燄迷人。動生危險。又專人手執。乍易以膏所患皆免。其快可知矣。

漢時中國尙無蠟燭

西京雜記南粵王獻高帝石蜜五斛。蜜燭二百枚。按蜜燭者蠟燭也。古蜜與蠟不能分解。混合爲一。故亦曰蜜燭。可見漢初無此物。故南粵以爲貢。其珍可知。至鄭玄注三禮言燭者多矣。而無以蠟燭爲證者。玄東漢末人。可知伊時亦無。淮南子云膏燭以明自燦。裴勝傳云膏以明自銷。益證當時盡油燭也。

晉初有蠟燭

世說石季倫以蠟燭作炊。又周仲智飲酒醉。瞋目謂伯仁曰。君才不如弟。而橫得大名。須臾舉蠟燭火。擲伯仁。伯仁曰。阿奴火攻。固出下策耳。然石季倫以蠟燭作炊。原以競豪富。則當時蠟燭之貴可想。蓋初與故世說又云。簡文集談士。以致前客後客夜坐。每設白粥。唯然鑪二。聞輒更益炷。按說文主同炷火主也。今謂之鑪心。以細繩或絮捻成者。俗謂之鑪捻。簡文帝王。仍然油燈。世說故特紀其儉。以是證東晉時

蠟燭仍貴也。自蠟燭行而油燈又不足貴。

自晉以後有蠟燭有油燈。蠟燭美而潔。便於提攜。油燈污而穢。難以攜帶。於是富貴之家用蠟燭。歸田錄寇萊公自少年富貴。不點油燈。雖寢室亦然。燭達旦。廁溷間燭淚成堆是也。貧儉之家然油燈。歸田錄所謂杜祁公爲人清儉。在官未嘗然官燭。油燈一炷。燐然欲滅是也。

### 六朝已然植物油

齊民要術種紅花收子。旣任車脂。亦堪爲燭。又麻子科大。收此一實。足供美燭之用。唐孫愐唐韻榨字注云。側嫁切。打油具也。夫旣曰打油。則是打植物子使出油。如今日之麻油豆油是也。植物油常賤於動物油。故自有植物油。無再然膏油者。是自六朝已不以動物油爲燈。可斷言矣。又唐本草柘字注。陳藏器曰。子可壓油爲燈。極明。是其證已。

### 宋之省油燈蓋

老學菴筆記。宋文安公集中有省油燈蓋詩。今漢嘉有之。蓋夾燈蓋也。複爲二層一端作小竅。注清冷水於其中。每夕一易之。尋常蓋爲火所灼。故易乾。此獨不然。其省油幾半。按油燈之制。大半以銅鐵錫爲之。下承以盤。使不欹仄。中有柱。蓋者盛油之器。則架於柱顛。置炷於中。然以取明。然時久則熱。灼油易乾。復蓋而注水於內。則蓋不熱。故省油。

### 古鐙台之高度

西京雜記，咸陽宮有青玉五枝鐙，高七尺五寸，作螭螭以口銜鐙，鐙然麟甲皆動，炳若列星。又宣帝上林有雁足鐙，又北里志，裴晉公嘗遊妓院，爲惡少所窘，公陰遣介求救於胡造，尙書胡來，主人上鐙，胡起取鐙，鐙台摘去枝葉而合其附。足也橫置膝上，令曰：「凡三鍾引滿，三臺酒須盡，不得有滴瀝，犯令者一鉄躋。」惡少長跪乞命，又東宮遺事，有銅蹄鐙，夕供油七升，又韓愈短鐙繁歌，長繁架也八尺空自長，短繁二尺便且光，裁衣寄遠淚眼暗，搔頭頻挑移近牀。太學儒生東魯客，二十辭家來射策，夜書細字綴語言，兩目昏眇頭雪白，此時提攜當案前，看書到曉那能眠。是漢唐油鐙，皆置繁上，其高七八尺者，蓋不動，其高二尺者，可移徙，讀韓詩如目睹其狀矣。然後世之繁皆尺餘，所以然者，隋唐以前，屋內器具不備，又皆席地坐，所謂案者，矮几也，故移置案前，不置案上。若宋以後，則案高而據椅，今日之坐，古謂之據，故短繁而置案上，視古尤便也。

### 古蠟燭皆蜜燭與今蠟燭異今蠟宋尙無

自宋以前所謂蠟燭，皆蜂蜜中所含之蠟也。蓋自魏晉時始能將蜜蠟分解，專以蠟作燭，故亦曰蜜燭。唐人夜怪錄云：「少頃有秉蜜炬自內出者，是唐仍以蜂蠟爲燭之證也。」卽晉書阮孚傳所謂蠟屐之蠟也。若今日之蠟燭，則產於四川瀘州各地之樹上，正月時，土人赴雲南蒙自購蠟種，歸放於蠟樹上而食其葉。

至五月葉盡。萬樹皆枯。枝幹皆生白衣。遠望若雪。將白膜刮下。卽蠟油也。自此蠟行。作燭者遂不用蜂蠟。惟不知始於何時。攷海錄碎事云。仙人燭木。似梧桐。以爲燭。可延數刻。此卽蠟樹也。海錄爲宋葉廷珪作。是宋時中國尙少樹蠟。李時珍本草綱目曰。蠟樹四時不凋。五月開白花。其蟲大如蟻。延緣樹枝。食汁吐涎。剝取其渣。鍊化成蠟。又水蠟樹。葉微似榆。及甜楮樹。皆可放虫產蠟。時珍明人是明時樹蠟已風行。至於清。凡爲燭皆以樹蠟。幾不知蜜蠟可爲燭矣。

古婦人會燭夜績狀況

漢書食貨志。冬民旣入。婦人同巷相從夜績。一月得四十五日。必相從者。所以省費燎火。同巧拙而合習俗也。男女有不得其所者。因相與歌詠。各言其傷。按同巷必相從夜績者。男女數十人。萃於一室。人多則夜不寒。語言多則不倦。互相倣效。則巧拙同。費省者。按列女傳云。齊女徐吾者。齊東海上貧婦人也。與鄰婦李吾之屬。會燭相從夜績。徐吾最貧。而燭數不屬。李吾謂其屬曰。徐吾燭數不屬。不能出請勿與夜也。徐吾曰。妾以燭不屬之故。起常先。息常後。洒掃陳席。以待來者。自與敵薄。坐常處下。夫一室之中。益一人燭。不爲闡。損一人燭。不爲明。何愛東壁之餘光乎。夫以數十人同績一室。而會合出燭。則一人所出者甚微。故曰費省。又拾遺記。魏文帝所愛美人薛靈芸。常山人也。居生貧賤。每聚鄰婦夜績。以麻蒿自照。按魏麻之梗。白而潔。細而長。然之則明。故古取以代燭。以此證三國時貧民仍以柴爲燭。不能膏燭也。

按古無棉。所謂績者，皆績麻。宋人詩所謂晝出芸田，夜績麻是也。自南宋後，棉花入中國，所謂績者，皆績棉也。河北人家，至冬糾合數十家，掘地爲室，容數十人，共一燈，男女紡績於其中。夜午方罷，與食貨志列女傳所述正同，令人悠然想見周秦遺俗也。





## 卷十二

行唐尙秉和著

### 城郭

#### 周王城高廣

攷工記匠人營國言築都城方九里。是王城。每面長九里也。又曰。城隅之制九雉。注長三丈高一丈爲雉。隅謂城角浮思也。疏城隅高九丈。城身高七丈也。按宮門阿五雉。宮隅七雉。故知隅高二丈。今城隅角高九丈。除二丈卽城身高。故疏云高七丈也。

#### 王城十二門

攷工記國方九里。旁三門。是每面三門。每三里開一門。四面十二門。今北平城爲元所築。亦每面三門。及明徐達入北京。以城大難守。自東西面北頭之門起。迤北全墮之。是以東西北三面祇有二門。合前三門共九門。有違周制矣。而鼓樓在元時居全城正中者。今偏在北城。殊不壯觀也。

#### 周列國城高廣

攷工記宮隅之制。以爲諸侯城制。按宮隅高七雉。除浮思二雉。高五雉。今以爲諸侯城制。是高五丈也。左

傳隱元年都城過百雉國之害也先王之制大都不過三之一注侯伯之城方五里徑三百雉按百雉恰足參之一過則爲害由此推知侯伯之都城爲三百雉三百雉合九百丈以每里一百八十丈計之正五里故注云侯伯之城方五里也

周城牆上女牆與今同

左傳宣十二年國人大臨也注臨哭守陴者皆哭注陴城上俾倪孔疏俾倪者看視之名釋名云城上垣曰陴於其孔中俾倪非常說文云城上女牆俾倪也按城上之短垣曰女牆中有孔守城者以牆爲蔽於孔中俾倪探望窺見敵情唐韓偓詩所謂宮雅猶戀女牆啼是也自周及漢唐以迄於今仍而不改可見古制之善矣

周城有縣門

左傳桓二十八年楚子元伐鄭衆車入自純門及達市縣門不發內城門又襄十年偃陽人啓門諸侯之士門焉縣門發聊人紇挾之以出門者孔疏縣門者編版廣長若門施機關以縣門上有寇則發機而下之服虔云挾攬也謂以木攬縣門令在門內者出也按自漢以來史所紀戰事多矣而從未有縣門則此制之廢棄已久故其詳亦不悉也

古保護城垣之法

公羊傳晉人執宋仲幾於京師仲幾之罪何不養城也何休注若今以草衣城也按古者城垣皆以土築雨淋則土墮故以草衣城有類於養觀何休注漢魏時即如此又北平圖經東城泡子河外即通惠河元時常於此處以葦衣城是元時仍如此蓋自周至元凡城皆以土築故至今無一存者至明始以磚築城可數百年不圯今北平南城爲明嘉靖時築城上之磚印記宛然是其證也

### 周都城內布置概況

攷工記匠人營國方九里旁三門國中九經九緯經涂九軌左祖右社面朝後市按經涂九軌者言路廣能容九車也左祖者宗廟言宗廟建於左而社在右今北平皇宮尙如此也面朝後市者言王宮前爲朝會之所後爲市肆也

### 周朝面積及位次

攷工記市朝一夫注市與二朝占地各百畝二朝者內朝外朝按周一夫授田百畝內朝外朝各占地百畝故曰一夫又曲禮天子當依同辰狀如屏書爲斧文高八尺諸侯北面而見天子曰覲天子當宁注門屏之間而立諸公

東面諸侯西面曰朝疏常依常宁皆南面凡天子三朝其一在路門內謂之燕朝太僕掌之其二是路門外謂之治朝司士掌之其三是皐門之內庫門之外謂之外朝朝士掌之燕朝朝公族治朝每日視朝治事之位司士所謂王南面三公北面東上孤東面北上卿大夫西面北上上是也外朝是詢衆庶之朝即朝

士所謂左九棘右九棘面三槐是也。

又秋官朝士掌建邦外朝之法左九棘孤卿大夫位焉羣士在其後右九棘公侯伯子男位焉羣吏在其後面三槐三公位焉州長衆庶在其後左嘉右平罷民焉右肺石達窮民焉帥其屬而以鞭呼趨且辟禁慢也朝錯立族談者注樹棘者取其赤心而外刺錯立者立達其位族談者聚談按左傳昭十一年叔向曰朝有著定會有表注著定者朝內列位常處錯立者達著定之處而立也古會盟必於野故設表以爲位異於朝也。

周正月國民至闕下觀象讀法

周禮天官正月之吉縣治象之法於象魏使萬民觀治象挾日而斂之注象魏闕也從甲至甲謂之挾日象者非惟書其事且揭其圖使觀者易辨而知警也。

## 卷十三

行唐尙秉和著

### 周都城街衢

攷工記匠人國中九經九緯。經涂九軌。環涂七軌。野涂五軌。環涂以爲諸侯經涂。野涂以爲都經涂。按南北曰經。東西曰緯。九經九緯。言經緯路各有九。而其廣能容九軌也。還涂者。還城道。野涂者。國外道。爲諸侯經涂者。言諸侯城內道七軌。爲都經涂者。言諸侯所屬之都道則五軌。以次遞降也。由是證之。周豐鎬及洛陽街衢橫豎均有九。而其廣則皆九軌也。

### 周諸侯都城路廣亦九軌

九軌者。諸侯之路。遯周王二軌。然左傳桓十四年。宋人以諸侯伐鄭。焚渠門入。及大逵。又宣十二年。入自皇門。至於遠路。注云。涂方九軌。曰逵。夫鄭最小國。尙皆九軌。則齊晉大國。更不待言。然則周制諸侯不必盡從也。

### 周時夜禁

周禮秋官司寤。禦晨行者。禁宵行者。夜遊者。按黑夜遊行。一則恐其爲盜。一則恐其遇盜。故皆禁也。

### 周街衢行人秩序

禮王制道路男子由左，婦人由右，車從中央，注道中三涂遠別也。

殷周時道路厲行清潔

韓非子殷之法刑棄灰於道者，斷其手。子貢疑其重，夫子曰：「知治之道也。」又史記李斯傳：「商君之法，刑棄灰於道者。」夫棄灰細故也，然能使道路汙穢，有礙觀瞻，故嚴刑以防之。由是證古人之厲行清潔，講求衛生之過於後人也。

漢長安之街衢概況

三輔皇圖云：有香寶街、夕陰街、尙冠前街。三輔舊事云：長安城中八街九陌。漢書劉屈氂妻梟首華陽街。京兆尹張敞走馬章臺街。陳湯斬郅支王首，懸於藁街。張衡西京賦云：參塗夷庭，街衢相經，廛里端直，莫字齊平是也。又張衡東京賦：經途九軌，是漢都街衢，廣亦九軌也。

秦仍刑棄灰

漢書五行志：秦連相坐之法，棄灰於道者，黥。是蓋仍沿商周之法。世勳謂秦法嚴，然黥刑較斷手仍輕也。

唐城門出入規程

隋唐嘉話：諸街晨昏出入傳叫，以警行者，代之以鼓。城門入由左，出由右，皆馬周發之。

漢唐以來都會盜劫則鳴桴鼓

漢書尹賞傳。長安城中。薄暮塵起。剽劫行者。死傷橫道。桴鼓不絕。又張敞傳。由是桴鼓稀鳴。市無偷盜。又唐杜甫詩。殺人紅塵裏。報答在斯須。又隋唐嘉話。諸街晨昏傳叫。代之以鼓。是在漢唐時。都城街市。以人煙繁盛。故殺掠劫奪。白晝不諱。街吏聞警。則鳴鼓以報也。

### 漢禁夜行

史記李廣傳。常從一騎出。從人田間飲。還至霸陵亭。霸陵尉醉。呵止廣。廣騎曰。故李將軍。尉曰。今將軍尙不得夜行。何乃故也。止廣宿亭下。是可證不惟城內禁夜行。卽四郊亦禁也。又三國志。魏武傳注。武帝爲洛陽北部尉。小黃門蹇碩叔父夜行。卽棒殺之。是其罪可至死也。

### 晉時禁夜行

世說新語。王安期作東海郡。吏錄一犯夜人來。又殷浩始作揚州。劉尹行日欲小晚。便使左右取僕。人問其故。曰。刺史嚴不敢夜行。是非都城而外郡。亦禁夜。且並官吏禁也。

### 唐夜鼓一動卽禁夜行

白行簡李娃傳。久之日暮。鼓聲四動。姆曰。鼓已發矣。當速歸。勿犯禁。又樞異記。憲宗遷葬。都人士畢至。裴通遠家在崇賢里。妻女輩亦往縱觀。日暮歸至天門街。夜鼓將動。有白頭嫗亦忙遽而行。裴家青衣謂嫗曰。若步履不逮。懼犯禁。車中尙可通融。觀是則唐時夜禁。以鼓爲限。鼓聲起。則都市行人絕。男子徒行固

禁。卽婦女乘車馬者亦一律禁也。

### 古長途官道路政專官掌之

周禮秋官野廬氏掌國道路至於四畿。注不通之處使人治之。比國郊及野之道路宿息井樹。宿止宿息盡止井供飲食樹爲蔭蔽。凡有賓客則令守涂地之人聚而櫟之。同栢有相翔窺伺者誅之。凡道路之舟車輶互者敍而行之按古驛站客館均未備沿官路賓客往來則宿於野而又無售飲食者故設專官按道路遠近設止宿之處設晝憩之廬。今所謂打尖。掘井以供賓客製飲食列樹以備行旅蔭涼而以爲遮衛又孤宿郊外恐夜有盜賊也則令土人擊柝以爲警車馬衆多恐其爭路也則令以次按敍而行此不能以今日沿大道村鎮稠密逆旅櫛比且到處皆有售飲食者之習慣窺測也。

### 古修長塗官道

晏子春秋景公築露寢之臺三年未成又爲鄒之長塗按鄒爲大都此長塗必由臨淄至鄒有數百里之遠發民築之民固病矣然古人之重視路政便利交通可見一斑矣。

### 古重視行旅死者

周禮秋官蜡氏若有死於道路者則令埋而置楬焉書其日月焉懸其衣服任器於有地之官以待其人按此等惠政在清時夏日行官道每逢之埋於路側上插木標書其死之日月及衣服顏色以待尋者而



始於周官也。

古禁蒙布巾持兵仗行官道

周禮野廬氏掌凡道禁鄭注禁謂若今絕蒙布巾持兵仗之屬按持兵仗恐其行規禁蒙布巾頗不得其義得無以其駭衆歟然至漢尙如此也

又禁野之橫行徑踰者禁行作不時者不物者按不由正道橫行徑踰必有奸邪不時者注云不夙早也則莫同暮不物者衣服非常故皆禁之

自周以來列樹表道

左傳襄九年晉伐鄭杞人鄆人從趙武魏絳斬行栗注表道樹也孔疏行道也按周語云列樹以表道此行栗卽表道之樹以其礙行軍故斬之

秦以松表道晉以槐表道

漢書賈山上書曰秦爲馳道樹以青松是秦以松表道也左太冲吳都賦曰馳道如砥樹以青槐亘以綠水玄蔭耽耽清流疊疊是晉時官道兩旁皆樹槐也

唐仍以槐表道

國史補貞元中度支欲取西京槐樹爲薪更栽小樹又吳子華有題湖城縣西道中槐樹詩皆官道槐樹

也。

清官道多柳而雜以槐

清時官道寬數十丈兩旁樹柳中雜以槐余幼時自正定應舉赴京師行官道六百餘里兩旁古柳參天綠陰翳地策蹇而行可數里不見烈日柳陰下賣茶賣酒賣餅餌者絡繹不絕疲則憩熱則乘涼渴飲飢食唯所欲雖遠行而有閒逸之趣自鐵路行而數百里參天之古木盡燬官道爲民地所蝕祇容二軌於是數千年之遺制舊蹟遂泯滅無餘

## 卷十四

行唐尙秉和著

### 都城市肆

周市在王宮後面積百畝

攷王記匠人營國左祖右社面朝後市注後市者言在王宮後也又云市朝一夫古一夫授田百畝是市在王宮後而地廣百畝也

周時市朝之布置

周禮天官內宰凡建國佐后立市設其次司市所居置其敍胥師賈師所居正其肆陳其貨賄出其度量淳幅廣制匹長祭之以陰禮然市亦謂之朝論語云吾力猶能肆諸市朝史記孟嘗君傳獨不見夫朝趨市者乎明且側肩爭門而入日暮之後過市朝者掉臂而不顧注云言市之行列有如朝位故云市朝然則古市內行列整齊有市社有官廳而肆廛則列於兩旁招商列居甚整齊也

周管理市政制度一市官之嚴厲

周禮地官司市掌市之治教政刑度量禁令以次敍分地而經市凡市入則胥執鞭度守門市師于思市亭

次聽大治大訟胥師買師于介市亭之屬次聽小治小訟市刑小刑憲罰以文書播于衆中刑徇罰以其人示市大刑打也扑打也罰

一市貨以類陳列不許雜亂

司市云以陳肆辨物而平市又肆長陳其貨賄名相近者相遠也實相近者相爾同類也按陳肆辨物者注云物同使列於一區則美惡易辨名相近者相遠也言名雖同而實不同不許同列以欺人也實相近者相邇也言貨之名與實相同可近列一處也皆所以防弊也

一嚴禁靡物與詐欺

司市以政令禁物靡而均市以買賈音古民禁偽而除詐按物靡者鄭云侈靡也侈靡則悅目而售易價因以昂可使物價不平均又無用故禁之賈民者曾爲賈知物情偽故欺詐易去也又胥師察其詐偽飾行續惡者誅罰之賈民卽其屬也

一物有定價懸高處使人知

司市以度量成價而徵價同賈羣吏平肆展整也成平也奠賈同價上旌于思次以令市又賈師展其成而奠其價按徵價者言按丈尺升斗定物價而高懸于市亭使買者有所徵信而不疑也

一嚴防盜賊與市民秩序

司市以刑罰禁虢同暴而去盜。又司虢禁其鬪鬪者。與其虢亂者。出入相陵犯者。以屬遊飲食于市者。若不可禁。則搏而戮之。又司稽掌巡市而察其犯禁者。與其不物者。而搏之。掌執市之盜賊以徇。且刑之。胥各掌其所治之政。執鞭度而巡其前。掌其坐作出入之禁令。襲其不正者。凡有罪者撻戮而罰之。按屬遊飲食者。言聚而羣遊飲食也。不物者。言衣服視瞻奇異不經也。襲其不正者。言掩捕犯禁之人也。

### 一遺物招領

司市凡得貨賄六畜者。亦如之。言庭子敘也。三日而舉之。按市有遺物。事之常也。置於敘以待認領。三日舉之者。言過三日無人認領。則沒入官也。

### 一設專官掌契券

質人掌成市之貨賄。凡賣價者質劑焉。大市以質。小市以劑。掌稽市之書契。凡治質劑者。國中一旬。郊二旬。野三旬。都三月。邦國莽。期內聽。期外不聽。按此卽司市所謂以質劑結信而止訟也。註。質劑券也。先鄭云。謂兩書一札而別之也。言保物要還也。疏。古未有紙。故以札。竹版書。大小者言券有長短也。治質劑者。言聽質劑之訟也。訟有期。過期則不聽此訟也。

### 一貸民錢國息五厘

泉府凡民之貸者。與其有司辨而授之。以國服爲之息。後鄭云。以國服爲息者。以其于國服事之稅爲息。

假令貸萬泉期息五百若是則五厘也。

古市一日三合

周禮地官司市大市日昃同側而市百族爲主朝市朝時而市商賈爲主行爲商居爲賈夕市夕時而市販夫販婦爲主小販又禮郊特牲云大市於中朝市於東偏夕市於西偏按古市面積祇百畝除司市等官聽事之處疑太狹今一日分爲三時之市各有所主易期而入則無壅矣。

古以人民與牛馬同上市

賀人掌成市之貨賄人民牛馬兵器珍異鄭云人民奴婢也疏以其在市平定其價故知非良人按古時必罪人方爲奴婢故云非良人非若後世良人亦爲奴婢也奴婢可買賣故與牲畜同上市議價也。

周時賣獸肉者懸獸首於門以爲識

晏子春秋君服之於內而禁之於外是何異懸牛首於門而賣馬肉於內也據此是當時賣何獸肉卽懸其首於門以爲標識也。

漢都城市場

三輔黃圖長安市有九各方二百六十六步六市在道西三市在道東凡四里爲一市致九州商人在突門夾橫橋大道市樓皆重屋有令署以察商賈貨財買賣之事三輔郡尉掌之直市在富平西南二十五

里。卽秦文公造物無二價。故以直市爲名。張衡西京賦云。郭開九市。通關連閣。旗亭。市樓重立。俯察百隧。是也。也。繼道又按郡國志。長安大俠黃子夏居柳市。司馬季圭卜於東市。晁錯朝衣斬於東市。西市在醴泉坊。

按周市在王宮後。地祇百畝。殊迫隘。至秦漢都城規模較周大啓。於是市肆亦異制。六市在道西。三市在道東。必大街之東西。不定在王宮後。又四里爲一市。較周制亦宏敞。而各方六百六十六步。可證市自爲院落。有若今日特闢之商場。沿承周制。尙無臨街列肆售物。若今日都市之雜亂。而管理市政者。爲三輔都尉。張衡西京賦所謂周制大胥。今也惟尉是也。而市樓皆重屋。市樓卽旗亭。旗者商家所鑒之招牌。懸於樓頭。故曰旗亭。史記褚先生所謂臣爲郎時。與方士會旗亭下者。此也。

### 漢酒市

漢書萬章傳。長安熾盛。街巷各有豪俠。章在城西柳市。又酒市。趙君都按柳市已見前。大俠黃子夏所居。蓋以其地多柳而名。酒市蓋又以其地多釀酒者而名也。惟柳市酒市。是否在九市之內。抑在道東或道西。則不詳也。

### 周時商貨皆以璽節出入否則沒官

周禮地官司市。凡通貨賄。以璽節出入之。又掌節。貨賂用璽節。皆有期以反節。凡通達於天下者。必有節。

以傳輸之無節者有幾則不達。又司關掌國貨之節。凡貨不出於關者。舉其貨。罰其人。按節者竹符也。持此爲憑。貨達則反節。然則古之經商者。運達禁品不易也。

右商賈之詐僞

新序魯有沈猶者。且飲羊飽之。以欺市人。魯氏之鬻牛馬者。善豫買。同價孔子將爲司寇。沈猶氏不敢朝飲其羊。魯氏之鬻牛馬者不豫買。按朝飲其羊則腹大而似肥。豫買者蓋豫先宣傳其牛馬之美。而昂其值。其實不副也。

漢時已有在街上叫賣食物者

三國志注趙岐遭家禍。詣北海販胡餅。孫賓碩過市。疑其非常人。問曰。自有餅耶。販之耶。岐曰。販之。賓碩曰。買幾錢。賣幾錢。曰。買三十。賣亦三十。是在市上叫賣也。

漢已有書肆

後漢王充傳。常遊洛陽市肆。閱所賣書。一見輒能誦憶。是漢已有書肆也。

漢晉時酒壚

史記司馬相如傳。乃俱之臨邛。盡賣其車騎。買一酒舍。酤酒。而令文君當壚。又世說新語。阮公鄰家婦有美色。當壚酤酒。阮與王安豐常從婦飲。阮醉便眠其側。又庾公爲尙書令。着公服經黃公酒壚下過。注壚



酒肆也。以土爲墮。四邊高似壇也。按說文。壇黑剛土也。呂覽凡耕之道。必始于壇。爲寡澤而後枯。酒壇者。古陶器大者。殊少。而又無釉。疑卽以剛燥之土。築使中空。四邊高起。候乾用以盛酒。而不漉也。抑或以陶器置當中。懼其毀壞。四周用此燥土培壅。以爲固。且免漚酒。不然。胡必以壇哉。後閱漢書。壇作廬。師古曰。案土爲廬。以居酒甕。四邊隆起。形如鍛廬。俗學謂當廬爲對溫酒火廬。失其義矣。觀此。則與余後說合也。

#### 唐時鬻胡餅狀况

任氏傳。行及里門。門扃未發。旁有胡人鬻餅之舍。方張炭熾爐。暫往棲止。按胡餅者。卽今之燒餅也。熾炭火爐中。而以餅置爐上灼之。食頃熟矣。其製法傳自胡人。故曰胡餅。

#### 唐都市賣蒸餅狀况

朝野僉載。周張衡位四品。退朝見路旁蒸餅新熟。遂市一枚。馬上食之。被御史彈劾。降勅流外。據此。唐都城街上。似已隨便設肆。與今無異。不必有定市也。若古則無是。晏子春秋云。晏子宅陋。景公欲易其宅。晏子曰。臣家貧而居近市。百物取給焉。若居與市遠。則朝夕不便。是可證臨淄雖繁盛。尙無臨街設肆之制。而市有定處。故去市遠。則購物難。漢時蓋尙如此。至唐則與今無異。

#### 漢已有牛牙人

後漢逢萌傳。君公遭亂。獨不去。僮牛自隱。注謂平會兩家買賣之價。

唐馬牙人

集異記。寧王方集賓客。鬻馬牙人。麴神奴者。呈二馬。皆神駿精采。問價。牙人曰。此一千。此五百。座客皆不識其貴賤之由。

按牙人者。主介紹。平會兩家買賣價值。費唇舌牙齒。故曰牙人。今各物皆有牙人。不祇牛馬。想漢唐亦然。特不見於載記耳。若周制則無是。凡物價皆由市官酌定。以旌於市亭。賈師所謂展成奠<sub>定也</sub>。價以令於衆也。

唐各行有首

唐靈鬼志。吳太伯祠在蘇閭門西。人多獻牲牢以祈福。時乙丑春。有金銀行首。畫美人以獻。又虬髯客傳。某日午時。訪我於馬行東酒樓下。又周禮地官肆長孔疏。一肆立一長。便檢校一肆之事。若今行頭。是唐時各行皆有行首。與今略同。

唐衣肆質肆<sub>當舖</sub>書肆

任氏傳。鄭生不知是計。入西市衣肆。又李娃傳。生不知是計。乃質衣於肆。以備牢醴。又娃命出門。生騎而從。至旗亭南偏門。鬻墳典之肆。生揀而市之。載以歸。

總觀古市肆概況。周以前市自市。街自街。凡列肆必於市。臨街無鬻物者。西漢蓋仍如此。故長安有九市。

之多。至唐則街市已混爲一。沿街設肆。不必定在市。以迄於今。仍而不改。故唐以後狀況。可臆揣而知。不必攷也。

### 古契券周名質劑漢名下手書唐名畫指券

周禮司市以質劑結信而止訟。又質人凡買賣者質劑焉。大市以質。小市以劑。鄭注質劑謂兩書一札而別之也。若今之下手書。言保物要還也。孔疏古未有紙。故以札書。漢之下手書。卽今唐時畫指券。與古質劑同也。按札者竹簡也。兩書一札而別之者。謂甲乙各書於札上。中分而各持其一。以爲信。漢時仍以竹爲之。而名下手書。東漢末雖有紙。蓋貴甚仍無用者。至唐則盡以紙矣。然畫指之義。仍不詳也。

### 古收債以合券爲憑

戰國策孟嘗君使馮諼收責於薛。載契券而行。使吏召諸民當償者。悉來合券。券徧合。起矯命以資賜諸民。因燒其券。按此亦以竹爲券。剖而分之。各持其一。故合之以爲信。又漢書高帝紀及見怪歲竟。此兩家常折券棄負。按此亦以竹簡爲券。既不徵索。故折毀也。



## 卷十五

行唐尙秉和著

### 閭里

周民居閭里概況

周禮地官鄉大夫。今五家爲比。使之相保。五比爲閭。二十五家。使之相受。四閭爲族。百家。使之相葬。五族爲黨。五百家。使之相救。五黨爲州。二千五百家。使之相調。五州爲鄉。萬二千五百家。使之相賓。按注相保者。奇裏相保也。卽互保此五家。無姦宄。相受者。後鄭云。有故而寄託。使之相受。相葬者。百家之財力贍。互相助財。相救者。五百家勢衆。故可相救。相調者。禋札相調。禋札者。或災荒。或癘疫。以二千餘戶之衆。不能全被災。可互調恤也。相賓者。以萬二千之戶口。秀民必多。故由鄉校賓其賢者於國校。使畢業而爲官吏也。按王都百里以內爲鄉。鄉有大夫主其治。州有長。黨有正。族有師。閭有胥。比有長。若百里以外則爲遂。以鄰里鄴鄙縣組成。五家爲鄰。五鄰爲里。五里爲鄴。五鄴爲縣。五縣爲遂。其質遂之鄰里鄴鄙縣。與鄉之比。閭族黨州。名異而實同。必異名者。備師田行役。各以旗物率其衆。使於識別耳。按古之時。民無郊居者。如後世之鄉村。祇夏日卽農郊居。書所謂厥民析。詩所謂中田有廬是也。言廬於

井田之中及秋後農事畢則歸都邑詩云曰爲改歲入此室處言冬日農畢將改歲矣入居都邑之室也室在邑廬在野三代時截然不同不能如後世之混合稱之觀大司徒授民田以室數制之不以廬數注云留城郭之宅曰室是其證故夫比閭族黨鄰里之組合皆都邑之狀況也

至春秋以社爲里之代名

管子公子開方以書社七百下衛矣左傳書社五百商子里有書社史記索隱云古者二十五家爲里里各立社書社者書其社之人名於籍下衛者言以此七百社降衛也

漢閭里必有門門有監

史記酈食其傳爲里監門又張耳傳俱之陳爲里監門又萬石君傳內史慶醉歸入外門不下車萬石君聞之不食慶肉袒謝萬石君曰內史貴人入閭里里中長老皆走匿內史坐車中固當又漢書于定國傳始定國父子公其閭門壞父老方共治之于公謂曰少高大閭門令容駟馬高蓋按閭里皆二十五家此二十五家共一門出入又有門監以司啓閉稽奸邪使莠民無所容納古里政之整齊如是

漢長安里名

三輔黃圖長安閭里一百六十室居櫛比門巷修直直宜明建陽昌陰尙冠修城黃棘北煥等里漢書云萬石君奮徙居陵里又徙家長安戚里宣帝在民間時常在尙冠里劉向列女傳節女長安大昌里人也

戚里者。所居皆皇家之姻戚。故以名也。

### 漢仍有鄉名

史記陳平傳。陽武戶牖鄉人也。注。漢制十鄉爲一縣。又陳勝傳。行至新大澤鄉。按周制五州爲鄉。鄉大於州縣。漢則爲州縣。屬僅大於亭耳。漢承秦制。多與周異矣。

### 秦漢亭制

新序。梁邊縣與楚鄰界。梁之邊亭。與楚之邊亭。皆種瓜。又高士傳。始皇以金壁置阜鄉亭。是六國時卽有亭。而不詳其制。漢書高帝紀。及壯試吏爲泗上亭長。師古曰。秦法十里一亭。亭長者主亭之吏也。亭謂停留行旅之館。又求盜之薛治注云。亭有兩卒。一爲亭父。掌開閉掃除。一爲求盜。掌逐捕盜賊。是亭者有二義。一以便行旅。如劉寵傳。嘗出京師。欲宿亭舍。亭吏止之。日。整頓洒掃。以待劉公。又王忱傳。妾夫爲涪令。過宿此亭。又范式傳。辟公府之京師。道宿下亭。又張式傳。父業郡門下掾。送太守妻子還鄉里。至河內亭。又高士傳。桓帝以安車徵韓康。康辭安車。乘柴車。先行至亭。亭長以徵君當過。發人牛。修道橋。及見康車。以爲田叟也。奪其牛。是官吏過往。及人民宿止。皆亭長是賴。一以防盜賊。如朱博傳。少給事縣。爲亭長。好客。少年捕擄敢行。稍遷爲功曹。又高帝紀。常求盜之薛。是亭長逐捕盜賊。保護行旅。有功。可升爲功曹也。

### 晉唐仍有亭

世說褚季野於章安令遷太尉記室參軍。乘估客船送故吏數人。投餼唐亭住。適吳興縣令沈充送客。亭吏驅公移牛屋下。後縣令知。鞭撻亭吏以謝。又褚公嘗至金閶亭。是晉時仍有亭。亭吏即漢之亭長。其所掌蓋仍與漢同。又唐人集異記。安陽城南五里有一亭。過客宿止輒死。有一士人不信。宿其中。又撫異記。靈璧縣東界有一亭。旁有古樹參天。是亭之創至唐仍存。自秦漢訖唐千餘年不廢。可謂久矣。

秦漢鄉吏亭長以外之鄉官

史記三老五更。述說漢王。又高帝紀。舉民年五十以上。有脩行能帥衆爲善。置以爲三老。鄉一人。擇鄉三老一人爲縣三老。與縣令丞尉以事相教。正義曰。百官表。十里一亭。十亭一鄉。鄉有三老掌教化。又文帝紀。三老衆民之師也。又以戶口率置三老。孝悌力田常員。又明帝紀。賜三老孝悌力田人三級。注皆鄉官名。三老高帝置。有藥即孝弟力田高后置。又武帝紀。賜縣三老。帛人五匹。鄉三老孝悌力田。帛人三匹。是三老者。有縣三老。有鄉三老。其責任在掌教化。故詔云。衆民之師。民有不臧。則可讓之。司馬相如傳。所謂讓責也三老孝悌。以不教誨之過是也。孝悌力田之職。蓋與三老同。而力田微異。力田者。蓋主以精勸農事爲率。故相如讓孝悌而不及力田。惟孝悌力田二官。是否有縣鄉之分。史無明文。不敢臆說。

鄉官之等級

漢書尹賞傳。乃部戶曹掾史。與鄉吏亭長里正父老伍人。雜舉長安中輕薄少年惡子。是縣令之下。即鄉



吏。鄉吏之下卽亭長。亭長之下卽里正。里正之下爲父老。伍人。若夫功曹戶曹賊曹等職。乃佐縣令治事者。鄉吏亭長有功。雖可擢爲曹掾。乃縣屬而非鄉官。史記陳餘爲里監門。吏常以過笞餘。此所謂吏卽鄉吏也。

若夫三老。孝悌力田三職。雖鄉官乃人民之表率。專司教導。職雖微而名甚榮。與鄉吏亭長截然不同。以故皇帝有恩賜時。每及三老。孝悌力田。而不及鄉吏亭長。此外鄉官復有鄉嗇夫。後漢鄭弘傳。弘嘗爲鄉嗇夫。又鄭玄傳。少爲鄉嗇夫。注其鄉小者。縣署嗇夫一人。前書曰。鄉有嗇夫。掌聽訟收賦稅。而不言縣有嗇夫。蓋此官爲縣所署。何鄉人卽佐縣官。清理其鄉之訟獄收稅等事。不惟與三老等職異。與鄉吏等官亦異也。

### 六朝時鄉官

通考云。宋五家爲伍。伍長主之。二伍爲什。什長主之。什十爲里。里魁主之。十里爲亭。亭長主之。十亭爲鄉。鄉有鄉佐。三老有秩。嗇夫。游繳各一人。所職與秦漢同。按秦漢時十里爲亭。二十五家爲里。十里二百五十家。茲百家爲里。十里卽千家。六朝之亭長與漢之鄉吏所轄正同。而十亭爲鄉。鄉佐所轄則萬家矣。又有三老有秩。嗇夫與鄉佐分司治化。甚美備也。至隋開皇十五年。罷州縣鄉官。唐初復置。凡百戶爲一里。里置正一人。五里爲鄉。置耆父一人。以耆年平謹者縣補之。亦曰父老。貞觀九年鄉置長一人。佐二人。十

五年復省。然耳目記云：新昌令夏侯彪之，初下車問里正曰：「又杜甫詩來，時里正爲裏頭，是皆天寶以後事，仍有里正名，意者鄉長省而里正仍存歟？」然自唐以來，鄉官之制名雖存而實則廢。凡里正等吏，僅以供縣官驅役差徭奔走，其猥賤與皂隸同。凡士人無爲之者，訖明清皆如此。周官之美意破壞盡矣。非若漢末以陳實之大賢，亦可爲亭長也。見三國志注。

古鄉官之於風俗關係

周鄉官所謂州長、黨正、族師、閭胥、鄉大夫、鄰師、閭長、里宰、鄰長、里大夫等，皆鄉官。政教兼理，主知民善惡，爲役先後，知民貧富，爲賦多少，考德行，察道藝。至三年則比而興起賢者，能者賓禮之，否則糾其過惡而戒之。故教化易成。至漢則以鄉吏亭長嗇夫分司其刑政錢賦各事，而別舉三老孝悌力田專掌教化。凡有孝子順孫貞女義婦，讓財救患及學士爲民式者，皆旌表其門，以興善行。故司馬相如至蜀，則讓責也三老孝悌以不教誨，又尹翁歸傳：「至令民有骨肉爭訟，既傷風化，重使三老受其恥，處民師之地，專教導之責，激揚風化，興舉孝廉善者，無不名，能者無不達，訖至東漢，社會風俗之淳良，人民氣節之高尙，遠非三代所能及。人徒見漢末亂而忽忘之耳。豈知政亂於上而風清於下，無善行而不彰，無文學而不達者，則以此鄉官激揚褒舉之力也。嗚呼盛哉！」

周因鄉制善盜賊姦宄逃亡無所容

韓非子。溫人之周。周不紀。客問之曰。客也。對曰。主人問其巷人而不知也。吏因囚之。君使人問之曰。子非周人也。而自謂非客何也。曰。臣少嘗誦詩曰。普天之下。莫非王土。率土之濱。莫非王臣。今君天子。則我天子之臣也。豈有爲人臣而又爲客哉。君使出之。又管子。夫善牧民者。非以城郭也。輔之以什。司之以伍。伍無非其人。人無非其里。注謂無客寄里無非其家。故奔亡者無所匿。遷徙者無所容。不求而約。不召而來。無所匿。故民無流亡之意。吏無備追之憂。觀是則周時盜賊姦邪。無所容身。凡行旅而無保證者。隨所至而立困。而比閭族黨組織之尤要者。二十五家之內。必有總門以爲出入。而門必有監。以爲稽查。人徒營商。君法嚴。無驕者。逆旅不納。而不知盛周卽如此也。又周時社會奴僕待遇。慘酷極矣。而無一亡者。誠以其時鄉制善。逃亡無所入。不待出境。卽可緝獲。卽能出境。亦旋卽被囚。故不敢逃。卽逃亦自歸也。



## 卷十六

行唐尙秉和著

### 祠祭

郊天用牛須卜牛口傷卽不用

左傳宣三年春王正月郊牛之口傷改卜牛牛死乃不郊按郊者祭天也惟天子得郊天魯以周公之故亦得郊天而郊必用牛牛必卜祭義君召牛擇其毛而卜之吉然後養之是也而牛或微傷卽不用而改卜牛若死卽不郊一若天神惟牛是重牛口雖小傷天卽厭之者故事不郊而不敢以有眚之牛祭也

牛角傷亦不敢郊

左傳成七年春王正月鼯鼠食郊牛角改卜牛鼯鼠又食其角乃免牛按鼯鼠極微細玉篇云蟹毒食人及鳥獸皆不痛本草陳藏器曰極細卒不可見食人及牛馬成瘡不覺然則食郊牛角其傷極細微矣亦改卜不用其視牛之重如此

祭宗廟亦以牛爲重至衣以文繡

高士傳莊周曰子不見郊祭之牛乎衣以文繡食以芻菽又史記老莊列傳養食之數歲衣以文繡是旣

爲犧牛。平日養之。卽衣以文繡也。

牛入廟時爲牛歌舞

祭統。君迎牲。又周禮地官封人。凡祭祀歌舞牲。注。君牽牲入廟。隨而歌舞之。言其肥香。以敢神。是牲之入廟。君須迎牲。迎而牽之。佐以歌舞。若曰。牛肥香可愛。人見之而歌舞。神見之當亦愉悅如人也。

犧牛之尊貴

祭義。君式齊牛。曲禮。國君下齊牛。言君而卿大夫可知矣。意謂此爲祖宗所享之牛。故道遇之必式。以致敬也。

凡祭牲皆衣以文繡

周禮夏官羊人。凡祭祀飾羔。又小子職。凡沈祭川辜祭俎侯四時惡氣飾其牲。注。飾者飾之以繡。繡者文繡也。是除牛牲外。凡豕牲。羊牲。犬牲。皆以文繡飾也。

古以牛爲質禱病

韓非子。秦昭王病。百里買牛而家爲王禱。按此係百姓聞王病買牛質於里社。而爲王禱。病愈殺牛以祀神也。

古以牛祭燕子

月令仲春玄鳥至。至之日以大牢祠于高禩。天子親往。注玄鳥燕也。高辛氏之出。玄鳥遺卵。簡狄吞之。因孕生契。詩所謂天命玄鳥降而生商是也。後王以爲媒官嘉祥而立其祠。大牢者牛祭也。

### 古以犬爲祭牲或伏瘞或磔

周禮犬人掌犬牲。凡祭祀供犬牲。伏瘞亦如之。注伏。伏犬以王車轅之。卽轅祭也。又月令磔犬於城門。按犬肉後世人不食已久。誰復以祭神。而周時大祭皆用之。不惟大祭。凡尋常禳除不祥之舉。無不以犬。較他牲用尤多。豈以其腥惡爲馨香歟。可見古今人食品之異。

### 古祭時以香草達馨香

周禮天官祭祀共蕭芳。按蕭者香草也。詩取蕭祭脂。郊特牲蕭合黍稷。臭陽達於屋壁。亦以縮酒。

### 古祭先必以尸尸服亡者之服

祭統。孫爲王父尸。周禮春官司服。若將祭祀。則各以其服授尸。曾子問。祭必有尸乎。孔子曰。祭成喪者必有尸。尸必以孫。孫幼則使人抱之。無孫則取於同姓可也。宋程顥曰。古人祭祀用尸。義極深。人之魂氣既散。必求其類而依之。人與人既爲類。骨肉又爲一家之類。至誠相通。以此求神。宜其享之。後世以尊卑之勢。遂不肯行。按程子所說尸義。極爲深至。論語鄉人讎。孔子朝服而立於阼階。讎者黃金四目。狀極凶惡。入人家室內。驅逐疫鬼。孔子恐并驚廟神。故立阼階俾祖宗來依。是其事與尸異。而理則相通。要其使鬼

神以子孫爲憑依則一也。

### 尸之坐位

朱子曰：神主之位東嚮，尸在神主之北。又晏子春秋：尸坐堂上不席，以憂故也。據是則尸坐於神主之左，以使神依以享祭，故憂惕而不席也。

### 爲尸之光榮

詩：皇尸載起，鼓鐘送尸。又曾子問：尸弁冕而出，卿大夫皆下之。孟子：敬叔父乎？敬弟乎？彼將曰：敬叔父。曰：弟爲尸，則誰敬？彼將曰：敬弟。是子孫而爲尸，凡祭者遇之皆致敬也。

### 古以石函藏主

左傳：哀十六年，及西門，使人反禘於西園。注：禘藏主石函，孔悝去國，故載石函而去。按孔悝亡命去國，倉皇奔竄，而仍載石函與主同去，古人視主之重如此。

### 古祭必以祝史致禱詞

周禮：春官太祝，下大夫二人，上士四人，小祝中士八人，貳祝上士二人。又新序：中行寅將亡，乃召其太祝而欲加罪焉，曰：子爲我祝，犧牲不肥，澤耶？戒齋不敬耶？使吾國亡？又左傳：桓六年，祝史正辭信也。不虛稱君美今民饑而君逞欲，祝史矯舉以祭，臣不知其可也。又昭十八年：齊侯疥，遂店，期而不瘳。梁丘據曰：吾事鬼



神豐而疾病是祝史之罪也。諸侯不知其謂我不敬，君曷誅於祝固史器以辭責。按杜注詐稱功德以欺鬼神曰矯舉，然則祭時祝詞皆太祝爲之，卽各項祭品亦皆祝史省視。然因亡國而罪太祝，病不愈而殺太祝，亦可謂迷信之甚矣。

### 古祭先齊戒之誠

禮祭義：齊之日，思其居處，思其笑語，思其志意，思其所樂，思其所嗜。齊三日，乃見其所爲齊者。祭之日，肅然聞乎其聲，出戶而聽，愴然必有聞乎其歎息之聲。按人鬼相通，誠而已矣。必如是而后精神通，神來享，否則神不接也。

### 古庶人不得立宗廟不能用牛羊豕祭服則尙黃

禮哀公問：待年而食者，不得立宗廟。王制：庶人祭於寢。春薦韭，夏薦麥，秋薦黍，韭以卵，麥以魚，黍以豚，稻以雁。以待年而食者，農夫力田者也。古士以上始得立廟，庶人無廟，祭於家，且祭品亦不得用大牲。貴賤之界分如此。又士制黃衣黃冠而祭，息田夫也。又野夫黃冠，黃冠草服也。按野人應白衣，而祭則用黃，殊不得其義。

### 周年終大蜡之盛況

周禮地官：國索鬼神而祭祀，則以禮屬民而飲酒於序，以正齒位。又禮雜記：子貢觀大蜡，孔子曰：賜也樂。

乎。對曰：一國之人皆若狂，賜未知其樂也。子曰：百日之蜡，音乍一日之澤，非爾所知也。張而不弛，文武弗爲也。弛而不張，文武弗爲也。一張一弛，文武之道也。郊特牲云：蜡者，索也。歲十二月合聚萬物而索饗之也。按歲終合萬神而祭之，以爲報賽，祭能國人大饗而會飲於序，月令孟冬所謂大飲烝是也。歡呼舞蹈，其狀若狂。百日蜡，一日澤者，言勤勞稼穡有百日之久而娛樂祇一日也。張弛者，以弓爲喻，用則張，不用則弛。喻民勞逸須相循環，不可偏一自文武以來，其道如是，然則周時每至歲終大蜡之日，全國人歡欣鼓舞，如醉如狂，其盛狀可想矣。又詩豳風十月滌場，朋酒斯饗，曰殺羔羊，騁彼公堂，稱彼兕觥，亦大蜡大飲之況也。

### 秦仍年終大蜡

禮運孔子與子蜡賓，注夏曰清祀，商曰嘉平，周曰蜡。秦曰臘，又韓非子秦襄公有病，百姓爲之禱，病愈，殺牛塞禱，郎中閭遇公孫衍出見之，曰：非社臘之時也。奚自殺牛而祠社？是可證秦至臘日，卽殺牛索饗，百神與周之大蜡同也。

### 社祭

禮祭義：王爲羣姓立社，如北平先農壇曰太社，王自爲立社，如中央公園社稷壇曰王社，諸侯爲百姓立社，曰國社，自立社曰侯社，大夫以下成羣立社，曰置社，注社所以祭后土先農也。

### 古二十五家必有社

左傳哀十五年書社五百。商子曰：里有書社。史記索隱：古者二十五家爲里，里各立社。書社者，書其社之人名於籍也。

### 古以叢木爲社，外圍以垣，中有門

今之社祇有壇。古社旣築壇，必樹以叢木。故所謂社者，實攢木也。大戴禮：千乘篇：教其書社，脩其灌廟。按毛詩傳：灌，木叢也。呂氏春秋：問其叢社。叢社，亦叢木。注：古者皆以社爲叢。叢卽灌也。又墨子：三代聖主其始建國，營都必擇木之脩茂者，立以爲叢位。注：叢位卽叢社。又墨子：季孫紹與孟伯常治魯國之政，不能相信，而祝於禁社。禁者，叢字之訛，仍叢社也。是以世說新語云：阮宣子伐社樹，有人止之。宣子曰：社而爲樹，伐樹則社亡。樹而爲社，伐樹則社移矣。是社爲叢木之證也。惟周官鄭注云：中攢木爲之，外圍以垣，中有門。然則古社之概況與今同，祇多叢木耳。應璩書所謂虛社高木，梁元帝詩所謂叢林多古社者，此也。

### 社樹必塗績，采畫其實爲狐鼠之宅

韓非子：桓公問管仲曰：治國災患，曰社鼠。夫爲社者，樹木而塗之。塗以文鼠穿其間，窟穴其中，燠之則恐，焚之則恐塗墮。是社雖爲叢木，木上必加塗績以爲飾也。墮者，脫也。塗見水則脫。又世說：謝幼輿謂

周侯曰卿類社樹遠望之峨峨拂青天就而視之其下則羣狐所託下聚溷而已然則社不惟爲鼠所穴亦狐之窟宅也

周時祭社之盛況

左傳公如齊觀社韓非子非社臘之時也奚自殺牛而祠社是祭社必以牛也又禮郊特牲唯爲社事單出里注事祭也單出里者里人盡出祭也是祭社之盛況幾與大蜡同也國民至是日飲食歌舞醉飽歡樂其狀況可知矣

祭社亦有尸

周禮士師職若祭勝國之社則爲之尸按祭亡國之社尙有尸祭當代社更有也

古春秋兩季祭社

月令仲春擇元日命民社注元日者甲日也天子甲爲首故曰元亦猶祫禘用己日也無定日也但祫用上己茲未言上中蓋視人事臨時擇定此春社也周禮春官社之日蒞卜來歲之稼注云卜來歲之稼則社宜爲秋祭按月令孟冬是月也大飮烝天子乃祁來年于天宗大割祠于公社是秋社在孟冬舉行不曰冬而曰秋者言秋事畢百物斂藏宜祭社以爲報也月令天子祁來年於天宗卽春官所謂蒞卜來歲之稼也此秋社也

社鳥不可犯

論語比考識子路子貢過社樹有鳥子路搏鳥社人牽子路子貢說之乃止是可見時人視社之重雖樹鳥亦不可犯也

若亡國之社則止覆以屋不使見天陽

禮郊特牲天子大社必受霜露風雨以達天地之氣也是故喪國之社屋之不受天陽也亳社北牖使陰明也殷社又呂氏春秋狐援說齊宣王曰殷之鼎陳於周之廷其社蓋於周之屏亡國之社不得見於天王必勉之無使太公之社蓋之屏注屏障也言屋其上也亡國之社上覆以屋而北其牖不使見天日變陽而爲陰若現代之社則暴露之使受霜露風雨也然此皆爲國社里社則私社也私社則否

凡盟必于社

墨子齊有二人訟者久不決乃使之入共一羊盟齊之神社二子許諾於是泔同緇灑羊而灑其血蓋古人以社爲明神所憑依事不能決雖官吏亦無如何則使對神盟詛以濟法律之窮周禮秋官所以有司盟之職專掌百姓盟詛之事也

又聽陰正不訟則在亡國舊社

周禮地官媒氏凡男女之陰訟聽之於勝國之社注亡國之社奄其上而棧其下陰訟者中冓之事不欲

暴其情。故於此聽之。按此最爲仁政。淫穢之事。不暴其情。則廉恥可保。勝國社上皆屋而少。矚光陰晦。而不明於此聽陰訟。恰與事相應也。

漢社日分肉

史記陳平傳。里中社。平爲宰。分肉甚均。父老曰。善。陳孺子之爲宰。按此係祭罷而分其胙肉也。雖未言其情狀。然是日之爲社會佳節無疑也。又睦弘傳。昌邑有枯社。以木復生。又蔡邕集有陳留東昏庫上里社碑記。是必始築社成。詣中郎記其事。其重可想。

漢仍春社秋社

漢書五行志。建昭五年。兗州刺史浩賞。禁民私所自立社。張宴曰。民間三月九月立社。號曰私社。舊二十五家爲一社。而民或十家五家共爲田社。故禁之。

漢亦爲人立社

史記樂布傳。燕齊之間。皆爲立社。號曰樂公社。蓋西漢時。除皇家外。尙無爲人立祠廟者。故曰社也。若後漢則有爲賢人君子立廟之事。如王喬傳。乃爲立廟。號葉君祠是也。

六朝唐宋社日仍盛

魏書王修傳。母以社日亡。來歲鄰里社。修感念哀痛。鄰里聞之。爲之罷社。唐杜甫詩。今年大作社。拾遺能

住否。宋墨莊漫錄云。今人家閨房。遇春秋社日。不可組紉。謂之忌作。故周美成秋蕊香詞云。聞知社日停鍼線。觀以上諸證。自六朝以迄唐宋。社日之盛況。仍與周秦兩漢同。可謂久矣。至歷代詩人言社者尤多。不可枚舉。略而不書。書其能爲社會狀況證者。

周以甲日社。後代社日用戊巳日。

月令擇元日。令民社。是周秦用甲日社也。埤雅云。燕之往來避社。而曠土不以戊巳日。簪口布翅支尾。是後代又以戊巳日社。惟不知始於何時耳。





# 卷十七

行唐尙秉和著

## 學校

歷代學校制度通攷等書紀之詳矣。茲所欲知者，乃學子在校起居飲食洒掃應對進退誦讀諸狀況，而非其制也。全書宗旨如此，而學校尤甚。

### 周時鄉校校規

管子弟子職：少者之事，夜寐蚤作，既拚盥漱。注：拚，掃席前日拚。盥，盥手漱漱口。執事有恪，攝衣共供同盥。先生乃作，沃盥徹注：既盥，微盥器。汎拚正席。注：汎，謂汎水。拚，謂拚之。先生乃坐，出入恭敬，如見賓客，危坐鄉同向師。顏色毋怍，此晨起侍先生。盥漱洒掃及出入坐起之狀況也。顏色毋怍者，言幼年學子對先生常有羞縮不安之態，於威儀不方雅。視聽太拘促，蓋古人學規雖嚴肅，絕不欲使弟子不活潑欠雍容，故首舉以爲戒。

### 授課規程及誦讀儀式

又云：授業之紀，必由長始。注：先從長者教。一周則然，其餘則否。注：一周之外，不必從長始。始誦必作。起立。其次則已。次誦則不作。按古人最重長幼，故授業亦以長者爲先。

言行坐作應對賓客及請業儀式

凡言與行思中以爲紀。注：思合中和。古之將興者必由此始。後至就席狹坐則起。注：狹坐之人見後至者則當起。若有賓客弟子駿。逸也。作對客無讓。應且遂行。趨進受命。所求雖不在。必以反命。注：言反白。反坐復業。若有所疑。捧手問之。師出皆起。按對客周旋。弟子與弟子不必遜讓。遜讓反慢客矣。應直。且字疑。遂逕行。古人講求威儀詳密如是。

弟子餽食陳列食品儀式

至於食時。先生將食。弟子饌饋。注：還具其食。攝盥盥漱。跪坐而饋。置簠錯食。陳膳毋悖。凡置彼食。鳥獸魚鼈。必先菜羹。注：先菜後肉。羹戴音悉。細切肉。中別戴在醬前。其食要方。注：陳列食器要令成方。飯是爲卒。注：言最後具飯。左酒右漿。告具而退。奉手而立。按告具而退者。具者備也。陳食既備。告先生食也。奉手而立者。侍食於旁也。

弟子侍食儀式及禮節

三飯二斗。左執虛豆。右執挾匕。周還而貳。惟嚟之視。同嚟以齒。周則有始。柄尺不跪。是謂貳紀。先生已食。弟子乃徹。趨走進漱。拚前板祭。按三飯二斗者。言飯畢。卽易斗以取潔。如今之食番菜。每菜易器也。虛豆者。備承接淋漓挾者。箸也。與匕同爲取食之器。貳者。再益。嚟者。盡也。同盡。再以次再益。柄尺不跪者。言豆有柄長尺。則立而進之。拚前板祭者。拚者。掃也。板者。斂食之器。板祭者。言以板斂祭品也。公羊傳。餼而刻。

其板與此板同也。至此而弟子侍食之禮畢。

### 弟子會食禮節

先生反命。弟子乃食。以齒相要。坐必盡席。注：所謂食坐盡前。飯必捧摩。羹不以手。亦有據膝。毋有隱肘。注：隱肘則太伏。既食乃飽。循咍復手。注：咍。口也。覆手而循。所以拭去不潔也。振枉掃席。已食者作。振衣而降。旋而嚮席。各徹其饋。如於賓客。既徹并器。乃還而立。注：并謂藏去也。按飯必捧摩者。曲禮云。共飯不澤手。注：古禮飯以手不以箸。故云捧摩也。有據膝毋隱肘者。言食時態度俯仰適中也。

### 洒掃儀式及規矩

凡拚。掃也。之道。實水於盤。注：備。泛洒。攘臂衽及肘。注：恐。濕袂。堂上則播洒。室中握手。注：堂上寬。故播散而洒。室中隘。故握手掬水洒。執箕膺揲。舌也。厥中有帚。注：云。既洒水將掃。故執箕當舌置帚於箕中也。入戶而立。其儀不忒。執帚下箕。倚於戶側。注：謂倚箕于戶側也。凡拚之紀。必由奧始。西南隅。俯仰聲折。拚毋有徹。動也。不得觸動他物。拚前而退。聚於戶內。坐板排之。坐板者。臥板也。以葉適已。注：向。實帚於箕。先生若作。乃興而辭。注：拚未畢。故辭令止。坐執而立。遂出棄去。既拚反立。是協是稽。按坐板排之者。舊注謂板穢時以手排之。以板為除。義似不協。余謂坐板者。非人坐。乃臥板於地。排穢其上而出之也。讀此文。古弟子洒掃細節。如目睹矣。

### 弟子在塾夜間執燭狀況

昏將舉火執燭隅坐錯總薪束之法橫於望所櫛據禮記注之遠近乃承厥火居句如矩細薪蒸然者處下捧椀以爲緒燭灰右手執燭左手正櫛據禮記鄭注引有墮代燭交坐毋背尊者乃取厥櫛當爲遂出是去此節詳解皆在燈燭門聖者燼也交坐毋背尊者言毋蔽尊者明也

夜寢時弟子侍枕席禮節

先生將息弟子皆起敬奉枕席問何所趾始也俶始也枉則請有常則否改班席問何趾先生既息各就其友相切相磋各長其儀凡則復始是謂弟子之紀按紀者綱紀也今謂校規古謂之紀吳云是蓋周時通行全國之鄉校規程未必爲齊所獨有按周秦文可以考求當時社會情狀者除曲禮內則昏禮諸篇外以此爲最詳矣真第一寶書也讀之若身遊成周時鄉校而參觀也

古學校之等級 學子按等遞升與今同

禮學記古之教者家有塾黨有庠注應術爲遂有序國有學按五百家爲黨萬二千五百家爲遂是升學次第由庠而序由序而國學也但黨之下爲閭閭亦有學孔疏云黨庠乃教閭中所升者但閭學何名禮無明文殆如今之小學也

周學校年年招考年年考試

禮學記。比年入學。中年考校。一年視離經辨志。視其企向。三年視敬業樂羣。五年視博習新師。七年視論學取友。謂之小成。九年視知類通達。強立而不反。謂之大成。夫然後足以化民易俗。按比年入學者。年年有來學之人也。中年考校。注中者聞也。言於入學期間。常考其德行道藝也。離經者。謂離析經理。使章句斷絕。視其能解未也。辨志者。視其企向何經也。一年級之事也。若三年級則視其能敬業樂羣與否。視一年級有進矣。五年級則視其能博習羣經親愛本師與否。視三年級有進矣。七年則視其論學取友。能合道與否。視五年又進矣。九年則視其能知類通達與否。果能於事類之通變洞達無遺。又能自立臨事而不惑。則學成矣。故可使化民成俗也。

### 三代大學小學之位置

禮王制。有虞氏養國老於上庠。養庶老於下庠。夏后氏養國老於東序。養庶老於西序。殷人養國老於右學。養庶老於左學。周人養國老於東膠。養庶老於虞序。虞序在國之西郊。注上庠。東序。右學。東膠。皆大學也。皆在國內。王宮。東下庠。西序。左學。虞序。皆小學也。皆在西郊。惟殷人相反。大學在西郊。小學在王宮東也。

### 古學校亦爲鄉老飲酒游息習禮之地

左傳襄十三年。鄭人游於鄉校。以論執政。然明謂子產曰。毀鄉校何如。子產曰。何爲。夫人朝夕息退而游焉。

又周禮地官國索鬼神而祭祀則以禮屬民而飲酒於序以正齒位注正齒位者鄉飲酒義所謂六十者坐五十者立侍六十者三豆七十者四豆八十者五豆九十者六豆是也必正之者爲民三時務農將闕于禮至此農隙而教之尊長養老見孝悌之道也此以後世社會窺測於學校之中而養老而飲酒而父老游息且賓興於是鄉射於此似於校務有妨矣而不知古人所謂學非第誦誦也凡長幼進退揖讓之節飲酒習射齒位尊卑俎豆多寡之分其禮式皆於學校舉行使弟子及國民得觀摩講習之益而國家養老又恆于校中則謂古學校爲公共習禮之場所可也

戰國時學宮仍以習禮爲重

列女傳孟母其舍近墓孟子之少也嬉遊爲墓間之事踴躍築埋孟母曰此非吾所居乃去舍市旁其嬉戲爲賈人街賣之事孟母又曰此非吾所以居處子也後徙舍學宮之旁其嬉遊乃設俎豆揖讓進退孟母曰真可以處吾子矣

漢師教授必居帳中

漢書董仲舒傳爲博士下帷講誦弟子傳以次相授業或不見其面又後漢馬融傳融才高博洽爲世通儒教養諸生常有千數常坐高堂施絳紗帳前授生徒後列女樂弟子以次相傳鮮有入其室者是兩漢經師教授者皆設帳也

漢時學校弟子賃人作食

漢書兒寬傳。詣博士受業。孔安國貧無資用。常爲弟子都養。時行賃作。帶經而鉏。休息輒讀誦。按都養者。師古曰。都。凡衆也。養。主給烹炊者也。貧無資用。故供諸弟子烹炊。又世說服虔既善春秋。將爲注。欲參攷同異。聞崔烈集門生講傳。遂匿姓名爲烈門人。賃作食。每當至講時。輒竊聽戶壁間。蓋漢時經師門下。常有數百人。其貧者自炊。其富者賃人作炊。與今同也。

古入學必與師以資

拾遺記。賈逵來學。不遠萬里。或襁負子孫。舍於門側。皆口授經文。贈獻者積粟盈倉。世謂舌耕。魏志。邴原傳。注。原十一而喪父。鄰有書舍。原過其旁而泣。師問曰。何悲。原曰。孤爲易傷。貧爲易感。夫書者必具有父兄者。一則羨其不孤。二則羨其得學。心中惻然。而爲涕零也。師亦泣曰。欲書可耳。答曰。無資。師曰。童子苟有志。我徒相教。不求資也。原遂就書。是漢末就師求學者。必與師以資。以爲報。又北史賈思伯傳。初思伯與弟思同師事北海陰鳳。業竟無資酬之。鳳遂質其物。時人爲之語曰。陰生讀書不免癢。不識陰鳳脫人衣。是六朝時學子仍以資酬師。與後世同也。

古弟子禮師須北面

漢書于定國傳。定國爲廷尉。乃迎師學春秋。身執經北面備弟子禮。

自唐虞三代以來閭里以上皆有校。校弟子之優秀者，每年以次升學，至大學而止。略如今日學制，由初級小學而高等，而初中而大學也。而統名之曰庠序。里人習禮於此，游息於此，大和會於此，則視今稍異。官校既多，無私人講學者，以故春秋以前之學人，無有師弟受授之說。至春秋末葉，兵戎興，賦稅重，鄉校廢，於是私人講學之風漸盛。孔子其首出者也。孔子之徒三千，身通六藝者七十二人，而七十二人之中，若曾子、子子、張子、夏子、游，又各有徒黨傳業，訖於漢代，只明一經，卽有弟子，其大師門下恆數百人，或千餘人。自是以來，私塾益昌，其所謂官學者，形式而已。由兩漢至明清二千餘年，形狀如一，可謂久矣。至清末學校興，私塾廢，形式始變也。



# 卷十八

行唐尙秉和著

## 農田

### 三代井田狀況

韓詩外傳古者八家而井田方里爲井廣三百步長三百步六尺一步一里其田九百畝廣一步長百步爲一畝廣百步長百步爲百畝八家爲鄰家得百畝餘夫各得二十五畝不在本井之內家爲治也公田十共八畝餘二十畝共爲廬舍各二畝半八家相保出入更守疾病相憂患難相救有無相貸飲食相召嫁娶相謀漁獵分得按經傳言井田者多矣無如韓詩之簡當明了井字形共爲九區區各百畝八家分占中央爲公田八家爲公家各種十畝共八十畝餘二十畝各得二畝半以爲田廬詩曰雨我公田遂及我私又曰中田有廬中田者公田也井字之中也

### 井與井間之水道溝洫

攷工記匠人九夫爲井井間廣四尺深四尺謂之溝方十里爲成成間廣八尺深八尺謂之洫方百里爲同同間廣二尋深二仞謂之澮專達於川各載其名注載其名識水所從出也按溝洫澮川皆由小水以

達于大水。偶值水潦。水易洩。不至爲災。

井與井間之道路

周禮地官遂人。凡治野。夫間有遂。遂上有徑。注云二尺。可容牛馬。按夫間者百畝與百畝之間也。徑二尺。

可容人與牛馬行也。又十夫有溝。廣深各四尺。溝上有眡。注可容大車。百夫有洫。深廣各八尺。洫上有涂。容乘車一軌。千夫有

澮。注廣二尋。深二仞。澮上有道。容二萬夫有川。川上有路。容三萬夫有澮。按澮澮澮川。即匠人所營之水道。而水

道之上爲徑。涂道路亦隨水道而遞廣。以便行人車馬往來。以達于王畿。

按井田之制。溝洫澮川一縱一橫。其中阡陌亦一南一東十字相交。一以防。水潦。一以限。戎馬。設險要。故

左傳成二年。晉與齊平。要齊之封內。盡東其畝。言使壘畝盡東西行。晉伐齊。循壘東行。軍行甚易。齊人所

謂唯吾子戎車是利。不顧土宜是也。若南東其畝。則戎車不利矣。然溝洫之制。不始于周。書濬畝澮距川。

論語禹盡力乎溝洫。觀是自夏后以來。即經營溝洫。自禹至周。非一人之力。一時所成。其壞也。自周至秦。

其由來已久。非一時之力。觀左傳襄十年。子駟爲田。洫司氏堵氏侯氏皆喪田焉。是井田之壞。春秋中葉

已然。世謂始于商鞅開阡陌。李悝盡地利者。誤也。然則三代時農田狀況。與今迥殊。讀周禮如目覩矣。

古按都邑室數授田。田下者可多授

周禮地官。凡造都鄙。制其地域而封溝之。以其室數制之。不易之地家百畝。一易之地家二百畝。再易之

地家三百畝。按古之人民，盡居都邑。故按室數授田，而田有高下。上田授百畝，每年可種，不易之田也。息一年一種者爲一易，息二年一種者爲再易。封溝者，四境界上以溝洫爲封，樹木以爲阻固。蓋古者地廣人稀，而國與國鄰，必有疆界，封樹以爲標識，且以阻交通，限戎馬。至後代人口增多，而阡陌溝洫占地頗廣，故商鞅開阡陌以益田也。阡陌者，溝洫上之道路也。

#### 古農民夏日出而就田狀況

詩中田有廬，陂場有瓜，是剝是茹。正義云：古者宅在都邑，田於野外。農時則出而就田，須有廬舍，故言中田。謂於田中作廬，又於田畔種瓜也。按正義釋中田，誤。中田者，公田居一井之中，故曰中田。言廬于井之正中者也。

又漢書食貨志：春將出民，里胥平旦坐於右塾，里門側之塾鄰長坐於左塾，畢出然後歸。夕亦如之。注：里胥鄰長坐於門側者，督促勸之，知其早宴，防怠惰也。

#### 古農畢歸都邑狀況

詩穹窒薰鼠，塞向瑾戶。嗟我婦子，曰爲改歲。入此室處。鄭箋：穹，窮窒塞。向北出牖，瑾塗。言既窮塞室內，孔穴薰鼠而出之，更塞北向牖以備朔風也。按此言秋後農事畢，將由田廬而歸都邑，預先修治邑中住室，以爲歲莫禦寒計也。

牛耕攷

隨園隨筆云。賈公彥以爲古無牛耕。牛耕始于漢趙過。故周禮牛人之職。不言耕事。然山海經曰。后稷之孫叔均。作牛耕。孔子弟子冉耕字伯牛。似乎三代時已有牛耕矣。嚴冬友曰。平原君云。秦以牛田之水。通糧。當爲牛耕之始。故呂氏春秋季春。出上牛示農耕早晚。此其國俗也。又史記律書。牛者耕種萬物也。按以牛耕地。周以前載記實無明文。然冉耕字伯牛。實牛耕之確證。謂始於秦者。蓋不然也。後之人又謂始於漢趙過者。乃魏賈思勰之誤。思勰齊民要術序云。趙過始爲牛耕。唐賈公彥承其說。豈知漢書食貨志言趙過爲代田。用耦犂二牛三人耕。蓋變通牛耕之法。非創始牛耕。又賈誼當文帝時。前於過遠矣。而有百姓煦牛以耕。曝背而耘之語。此又一確證也。又論語。犂牛之子騂且角。注犂雜色也。然犂字各字書皆訓耕。吾以爲犂牛卽耕牛。耕牛勞苦。最爲下等。故以爲喻。又食貨志民或苦少牛。無以趨澤。故平都令光教過。以人挽犂。若過以先無牛耕。皆人挽犂焉。用教哉。此尤確證也。

古農婦餉耕狀況

詩豳風。同我婦子。饁彼南畝。又其饁伊黍。又左傳僖三十三年。初。臼翼使過冀。見冀缺耨。其妻饁之。敬相待如賓。按饁者餽也。男耕於野。婦往餽食。同我婦子者。言婦饁田并携其幼子也。是蓋春初耕作。尙未移居于田廬時也。若已往田廬。則一井之地。距廬甚近。無庸饁也。

古灌園以桔槔

莊子子貢南遊楚見漢陰丈人抱甕而灌子貢曰有械於此一日浸百畦用力寡而見功多夫子不欲乎爲圃者印同傳而視之曰奈何曰鑿木爲機後重前輕挈水若抽數加沃湯其名曰槔又史記田單傳莒人求潛王子法章得之太史儼之家爲人灌園又鄒陽傳於陵子仲爲人灌園

古鋤苗去留規矩

呂氏春秋凡禾之患不俱生而俱死是以先生者美米後生者爲糝也是故其耨也長其兄而去其弟注殺小留大不知稼者則去其兄而養其弟不收其粟而收其糝按今日鋤苗者有諺語曰揀苗如上囊言鋤時揀擇大者留之其功效如益一次糞也不知古人於數千年前早有此研究又漢書食貨志苗生葉以上稍耨隴草因隴其土以附苗根故其詩曰或芸或苴黍稷薿薿芸除草也苴附根也言苗稍壯每耨輒附根比盛暑隴盡而根深耐也能風與旱故儼儼而盛也此可見我國農業在上古時代講求已極精徒以儒家向不保存農學書籍至使三代農書盡歸散失至可慘痛茲呂氏所述乃千百之一周秦書所僅見者耳

古農家種苗不地不時不行之防備

呂氏春秋其爲晦畝同也高而危則奪澤陂則埒按爾雅山上有水埒疏云停泉陂則埒言低則停水也舊注非見風則儼仆也高培則

拔寒則雕。同凋熱則脩。具也一時而五六死。故不能爲丕。不俱生而俱死。虛稼先死。虛根不實衆盜乃竊。望之似有餘。就之則虛。不粟是不地害稼也。又所謂今之耕也。營而無獲者。其早者先時。晚者不及時。寒暑不節。稼乃多菑。實是不時害稼也。又四序參發。大剛小畝。爲青魚肚。去也苗若直獵。地竊之也。既種而無行。耕而不長。則苗相竊也。弗除則蕪。除之則虛。則草竊之也。故去此三盜者。而後粟可多也。是不行之害也。知其害則知防矣。

古窮民在田拾穗狀況

詩彼有不穫穉。此有不斂穧。彼有遺秉。此有滯穗。伊寡婦之利。注穰禾之鋪而未束者。秉把也。主人不暇取。寡婦得捃拾之也。又列子林類年且百歲。拾遺穗於故畦。又魏略焦先不踐邪徑。必循阡陌。及其捃拾。不取大穗。又後漢范冉傳。遂推鹿車。載妻子。捃拾自給。是窮民拾禾稼。自古有之。惟周時只云寡婦。不云男子。以其時民年二十卽授田。而寡婦則無田可耕。故拾穗也。若後世之窮者。則不惟寡婦。此亦社會之一小變態也。

周時農民之概況

盛周農民概況。經傳言之詳矣。而漢書食貨志。則總括經傳禮記等書。敘述尤明了。大哉班書。真千古第一良史也。志云。理民之道。地著爲本。故必建步立畝。正其經界。六尺爲步。步百爲畝。畝百爲夫。夫三爲屋。

屋三爲井，井方一里，是爲九夫。八家共之，各受私田百畝，公田十畝，是爲八百八十畝，餘二十畝，以爲厰舍出入相友，守望相助，疾病相救，民是以和睦而教化齊同，力役生產，可得而平也。民授田，上田夫百畝，中田夫二百畝，下田夫三百畝，歲耕種者爲不易，上田休一歲者爲一易，中田休二歲者爲再易，下田三歲更耕者，自爰其處。農民戶人已受田，其家衆男爲餘夫，亦以口受田如此。士工商家受田，五口乃當農夫一人，此謂平土可以爲法者也。若山林藪澤原陵淳鹵之地，各以肥磽多少爲差，民年二十受田，六十歸田，七十以上，上所養也，十歲以下，上所長也，十一以上，上所彊也，種穀必雜五種，以備災害，田中不得有樹，用妨五穀，力耕數耘，收穫如寇盜之至。禮天還同禮廬樹桑，菜茹有畦，瓜瓠果蓏，殖於疆易，雞豚狗彘，毋失其時，在墜曰廬，在邑曰里，五家爲鄰，五鄰爲里，四里爲族，五族爲黨，五黨爲州，五州爲鄉，鄉萬二千五百戶也。鄰長位下士，自此以上，稍登一級，至鄉而爲卿也。於里有序而鄉有庠，序以明教，庠則行禮而視化焉。春令民備出在墜，冬則畢入於邑，其詩曰：四之日舉止。同耻同我婦子，饁彼南畝，又曰：十月蟋蟀入我牀下，嗟我婦子，聿爲改歲，入此室處，所以順陰陽，備寇賊，習禮文也。春將出民，里胥平旦坐於右塾，鄰長坐於左塾，畢出然後歸，夕亦如之，入者必持薪樵，輕重相分，可見春時向不出居田廬班白不提攜，冬民旣入，婦人同巷相從夜績，女工一月得四十五日。半夜同必相從者，所以省費燎火，同巧拙而合習俗也。男女不得其所者，因相與歌詠，各言其傷，按經傳言周時農民生活狀況者甚多，然皆散漫不具，此文於授田歸

田之制。春出田廬農作。冬歸邑室度歲。及婦孺餽耕南畝。同巷冬夜。婦人績麻。各情狀。以次陳述。歷歷如繪。無一字不本於詩書禮經。而源本詳悉。蒼萃終始。讀之較經傳則爲明晰。故錄以爲殿。

若夫秦漢以來。田地爲民所私有。而可買賣。

古民無田者。

趙馬服君之爲將。秦王翦之伐楚。皆先購良田。漢

蕭何亦大購田。是其證也。田制旣異。人口亦漸多。於是夏日出居田廬。冬日入居邑室之動作。亦漸不同。而野外邨居多矣。循是以來。數千年間。不異其狀。故亦不再述焉。



## 卷十九

行唐尙秉和著

嫁娶

出妻禮節 再嫁妻妾當夕次敘附

周時有官媒

周禮地官媒氏掌萬民之判。

注判半也。主合其半成夫婦。

凡男女自成名以上，皆書年月日名焉。令男三十而娶，女二

十而嫁。凡娶判妻。

出婦

入子者。

再嫁而攜其子。入家者書之。

書之。

以息爭訟。

中春之月，令會男女。于是時也，奔者不禁。司

男女之無夫家者而會之。又時取妻如之何，非媒不得。又士昏禮：昏禮下達，注必使媒氏下通其言，皆必

由媒交接，設介紹，皆所以資廉恥。蓋上古人祇知有母，不知有父，自伏羲定嫁娶之禮，以儷皮爲聘，人始

有夫婦。有夫婦然後有父子，始與禽獸殊。三代以來，更相沿飾，至周遂有媒氏專官。未必始專司判合之

事。凡男無家女無夫者，卽爲中婚。以王命會之，免其怨曠。一則保人廉恥，一則順民所欲。民有欲而爲廉

恥所拘，不能自達者多矣。今媒氏以命令行之，俾離寡者各如其願，無私合之名，免淫奔之俗，於社會風

化所關甚大也。

春秋仍有官媒

管子凡國都皆有掌媒丈夫無妻曰鰥婦人無夫曰寡取鰥寡而和合之予田宅而家食之三年然後事之供國役此之謂合獨按掌媒卽周禮所謂媒氏也是春秋時仍有專官以理婚事也

婚期多於春日舉行

詩桃之天天灼灼其華之子于歸宜其室家又周禮地官中春之月令會男女于是時也奔者不禁按中春者仲春也夏歷二月也非周正周授民時仍用夏歷是時桃紅柳綠天氣和暖人民嫁娶多於是時其怨女曠夫則未免有情誰能遺此故雖奔而不禁此以證社會婚者皆于是時也

周議婚時禮節

古婚禮儀禮士昏禮言之詳矣而禮節太繁反不易悉究茲擇經傳敘述簡括者明之

禮記昏義納采用雁問名生母名納吉卜日吉納徵先納聘財請期親迎期皆主人几筵於廟而聽命於廟按今日

定婚者男家須以財爲聘禮富貴人家祇衣服首飾而無現金貧者則以錢財多少爲爭議若周時則納財爲一定禮節又以婚姻爲人生第一大事故納采卜吉親迎無不告廟而行聽命于廟者凡卜必于廟卜得吉若祖宗所命也然後行之

古親迎必以夜衣服皆尙黑

儀禮士昏禮云昏禮下達鄭云上娶妻之禮以昏爲期因而名焉陽往而陰來日入三商爲昏疏三商者

刻漏之名。又云。主人爵弁纁裳緇衣。從者畢玄端。乘墨車。從車二乘。執燭前馬。按下達者言陽。下達於陰。古婚必男家先以媒妁求女家。必夜行者。言迎陰氣入家。宜於夜。夜陰時也。車服皆尙黑。黑亦陰。正與時相稱。與今代嫁娶之尙紅者迥殊。又從車二乘。執燭前馬。惟以夜故。執燭與前。以爲導引。若今日白晝親迎。仍有綵燈。執持行列。與告朔餼羊無以異。失其義矣。

### 親迎時禮節及新婦登輿時狀況

說苑諸侯以屨二兩加琮。大夫士庶以屨二兩加束脩。二曰某國寡小君。使寡人奉不珍之琮。不珍之屨。禮夫人貞女。夫人曰。有幽室數辱之產。未諭于傳母之教。得承執衣裳之事。敢不敬拜祝。祝答拜。夫人受琮。取一兩屨以履女。正笄衣裳而命之曰。往矣。善事爾舅姑。勿貳爾心。無敢回也。女拜乃親引其手。授夫乎戶。夫引手出戶。夫行女從。拜辭婦。女母于堂。拜諸母於大門。夫先升輿執轡。女乃升輿。轂三轉。然後夫下先行。士大夫士庶稱其父曰。某之父。某之師友。使某執不珍之屨。不珍之束脩。敢不敬禮某氏貞女。女母曰。有草茅之產。未習于織紵紡績之事。得奉執箕帚之事。敢不敬拜。是自諸侯至于士庶親迎時所持禮物。或以玉或以束脩。可隨貴賤而差。獨屨二兩。則無貴賤必具。且女臨登輿。其母卽以此屨履女。亦無貴賤皆同。揆其用意。似此屨爲男家所備。女服。故將登輿。母必以此屨履女。非若琮與束脩之純爲采禮也。然衣服首飾均不及。而獨遣以屨。意者新婦入門。爲踐履之始。故獨重之歟。

古親迎時奠雁御車及新婦入門共牢合巹狀況

禮記昏義。父親醮注酌而無醢子。而命之迎。男先于女也。子承命以迎。主人几筵于廟。而拜迎于門外。女父壻執雁入。揖讓升堂。再拜奠雁。降出御婦車。而壻授綏。御輪三周。先俟於門外。三周。即授御者先歸。婦至壻揖婦以入。共牢而食。合巹。音謹以一氣分爲兩。名曰巹。各執其一。而醕。食後以酒漱口。按古人以男女配陰陽。雁隨陽。故奠雁。壻既爲婦御。又先馳歸。備迎婦於門外。牢者牲也。共牢者共食一牲也。古食罷以酒漱口。必以巹盛酒者。取合同之義也。今日婚者。坐帳後飲交杯酒。蓋猶共牢合巹之遺意。而雁不易得。代之以鵝。亦曰奠雁。甚無謂也。

古入洞房將寢時男御女媵交換鋪陳臥席狀況

儀禮士昏禮。共牢合巹既徹。徹。僕。主人說。同脫。服于房。媵受婦說服于室。御受姆授巾。將寢清。御衽。臥席于奧。媵衽良。壻也。席在東。皆有枕北止。同趾。主人入。新壻親說婦之纓。燭出。將寢。故侍者媵餽主人之餘。御餽婦餘。贊酌外尊醕之。按夫婦將寢。故弛禮服。御者壻之侍者。媵則新婦侍者。婿衣媵受婦衣。御受示交接有漸也。姆授巾。俾女備拂拭潔清也。良者良人。即壻也。御爲婦鋪臥席。媵爲壻鋪臥席。仍交接之義。北趾者。足北嚮。至新壻爲新婦脫纓。則晚妝俱卸矣。故侍者持燭出也。餽者食餘饌也。媵餽男餘。御餽婦餘。無一事不以交接爲義。此等禮節。後世未見有行者。蓋亡已久矣。

天明新婦謁見舅姑儀式

古以夜昏故婦不及見舅姑。至天明行之。禮記昏義云：夙興婦沐浴以俟見。質明贊見婦於舅姑。執筭棗栗。腹脩以見。贊醴婦。婦祭脯醢祭醴。成婦禮也。舅姑入室。婦以特豚餽。明婦順也。按贊者贊行禮之人也。古初見必以贊。婦人贊棗栗。筭者盛棗栗之器也。以豚餽者新婦初爲舅姑上食也。婦道如是也。

第三日舅姑享新婦儀式

禮記昏義：厥明注又次舅姑共饗婦以一獻之禮。奠酬。舅姑先降自西階。婦降至阼階。以著代也。按昏之次日婦既見舅姑。舅姑於第三日卽饗婦。西階者賓位。阼階者主位。新婦居阼階。示自此授以室代爲家政也。故曰著代。又按韓詩外傳：厥明見舅姑。舅姑降自西階。婦升自阼階。授之室也。以降爲升。義尤明。當從外傳。

古嫁女後三夜不息燭娶亦不賀

禮記曾子問：嫁女之家三夜不息燭。思相離也。取婦之家三日不舉樂。思嗣親也。郊特牲：昏禮不賀。人之序也。是古不以嫁娶爲喜事。故不賀。而嫁女之家尤相思念。有遠別之悲。趙太后至持踵而泣。然取婦。究爲喜事。曲禮已有賀取妻之文。後代賀者成爲風俗。不能以古禮繩。惟古時賀娶者有之。賀嫁者絕無。今則嫁女已賀矣。序者代也。

古新婦入門之眼波視態羞媚狀況

呂氏春秋白圭新與惠子相見。惠子說之以強。白圭無以應。惠子出。白圭告人曰。人有新娶婦者。婦至。宜安。矜。煙。視。媚。行。監子操蕉火而鉅。新婦曰。蕉火太鉅。入於門之中。有斂陷。新婦曰。塞之。將傷人之足。此非不便之家氏也。然而有大甚者。今惠子之遇我。尙新。其說有大甚者。將毋類是。按安矜。煙視媚行。形容新婦之狀態。可謂入微矣。然可意會。難以言詮。安者。從容矜者。謹慎。煙視者。眼波流動。不直睨。媚行者。動止羞縮。柔媚安徐也。是皆新婦初入門之狀態。反是則失身分。白圭所言者是也。

漢初女過期不嫁則有罰

漢書惠帝紀。女子年十五以上至三十不嫁。五算。應劭曰。欲人民繁息。漢律人出一算。算百二十錢。唯賈人與奴婢倍算。今使五算。罪之甚也。按女子失時不嫁。不惟與生息有關。準之人情。亦大背。豎漢律五算之罰。殊不爲苛。以於風俗所關甚大也。

漢時賀婚成俗

漢書宣帝紀。五鳳二年詔曰。夫婚姻之禮。人倫之大者也。酒食之會。所以行禮樂也。今郡國二千石。或擅爲苛禁。禁民嫁娶。不得具酒食相賀。召令民無所樂。非所以導民也。按漢律三人以上。無故羣飲。罰銀四兩。吏因並嫁娶而禁之。故詔不許也。是可見民嫁娶具酒食相賀。召已成風俗。與周異。觀陳平傳。張負以

女孫與平爲平貧，乃假貨幣以聘，予酒肉之資以內婦，是其證也。

### 漢時新婚夜聽房狀況

後漢書袁隗妻傳：初成禮，隗問之曰：南郡君馬融之妻，學窮道奧，文爲詞宗，而所在以財貨爲損，何也？倫對曰：孔子大聖，不免武叔之毀；子路至賢，猶有伯遼之愬。家君獲此，固其宜耳。隗又曰：弟先兄舉世爲笑，令姊未適，先行可乎？對曰：妾姊高行殊邈，未遭良匹，不似鄙薄，苟然而已。隗默然不能屈，帳外聽者爲慙。據是：新婚之夕，於窗外竊聽新婦語及其動作，以爲笑樂，自漢時而已然也。

### 春秋時已有回門禮

今人嫁女，彌月後與壻歸來，號回門。始于公羊傳：高固及子叔姬來曰：何諸？爲其雙雙而俱至者歟？是周時已有回門禮，說見隨園隨筆。

### 漢時婚用青廬

世說：魏武少時，嘗與袁紹好爲游俠。觀人新婚，因潛入主人園中，夜呼叫云：有偷兒賊！青廬中人皆出觀。魏武乃抽刀劫新婦與紹還，是：新婚居青廬，與周之用黑色車服爲義同也。

### 看新婦

隨園隨筆云：今人新婚，親友看新婦，按世說：謝尚書娶諸葛恢之小女，恢在時不允，恢亡乃婚，于是王右

軍往謝家看新婦。容服光整。猶有悵之遺風。是晉時已有此禮。

六朝時男家催妝及回門時女家打壻之惡習

西陽雜俎。北朝婚禮。青布幔爲屋。在門內外。謂之青廬。於此交拜。迎婦夫家領百餘人。或十數人。隨其奢儉。挾車俱呼新婦子催出來。至新婦登車乃止。是男家之催新婦上妝。登輿甚暴戾也。又云壻拜閣日。謂爲報也。然至打以杖。詭亦甚矣。  
四門婦家親賓婦女畢集。各以杖打聲。即壻爲戲。至有大委頓者。是婚後壻往婦家。婦家亦戲虐新壻以

隋唐時娶婦之詳禮

西陽雜俎。近代婚禮。當迎婦以粟三升。填門。席一枚以覆井。窰。麻也三斤以塞窰。箭三隻置戶上。婦上車。聲騎而環車三匝。女將上車。以蔽膝覆面。婦入門。舅姑以下。從便門出。更從門入。言當躡新婦迹。又婦入門。先拜豬穢。穢也及窰。娶婦夫婦并拜。或共結鏡紐。又娶婦之家。弄新婦。臘月娶婦。不見姑。又新婦乘鞍。讀此隋唐時娶婦禮節。如目睹矣。而其禮今無一存。惟交拜及弄新婦。尙不免耳。

唐婚時用曉

西陽雜俎。禮婚禮必用昏。以其陽往而陰來也。今行禮於曉。是唐時婚禮。已不以夜。若今日則竟在日中矣。



六朝時南北重娶不重娶之異

顏氏家訓。江右不諱庶孽。喪室之後。多以妾媵終家事。避疥蚊蟲。或未能免。限以大義。故稀聞鬪鬩之聲。河北鄙於側出。不預人流。是以必須重娶。至於三四。母年有少。於子者。後母之弟。與前婦之兄。衣服飲食。爰及昏宦。至于士庶貴賤之隔。俗以爲常。按重娶之風。自周以來。有之。凡爲後母所虐者。皆其父重娶者也。而非爲其子側出而不納娶。抑或六朝時河北風俗如此乎。

宋時婚禮令壻坐馬鞍爲樂

歸田錄。今之士族。當婚之夕。以兩椅相背。置一馬鞍。反令壻坐其上。飲以三爵。女家遣人三請而後下。乃高婚禮。謂之上高坐。凡婚家舉族。內外姻親。與其男女賓客。堂上堂下。竦立而視者。惟壻上高座爲盛禮。按今日河北人家。新婦下轎時。恆當門置一馬鞍。令從鞍上過。謂之登高。以取吉。宋時則施之于壻。且置於椅上。令壻上高座。座誠高矣。危亦甚矣。古今婚禮之有趣者。當以此爲第一。六朝之打鞦韆。周時之御媵。交換服侍男女。以爲交接之導引。又次之也。

漢時嫁女之早爲前後所未有

後漢書陰瑜妻傳。年十七適陰氏。班昭傳。年十有四。執箕帚於曹氏。漢書上官皇后傳。月餘遂立爲皇后。年甫六歲。按年十七出嫁者。今世亦有之。十四歲則罕矣。若六歲者。則古今未有也。

古人之輕于出妻 年五十無子必被出

儀禮士昏禮。姆鄭注云。姆婦人五十無子。出而不復嫁。能以婦道教人者。若今乳母矣。按婦人無子。豈其願哉。年五十將老矣。而被出。復何所歸。祇有爲傳之一途耳。古男子對於婦人。無情若是。苛薄若是。輕視人道。若此。而不聞聖人有所糾正。此一失也。

古箕踞出妻。生子不類。亦出妻。因口舌或一棗栗而出妻

韓詩外傳。孟子之妻獨居踞。孟子入戶視之。白其母曰。婦無禮。請去之。母曰。將上堂。聲必揚。獨入戶。視必下。汝於燕私之處。入戶不有聲。令人踞而視之。是汝無禮。汝婦無禮。是因妻箕踞。非欲出妻也。又孔叢子。尹文子生子不類。怒而杖之。告子思曰。此非吾子也。吾婦殆不婦。言失婦道。吾將黜之。子思曰。若子之妻。則堯舜之妻。復可疑也。此二帝聖者之英。而丹朱商均。不及匹夫。生可類乎。是因生子貌不類己。而欲出妻。其罪狀尤爲莫須有也。又史記。陳平世家。有叔如此。不如無有。伯聞之。逐其妻。棄之。是因口舌出也。又漢書王吉傳。少時學問居長安。東家有棗樹。垂吉庭中。吉婦取棗以啖吉。後知之。乃去婦。是因食一棗而出婦也。以是證古男子對婦之無情。待遇苛薄。匪夷所思。

惟常被出。故必預先蓄積以備養老

韓非子。衛人嫁其子而教之曰。必私積聚。爲人婦而出常也。其成居幸也。此可見婦而被出。不必有大惡。

故於嫁時卽刻刻防此。觀史記陳軫傳云：故出婦嫁于鄉曲者，良婦也。是良婦而亦被出，禮記檀弓：伯魚之母死，期而猶哭。夫子曰：嘻，其甚也。伯魚聞之，遂除之。疏：伯魚母出期而猶哭，故夫子以爲甚。是大聖亦出妻。又子上之母死而不喪，被出而死。門人問諸子思曰：昔者子之先君子喪出母乎？曰：然。子之不使白也，喪之何也？子思曰：昔者吾先君子無所失道，道隆則從而隆，道汙則從而汙，伋則安能爲伋也？妻者是爲白也。母不爲伋也。妻者是不爲白也。母故孔氏之不喪出母，自子思始也。是大賢亦出妻而皆莫詳其故，恐亦無大過也。

### 古出妻禮節

禮雜記：諸侯出夫人，夫人比至其國，以夫人之禮行。仍待以夫人之禮義未絕。至以夫人入，使者將命曰：寡君不敏，不能從而事宗廟社稷，使使臣某敢告於執事。女家主人對曰：寡人固前辭不教矣。言納采時答詞有不教之女。寡君敢不敬辭以俟命。有司官陳器皿，主人有司亦官受之，注器皿。女本所齋物也。律棄妻，界所齋卽返其嫁妝也。是國君棄妻之禮節也。又妻出，士庶出妻。夫使人致之曰：某不敏，不能從而共粢盛，使某也敢告於侍者。謙語。主人對曰：某之子不肖，不敢辟誅。避罰。敢不敬須以俟命。使者退，主人拜送之，不言返所齋。想亦與諸侯同也。是士庶出妻之禮節也。所異者既出妻，則必宣布其罪過，而使者僅曰：不能從而事宗廟，不能從而共粢盛。若女仍無過，而過在男子者，含意不露，弗與女家以難堪，而使者將去，主人仍拜送之，真

可謂彬彬有禮矣。又最異者，無論貴賤，只男家棄女，女家即順受。既無若今日之賠償，以錢財亦無罪過。有無之爭議，所以然者，以當時社會風俗，出女再嫁不難，非若後世之以再醮爲恥。又自古女子以從人爲義，男女不平等，視爲固然，故被棄雖不當罪而不辭也。

自周迄宋，婦女皆不諱再嫁。

貞女不再嫁，操守清潔，自古義之。然在周時，殊無特別旌表之舉。蓋王道本乎人情，禮緣義起，女而守固爲義，即再嫁亦不違禮。其見於載記者，自周迄宋，皆如是也。自明以來，士族搢紳之家，皆恥於再醮，以守節爲高，以改嫁爲不義，不驗人情，但崇虛矯，致使社會男女受無形之拘束，及其潰決，遂并廉恥而胥捐。放佚狂蕩，不可制止，斯非古聖人之過，乃宋明以來腐儒客氣不衷之談之有以致之也。茲將歷代改嫁之見於載記者述之如左。

聖人家婦改嫁

禮檀弓：伯魚死，其妻嫁於衛。又子思之母死於衛，赴于子思，子思哭於廟，門人至曰：「庶氏之母死。」嫁于庶氏。何爲哭于孔氏之廟乎？子思曰：「吾過矣，吾過矣。」乃哭于他室。夫孔子在春秋爲第一講禮之家矣，乃其子死，子婦不免於嫁，何況其他，誠以矯而守不如順而去，且以防矯守之流弊也。

春秋人視異姓同母兄弟如親兄弟

左傳成十一年，聲伯之母不聘。穆姜曰：吾不以爲姒，生聲伯而出之，嫁于齊管于奚，生二子而寡，以歸聲伯。聲伯以其外弟即管氏子爲大夫，而嫁其外妹於施孝叔，是視其異姓兄弟如親兄弟，可見當時士大夫不以再嫁爲諱也。

春秋士人妻中道改適他姓及再歸本夫仍可再受

左傳成十一年，聲伯既嫁其外妹同母女弟于施孝叔，晉卻離來聘，求婦於聲伯。聲伯奪施氏婦而與之。婦人曰：鳥獸猶不失儷，子將若何？曰：吾不能死亡，婦人遂行。生二子於卻氏。卻氏亡，晉人歸之施氏。施氏逆諸河，是娶妻而見奪，奪數年而又歸本夫，仍承受無異詞，益可見當時社會不以改適爲病也。

春秋時女守寡其家卽亟爲擇配

左傳閔二年，衛惠公之卽位也少，齊人使昭伯蒸于宣姜，不可。昭伯不強之，生齊子戴公。文公宋桓夫人許穆夫人宣姜者，惠公之母。昭伯者，惠公之庶兄，是齊人憐其女寡，以勢力強使再嫁于昭伯，兼植黨也。又僖二十三年，公子重耳至秦，秦伯納女五人，懷嬴與焉。懷嬴者，懷公之夫人，懷公死，嬴寡，故復使嫁于重耳，也是可見當時社會寧害義不使女守寡也。

漢時仍重視同母兄弟仍寡則再嫁

史記武帝母王太后，母曰臧兒。臧兒嫁槐里王仲，生信與兩女。仲死，更嫁長陵田氏，生男蚡勝。臧兒長女

母。即武帝

嫁爲金王孫婦。生一女矣。後納太子宮生武帝。武帝卽位。聞太后有女在長陵。乃自往迎取。攜見太后曰。臣得姊與俱來。賜錢千萬。是不以異姓同母姊爲嫌也。且以田蚡爲丞相。田蚡者太后之異姓同母兄弟。太后視之等於同母兄弟。故帝以蚡爲丞相也。是當時不鄙視再嫁。故皆不諱其事也。觀太史公直書不隱其風。尙可知矣。又平陽公主夫曹壽有惡疾。歸國。公主守寡。卽再嫁衛青。又鄂邑長公主寡。與丁外人通。旋謀封外人爲嫁之。皆不鄙再嫁之證也。

又後漢書陰瑜妻名采。荀爽之女也。十九而寡。采時尙豐少。後同郡郭奕喪妻。父爽以采許之。因詐稱病篤。召采。不得已歸。懷刃自誓。是女本不願再嫁。而父強之也。爽爲當代名流望族。猶強迫女嫁。他可知矣。

如不再嫁而私奔則以爲恥

早寡再嫁。原不爲非。倘私奔則於德有累。史記司馬相如傳。文君旣私奔相如。卓王孫大怒曰。女至不才。吾不忍殺。不與一錢也。是以私奔爲恥。非怒其再嫁。先聖制禮不閑再嫁者。卽懼有此也。

魏晉時名族女再嫁

吳志步夫人傳。生二女。長字大虎。前配周瑜子循。後配全琮。少曰小虎。前配朱據。後配劉纂。又世說諸葛恢女適庾亮兒。後爲蘇峻所害。將改適江嗣。與亮書及之。亮答曰。賢女尙少。故宜是皆名族而改嫁也。

唐宋名族女再嫁

隨園隨筆云。唐時公主再嫁者二十三。三嫁者四。詳見新唐書公主傳。宋秦國大長公主初嫁米福德。再適高懷德。韓昌黎之女。先適李漢。後適樊宗懿。宋范文正公之子婦。先嫁純禮。後適王陶。陶公之門生。公尙居相位。而公所立義莊。有孀婦改嫁之費。公母謝氏亦改嫁者也。得封吳國太夫人。又王荊公爲相時。以子雱顛。改嫁雱婦。是唐宋貴人。皆不以再嫁爲恥。世俗可知。至明王端肅公怒娶陳郎中妻。於服中封一品夫人。士林爭指目之。至清則絕迹矣。

#### 古出婦改嫁後再見前夫前後夫皆不避

漢書朱買臣傳。妻旣去。其後買臣負薪墓間。故妻與夫家俱上冢。見買臣飢寒。呼飯飲之。又癸辛雜識。放翁原配唐氏。爲姑所出。改適宗室趙士程。後先生遊沈園。遇唐氏夫婦。唐言於趙。以酒餌餽先生。先生卽題釵頭鳳一闋於壁而去。此以今日社會狀況揆之。必兩相迴避不暇矣。不惟前夫恥見後夫。後夫亦不願見前夫。且婦人更無介紹兩夫之理。而宋時不爾者。可見視再嫁爲甚尋常也。

#### 古妻妾當夕次序 諸侯每夜御二人五日而徧

內則妾雖年老。未滿五十。必與五日之御。注諸侯九女姪娣兩兩而御。則三日也。次兩媵則四日也。次夫人專夜。則五日也。疏夫人及兩媵。各有姪娣凡六人。兩兩而御。故三日也。是諸侯每夜御二人五日而徧也。

天子十五日而徧

周禮九嬪注云女御八十一人當九夕世婦二十七人當三夕九嬪九人當一夕是天子最多每夜御九人三夫人當一夕后當一夕十五日而徧是至少每夜三人或一人當夕

王后當夕次敘望前與望後不同

內則必與五日之御鄭注望前卑者在前尊者在後望後乃反之按卑者在前諸侯則姪娣先當夕最後夫人天子則女御先當夕至十五日后專夕十六日仍后專夕最後乃及女御故云反之也

卿大夫三日妻妾徧當夕士二日而徧

內則妻不在妾御莫敢當夕疏此謂卿大夫士以下大夫一妻二妾則三日御徧士一妻一妾則二日御徧妾恆避女君御日女君御日固不敢當夕縱令自當御日女君不在猶不敢當夕也

月辰避夕

內則妻及月辰居側室按月辰者天癸至也惟禮祇言妻而不及妾御者妻居正室故也惟妻雖避夕妾亦不敢當夕也



## 卷二十

行唐尙秉和著

### 喪事

古人將死時以生綿覆口上以候絕氣

禮喪大記屬纊以俟絕氣注纊新綿易動搖置口上以爲候如纊不動卽氣絕也

古人初死必登屋招魂大呼死者名字使歸至唐猶然

禮運及其死也升屋而號告曰皋某復然後飯腥而直孰按皋者疏云皋皋引聲之言某者死者姓名復者返也言北面長呼告天使某返也又喪大記復也注招魂有林麓則虞人設階凡復男子稱名婦人稱字按設階者設升屋之階也又墨子其親死列尸弗斂登屋窺井挑鼠穴探滌器而求之其人焉以爲實在則慙愚甚矣知其亡也必求焉僞已甚矣按墨子所言窺井挑鼠穴探滌器諸狀况乃民間無識者相沿之陋俗王制無是也王制祇登屋招魂耳而墨子以是攻儒者儒豈有此鄙猥之舉哉然因是可得周時社會人死時之狀況矣漢牟融曰人臨死其家上屋呼之又段成式金剛經鳩異及明已聞對門復魂聲問其故子昨宵暴卒又補闕孫董善占夢有人夢聚生屋上孫曰重來重來呼魄之象其人果卒重來者

桑字形。呼魄卽復魂。是可證漢唐人初死皆叫魂也。

斂前洗浴尸沐頭

喪大記。管人汲不說。同脫。緇。井。編。屈之。盥。階不升堂。授御者。小臣四人抗。舉也。衾。御者二人浴。浴水用盆。沃水用料。浴用絺布。拒也。音振。拭。用浴衣。如它日。平日。小臣爪足。爪。剔足。此浴身之禮節也。又浴者差沐于堂上。君沐梁。大夫沐稷。士沐梁。稷。應爲。管人受沐。乃養之。授浴者沐。沐用瓦盤。拒用巾。如它日。小臣爪手。剪須。此沐頭之禮節也。沐浴既已而後斂。又曾子之喪。浴于靈室。蓋貴人皆浴于正寢。曾子以士。故浴于靈室也。

古斂衣左衽結絞不紐

死結。解。

喪大記。凡斂衣皆左衽。結絞不紐。注衽衣襟也。生嚮右。左手解。抽帶便也。死則襟嚮左。示不復解也。結絞不紐者。生時帶並爲曲紐。使易抽解。若死則不復解。故畢結不爲紐也。

古斂時口須含飯

禮雜記。古者鑿巾以飯。注飯含也。鑿巾者。大夫以上貴。使賓爲其親含。恐尸爲賓所憎穢。故以巾覆尸。當口鑿穿之。使含得入口也。

古未斂前以冒覆口

禮雜記。冒者所以掩形也。注掩尸形恐人惡之。按冒者蓋亦巾之類而大于巾。覆尸全不露。故謂之冒。愚謂掩形不惟恐人惡。陳尸未斂亦不宜暴露也。

### 古必三日始斂

禮問喪。死三日而後斂。何也。曰。孝子親死。悲哀志懣。故匍匐而哭之。若將復生然。安可得奪而斂之也。三日而不生。亦不生矣。家室之計。衣服之具。亦可以成矣。親戚之遠者。亦可以至矣。故以三日爲之禮制。按今日鄉間。或有三日斂者。都邑則絕無也。鄉間衣服棺槨需遠市。都邑則立具。又夏日斂尤速。

### 三代入斂時晨莫不同

檀弓。夏后氏尚黑。大事斂用昏。殷人尚白。大事斂用日中。周人尚赤。大事斂用日出。按今時斂者。用昏者多。仍夏道歟。

### 古斂以衾裹尸以布束尸

禮喪服大記。小斂布絞。縮者一。橫者三。君錦衾。大夫縞衾。士緇衾。皆一衣十有九稱。疏。布絞者以布爲絞。縮從也。謂從者一副。監置於尸下。橫者三副。亦在尸下。從者在橫者之上。每幅之末。析爲三片。以結束爲便也。又云。衣布於衾上。然後舉尸於衣上。屈衣裹。又屈衾裹之。然後以絞束之。由是證古之斂近尸者。衣衣之外。裹以衾。再以布束之。以爲固也。此雖是小斂。然大斂亦如此。不過布絞加多耳。今江南尚有行之。

者。餘則少也。

初遭喪卽祖括髮

檀弓。祖括髮。去飾去美也。又去飾之甚也。又士喪禮。主人髻髮袒。注。髻髮者。去笄纚而紒。按。紒者。結也。髻也。蓋以麻約髮而爲髻。示毀容盡也。

喪服袖特寬至三尺三寸

禮雜記。弁經其袂侈袂。注。常服袂二尺二寸。侈則三尺三寸。按。服斬衰。正以志哀。侈袂示哀之甚也。

服斬縗麻帶草履杖行

左傳。襄十六年。晏桓子卒。晏嬰縗斬縗。苴經帶。注。麻有子。曰苴。杖菅屨。按。今日喪者。猶以粗麻絞爲帶。杖行。獨草履無用者。皆白布鞋。蓋以平日亦常草履不足表哀痛。又按。自清至民國。服制皆變古。獨喪服不變。無一不與古同。鮮違當代服制者。此可見孝親之事。不與他同。故國家亦不干涉也。

古孝子之居處飲食

左傳。襄十六年。晏桓子卒。晏嬰食粥。同。齊。居倚廬。寢苦。枕草。又檀弓。悼公之喪。季昭子問于孟敬子曰。爲君何食。敬子曰。食粥。天下之通義也。孟子曰。三年之喪。齊疏之服。齊衣下縫也。不緝。曰斬衰。緝曰齊衰。飭粥之食。自天子達

於庶人。三代共之。是居倚廬。食薄粥。無貴賤皆行之。古事。事尙等級。獨此平等也。

### 古處喪之瘠弱飢寒狀況

墨子。上士之操喪也。必扶而能起。杖而能行。又哭泣不秣聲。言無次第。翁綏綏。言儀。垂涕。處倚廬。寢苦枕塊。又相率強不食而爲飢。薄衣以爲寒。面目陷陷。顏色黧黑。耳目不聰明。是周時社會遭喪者之普通狀況也。

### 古孝子處倚廬非謁母不入內寡言語

禮雜記。三年之喪。言而不語。對而不問。廬聖室之中。不與人坐焉。在聖室之中。非時見乎母。不入內。按倚廬在中門外。不入門者。不入中門至內寢也。

### 倚廬架木爲屋壘壘音激爲牆

禮大記。父母之喪。居倚廬。注倚木爲廬於中門外之東。不塗。以草夾障。不以泥塗。寢苦。草也。枕曲。君之廬宮之。以幃障之。如宮。大夫士。檀之。露而不障。既葬。柱楣塗廬。不於顯者。不塗廬外顯處。既練。居聖室。十二月小祥。以壘灰塗廬使白。既祥。黜聖。又雜記。三年之喪。居聖室之中。鄭玄云。壘壘爲之。不塗聖。按倚木爲廬者。卽架木爲室。而以壘砌牆。壘者。打土晒乾爲之。不陶不燒。卽以此砌牆。而不塗聖以爲飾。檀者。袒也。言露而不障。柱楣者。使廬高起而受光。至小祥則聖室使白。且黜地使黑以爲飾也。

古哭必辟踊若偃者跋者則否

禮檀弓有子與子游立見孺子慕者有子謂子游曰予豈不知夫喪之踊也予欲去之久矣情在于斯其是也夫子游曰人慍斯戚戚斯歎歎斯辟辟懣心斯踊又辟踊哀之至也有算爲之節文也疏男踊女辟哀痛之至若無節限恐傷其性故辟踊有算算者數也每一踊（三跳三踊九跳爲一節士三踊初死日一踊小斂一踊）大斂一踊凡三日一踊大夫五踊諸侯七踊王九踊又婦人倡踊注倡先也是婦人亦踊不惟撫心痛哭也又問喪偃者不袒跋者不踊誠以偃則不能露胸跋則不能跳起也

古哭君亦踊

左傳宣十八年子家使晉還既復命袒括髮注以麻約髮卽位哭三踊而出時公薨又晏子春秋遂袒免同音以布約首坐枕君尸而哭興三踊而出杜注九跳爲一節禮所謂辟踊有節按踊必三者當時定制少則簡多則過故以九跳爲節然自漢以來卽不見有行此禮者殆亡已久矣

喪拜之不同

檀弓孔子曰拜而後稽顙顙乎其順也注股喪拜言主人拜賓也稽顙首觸地無容稽顙而後拜順乎其至也按拜而後稽顙者先合手屈膝以首觸地也稽顙而後拜者先屈膝以首觸地起而合手也皆所謂喪拜也喪拜無容以遺喪痛悼皇遽不能爲容今孝子見賓卽稽顙而不合手皆不拜猶周之遺俗

同時遭喪父斬衰母齊衰男免女髻

禮喪服小記斬衰括髮以麻疏主人爲父之服也。又爲母括髮以麻免。音同而以布齊衰惡笄以終喪。注母服輕可以布代麻也。齊者衣下縫不緝曰斬衰。緝曰齊衰。是可證爲父服斬衰爲母服齊衰。括髮以麻者鄭注喪服云自項以前交於額卻繞紒。若以布代麻則名免是括髮與免形式如一。只用麻用布不同耳。至去笄纒而紒。同使髮露則同也。又云男子免而婦人髻免者鄭注以布廣一寸自項交於額卻繞也。髻者鄭注云形與括髮如一。卽露髻然則免也。髻也。括髮也。名異而形實同也。

女髻以榛爲笄

禮檀弓南宮韜之妻之姑喪孔子誨之髻曰爾勿從從爾爾勿扞扞爾。蓋榛以爲笄長尺而纒八寸注去纒而紒曰髻。纒所以韜髮今遭喪但露紒而已。紒者髻也。益證髻卽括髮也。

古以白布纒髻故禿者不免

禮問喪禿者不免注免。音同者以白布廣一寸從項中交於額卻向後繞於髻也。然禿則不免是可證古只以白布約髻若禿則無髻可約非若今世之祇約白布條於額也。

古鄉里助喪詳情 鄉里代爲糜粥

禮問喪親始死水漿不入口三日不舉火故鄉里爲之糜粥以飲食之又曾子問昔者吾從老聃助喪於

巷黨又檀弓孔子之故人原壤母死。夫子助之沐槨。皆鄰里助喪之證也。

### 古喪事必有主喪者代主人負責治事

禮檀弓孔子之喪。公西赤爲志焉。子張之喪。公明儀爲志焉。注志謂章識。又荀子修士之喪。勸一鄉屬朋友。庶人之喪。合族黨勸州里。注屬者謂付託之使主喪也。又史記項羽本紀。每吳中有大徭役及喪。項梁嘗爲主辦。陰以兵法部勒賓客及子弟。又陳平傳。邑中有大喪。平貧侍喪。以先往後罷爲助。是自周迄漢。皆有鄰里助理喪事。並由主人特請人付託之。以爲主辦。無一不與今同也。

### 居喪期限殷周皆三年至戰國已不行

論語高宗諒闇三年不言。禮王制父母之喪三年不從政。是殷周皆三年喪也。至春秋時蓋已不守此制。論語鑽燧改火。期斯可矣。是必已有喪父母而期服者。故宰予敢如是昌言。而墨子之徒只服三月。深以久喪爲非。又孟子然友反命定爲三年之喪。父兄百官皆不欲曰。吾宗國魯先君莫之行。是至戰國三年之喪舉世莫有行者。惟儒者行之。韓詩外傳齊宣王謂田過曰。吾聞儒者親喪三年。是其證也。

### 前漢仍短喪

古君父喪同。而文帝臨終詔三十六日除服。自是爲定例。於是宰相翟方進後母死。以爲身備漢相。不敢踰制。既葬三十六日除服。又薛宣傳後母病死。弟脩爲臨淄令。去官持服。宣爲丞相。謂三年服少能行之。



者。兄弟相駁。脩遂竟服。由是不和。

有喪三年者則名譽特起

公孫弘傳。後母死。服喪三年。遂舉孝廉。原涉傳。時少行三年喪者。及涉父死。廬墓三年。哀帝紀。河間王良喪太后三年。爲宗室儀表。益封萬戶。蓋當時無行三年喪者。偶有之。卽交口稱道也。

然親死不奔喪則有罰

漢書陳湯傳。湯待遷父死。不奔喪。司隸奏湯無循行。張勃坐選舉不實。削戶二百。

至後漢遭喪無不去官守制。且有以弟喪師喪去官者

後漢承光武明帝提倡禮教之後。凡父母喪。無不去官守制者。而趙苞以伯父喪去官。陳重以姊憂去官。雖玄遷太常寺丞。以弟服去職。劉焉拜中郎。以師祝公喪去官。以是證後漢之社會風俗。雖三代不能及。爲中國風俗第一淳美之時期。

漢時喪服皆縗素

高帝紀。寡人親發喪。兵皆縗素。蘇武傳。雲中生口。言太守以下吏民皆白服。言上崩。翟方進傳。方進薨。少府供張。柱檻皆衣素。按自周時。親死服斬衰。皆以素布爲衣。又荆軻傳。白衣送至易水上。凶事服白。其來已久。至漢猶然也。

古賻喪成俗至今不改

禮檀弓。孔子之衛。遇舊館人之喪。入而哭之哀。出使子貢說。曰。驂而賻之。注。賻。助喪用也。是解驂馬。鬻以爲喪費也。又史記朱建傳。建母死。貧未有以發表。方假貸服具。陸賈爲說。辟陽侯奉百金爲祝。注。衣被之具。列侯貴人以辟陽侯故。往賻凡五百金。又原涉傳。所知母死。涉入弔。問以喪事。家無所有。乃卽與賓客市買衣被棺具等物。載至喪家。是自周迄漢。凡貧者遇喪。無不賴朋友資助。後世因之。至今不更遞。

漢時官吏死可因賻致富

何並傳。吾生素餐日久。死雖當得法賻。勿受。又後漢羊續傳。二千石卒。官賻百萬。按法。賻者。官家例賻。不論貧富。又原涉傳。哀帝時。天下殷富。大郡二千石死。官賦斂送葬。皆千萬以上。妻子通共受之。以定產業。是於法賻外。又賦斂同僚。以爲亡者。妻子生活費。資至千萬。則鉅富矣。唐宋以來。官吏卒遠方。朋友資助。經紀其喪事者。不可勝數。然無有因喪賻致富者。是以風俗醇樸。莫過於兩漢。

歷代弔喪者之禮節

論語。裘羔玄冠。不以弔。禮內則。行弔之日。不飲酒食肉。按羔裘玄冠。皆吉服。華美。飲酒食肉。違哀戚之義。故皆不宜於弔。禮檀弓。曾子襲裘而弔。子游裼裘而弔。曾子指子游示人曰。夫夫也。爲習於禮者。如之何。其裼裘而弔也。主人旣小斂。以衣衾蓋尸。袒括髮。子游趨而出。襲裘帶絰。以布條加武上。而入。曾子曰。我過矣。我過

矣。夫夫是也。

按襲者注充美也。言掩抑其美。使不見也。卽以單衣護於裘外。裼者注云裘上加裼衣。裼衣雖加他服。猶開露見美以爲敬也。曾子以弔主哀。故掩裘美而襲裘。豈知主人未斂猶吉服。弔者不宜凶服。故子游仍裼裘以見美。及主人小斂而易服。子游乃襲裘加經於武冠梁以弔也。

晉時弔喪須執孝子手

世說新語顧彥先生平好琴。及喪張季鷹往哭之。不勝其慟。遂徑上牀撫琴作數曲。撫琴曰。顧彥先頗復賞此。不因又大慟。遂不執孝子手而出。又王東亭與謝公安惡。王在東聞謝喪。使出都往哭。督師刁約不令前曰。官生平不見此客。王亦不與語。直前哭甚慟。不執末婢手而出。謝琰小名是可證當時弔哭已須執孝子手。安慰之爲一定禮節。清時士大夫弔喪已必掀帳至孝子處。唁慰數語。蓋猶古之遺俗。惟不執孝子手爲小異耳。

晉時弔喪必主人先哭客乃哭

世說新語阮步兵喪母。裴令公往弔之。阮方醉坐牀。箕踞不哭。裴至下席於地。哭弔嘯畢便去。或問裴凡弔主人哭。客乃爲禮。阮既不哭。君何爲哭。又王右軍與王述不睦。後述喪母。右軍屢言出弔。而卒不果。後詣門自通。主人既哭。不前而去。以陵辱之。按古弔喪無不哭者。至晉時須主人哭乃哭。主人若不哭。客卽

不哭。故主人聞客至，必先哭以爲禮也。

唐人弔喪須服白衫須哭泣

大唐傳載，唐臨性寬仁多恕，常欲弔喪，令家僮取白衫，僮乃誤持餘衣，懼未敢進。臨覺察，謂曰：「今日氣逆，不宜哀泣，向取白衫且止，是可證唐人弔喪，不白衣則不弔，且弔必哭泣，不似晉人之必俟主人哭也。」

六朝時哭有詞

顏氏家訓：「禮以哭無言者爲號，然則哭亦有詞也。江南哭喪時，有哀訴之言，山東重喪則呼蒼天，期功以下則但呼痛。按今日男子哭皆號，無有言者，惟婦人乃有之，風氣又與古異也。」

六朝時不弔則怨

顏氏家訓：「江南凡遭重喪，若相知者同在城邑，三日不弔，則絕之。除喪雖相遇則避之，怨其不憫己也。有故及道遙者，致書可也，無書亦如之。北俗則不爾，按此必赴而不弔也。不然，雖同都邑，三日之間未必盡聞知，安得怨其不弔？」

南北朝年節時對喪家之異

顏氏家訓：「南人冬至歲首，不詣喪家，若不修書，則過節束帶以申慰。北人至歲之日，重行弔禮，禮無明文，則吾不取。按古人視冬至節極重，與元旦同，至時人皆賀節，歡忭不詣喪家，宜矣。至重行弔禮，甚無謂也。」

凡禮之不合人情者，必不能久。唐宋以來，不見有此，蓋此俗之革除久矣。

### 六朝時年節見孤子則泣

顏氏家訓已孤而履歲及長至之節，無父拜母，祖父母世叔父母姑兄子，則皆泣。無母拜外祖父母舅姨兄子亦如之。此人情也。按無父過年節，拜父族時，父族以其無父可拜，愷然而泣。無母拜母族時，母族以其無母可拜，故亦泣。蓋皆幼子初喪父母一二年事也。今世外甥初喪母，新年至外家，仍有此感。

### 六朝時初釋服見君必泣，否則見薄於人

顏氏家訓江左朝臣子孫初釋服，朝見二宮，皆當泣。二宮爲之改容，頗有膚色充澤，無哀感容者，梁武帝薄其爲人，多被抑退。裴政出服，問訊武帝，貶瘦枯槁，涕泗滂沱。武帝目之曰：裴二禮不死也。按此已釋服矣，尙有此習慣。齊梁時禮教過東西晉遠矣。

### 歷代忌日之重

禮祭義：君子有終身之喪，忌日之謂也。忌日不用。注：不作事。非不祥也，言夫志有所至，而不敢盡其私也。按父母死日，今謂之忌辰。至忌辰則哀戚思慕，無論年遠近皆如此。故曰終身之喪，古禮至今不變者，惟此耳。

### 六朝時忌日仍與周同

顏氏家訓。忌日不接外賓。不理衆務。魏王脩母。以社日亡。來歲有社。脩感念哀思。鄰里爲之罷社。按不接外賓。不理衆務。卽祭義所謂忌日不作也。然鄰里因忌而罷社。蓋脩之哀有逾於衆人者。故感動如此。

唐忌日狀況

耳目記。周武則天左領軍權龍褒。不識忌日。問府吏曰。何名私忌。對曰。父母亡日。請假獨坐房中。不出。褒至忌日。於房中靜坐。有青狗突入。褒大怒曰。衝破我忌。更陳牒。文書改明日作忌。按獨坐不出。仍不接外賓。不理衆務之義。述此者。以見忌禮自周迄唐。豪未變更。以迄於今。故唐後不更述。

## 卷二十一

行唐尙秉和著

### 葬

周時以獨木板棺爲最貴

莊子。宋有荆氏者。宜楸柏桑。其扶把而上者。求狙猴之杙者。斬之。三圍四圍求高名者。斬之。七圍八圍。貴人富商之家。求樺榜者。斬之。故未終其天年。注。樺榜棺也。棺之全一邊者。謂之樺榜。按全一邊者。謂棺之四牆皆一板所成。非數板湊成。故非大木不辦。今世仍重之。謂之獨榜獨蓋。又曰四獨。卽樺榜之義也。

周製棺以槨木爲最貴。

左傳襄三年。初穆姜使擇美槨。以自爲槨。又襄三年。季孫爲己樹六槨於蒲圃東門之外。注。欲爲定。如薨。已槨。匠慶用蒲圃之槨。爲觀。按說文。槨。楸也。木性堅而文理甚美。故古人喜以爲槨。猶今之尙黃柏楠木也。然周時亦有用柏者。左傳定元年。魏舒卒。范獻子去其柏椁。是也。

周人飾棺之麗

禮喪記。周人牆置娶。又檀弓。孔子之喪。公西赤爲志焉。

注。志。謂章識。

飾棺牆置娶。子張之喪。公明儀爲志焉。褚

幕丹質。蟻結於四隅。注：盧植曰：牆載棺車箱也。牆之障柅，猶垣之障家。三禮圖曰：要以竹爲之，高二尺四寸，廣三尺，衣以白布，柄長五尺。葬時令人執之於柩車傍，褚幕丹質者。注云：以丹布幕爲褚。按玉篇褚者，義也。言以丹布爲幕而覆棺也。蟻結於四隅者。注云：查褚之四角，其紋如蟻行往來交錯。又按娶者疏云：在旁曰帷，在上曰荒。凡飾棺總曰柳。史記樂布傳：所謂置廣柳車中者是也。

又按今富貴人家，入斂後卽以紅帛幄冒棺，使不露，卽褚幕丹質也。今出殯時之棺罩，卽古之棺牆帷荒之屬。特今柩昇行者多，古則輓行，故牆娶之屬亦微異耳。

周出殯運柩之法及護喪者之衆

禮內則弔於葬者必執引。若從柩及壙必執紼。又曲禮：助葬必執紼。注：車曰引，棺曰紼。疏：引，柩車索也。紼，引棺索也。凡執引人，貴賤有數。若其數足，則引人不得遙行，皆從柩也。何東山曰：天子千人，諸侯五百人，大夫三百人，士五十人。從柩者是執引所餘。紼是撥動之義，人無定數，故執紼以示助力。由此證之，古靈車之行，以引牽輓引之多寡，視貴賤而分有定數。人執一索，引車前行，不用牛馬。若紼則大於引，攷爾雅：紼，綽也。紼，音律。大索也。蓋靈車至葬所，牽紼以移柩入冢也。

又今日皆昇柩而行，昇柩人數最少十六人，或三十二人。最富貴之家，六十四人而止。惟天子乃用百二十人。若古則大夫尙三百人，天子則千人。其威儀之侈麗，十倍於今，無怪墨翟之以爲非也。



周引柩索用麻

左傳宣八年冬葬敬姜旱無麻用葛即注。葛所以引柩然因旱無麻即不能用麻索亦可見葬儀之侈用索之多矣。

周葬時先以槨布冢內再以鹿盧繫棺入冢

禮檀弓季康子之母死公輸若方小斂般請以機封將從之公肩假曰不可夫魯有初公室視豐碑三家視和楹般爾以人之母嘗巧乎注豐碑斲大木爲之形若石碑於槨前後四角樹之穿中於間爲鹿盧下棺以緯繞天子六緯四碑前後各重鹿盧桓楹者斲木如大楹四植謂之桓

按天子用石碑下棺諸侯不敢用石以木斲爲碑樹於槨之四角碑上有孔各安鹿盧棺到時將緯大索繞於鹿盧之上徐徐下之此天子諸侯之禮也公輸般巧請以機械下棺有類於諸侯之禮故公肩假以爲不可桓楹者但將木斲之若楹不爲碑形植四隅以下棺而已夫曰樹於槨之四角是棺未到而預將槨置於冢內也用碑繫棺是天子亦懸棺下葬也惟左傳僖二十五年晉侯請隧弗許杜注闢地通路曰隧天子葬禮也諸侯皆懸棺而下據杜說是天子不懸棺葬也鄭與杜孰是不敢定疑杜非也

古貧賤者之出殯及下葬狀況

古以引即案輓靈車士用五十人下而至於庶民當更少於士然亦較今日爲多葬用碑緯乃富貴之家

至庶民則不用禮檀弓懸棺而封人豈有非之者哉注貴者用碑梓貧但手懸棺而下然則古貧民下葬與今日同也

古窆內保護棺之法以蜃炭爲最貴

禮檀弓有虞氏瓦棺始不用薪夏后氏塋周般人棺槨周以蜃灰塋周者注云火熟曰塋治土成磚以周於棺之四週坎也釋文云塋燭頭燼卽木燼蜃灰者按周禮掌蜃掌斂互物蜃物以供闡墻之用注互物者蚌蛤之屬闡塞也墻穿中也將葬先塞蜃灰以禦濕使棺不朽然則夏后氏之塋周依鄭詁治土成磚圍於棺之四周依釋文以木燼塞於棺之四周詁雖微異要其禦濕之意則相同至周以蜃灰禦濕又視夏進步耳特夏尙無槨周承殷旣以槨護棺復於槨外塞以蜃灰法益密耳蜃灰之力與今之石灰同周無石灰用蜃灰墜牆使白者是也

然蜃炭在周時蓋甚貴觀左傳成二年宋文公卒始厚葬用蜃炭注燒蛤爲炭以墜葬夫以諸侯用之尙曰厚葬則貧賤者之不能用可知矣

周時從葬之物品 一明器

荀子薦器則冠有瑩而無縫甕廡虛而不實木器不成斲陶器不成物簠竹也器不成內注薦器明器也瑩冠捲如兜鍪也縱韜髮者也冠明器之冠也甕廡所以盛醢醢人器實明器虛按明器者冥中所用之

器也。皆象其形而不必盛以物。故曰人器實。鬼器虛。檀弓所謂夏后氏用明器。示民無知。孔子所謂備物而不可用。知喪道者也。

又以草束爲人馬車物。以木製爲偶人。檀弓云。塗車芻靈。自古有之。明器之道也。孔子謂爲芻靈者善。謂爲俑者不仁。殆於用人乎哉。按塗車者以泥爲車。芻者草。芻靈者言束草爲人馬。俑者偶人。有面目機能。似乎生人。孟子曰。始作俑者。其無後乎。爲其象人而用之也。淮南子。魯以偶人葬。而孔子歎。孔子之所以歎。謂此爲用生人之漸也。觀此自夏以來。凡生人所用之物。皆一一製爲冥器。送之墓中。以備死者之用。而祇有其形。實不能用。聊以盡心焉而已。故孔子美之。

#### 又以實物從葬

檀弓云。殷人用祭器。示民有知也。按殷人尙鬼。不忍死其親。故以真祭器送葬。又禮檀弓。宋襄公葬其夫人。醯醢百甕。曾子曰。旣曰明器。而又實之。按明器宜虛。今置醯醢於中。則實矣。故曾子非之。

又按西京雜記。漢廣川王發掘戰國時魏王墓。其中鼎。孟琴。瑟。刀劍。几杖。諸物皆備。又墨子節葬篇。死者虛府庫。然後金玉珠璣比乎身。綸組節約車馬。藏乎壙。又必多爲屋幕。鼎鼓。几。挺。壺。盞。戈劍。羽旄。茵革。寢而埋之。是皆以真物從葬之證也。盞。浴器也。

#### 甚至以生人從葬

秦穆公以三良從葬。國人作黃鳥詩以誌哀。又左傳宣十五年。初魏武子有嬖妾無子。及疾病。謂穎曰。必以殉。又成二年。宋文公卒。始厚葬。用殉。又昭十二年。楚王縶於芋尹申亥氏。申亥以其二女殉。而葬之。又哀三年。季孫有疾。命正常曰。勿死。又禮檀弓。陳乾寢疾。屬其兄與其子曰。如我死。必大爲棺。使吾之婢子夾我。又墨子。天子殺殉。衆者數百。寡者數十。將軍大夫殺殉。衆者數十。寡者數人。又西京雜記。廣川王去疾。掘幽王墓。其中僵人有立者。有臥者。有伏於几上者。其百餘尸。皆當時殉葬者也。此等慘酷不仁之事。不知起於何時。然幽厲以前絕無之。至春秋戰國尤甚。直至西漢。此風始已。然亦不敢謂其必無。干寶之母。以其妾從葬。而竟不死。干寶感之。因作搜神記。是至晉尙偶有此非人之事也。嗚呼慘已。

未葬前方相氏以戈擊壙

周禮方相氏。狂夫四人。大喪先匱及墓入壙。以戈擊四隅。方良注。方良者。罔兩也。土怪也。方相氏黃金四目。形狀極可畏怖。儼時用以驅疫鬼。此又用以驅土怪也。

周時卽有挽歌

莊子。綈謳所生。必於斥苦。司馬彪注曰。綈引柩索。斥疏緩。若用力也。引綈所以有謳歌者。爲人有用力不齊。故促急之也。然則挽歌者。所以齊人力。猶今日築牆棹船者之喊號。非所以助哀。若後世之薤露歌。則純爲哀挽矣。

### 漢魏時以白布纏棺

世說白布纏棺。豎旒旒。按今日運柩遠行者。皆以紅布衣棺。內緒以棉。無用白布者。茲所謂豎旒旒。蓋亦運柩遠行。故以旒旒爲識。卽銘旌也。

### 漢時仍以紼引柩以牘製飾棺

後漢范式傳。式因執紼而引。柩於是乃前。史記樂布傳。乃置之廣柳車中。後漢趙咨傳。復重以牘製之。禮。按紼者大索也。輓車用引。引柩用紼。凡棺飾。總曰柳。卽牘製之屬。製柄長五尺。上衣以白布。葬時令人執之於柩車之傍。翼棺使不露。然則漢時出殯儀式。無一不與周同。

### 漢冢內以炭葦保護棺槨

漢書田延年傳。茂陵富人焦氏賈氏。以數千萬陰積貯炭葦。諸下里物。又魏志文帝紀。勿施葦炭。勿藏金銀銅鐵。一以瓦器。按夏用治土。周用蜃炭。皆以禦濕。至漢則加以葦。葦中空。亦能禦濕。惟所謂炭。不言其名。然蜃炭至漢時。惟沿海地有之。中原已絕。蓋石灰也。石灰禦濕之力。與蜃炭等。惟葦炭二物。皆不貴重。魏文帝至與金銀並稱。遺囑不許用。則不得其解。抑茲二物在漢時亦貴重乎。

### 漢仍以偶車馬及諸明器送葬而加以銅錢

漢書尹翁歸傳。百姓遵用其教。賣偶車馬下里僞物者。棄之市道。師古曰。偶謂土木爲之。象真車馬之形。

張晏曰。下里地下蒿里偽物也。又孔光傳。翟方進傳。賜乘輿秘器。張禹傳。賜東園秘器。秘器者。卽周之明器。皇室所造。較民間略工耳。故賜大臣用之。此可證上自天子。下至百姓。皆以偶物送葬。卽今洛陽北邙山。古墓掘出者是也。又張湯傳。會有人盜發孝文園瘞錢。如淳曰。埋錢於園陵以送死。是可見當時風俗。埋錢送葬。必百姓亦爲之。若周則無是也。

漢送葬者人多至數千。雖車馬亦白兼奏樂

漢書爰盎傳。劇孟雖博徒。然母死送葬車千餘乘。又後漢范式傳。乃見有素車白馬。號哭而來。會葬者千人。咸爲揮涕。又郭太傳。四方之士千餘人。皆來會葬。又周勃傳。常爲人吹簫給喪事。

按周時大夫之喪。祇引車者卽三百人。加以其他送葬者。必千餘人矣。是以高柴葬其妻。犯人之禾。犯。闕也。事

申詳請庚。償也。之。是可證送葬者之衆。有如社會。然後能將所過之禾稼。全行踏平。不然不至賠償也。見

檀弓。此等遺俗。兩漢猶盛。至送葬者皆素車白馬。惟東漢禮盛之時。如此。他則不見。吹簫樂喪。則更周所

無。然其俗至今不改。今門有弔客。則吹樂致敬。又靈柩出門臨窆。皆奏樂。非俱娛賓。並禮死者。爲一定儀

節。

唐運靈柩仍以車仍挽而不昇及槨房形狀

唐白行簡李娃傳。由是凶肆日給鄭生。令執總帷。獲值以自給。無何能挽歌。曲盡其妙。初二肆之傭。贊也

凶器者，互爭勝負，其東肆車轡皆奇麗，殆不敵，惟哀挽劣焉。其東肆長知生絕妙，乃醢錢二萬索僱焉。其黨者舊共較其所能者，無能及生。夫曰肆，曰備凶器，則唐已有槨房，曰車轡，則唐時仍挽靈車，而非若今日之抬槨，以其黨耆舊，則是挽靈輿執總帷。形若傘，又類佛幢。吹簫唱挽歌之人，有專業者，遇事則凶肆召集之，無事則散，游手好閒，與凶肆二而一，一而二，一切均與今日同，惟尙未昇柩耳。

#### 古柩前有銘旌書官爵於上

唐杜牧詩云：粉書空換舊銘旌。銘旌者，以帛爲之。今世用紅色，或金書，或墨書。茲云粉書，則書白字於上也。書白字，則旌或紅或綠或黃，非素帛可知。空換舊銘旌者，因李使君沒後十日，授處州太守之命，始到。李原池州刺史，今授新官，銘旌上換書處州太守銜稱，而不及見，故曰空換。由是可證古銘旌備書死者官銜於上，於柩前執之，俾人一望而知也。今富貴之家仍用之。

#### 漢墳之特高

周禮春官冢人注：引漢律列侯墳高四丈，關內侯以下至庶人，各有差。按周天子之墳高三仞，八尺曰仞，則兩丈四尺也。漢仍律尺，列侯之墳，過周天子矣。若天子則不曰墳而曰山陵，誠以其高大若山也。





## 卷二十二

行唐尙秉和著

### 墳墓

自殷以前不封無墳不樹

禮檀弓。國子高曰。葬者藏也。藏也者。欲人之弗得見也。是故衣足以飾身。棺周於衣。槨周於棺。土周於槨。以壤樹之哉。又荀子。葬田不妨田。注。言所葬之地。不妨農耕也。殷以前平葬。無邱隴之議也。又檀弓。孔子既得合葬於防。曰。吾聞之。古者墓而不墳。注。言殷時不墳也。由是證之。自殷以前。葬皆不起墳。今輒有殷以前名人墓者。不足據也。

周貴人有公葬地。不家自爲墓。

周禮。冢人掌公墓之地。辨其兆域。而爲之圖。先王之葬居中。以昭穆爲左右。凡諸侯居左右以前。謂畿內諸侯。卿大夫居後。各以其族。凡死於兵者。不入兆域。凡有功者居前。按此所掌爲天子及公卿大夫之墓。地王居中。諸侯居左右。卿大夫居王墓後。可見古有爵者。亦有公葬地。雖天子亦與卿大夫同兆域。不似後人之家有墓地。昭穆者。父子也。父爲昭。子爲穆。昭列左。穆列右。

周庶民有公葬地有墓官掌之不許異地

周禮墓大夫掌凡邦墓之地域爲之圖令國民族葬而掌其禁令正其位掌其度數使皆有私地域凡爭墓地者聽其獄訟帥其屬而巡墓屬居其中之室以守之注屬者塋限遮列處居中者官寺署也在其中按古者民無私田年二十授井田百畝六十歸田故無葬地公家爲擇一公葬地使民叢葬其處而公葬之中復有各族私域畫分遮列王制云墓地不請誠以墓地爲公家所給不得請求餘地有所檢擇也

周始爲墳墳高有制若庶人則不得起墳

周禮冢人疏引春秋緯云天子墳高三仞諸侯半之大夫八尺士四尺庶人無墳又檀弓云庶人縣封葬不爲雨止不封起墳不樹按八尺曰仞三仞兩丈四周律尺合今營造尺八寸二分然則周天子墳合今二丈尙微弱至漢諸侯尙高四丈天子則益高若上祇四尺雖今庶民尙過之蓋時益後則益侈然觀檀弓孔子既得合葬於防曰丘東西南北之人也不可不識封之崇四尺正與周制合又吳季札葬其子封高可隱季札大夫正與周制八尺合是緯書可據也

周墓樹之等差

周禮冢人疏引春秋緯曰天子樹以松諸侯樹以柏大夫樹以藥草士以槐庶人以楊柳據此是庶人許樹也而檀弓云庶人不封不樹則不許也又左傳吳子胥曰樹吾墓槨槨可材也吳其亡乎是卿大夫之

所樹不定依周制。疑庶人亦許樹也。

### 周墓形狀種種之不同

今墳概作圓形。古則異是。禮檀弓。孔子之喪。有自燕來觀者。子夏曰。夫子言之曰。吾見封之若堂者矣。見若坊者矣。見若覆夏屋者矣。見若斧者矣。從若斧者焉。馬鬣封之謂也。按馬鬣注疏無確詰。愚按文義。從若斧者焉。馬鬣封之謂也。是馬鬣卽斧形爲一式。馬鬣者馬領上之毛。向上直豎與斧形相類。蓋卽築墳頭使形銳而長。與斧相似。子夏恐人不解。更以馬鬣釋之。馬鬣封蓋俗語。若曰。斧形者。卽俗所謂馬鬣封也。

### 周已祭墓

周禮冢人。凡祭墓爲尸。孟子蚤起。施從良人之所之。遍國中無與立談者。卒之東郭墦。冢也間之祭者。乞其餘不足。又顧而之他。由是證之。周貴人祭廟時多。祭墓時少。非不祭也。祭廟必以其子孫爲尸。祭墓則外人可爲尸。是祭墓禮輕於祭廟也。若庶人則無廟可祭。尤須祭墓。墓者先人體魄所寄託。神主則人爲。以人爲之神主。與體魄比。孰爲親切乎。故有廟者。亦不忘祭墓。良心之所不能已也。先儒必謂周人輕墓者。亦不然也。

### 周以來之重墓哭墓

左傳僖二十八年，晉侯圍曹，門焉多死。曹人尸諸城上。晉侯患之，聽輿人之謀曰：「稱舍於墓，師遷焉。」曹人兇懼，是居其墓上，並未掘墓也。而懼若是，又曲禮適墓不登隴，墳也爲宮室不斬丘木，是墓樹尙愛之見墓則敬也。又檀弓顏淵曰：「吾聞之，去國則哭于墓而后行，反國不哭，展墓而后入，是出入皆告墓而后爲也。」又孔子過泰山，有婦人哭于墓而哀。淮南子：「譬若遺腹子之上隴，以禮哭泣之，而無所歸心，言不識父面，是有事則哭墓，尋常展墓亦哭也，是皆古人重墓之確證也。」

古侯王墓內陳設精美及其寬廣狀況

西京雜記：廣川王去疾，好聚無賴少年，發掘國內冢墓，述古墓內形狀甚悉。

魏襄王冢皆以文石爲椁，高八尺許，廣狹容四十人。中有石牀，石屏風，不見棺槨，明器蹤跡，但牀上有玉唾壺一枚，銅劍二枚，金玉雜具，皆如新物。按魏襄王卽孟子內之梁襄王也。惠王之子而廣川王乃景帝孫，其掘墓當在武帝時，計自襄王至武帝時不過二百年，故墓內器物尙如新也。

魏哀王冢以鐵灌其上，穿鑿三日乃開，有黃氣如霧，觸人鼻目。七日乃歇，初至一戶，無扃鑰，方牀方四尺，牀上有石几，左右各三石人立侍，皆武冠帶劍，復入戶，石扉有關鑰，叩開見棺槨，黑光照人，刀斫不入，燒鋸截之，乃漆雜咒，咒角爲棺，厚數十寸，累積十餘重，力不能開，乃止。復入戶，亦石扉關鑰，得石牀方七尺，石屏風銅帳鑄一具，或在牀上，或在牀下，或在地下，似是帳糜朽而銅鑄墜落，牀上石枕一，塵埃黝黝甚。

高似是衣服。牀左右石婦人各二十，悉皆立侍。或有執巾櫛鏡鑷之象，或有執盤捧食之形，無餘異物。但有鐵鏡數百枚，按石人而能刻出執鏡櫛巾櫛之象。古雕工之精細可想，而以咒角雜漆爲棺，雖刀鋸不能開。此等藝術，亦後世所無，惜今皆不存耳。

幽王冢甚高壯，羨門既開，皆是石室，撥除丈餘深，乃得雲母深尺餘，見百餘尸，縱橫相枕籍。殉者皆不朽，惟一男子，餘皆女子，或坐或臥，衣服顏色不異生人。按羨者墓道也。史記衛世家：共伯入釐侯羨，自殺者是也。羨門者墓道之門也。石室者卽周禮與左傳所謂蜃炭也。燒蜃爲炭，藉以禦濕，而厚至丈餘，故殉葬之尸雖僵而不腐，衣服顏色歷數百年不變，以蜃炭遮護，空氣不能入故也。古人葬術之精如此。

晉靈公冢甚瑰壯，四角皆以石爲覆，犬捧燭，石人男女四十餘，皆立侍。棺器無復形兆，尸猶不爛。孔竅中皆有金玉，其餘器物皆朽爛不可別。按棺槨器皿堅於人身矣，然皆腐朽，而尸獨不朽，祇孔竅塞金玉，似不能保全身不壞，疑別有善法。又棺槨皆朽爛不存者，以無蜃炭禦濕故也。

又按周幽王魏無幽王爲犬戎所殺，甫經大亂，百姓瘡痍未復，而其葬至用蜃炭厚丈餘，雲母石至尺餘，且殺殉百餘人，墓宮宏侈若是。晉靈公爲趙穿所殺，葬疑率矣，而石人一項，至有四十餘，他明器想稱是也。以是見古貴人之奢侈，非後人所能夢想，而石人雕刻之精工，及漆棺之堅固，其工藝亦突過後人也。

### 秦始皇墓內狀況

賈山至言云。秦始皇死。葬乎驪山。采金石治銅鋼其內。漆塗其外。中成觀游。上成山林。又劉向諫起昌陵疏云。秦始皇葬驪山之阿。下錮三泉。上崇山墳。高五十餘丈。石棹爲游館。人膏爲燈燭。水銀爲江海。黃金爲鳧雁。棺槨之麗。宮觀之盛。不可勝原。是墓內有池沼。有游館。池沼以水銀爲水。水內復作爲鳧雁。統古今帝王葬薶之侈。蓋無過始皇者矣。然未十年卽爲項羽發掘也。

漢士夫墳上起祠堂

自周以來。士大夫有宗祠祭先。雖天子無在墓上建祠堂者。自叔孫通說漢惠帝爲高祖立原廟。久之卿士大夫亦在墓上爲祠堂。霍光傳。其後光妻顯改光所自造塋制而侈大之。築神道。盛飾祠堂。又龔勝傳。勅子孫勿隨俗動吾冢。種柏作祠堂。張禹傳。禹年老自治冢塋作祠堂。原涉傳。令先人儉約。非孝也。乃大治起冢舍。周閣重門。鹽鐵論。今富者積土成山。列樹成林。臺榭連閣。中者祠堂屏閣。闕闕。是西漢時冢上起祠。成爲風俗。祇富卽爲之。不必貴人。且於祠堂之外。築高闕。闕之隅。築罍。罍以壯觀瞻。此等情況。在今日祇明清皇陵有之。皇陵外親王家間有之。餘雖卿相不如是也。然則古人之奢侈。勝今多矣。

晉人已迷信墳墓風水

世說新語。人有相羊祜父墓。後應出受命君。祜惡其言。遂掘斷墓後。以壞其勢。相者立視之曰。猶應出折臂三公。俄而祜墜馬折臂。位果至公。又晉明帝解占冢宅。聞郭璞爲人葬。帝微服往看。因問主人何以葬。

龍角主人曰。郭云此葬龍耳。不出三年。當致天子。帝問爲是出天子邪。答曰。非出天子。乃致天子問耳。按相墓之法。蓋自古有之。詩曰。相其陰陽。觀其流泉。卜宅如是。卜墓亦如是。而其書皆佚。至晉郭璞著有青囊經。是爲相墓最古之書。今尙存。

#### 漢時墓上已有石馬

西京雜記。陳竊入終南山採薪還。晚趨舍。至張丞相墓前。石馬以爲鹿也。以斧撻之。按後世墓上有石人石馬石羊以爲陳列。茲只云石馬。想不止此一物也。

#### 古盜墓狀況

呂覽高誘注云。有人自關中來者。言姦人掘墓。率於古冢旁。相距數百步外。爲屋以居。卽於屋中穿地道。達葬所。自其外觀之。冢未掘也。而藏已空矣。按今北平貴人墓。無一不被掘者。棺內寶玉。葬後數月。必出墓而盜取之法。與此盡同。此道行之。可謂久矣。

#### 西漢始有墓誌埋銘後則墓上亦有碑

葬者藏也。故自古無誌墓者。有之自西漢始。西京雜記。杜子夏杜鄉臨終。自作文。及死。命刊石埋於墓側。墓前種松柏五株。按此實埋銘之始。後之墓誌。皆埋於地下者也。若墓碑。若墓表。若墓碣。則樹於墓上。若神道碑。則樹於墓門者也。





## 卷二十三

行唐尙秉和著

坐席

牀榻椅子附

### 周坐席狀況

古器用不備。皆坐於地上。而藉以席。周禮春官司几筵。下士二人。注筵亦席也。鋪陳曰筵。藉之曰席。筵鋪於下。席鋪於上。所以爲位也。按筵大於席。蓋鋪地上。使無隙地。以爲潔。筵之上再鋪以席。而人坐之也。故古人入室卽脫履。

### 一席容四人

禮曲禮羣居五人。長者必異席。注。席以四人爲節。疏。古者地敷橫席。而容四人。四人則推長者居席端。若有五人。應一人別席。因推長者一人於異席也。是席以坐四人爲度。故曲禮又云並坐不橫肱。橫肱則妨他人。此亦一席坐數人之證也。

### 若有喪則可專席

曲禮有喪者專席而坐。按有喪則身著凶服。衣凶服與人共席。恐人嫌。故專席。

坐席規矩

曲禮侍坐於所尊敬毋餘席。注必盡其所近尊者之端。爲有後來者。疏所以然者。欲得親近先生。備顧問。似若扶持然。且使下端有空處。俾後者得坐。是不餘席有二義。一近先生。問業便。奉侍便。一盡席則下端有餘。使後來者空也。又內則讀書食則齊豆去席尺。注讀書聲當聞於長者。食恐汙席。故坐與席齊。豆去席尺者。亦恐汙席也。

登席禮節

禮內則登席不由前。爲躡席。徒坐不盡席尺。注升席必由下。由前則躡席。徒坐者。非飲食非講問時。故不盡席。

跪坐容態之同異

古之坐自膝以下向後屈。而以尻坐於足上。曲禮坐左足則著右。坐右足則著左。是其證。故儀禮士相見云。坐則視膝。夫必以尻坐於足上。身向後而後向前。而後能視膝。史記索隱云。古人跪坐。由儀禮視膝之言證之。跪與坐相近而微不同。釋名跪者危也。兩膝隱地勢危倪也。正字通伸腰及股而勢危者爲跪。因跪而益致其恭。然則跪者兩膝屈而身股直豎。胡能視膝乎。但後世皆曰古跪坐。義雖不同。亦不能改也。若兩脚向前則爲箕踞不恭。

韓詩外傳。孟子妻獨居踞。孟子入室視之。白其母曰。婦無禮。漢書張耳傳。高祖箕踞罵詈。陸賈傳。佗魑結箕踞見賈。師古曰。箕踞謂伸其兩脚而坐。形似箕。正今日平坐之式也。

故古之跪禮並不重略示敬於人

在今日而言跪其禮甚重。古則坐時略示敬於人耳。史記范雎傳。秦王賜跪也而請曰。枚乘傳。長君跪曰。幸甚。是皆坐時身略豎起。致敬於人。故以秦王之尊。亦行之於臣下也。

古因下衣不全屈身之事皆跪行之以妨露體

古者下衣不全。故時時妨露體。曾於身服部詳之矣。箕踞或露下體。故不論男女。以爲大不敬。屈膝坐。則永無露體之嫌。不惟此也。凡俯身之動作。屈身之動作。無不跪爲之。史記張釋之傳。跪爲王生結韉。張良傳。跪爲老人納履。夫結韉納履。足可踣地爲之。而不爾者。以蹲則兩股開張。有暴下體之勢。故必坐爲之。跪者坐而豎身也。

周賓主席向

左傳。昭二十五年。叔孫婁聘于宋。宴飲酒樂。宋公使昭子右坐。注云。改禮坐。疏。燕禮。司宮筵賓於戶西東上。小臣設公席于阼階上。西嚮。是禮坐主。西嚮賓南嚮也。云云。按周時賓升自西階。主升自阼階。其揖讓皆賓東嚮主西嚮。又史記郭隗謂燕昭王曰。今王將東向坐。目指氣使以求臣。則廁役之人至。是周時以

東嚮爲尊也。

漢仍坐席仍一席坐數人

漢書賈誼傳文帝與語不自知膝之前於席。是皇帝亦席地坐。雋不疑傳登堂坐定不疑據地曰惟席地故坐可據地。史記任安傳衛將軍從此兩人過平陽主。主家令兩人與騎奴同席而食。此二子拔刀斷席別坐。世說管寧與華歆共席讀書。有乘軒過門者。歆廢書出看。寧割席分坐曰子非吾友也。是自西漢初迄東漢末仍共席坐也。

漢坐席以東嚮爲尊

史記淮陰侯傳得廣武君令東向坐而已。西向事之。武安侯傳嘗召客飲坐其兄南鄉。自坐東鄉。以爲漢相尊不可以兄故私撓。是東鄉尊於南鄉。南越傳使者皆東鄉。太后南鄉。王北鄉。蓋寬饒傳從西階上東鄉特坐。樓護傳坐者百數皆離席伏。護獨東鄉正坐。是客皆以東鄉爲尊。後漢鄧禹傳進見東鄉甚見尊寵。桓榮傳乘輿常幸太常府令榮坐東面設几杖會百官。是天子特以東面尊元老也。

漢宴飲食時坐席之禮節

史記魏其傳飲酒酣武安起爲壽。坐皆避席伏。已魏其起爲壽。獨故人避席耳。餘半膝席。灌夫不悅起行。酒至武安。武安膝席曰不能滿觴。按避席者下席也。示不敢當。離席而伏於地也。膝席者言方坐而示敬。

于。人。兩。股。豎。起。因。而。兩。膝。著。席。故。曰。膝。席。即。跪。也。若。坐。則。兩。膝。向。前。不。著。席。也。蘇。林。謂。下。席。而。膝。半。在。席。上。者。誤。也。儀禮坐則視膝爲古坐足確證。

又按謝罪者皆避席。吳志張昭傳。昭避席謝。後漢皇甫嵩傳。坐者感動。皆離席請之。離席者仍避席下席也。

### 古有憂則不正席坐以見意

漢書原涉傳。聞友人喪。側席而坐。谷永訟陳湯疏曰。臣聞楚有子玉得臣。文公爲之側席。萬石君傳。子孫有過失。不誚讓爲便坐。師古曰。坐於便側之處。不正坐也。按此即側席也。

### 古席甚薄一人可坐五十重

後漢戴憑傳。光武召公卿大會說經。羣臣皆就席。憑獨立。光武問其意。憑曰。諸博士說經。皆不如臣而坐居臣上。是以不得就席。會元旦朝賀。百僚畢會。帝令羣臣能說經者。更相難詰。義不通者。輒奪其席。以益通者。憑遂重坐五十餘席。可證古坐席薄甚。不然五十重席。高不能坐矣。

### 後漢兼坐牀然仍跪坐

向栩傳。常於竈北坐板牀上。如是積久。板乃有膝踝足指之處。又魏志管寧傳。寧常坐一木榻上。積五十年。未嘗箕踞。榻上常膝處皆穿。夫必跪坐牀上積久。乃有膝踝足指之痕。若如今日之垂腿坐。則無是矣。

按魏晉時雖有襪而仍多赤足。前於足服部述之詳矣。茲又於上二事證之。膝雖隔袴。用力重尙可日久有痕。若足指隔襪。雖日久於木上亦不能有跡。茲竟有指痕者。以古人常赤足也。

東漢坐牀者雖多然牀上尙無茵席

東漢坐牀者。記載不可勝數。然牀上無鋪藉。蓋古人席地坐而席又薄。其苦可知。乍得牀以爲甚適。故無藉也。後漢袁術傳。六月坐簀牀而歎。注簀第也。謂無茵席也。夫以術之僭侈。尙無茵席。他更可知。彼向綳管寧牀上之有膝踝痕者。亦無席之證也。

魏晉時皆坐牀榻不席地而有獨榻坐連榻坐之分

蜀志簡雍傳。性簡傲。獨擅一榻坐。世說杜預拜征南將軍。朝士悉至。皆在連榻坐。裴叔則羊祜後至曰。杜元凱乃復連榻坐人。不坐便去。按玉篇。榻者牀之狹而長者也。人多則連坐一榻。勢使然也。又世說謝公領中書監。王東亭後至。坐促。王謝雖不通。太傅猶斂膝容之。按連榻而跪坐。擁擠堪虞。故裴羊不悅。謝公能斂膝容。王稱盛德也。

晉時不席地之證

世說裴遐在周馥所。馥設主人。遐與人圍棋。馥司馬行酒。遐正戲不時飲。司馬恚曳遐墜地。遐還坐。舉止如常。又支道林還東。時賢並送。蔡子升坐近林公。謝萬石後來。坐少遠。蔡暫起。謝移就其處。蔡還見謝在。

因合褥舉謝擲地。是皆不言坐牀而實不席地。如席地則不言墜地擲地矣。於是數千年之席地制至是遂改革無餘。此亦起居史上之一大紀念也。

### 魏晉牀上始鋪簟褥及草

魏書焦先傳。自作一瓜牛廬。營木爲牀。布草蓆其上。世說王恭從會稽還。王大造之。見其坐六尺簟。因語恭卿從東來。故應有此物。可以一領及我。恭無言。大去。卽舉所坐者送之。旣無餘蓆。便坐薦上。又陶侃母因家貧。倒諸薦以爲馬草。是皆於牀上藉以草蓆。其富者於草蓆之上。再加以簟。以爲潔清。視漢人之坐必親牀者。進矣。

### 若今日之坐古人皆曰據

箕踞者。席地坐足伸向前也。據者垂腿坐榻上也。漢書帝據廁。見大將軍。世說新語。庾公夜登黃鶴樓。僚屬皆散。庾公徐曰。老子於此興復不淺。便據胡牀。與諸人詠諠。又謝萬詣王恬。良久。恬沐頭散髮而出。亦不坐。仍據胡牀。在中庭晒髮。又陸機還洛。輜重甚盛。戴淵使少年掠劫。淵在岸上。據胡牀指揮。又王子猷中途求桓子野琴。笛。子野使回車下。據胡牀作三弄。按廁者遺器。卽今之馬桶。胡牀者兩橫木相交。中連以繩。可合可張。便於行旅。此二物皆不能跪坐。故據之。據者垂腿向前。卽今之坐也。又張說虬髯客傳。司空楊素驕貴。凡公卿上謁。皆踞牀而見。衛公李靖獻奇策。素亦踞見。按踞牀卽垂脚坐牀。與據同。

若今日之著鞋垂脚坐始見於梁侯景

南史侯景傳牀上常設胡牀及筌蹄著鞵垂脚坐按古人雖坐牀亦脫屣侯景著鞵不合一也垂脚坐牀不合二也史書之所以紀異按此亦據也正今日之坐式

然至唐坐牀仍跪坐不垂脚

唐人靈應傳遂升階相見登榻而坐又李泌外傳泌方寢肅宗入院不令人驚之登牀捧泌首置於膝夫既曰登榻登牀則不垂脚可知如垂脚則不登矣登則跪坐也故古有榻登以爲級

榻登

自漢魏迄唐皆坐牀榻席地者漸少然古人跪坐必先登牀而後能坐惟牀高二尺登頗不易則有榻登以爲塔梯釋名云榻登施大牀之前小榻之上所以登牀也

胡牀攷

自漢末有胡牀集異記漢靈帝好胡牀胡坐即今坐式是也胡牀今名馬架亦名麻榨因以麻繩連綴木上可合可張取携最便故出門者恒携之庾公登黃鶴樓據胡牀戴淵在岸上據胡牀指揮桓子野據胡牀作三弄王恬出不坐仍據胡牀皆見前章又南齊書劉憲傳遊諸故人惟一門生持胡牀隨後南唐書劉仁瞻傳世宗在城下據胡牀督攻城蓋胡牀中綴一繩用則張之不用則合或佩於鞍馬或挂於車轅且



可挂於壁。李商隱爲漢陽公陳情表云：黃犢留官，胡牀挂壁，是其證。故或疑胡牀爲矮凳者非也。矮凳如何能挂乎？惟此物在宋以前祇能據而不能坐，故古無曰坐胡牀者。

### 卓子攷

卓子之名，始見於楊億談苑。談苑云：咸平景德中，主家造檀香倚卓，言卓然而高可倚也。五燈會元張九成傳：公推翻桌子，觀談苑記其名，兼釋其義，可見宋以前無此物，爲主家所新創也。故其字談苑從卓。五燈會元作桌。五燈會元爲南宋沙門濟川作，用卓旣久，遂以意造爲桌字。

### 椅子攷

此名亦見於宋初。默記云：徐鉉謁李煜，久之，老卒取椅子相對，鉉止之曰：但正衙一椅足矣。又老學菴筆記：高宗在徽宗服中，用白木椅子，錢大主入覲見之曰：是檀香椅子耶？其在宋初，惟皇后得坐金漆椅。宋史后妃傳：劉貴妃與孟后朝太后，孟后坐金漆椅，妃亦設此椅，左右不服，迺呼太后出矣。妃起立，暗撤之，妃再坐而仆，是其證。

### 兀子攷

此物亦至宋始見。宋史丁謂傳云：謂已罷相知鄆州，私自寅緣，復許留京。次日早朝，賜坐，左右爲設墩，謂曰：有旨復平章矣。乃更以兀子進。是在宋初，非宰相不能坐兀子，相以下則僭其貴若此。

以上三物。定其興於宋初。又有一證。聞見錄。宋太祖雪夜叩趙普門。設重茵地上。熾炭燒肉。是可證棹椅等物。在宋初雖趙普家尙無有。故席地坐也。

卓椅兀至南宋遂大興

老學菴筆記。往時士大夫家婦女坐椅子兀子。則人皆笑其無法度。是可證至放翁時。雖婦女已坐椅子。兀子與今日等也。蓋在宋初。物以創始而見貴。至南宋又百餘年。雖士庶之家無不有也。又放翁之所謂坐仍據也。可見南宋時不跪坐已久。雖以放翁之博雅。亦從俗以據爲坐。與今日同。卽宋史所謂坐亦皆據也。

蓋席地之風。歷三代兩漢。至晉而更跪坐之容。歷三代兩漢。以訖於唐。約數千年。至宋而革。迄於今。惟日本高麗。仍席地跪坐。合中國無有也。且高座旣興。高几高案亦相因以起。凡讀書習字諸動作。亦相因以變。更曩侯景垂脚坐牀。羣以爲異。史官特筆書之者。後無不如此。此中國起居史上之一大革命。而載籍無詳者。豈不異哉。

几案攷

古所謂几。矮甚。攷工記所謂室中度以几。書顧命玉几。莊子隱几而臥。皆爲席地時憑撫之器。且多用於老人。故几與杖恆連稱。詩大雅。或授之几。後漢桓榮傳。東面設几杖。是其證。至於書案。曹操曾表進。然古

時跪坐，與几皆爲矮器。自宋時高坐興，於是几案亦相隨以高大。如今式。



## 卷二十四

行唐尙秉和著

### 拜跪

#### 古拜屈膝頭與腰平

拜與揖異。揖可立爲拜。必屈膝。世說陶公既救出梅賾。賾見陶公拜。陶公止之。賾曰。梅仲直膝。明日豈可復屈耶。是拜必屈膝之證也。然雖跪地而首不至地。荀子平衡曰。拜注平衡。謂罄折頭與腰如衡之平。是跪地後身罄折。使頭與腰相平如衡。卽古拜式也。

#### 拜後稽首頓首禮節輕重之區分

拜式旣明。然後可究其輕重禮節。周禮春官大祝辨九拜。一曰稽首。二曰頓首。三曰空首。四曰振動。五曰吉拜。六曰凶拜。七曰奇拜。八曰褒拜。九曰肅拜。以享佑祭祀。

#### 稽首之真象

按稽首者。注云拜頭至地也。蓋旣拜而頭俯至地。稍遲而後起。敬之至也。左傳哀七年公會齊侯于蒙。孟武伯相齊侯稽首。公拜。齊人怒。武伯曰。非天子寡人無所稽首。又左傳孟獻子相魯。如晉。公稽首。知武子

曰天子在而君辱稽首寡君懼矣是必拜天子而後稽首爲拜禮之至重者又按荀子云下衡曰勝首至地曰稽顙是稽首頭不至地但下衡而已與鄭注異然禮莫重於拜天子天子而不至地更何事可至地乎鄭故不從之

### 頓首之眞象

頓首者鄭注云拜頭叩地也卽叩首也蓋稽首者俯首至地稍住而起頓首則以首叩地一叩卽起也疏云敵者頓首然則頓首之禮輕於稽首故列稽首之次段玉裁謂周禮之頓首卽他經之稽顙誤也稽顙者頭觸地無容甚迫急頓首則以首叩地而有容甚從容故疏云敵者用之又稽顙純爲凶禮

### 空首之眞象

空首者注云拜頭至手所謂拜手也疏云君答臣下空手所謂拜手一拜答臣子再拜答神與尸觀疏意空首者卽拜也拜不至地至手而止卽荀子所謂平衡也又公羊傳趙盾北面再拜何休云頭至手曰拜手是也

### 吉拜之眞象

吉拜者注云拜而后稽顙按尋常拜禮無稽顙者惟遭喪有之儀禮士喪禮主人哭拜稽顙注云頭觸地無容又檀弓拜而后稽顙顙乎其順也稽顙而后拜順乎其至也孔子曰三年之喪吾從其至者是稽顙

者倉皇哀泣。見人卽以頭觸地。而無容節。純爲喪禮。非吉禮。鄭以稽顙釋吉拜。殊不可解。蓋拜而后稽顙者。見人先拜。墜身再俯而稽顙也。稽顙而后拜者。見人先以頭搶地。然後再從容拜也。由孔子之言觀之。皆處喪之禮。故吾疑吉拜者。乃從容之義。對上文振動而言。不稽顙也。振動拜卽恐懼而拜。無別義。故不詳也。

### 凶拜之眞象

凶拜者。注云稽顙而后拜。三年喪拜也。愚按降臣俘虜。見於紀傳者。亦往往稽顙。不專親喪。故經曰凶拜。凶拜之所包者廣也。鄭注仍非也。

### 奇拜衰拜之眞象

奇拜者。注云先屈一膝。卽今之雅拜是也。衰拜者。注云再拜。按漢之雅拜。疏不言其義。其狀不明。清時見面一屈膝。行間安禮。卽古之打陰。與注所謂先屈一膝者相類。再拜者。卽再起再俯。惟首不至地。至地則叩首矣。

### 肅拜之眞象

肅拜者。注云但俯下手。今時揖是也。疏肅拜但俯下手。惟軍中有此。所謂介冑不拜也。按曲禮介者不拜。爲其拜而夔。音挫拜。注夔拜則失容。又左傳成十六年。晉楚戰于鄢陵。楚子使工尹襄問郤至以弓。郤至

見客免冑承命曰以君之靈聞蒙甲冑不敢拜命爲事之故敢肅使者三肅使者而退注云肅使者肅手至地若今揖釋文云揖擡也許慎云揖舉首下手也由是證之古之揖與今異今揖上手至額自上而下古揖則下手至地自上而下古之揖今戲劇所行者是也

古男女拜之異

禮內則凡男拜尙左手女拜尙右手按尙者上也今拜則兩手相對古拜則兩手相交男尙左女尙右段玉裁云凡沓合也手右手在內左手在外是謂尙左手男拜如是喪拜反是喪服記祛尺二寸注祛袖口也尺二寸足以容手在外是謂尙右手女拜如是女之吉拜如是喪拜反是喪服記祛尺二寸注祛袖口也尺二寸足以容中人之併兩手也按段說非也如以手內外分男女則當曰前曰外不當曰尙尙書序尙上也詩衛風上慎旃哉注上尙也又論語好仁者無以尙之注尙加也既曰尙左尙右則以此手加於彼手之上也

古小官見大官必拜

漢書汲黯傳黯見蚡未嘗拜田蚡爲丞相嘗揖之又自天子欲羣臣下大將軍人曰君不可不拜黯曰夫以大將軍有揖客反不重耶是西漢羣臣每見丞相見大將軍必拜也又晉書王祥傳及武帝爲晉王祥與荀顗往謁顗謂祥曰相王尊重今見使當拜也祥曰相國魏之宰相吾等魏之三公相去一階耳及入顗遂拜而祥獨長揖是晉時官爵差一階見則亦拜也



### 古拜謁須稱名

後漢周黨傳及見光武伏而不謁注謁請也告也黨應伏地告某謁按伏地告某謁者當伏地時應告臣某謁見也伏而不謁者祇伏地下拜而不稱名違常例也

### 南北朝送迎賓客捧手與揖之狀況

顏氏家訓南人賓至不迎相率捧手而不揖送客下席而已北人迎送並至門相見則揖皆古之道也按捧手者拱手立而不俯揖則下手至地雖立而身罄折也

### 古朋友幼者見長者必拜

世說宗承以忤魏武見疏位不配德文帝兄弟每造其門皆獨拜牀下又蜀志龐統傳注引襄陽記曰龐德公襄陽人孔明每至其家獨拜牀下德公初不令止司馬德操嘗造德公值德公渡沔祀先人墓德操直入其室呼德公妻子速作黍妻子皆羅拜堂下按獨拜者主人不答拜也不令止者每見必拜不止之也德操既令德公妻子作黍是德公妻子與德操非初見也而亦必羅拜者漢時賓客見面則拜俗使然也

### 唐朋友仍見面則拜

張說虬髯客傳紅拂第長虬髯行三虬髯呼爲一妹張氏呼李郎來見三兄公驟拜之是雖於逆旅遇友

亦拜也。又人虎傳。文豪李微。既化爲虎。路遇同年進士御史袁儻。儻聞草間哭聲。視之乃虎。而能言。儻既知其爲微。乃曰。儻素以兄事故人。願展拜禮。乃再拜。虎以妻子爲託。敘談甚久。告別。儻乃再拜上馬。是於路上對故人而事以兄禮。亦再拜也。他若韓愈馬少監墓志云。愈以故人子。拜北平王於馬前。白行簡李娃傳。鄭生見娃母。跪拜致詞。是皆以後輩見前輩而拜。後世或有之。不足以見當時之特俗也。

唐時雖男女相亂初見亦拜

虬髯客傳。公歸逆旅。其夜五更初。忽聞叩門而聲低者。公起問焉。乃紫衣帶帽人。杖一囊。曰。妾楊家之紅拂女也。公遽延入。脫去衣帽。乃十八九佳麗人也。素面青衣而拜。公驚答拜。是雖文君之私奔相如。初見亦拜。又皇甫枚非煙傳。象乃躋梯而登。煙已令重榻於下。既下。見煙盛服立於花下。拜訖。俱喜。極不能言。是男女星夜幽會。亦拜。夫黑夜私奔。踰牆幽會。淫褻極矣。而相見必拜。其他可知。

至宋雖後輩見前輩不盡拜矣

老學菴筆記。前輩遇通家子弟。初見請納拜者。既受之。則設席望其家。遙拜其父祖。乃就坐。先君尙行之。觀放翁之言。初見請納拜者。可見不請者多矣。卽請拜。有受有不受者。如受之。則須遙拜其父祖以爲答。若唐以前。則見無不拜。拜無不受。不必請納拜也。蓋拜跪之禮。至宋一變。與坐席同。所以然者。古席地坐。置身低下。故視拜跪爲甚輕。至宋則人擅一椅。不惟席地之禮廢。卽牀上跪坐之禮。

亦廢。置身日高高則下就難。故視拜跪爲甚重。拜跪與坐席其始也。相因以俱興。其末也。相因以俱變。沿革變遷有不期然而然者。雖大賢大哲亦不能與風會反也。

### 唐宋見天子既拜而舞

明皇雜錄。玄宗既平內難。將欲草制書。甚難其人。顧謂蘇瓌曰。誰可爲詔。試爲思之。對曰。臣男甚敏捷。然嗜酒。幸免酤醉。足了其事。遽命召來。時宿醒猶未解。粗備拜舞。又玄宗召李白。時寧王邀飲已醉。拜舞頽然。又有黃門奉使交廣歸。拜舞於殿下。至宋猶然。老學菴筆記。先君言舊制朝參拜舞而已。後增以哂。按拜舞者。蓋既起而舞。以示歡欣舞蹈之義。今戲劇天子升殿。羣臣拜起。輒揚臂舉足。掀袍作勢。迴旋者是也。哂者。唐代有之。朝賀則無。今戲劇拜起而長聲唱者。是也。

明皇之召蘇琕李白。皆一人燕見。雖拜舞而興趣索然。若大朝之時。百官拜起。揚袂舉足。迴旋殿廷。真盛事也。



## 卷二十五

行唐尙秉和著

### 訟獄

古欲訟先以財物爲抵然民事與刑事不同

周禮秋官以兩造禁民訟入束矢于朝然後聽之注束矢者百矢詩曰其直如矢不入束矢是自服其不直也疏云不實則沒入官

又兩劑禁民獄入鈞金三日乃致于朝然後聽之注獄謂相告以罪名者劑今券書也疏券書謂獄訟之要辭三十斤曰鈞按訟者蓋今所謂民事獄者今所謂刑事也訟輕故入束矢獄重故入鈞金然貧者胡以堪哉

古訟兩造皆坐而無席

左傳襄十年王叔之宰與伯與之大夫坐獄于王庭注坐獄者坐訟也故晏子春秋云晏子曰獄訟不席又嬰聞訟夫坐地今嬰將與君訟敢不坐地乎是古訟獄者皆坐地之證也

古命夫命婦不躬坐獄訟

周禮秋官凡命夫命婦不躬坐獄訟注使其屬與子弟代之也按清時命夫命婦獄訟有報告今則無論何人皆可遣人代訟且可聘律師代也

### 古立肺石以達民隱

周禮秋官以肺石達窮民凡遠近惇獨老幼之欲有復于上而其長弗達者立于肺石三日士聽其詞以告於王而罪其長注肺石者赤石窮民天民之窮而無告者立肺石三日言赤心不妄告也愚按肺者肺腑也有欲達其肺腑之意者立此所以示也肺石至六朝仍有封氏聞見記云梁武帝詔于榜木肺石旁各置一函是其證

### 訟不決則使兩造盟于社而使其鄉黨供酒牲以懼之

周禮秋官司盟有獄訟者則使之盟詛凡盟詛各以其地域之衆庶供其牲與酒脯注不信言理屈而詐者則不敢聽此盟詛所以省獄訟按此法有數善萬民獄訟無佐證可成其罪欲赦之則受害者不甘欲罰之則爲惡者不服對神盟詛理屈者恐而不敢即敢勉強爲之必生愧怍可望色而知一也凡獄訟曲直鄉黨必知其實今忽累及鄉黨使供牲酒必有不欲而質證其曲直者二也又爲變詐者懼不見直於鄉里而他日不相保受或者自服三也此事初視之甚可笑繼思之有至理供牲者注盟者書辭於策殺牲取血坎其牲加書於上而埋之也

### 古獄爲圓形

周禮秋官司寇以圜土聚教罷民。凡害民者置之圜土而施職事焉。其不能改而出圜土者殺。注：圜土，獄城也。罷民者，夜在圜土，晝役司空，欲其勞則歸善。故曰罷。同疲。按出圜土者，即今所謂越獄也。故殺司馬遷報任安書云：幽于圜牆之中，圜牆即圜土，以此證漢獄仍與周同制也。

### 古徒刑必赭衣

荀子殺赭衣不純，說苑豫讓赭衣入繕宮。史記張耳傳：唯孟舒、田叔等十餘人，赭衣自髡鉗，稱王家奴。漢書楚交王傳：衣之赭衣，吾丘壽王傳：赭衣塞路。按徒刑者，即所謂晝役司空也。赭者赤也。衣赭衣，所以使人知其爲罪人也。此等衣制，至清尙有，沿歷數千年，可謂久已。

### 凡犯徒刑罪先坐嘉石以示衆

周禮秋官司寇以嘉石注：文石，樹外，楊門左。平罷民。凡萬民之有罪過而未麗于法而害于州里者，桎梏而坐諸嘉石，役諸司空。坐石期滿役于司空。重罪旬有三日坐，期役。坐石十三日，役一年。次罪九日坐，九月役。其次七日坐，七月役。其次五日坐，五月役。其下罪三日坐，三月役。使州里任之，則宥而舍之。桎梏在首，桎在足。役期長者，坐石日亦長。役期短者，坐石日亦短也。必先坐石者，所以示衆，任者保也。期滿使州里保出，不復爲非也。

### 古防範囚犯之刑具

周禮掌囚。凡上罪梏桎而桎。中罪桎梏。下罪桎注。桎者校也。即枷在首。猶牛之有桎。華兩手共一木。在足曰桎。按華者。今之手拷。桎者。今之脚擦。桎梏華上罪全有之。中罪去華。使手自由。下罪則祇刑其足。使不能逃走而已。

古遞解罪人膠目鞬手

呂氏春秋。管仲吾仇也。願生得之。魯君許諾。乃使吏鞬其拳。膠其目。盛之以鷗夷。置之車中。至齊。按鞬革也。以革囊其手。使不能動作。膠目者。以膠糊其目。使不能視。今賊劫人爲質者。猶用其法。鷗夷者。大皮壺。既鞬手膠目。復將其全身裝入鷗夷中。卽夫差以鷗夷盛子胥尸沈之江中者是也。

周極輕之刑曰釥。釥。刑酒撻曰髡。

周禮地官閭胥。掌比釥撻罰之事。注。鄉飲酒有失禮者。則罰以釥酒。重者撻之。又髡。刑剃人髮。不在五刑之內。蓋亦極輕刑也。

周時五刑之慘酷

周禮秋官司刑。掌五刑之法。墨罪五百。劓罪五百。宮罪五百。剕罪五百。殺罪五百。注。夏刑大辟。卽殺。二百。膺辟三百。宮辟五百。劓墨各千。至漢文帝除墨劓。則三刑。疏。宮刑至唐乃除。是周之五刑。沿自虞夏。仍而不改。大殺刑至今不能廢。宜也。至其餘四刑。慘酷極矣。墨者黥也。先刻其顙成文。以黑色涅之。終身不滅。



而軼傳以黥徒二人夾之。英布以常受黥刑，人呼曰黥布是也。劓者截鼻，言者去勢。左傳襄十八年，風沙衝連大車，塞隧而殿，殖綽郭最以爲奄人，殿師。齊之大辱，漢司馬遷被宮刑，終身恥之，以爲無顏。上先人邱隴是也。別者去足，卞和抱璞，別足。孫臏，別足爲齊將，齊歸貴履賤。在春秋時，此刑尤多。夫人之罪，既不至死，則受刑於一時，尙可遷善改過於後日。而黥其面焉，劓其鼻焉，去其勢，斧其足焉，使其終身殘廢，不可以爲人，則其酷甚於死矣。乃歷三代而不改，至漢文帝乃去其三。至唐乃去其宮刑焉。嗚呼！何其晚哉。

### 周處分殘廢人之法

周禮秋官墨者，使守門。劓者，使守關。宮者，使守內。別者，使守圜。髡者，使守積。是以昭四年，楚共王曰：「晉吾仇敵，今其來者，上卿大夫也。若吾以韓起爲關，言則使守門以羊舌肸爲司宮，加宮刑其可乎？」又說苑齊景公被髮御婦人，以出正閭，別跪擊其馬而反之。是守內守門之證也。又古之樂官，必爲瞽者。遇大祭祀，百數十人排隊而出，有眊瞭以爲相，可見無一有目者。故古之瞽者，皆不失業。無如今日之沿街乞食者，此則古人因材利用之善也。

### 古盜賊妻子入官爲奴

周禮秋官司厲，掌盜賊之任器貨賄。其奴男子入於罪隸，女子入於舂槁。左傳襄二十三年，初，裴豹隸也，著於丹書。以丹書其罪欒氏之力臣曰督戎，國人懼之。裴豹謂宣子曰：「苟焚丹書，我殺督戎，是男子入於罪隸。」

之證也。史記：楚交王世家，使杵臼確舂於市，卽舂也。棄者飲食也。女子質弱，故使爲之。

又罪人亡逸其妻子亦爲奴

新序：鍾子期夜聞擊磬聲而悲，召問之，曰：臣之父殺人而不得亡去，臣之母得爲公家隸，臣得爲公家擊磬，臣不覩臣之母三年矣。昨日爲舍市而覩之，意欲贖之，無財，是以悲也。子期爲贖其母，是有罪而逃者，則必奴其妻子，與盜賊同也。

漢唐犯重罪妻子皆沒爲官奴婢

漢律：罪人妻子沒爲奴婢。魏志：毛玠傳出見黥面反者，其妻子沒爲官奴婢。唐次柳氏舊聞：玄宗幸太子宮，見使用無妓女，令高力士選民間女五人進之。力士曰：臣以爲掖庭中故衣冠以事沒入者不少，可備選。又劉無雙傳：以父曾爲朱泚僞官，置大辟，無雙沒入掖庭。又因話錄：肅宗譙宮中有女優綠衣乘簡爲參軍者，乃伏法蕃將阿布思之妻也。是自漢迄唐，凡犯重罪者，其妻子無不沒爲官奴婢也。

古殺人狀況

古欲斬人，先使伏於鍤上。說苑：秦始皇旣囚太后，令曰：敢諫者死。茅焦旣諫，解衣伏質。史記：張蒼傳：犯死罪，常斬解衣伏質。漢書：王訴傳：旣已解衣伏質，師古曰：質，鍤也。欲斬人，使伏於鍤上，至斬人之器，則不以刀而以斧。管子：至堂阜，桓公親迎，祓而浴之。管仲跣纓捷衽，使人操斧而立其後，公辭斧三，然後退之。公

白垂纓下衽。寡人將見。按管仲曾射桓公中帶鉤。故自請死罪。使人操斧以備誅。而冠纓下垂。則於斬首時有礙。故屈纓於上。使不護項。又衣襟下垂。腰斬不便。故斂衽露體。俾無遮護。是皆就死時狀態。乃不持刀而持斧者。誠以古殺人盡以斧也。

### 古殺人後必暴其尸三日

周禮秋官。凡殺人者。踣諸市。肆之三日。左傳成十七年。晉厲公殺三卻。皆尸諸朝。襄二十三年。楚殺令尹子南。尸諸朝三日。昭二年。鄭子皙死。尸諸周氏之衢。加木焉。注書罪於木。加尸上也。卽論語所謂肆諸市朝也。又桓十五年。鄭祭仲殺雍糾。尸諸周氏之汪。汪云。汪池也。是不朝不市而於野也。然自漢以來。不見有陳尸之事。祇王允殺董卓。肆之於市。卓尸肥。夜然燈於臍中。謂之卓蠟。他甚少也。

### 古有焚尸刑有車裂刑

周禮秋官。凡殺其親者。焚之。殺王之親者。辜之。鄭注辜車裂也。左傳襄二十一年。轅觀起於四竟。杜注。轅車裂也。又史記商鞅傳。乃車裂之。至漢以後。則甚少矣。

### 古以金帛贖罪

虞書曰。金作贖刑。孔叢子。顏轡由善侍親。子路義之。後轡由以非罪執。子路請以金贖焉。新序。鍾子期爲擊磬者。贖其母。史記。李廣傳。當斬贖爲庶人。后漢明帝紀。天下亡命殊死以下。聽得贖。論定也死罪入讎。

二十四。右趾至髡鉗城旦春十四。是自死罪以至最輕之春罪。皆可以金帛贖。故富者無所畏也。城旦者。戍邊塞。晝伺寇虜。夜築長城。右趾者謂刖其右足也。但自文帝時卽詔除肉刑。謂右趾爲刖足。疑注非也。

漢女刑有願山

平帝紀。天下女徒。

言女應受徒刑者。

已論歸家。月出願山錢三百。又光武紀。女徒。願山歸家。如淳曰。令甲女子犯

徒罪。遣歸家。每月出錢雇人於山伐木。名曰雇山。按此刑後世少見。漢世重聚斂。故有此刑也。

漢死罪可改宮刑

景帝紀。詔死罪欲腐者許之。光武紀。詔死罪。募下蠶室。按此可見宮刑之重。觀詔語曰。欲腐者。蓋有事就死。不欲腐者矣。故須募也。蠶室常溫。割勢後懼中風。故居之。

按周時王宮。以奄人守內。亦因材利用耳。與劓刖同也。故其時士大夫家。亦常用奄人。左傳襄二十八年。崔子怒。寺人御而出。是其證也。至漢時帝王宮嬪愈多。須奄人愈衆。自然之宮刑。不敷用。則募以致之矣。故後漢郎顗傳。臣聞古者。本無宦官。武帝末春秋高。數遊後宮。始置之。

## 卷二十六

行唐尙秉和著

### 文具

成周以前皆以刀代筆

攷工記。樂氏爲削。長尺博寸。合六而成規。鄭注。今之書刀。疏。漢時蔡倫造紙。蒙恬造筆。古者未有紙筆。則以削刻字。至漢雖有紙筆。仍有書刀。是古之遺法也。按削者。刀也。今日出土之龜甲文。皆以刀刻字於上。而皆爲殷物。攷工記。作於周初。由是證成周以前。皆以削刻字。無所謂筆。故至漢因名曰書刀。言以刀作字也。東觀漢記。建初中。以書刀賜馬嚴。是也。

春秋戰國以竹木爲筆而不磨刀

古今注。古之筆。不論以竹以木。但能染墨成字。卽謂之筆。按曲禮云。史載筆。管子云。於是令百有司。削方墨筆。莊子云。衆史皆至。舐筆和墨。韓詩外傳。墨筆操牘。按茲所謂筆。皆竹木之筆也。先削成薄片。成斜刃形。而析其末。使竹木之文理。碎析蒙茸。然後能染墨。舐筆者。舐其尖使潤。受墨易也。然仍不磨刀。周末雖有帛書。大多數用竹簡。字訛則以刀削去。史記孔子世家。孔子爲春秋。筆則筆。削則削。子夏之徒。不能贊

一辭是其證。又拾遺記：任末削荆爲筆。後漢時雖有毛筆，任末以家貧削荆爲之，亦古以竹木爲筆之證也。

古竹筆今木匠仍用之。宋嬾真子云：古筆多以竹，如今木匠所用墨斗竹筆，故字從竹。按今木匠所用竹筆，長約五六寸，筆尖削成薄片，寬半寸餘，成斜刃形，以刀析其末，使刃碎能受墨，卽秦以前之筆。至所用墨斗，疑亦周舊也。

### 秦漢以獸毛爲筆

史記始皇令蒙恬與太子扶蘇築長城，恬取中山兔毫造筆。古今注：秦蒙恬以枯木爲管，鹿毛爲柱，羊毛爲被，所謂蒼毫也。按竹木能染墨而不能含墨，作字甚艱。蒙恬以鹿毛爲心，更以羊毛被於四周，束於管中。鹿毛質勁，羊毛質柔，含墨多，作字更速。後世精益求精，更益以兔毫。束以竹管，西京雜記所謂天子筆管，以錯寶爲跗，毛皆以秋兔之毫。韓愈毛穎傳所謂封於管城者是也。

### 至漢仍刀筆並用

西漢時雖以帛書，東漢雖有紙，然多用竹簡。用竹簡卽不能廢刀。漢書鄧都傳：臨江王欲得刀筆爲書謝上。原涉傳：削牘爲疏。朱博傳：與筆札使功曹自疏姦賊。功曹惶怖，大小不敢隱。博知實，勅自改而已。投刀使削所記。孔光傳：時有所言，輒削草藁，皆刀筆並用之證也。故夫蕭何世家云：以秦時刀筆之吏，汲黯傳

云。人言刀筆吏。不可爲公卿。尹齊傳云。以刀筆吏。稍遷至御史。周昌傳堯少年刀筆吏耳。當時之稱刀筆吏。似今日之稱書記生。繕寫小吏也。然就朱博傳觀之。似刀自刀。筆自筆。刀專供筆誤刊削之用。與周以前以削刻字。所謂書刀者異矣。

#### 至晉祇用筆不用刀

刀筆與竹簡。相因爲用者也。晉時紙盛行。竹簡遂廢。竹簡廢而刀亦廢。故自晉以來。遂無刀筆之語。

#### 春秋戰國時以漆爲墨

論語比考識。孔子讀易。漆書三滅。後漢杜林傳。林於西州得漆書。古文尙書一卷。又呂疆傳。至有行賂定蘭臺漆書經字。以求合其私文者。按古作字於簡。竹簡光滑。若施以今日之墨。乾卽脫落。故必以漆。管子云。有司削方墨筆。莊子云。砥筆和墨。韓詩外傳。周舍趙臣墨筆操牘。凡所謂墨。皆漆也。然不曰漆而曰墨。殆於漆之中。加以黑色。俾字易顯明也。然摩挲久則仍滅。故孔子讀易有漆書三滅之語也。

#### 至西漢始製墨成塊

西京雜記。尙書令僕丞郎。日給隄廩墨。漢官儀。尙書令僕丞郎。日給隄廩墨二枚。按地理志。隄廩縣。屬右扶風。必其地有以製墨爲專業者。所產最良。故因以爲名。然旣曰枚。則已製墨成塊。不專用漆。

#### 晉始廢漆墨用烟墨

東漢雖有紙，仍用竹簡。故漆墨仍不廢。至晉盡用紙，烟墨始行。墨經云：「晉始燒黍爲烟，和以松煤。」唐初高麗貢松烟墨，宋張遇供御墨，始用油烟入麝，謂之龍劑，以迄於今。

### 古以竹帛爲紙

墨子殺其人民，取其牛馬貨財，則書於竹帛。說文：「著之竹帛，謂之書。」漢書：「諷誦詩書百家之言，不可勝數，著於竹帛，是書字於竹帛之上也。」其以竹爲書者，小則曰簡，詩小雅：「畏此簡書。」毛傳：「簡書，戒命也。」孔疏：「古者無紙，有事書之於簡，故曰簡書。」左傳：「閔元年，請救邢以從簡書，是也。」再小則曰札，史記：「司馬相如傳：上令尙書給筆札。」注：「札，木簡之薄小者。」又與簡札名異而實同者，曰牘。曰「舉」，史記：「補傳：東方朔初入長安，至公車上書，凡用三千奏牘。」漢書：「許皇后傳：書對牘背。」又周勃傳：「乃書牘背示之曰：以公主爲證。」師古曰：「牘，木簡也。」又禮學記：「今之教者，呻其佔畢，疏佔視也。」畢，簡也。又爾雅：「釋器：簡謂之畢。」董簡札牘，畢同物而異名。而牘之小與札同，說文：「札，木牘也。」漢書：「路溫舒傳：編以爲牘。」師古曰：「小簡曰牘，是畢與簡等，牘與札等，而札牘則更小於簡畢也。」

其大者則曰方，曰策。孟子曰：「吾於武成，取二三策而已矣。」中庸曰：「文武之道，布在方策。」蔡邕獨斷云：「策者，簡也。單執一札，謂之爲簡。連編諸簡，謂之爲策。凡書字有多有少，一行可盡者，書之於簡，數行可盡者，書之於方。方所不容者，乃書於策。」又杜預左氏序：「大事書之於策，小事簡牘而已。」孔疏云：「策者，冊也。連編於」



簡爲之。按儀禮聘禮云。不及百名書於方。鄭玄云。方板也。是方廣於簡。字在簡多不能容。乃書於方板上。方復不能容。乃接書於簡。簡多按次序連編之。乃名爲策。策者一文而聯多簡之總名。非策更大於方也。漢魏時校訂古書。常有脫簡錯簡諸事。脫者於策中少一簡。錯者倒置策簡之先後也。

故夫今日可以紙爲者。古無不以竹木。一契券。

周禮質人。凡買賣者質劑焉。鄭注質劑券也。疏古未有紙。故以札書。漢書高帝紀。此兩家常折券棄負。師古曰。以簡牘爲契券。既不微索。故折毀之。是契券皆以竹木。

### 一名刺

史紀高帝紀。乃給爲謁曰。賀錢萬實不持一錢。注云。謂以札書姓名。君今通姓名。又酈食其傳。生瞋目按劍叱使者曰。走入復言沛公。吾高陽酒徒也。非儒人。使者懼而失謁。後漢郭泰傳。士爭歸之。載刺常盈車。福衡傳。乃陰懷一刺。旣而無所之適。至於刺字漫滅。凡所謂謁皆竹札也。故懼而失謁。謁可盈車。懷謁久不用。字至磨滅也。

### 一書疏須盛以囊

史記補傳。朔初入長安。至公車上書。凡用三千奏牘。公車令兩人共持舉其書。僅然能勝之。夫惟竹簡。故其重若是。而書疏則盛以囊。漢書東方朔傳。文帝集上書囊。以爲殿帷。是可證羣臣凡有書奏。皆以囊盛。

不以囊。則人見。且簡札散亂。無所收束。由是推之。凡朋友齊問往還。亦必皆以囊。故後漢廣陵思王傳。荆哭不哀。而作飛書。封以方底囊。底方則容廣也。

一書籍

莊子惠施多方。其書五車。夫惟竹簡。故著書至有五車之多。又論語比考識。孔子讀易。韋編三絕。鐵鑽三折。夫惟竹簡。故貫之以韋。讀畢一簡。以鐵鐺掀一簡也。韓非子。魏昭王讀法。十餘簡而睡矣。是亦編簡爲策之證也。

東漢時以竹簡製書之法簡長二尺四寸

後漢吳祐傳。欲殺青簡以寫經書。注殺青者。以火炙簡。使青而易書。且不蠹。又周磐傳。編二尺四寸簡。寫堯典一篇。并刀筆各一。以置棺前。又曹褒傳。撰自天子至於庶人冠婚喪祭始終制度。以爲百五十篇。寫以二尺四寸簡。是欲寫經書。先將竹簡殺青而書之。長則以二尺四寸爲度也。

若法令之書則簡長三尺

左傳定八年。鄭駟歐殺鄢析而用其竹刑。杜注析私造刑書。書於竹簡。故曰竹刑。而不言其尺寸。漢書杜周傳。君爲天下決平。不循三尺法。孟康曰。以三尺竹簡。書法律也。又朱博傳。廷尉治郡斷獄。且二十年。亦獨耳剝日久。三尺法令。人事出其中。是漢時刑書竹簡。長皆三尺。比尋常書長六寸也。

### 後漢始有紙

後漢蔡倫傳。自古書契多編以竹簡。其用縑帛者。謂之爲紙。縑貴而簡重。並不便於人。倫乃遺意用竹。屬麻頭及敝布魚網以爲紙。紙之創造始於此。然東漢至魏。仍兼用竹簡。魏張既傳。常蓄好刀筆及版奏。是其證也。

### 古貧者得書難。常寫於門牆衣服及股上

拾遺記。蘇秦張儀同志好學。遇見墳籍。行路無所題記。以墨書掌及股裏。夜還而寫之。折竹爲簡。剝樹皮編以爲書帙。又賈逵家貧。削庭中桑皮以爲牒。或題於屏屏。又任末觀書合意者。題其衣裳。門徒更以淨衣易之。河洛秘奧。非正籍所載。皆注記於柱壁及園林樹木。好學者來輒寫之。是可證古時紙固少。卽竹簡貧者亦不易辦。故任處寫書。

### 至東晉紙大行。始不用竹書而以卷計

世說。庾仲初作揚都賦成。以呈庾亮。亮大爲其名價。於是人人競寫。都下爲之紙貴。又庾子嵩讀莊子。開卷一尺許。便放下。曰。了不異人意。又世說注。褚陶曰。聖賢備在黃卷中。始不曰簡而曰卷矣。

### 唐時書籍仍爲卷。至宋裝爲冊。而仍以卷計

唐韓退之王適墓誌。得一卷書。若告身者袖之。按王適婦翁。必嫁其女於官人。適本秀才。媒妁受賄。給婦

翁謂適爲官人持一卷書作告身即詔封以爲證由是可證唐時書籍皆爲卷形史謂某人藏若干卷書者殊名與實符至宋印本書行皆裝成冊而仍以卷計則不合矣

漢人作書已用硯

自秦以前不見人用硯俗傳周武王有硯銘者僞也周初承殷皆以削刻字周末用漆書調漆時或用硯然諸子所記或曰和墨或曰墨筆而不及硯故吾謂今木匠所用墨斗爲周制至西漢製墨成塊用時須磨磨必以硯故漢書薛宣傳云下至材用筆研皆爲設方略後漢班超傳安能久事筆硯間乎似當時讀書者爲不可離之物至漢末而愈多矣

古傭書致富

拾遺記漢安帝時家貧不得仕乃挾竹簡插筆於洛陽市傭書美于形貌又多文辭來僦其書者丈夫贈其衣冠婦人遺其珠玉一日之中衣寶盈車而歸是可證漢時能書者少又士人能書恆恥而不爲故有傭書者業必發達也

古人作書不憑几

世說桓宣武北征袁虎字宏小時從被責免官會須露布文喚袁倚馬前令作手不輟筆俄得七紙又夏侯泰初嘗倚柱作書時大雨霹靂破所倚柱衣服焦然神色如故書亦如故按今人作書必憑案有能懸肘

懸腕者，則以爲能。若魏晉時尙無高几可憑，故隨地可作書，無不懸肘也。

### 古竹書易亡之故

後漢吳祐傳文侯爲南海太守，欲殺青簡以寫經書。祐曰：「此書若成，載以兼兩。」按此時所謂經，五經耳。兼兩者，數車也。祇五經卽載數車，故五胡亂起，中原文物悉成灰燼。彼夫汲冢竹書，有七十餘車，實書類亦不多也。

### 隋唐已有木板書

隨園隨筆云：按陸深河汾燕閒錄云：開皇十三年十二月八日，上勅佛經雕板行世。唐柳玟家訓序言在蜀時，嘗閱書肆見字書小學率雕本，是自隋已有木板，但祇雕佛經。至唐末漸及於字書小學，尙未有雕本經書。

### 五代始刻九經及其他經籍

齊召南歷代帝王年表云：後唐明宗長興三年，初刻九經板印賣之。至周廣順三年，九經板始成。又五代史和凝傳：文集百卷，自鏤板行世。又宋史藝文志曰：周顯德時始有經籍刻板，學者無筆寫之勞。又歐陽修有蜀刻本韓集，是可證五代時不惟刻九經，並刻其他書籍，不似唐末之祇刻小學也。

### 至宋刻板書始大備

五代時雖刻九經祇正文及注疏則畏難而不刻。隨園隨筆云宋真宗幸國子監問邢昺經板幾何昺曰十餘萬。臣少從師授經有疏者百無一二力不能傳抄。今板本大備士庶家皆有之。是刻板書至北宋已大備也。

### 書籍變遷之歷史

自曹魏以前皆用竹簡寫書。或以帛。帛貴用者少。皆簡書也。至東漢有紙。紙初發明。漢魏時蓋仍貴。其見於史者仍用簡書。不廢刀筆。至晉紙多。簡書始廢。此一變也。晉以後雖有紙。然書必手抄。南史沈麟士年過八十猶手抄細字書數十篋。梁袁峻自寫書日課五十紙。至五代時雖有刻板書。蓋甚不備。仍不免手抄。故蘇軾李氏山房藏書記言老儒先生自言少時史記漢書不可得。幸得皆手抄讀之。近年市人轉相摹刻。日傳萬紙。抄寫之勞始免。此又一變也。至清末影印行。能將巨帙縮爲小帙。攜帶尤易。此又一變也。

## 卷二十七

### 迷信禁忌

#### 古救日食狀況

夏書胤征曰：辰弗集於房，瞽奏鼓，鼗夫馳，庶人走。是自夏時逢日食，則舉國惶恐奔馳以救之也。周禮夏官大僕：凡軍旅田役贊王鼓。救日月亦如之。又地官鼓人：救日月則詔王鼓。又左傳昭十七年：日有食之，詔子曰：日有食之，天子不舉，不舉盛饌伐鼓於社，伐鼓於社陰諸侯用幣於社，伐鼓於朝，自責大史曰：三辰有災，百官降物，素服君不舉，辟移時，樂奏鼓祝，用幣，史用辭。杜預云：集，安房舍也。辰不集於房者，言不安於舍次也。蓋古人以日月食乃三辰之災，故舉國上下竭力救護。又桓十五年六月日食，文十五年四月日食，皆用幣伐鼓，與此同。此種救護禮節，至清仍存。每日食則百官素服，商民敲銅鐵器以爲救護，鏗鏘震天。又周禮女巫巫注：魯人因日食而哭。夫至於舉國皆哭，則由震恐以至於悲慘矣。然自三代至清沿之數千年，何其久哉。

#### 古忌迎太歲動作

荀子武王之伐紂也。行之以兵忌。東面而迎太歲。謂逆歲星。尸子武王伐紂。魚辛諫曰。歲在北方。不北征。武王不從。按今日建築房屋。俗避太歲所向。謂犯之則凶。古則動兵亦忌也。

周時忌子卯日

禮玉藻。子卯稷食菜羹。左傳辰在子卯。謂之疾日。君徹宴樂。學人舍業。爲疾故也。禮檀弓。晉平公謂杜蕢曰。爾飲曠何也。蕢曰。子卯不樂。注云。紂以甲子死。桀以乙卯亡。謂之疾日。又左傳昭十八年。二月乙卯。周毛得殺毛伯過而代之。萇弘曰。毛得必亡。是昆吾稔之日也。注昆吾以乙卯日與桀同誅。稔熟也。言其侈惡積熟。故誅。按此等禁忌。殊不可解。桀紂罪惡貫盈。以子卯日誅。宜也。胡爲反忌是日。學人至於舍業哉。抑以帝王死於是日。是日必大凶。然昭王南征死於江。幽王死於驪山。皆凶死。胡後人不忌其死日。吾疑其尙有說也。

古忌晦日

左傳成十六年。郤至曰。陳不遠晦。注月終陰之盡。故兵家忌之。以犯天忌。我必克之。

漢忌癸亥日

後漢鄧禹傳。明日癸亥。匡等以六甲窮日不出。禹因得更理兵勸衆。按癸爲十干末。亥居十二支末。癸亥日居六十甲子之末。故曰窮日。不出兵。



### 古忌五月五日生

史記孟嘗君傳田嬰有賤妾有子名文文以五月五日生嬰告其母勿舉其母竊生之及長其母因兄弟見其子於嬰嬰怒文頓首曰君所以不舉五月子者何故嬰曰五月子者長與戶齊不利其父母文曰人生受命於天乎受命於戶乎必受命於戶則可高其戶耳誰能至者又西京雜記王鳳以五月五日生其父欲不舉曰俗諺舉五日子長及戶則自害不則害其父母其叔父曰昔田文以此日生爲薛公以古事推之非不詳也遂舉之又世說胡廣本姓黃以五月五日生其父母置甕中流於江湖胡公取之養爲己子後登台司又宋書王鎮惡以五月五日生父母欲棄之祖猛曰昔田文以此日生爲齊相此兒必興吾宗遂舉之又孝子傳紀適以五月五日生父母棄之是此禁忌自周至六朝而未已迄唐始漸衰唐書崔信明傳以五月五日正中時生其父請太史令占之是仍有所疑也特不殺耳又癸辛雜識宋徽宗以五月五日生以俗忌改作十月十日爲天寧節是宋時尚以是爲忌也

### 漢及六朝人忌辰日哭喪

顏氏家訓陰陽說云辰爲水墓又爲土墓故不得哭王充論衡云辰日不哭哭則重喪今無教者辰日有喪不問輕重舉家清謐不敢發聲以辭弔客按此等禁忌之無理殆與五月五日生子同也

### 春秋時忌見科雉及兩頭蛇

說苑。楚莊王獵雲夢。射科雉得之。申公子倍攻而奪之。王將殺之。大夫諫曰。爭雉必有說。子姑察之。不出三日。子倍病而死。郢之戰。楚勝晉歸而賞功。申公子倍之弟請賞於王曰。臣之兄讀故記曰。射科雉者不出三月必死。臣之兄爭而得之。故夭死也。王命發府而視之。於記果有焉。遂賞之。按科雉不知爲何物。康熙字典云。科雉獸名。而不言其本。胡得之而必死哉。然古載記卽有之。怪甚矣。

新序。孫叔敖爲兒時。出遊見兩頭蛇殺而埋之。歸而泣。其母問其故。對曰。聞見蛇兩頭者死。嚮者吾見之。恐人復見之也。殺而埋之。母曰。如是存心必不死。旣而果不死。按此亦與得科雉者存心同耳。彼何以死。此何以不死。蓋事出偶然。無關休咎也。

古以女爲不祥

左傳。襄二十五年。鄭伐陳。入之陳侯奔。遇賈獲。載其母妻。下而授公車。公曰。舍爾母。辭曰。不祥。是以母爲不祥。弗與共車也。又列女傳。趙簡子伐楚。至河。津吏醉不能渡。欲殺之。津吏女娟旣說簡子而免其父。且請操櫂而渡。簡子曰。吾將行。選士大夫齋戒沐浴。義不與婦人同舟而渡也。是亦以女爲不祥。恐同舟敗事也。又漢書李陵傳。吾士氣少衰。鼓之不起者何也。軍中豈有女子乎。乃搜得盡斬之。明日斬首三千級。是軍中尤忌有婦人也。

古忌東益宅

新序哀公問孔子曰。寡人聞之東益宅不祥。有之乎。孔子曰。不祥有五。而東益不與焉。按此事淮南子亦載之。謂哀公欲西益宅。史爭之以爲不祥。哀公怒。問其傅宰折睢。蓋一事而傳聞異詞。然或曰東。或曰西。亦足證其無正理。而純爲習慣之迷信矣。

#### 周及漢皆惡梟鳴。唐以梟爲報喜。

說苑齊景公爲露寢之臺。成而不通焉。柏常騫曰。爲臺甚急。臺成君何爲不通。公曰然。梟昔者鳴。其聲無不爲。吾惡之甚。故不通焉。又漢書霍光傳。鴞數鳴殿前樹上。大怪之。按梟晝伏夜動。純爲陰物。俗謂其夜見鬼始鳴。必自三代時有是說。不然何惡之甚哉。然至唐時。又以梟爲報喜。

劇談錄韋顥舉進士。未放榜。擁爐愁歎。忽檐際有梟怪鳴。疑有殃咎。忽禁鼓一鳴。報顥及第。又隋唐嘉話。有梟鳴於張率更庭樹。其妻以爲不祥。連睡之。率更云。急洒掃。當遷官。言未畢。賀客盈門。

#### 古人迷信蛇妖。

左傳文十五年。有蛇自泉臺出。入於國。如先君之數。秋八月。聲姜薨。毀泉臺。又韓非子。涸澤蛇將徙。有小蛇謂大蛇曰。子行而我隨之。人以爲蛇之行者耳。必將殺子。不如相銜。負我以行。人以我爲神君也。乃相銜負。以越公道。人皆避之曰。神君也。按韓非子雖寓言。然當時人心理。實如是也。

#### 古以狗矢浴不祥。

韓非子燕人無惑。言惑注皆誤故浴狗矢。燕人其妻有私通於士。其夫早自外而來。士適出。夫曰何客也。其妻曰無客。問左右。左右言無有。如出一口。其妻曰公惑易也。因浴之以狗矢。又燕人李季好遠出。其妻私有通於士。季突之。士在內中。妻患之。其室婦曰。令公子裸而解髮。直出門。吾屬佯不見也。於是公子從其計。疾走出門。季曰是何人也。家人皆曰無有。季曰吾見鬼乎。婦人曰然。爲之奈何。曰取五牲之矢。浴之。按牲矢避鬼魅。古所未聞。迷信至此。祇有捧腹而已。

古以芻狗禱病

莊子天道篇。夫芻狗盛以篋衍。衍也巾以文繡。尸祝齋戒以將之。及其已陳也。行者踐其首脊。蘇者取而爇之而已。按淮南子。疾疫時行。則芻狗爲帝。是芻狗者。束草爲狗。被以文繡。供於神用以禱病。病愈多芻狗愈貴。然禱能則以車轢之。踐踏之。復爲薪矣。觀魏志周宣傳。人嘗三夢芻狗。三占皆不同。而皆應。人問其故。宣曰。芻狗者祭神之物。故始夢當得飲食。祭祀既訖。則爲車所轢。故中夢當折脚。芻狗既車轢之後。必載以爲薪。故後夢爇失火也。是芻狗之用。自周迄三國仍相同也。至唐則代以紙馬。博異記。王昌齡舟行至馬當山。禱神祈風。具酒脯紙馬。是其證。

古以桃木避不祥

左傳襄二十九年。楚人使公視榘。乃使巫以桃茢先祝殯。楚人弗禁。旣而悔之。杜注。茢。黍稷。孔疏。茢是帚。

蓋桃爲棒也。按左傳昭十二年。楚王曰。唯是桃弧棘矢。以共禦王事。杜注。桃弧棘矢。以禦不祥。又莊子。插桃枝於戶。連灰其下。童子入不畏。而鬼畏之。是鬼智不如童子也。惟鬼畏桃木。故魯人先以桃茢祛亡鬼。後楚人知其故。故悔。悔先靈被祛也。又禮記。君臨臣喪。以巫祝桃茢執戈。是魯又以楚子爲臣也。

又漢書。廣川惠王傳。今欲糜爛望卿。使不能神。取桃灰毒藥。與支體雜煮之。又王莽傳。莽感高廟神靈。遣虎賁虎士入高廟。拔劍四面提擊。斧壞門牖。桃湯赭鞭。鞭洒屋壁。是又煮桃木爲湯。以避鬼也。又宋史五行志。西川孟昶。每歲除日。命翰林爲詞。題桃符。又李時珍本草集解曰。桃味辛。氣惡。故能厭伏邪氣。今人門上用桃符辟邪。以此也。又元好問詩云。十九桃符傍門戶。是可證。刻桃爲符。至新年則懸門上。以辟邪也。又古今載記。以桃木避鬼之事。難更僕數。他迷信事。或古有今無。獨此事歷周迄今不改。胡其久如此哉。

### 周以來夢之迷信

周禮春官。占夢。中士二人。注。專占夢之吉凶。詩小雅。乃寢乃興。乃占我夢。又大人占之。衆維魚矣。又正月篇。訊之占夢。又左傳。成十年。晉侯夢大厲。又史記趙世家。趙盾在時。夢叔帶持要而哭。卜之。兆絕而後好。又簡子夢之。帝所甚樂。又史記佞倖列傳。文帝夢欲上天。不能。有一黃頭郎從後推之上天。後陰求推者。郎即見鄧通。尊幸之。是周及漢皆重視夢。而周且有掌夢專官也。至三國魏周宣。以占夢著大名。而占無

不驗事尤奇也。

### 古夢棺者必得官

世說新語人問殷中軍何以將得位而夢棺將得財而夢矢穢殷曰官本是臭腐所以將得而夢棺屍財本糞土所以將得而夢穢汗又晉書索紞傳索充初夢天上有二棺落充前紞曰棺者職也常有京師貴人舉君二官者俄而果然又因話錄李逢吉未掌綸誥前家有老婢好言夢後多有應李公久望除官因訪於婢一日婢至慘然公問故曰昨夜與郎君作夢不好意欲不說公強之曰夢有人昇棺至堂後云且置在此不久即移入堂中此夢恐非佳也公聞甚喜俄除中書舍人後知貢舉未畢而入相又雜家小說紀此等事亦甚多不勝錄也。

### 古詛祝所惡之人使神加殃

左傳隱五年鄭伯使卒百人出殯行二十五出鷄人以詛射顓考叔者注鄭前伐許顓致叔執鄭伯之旗螫弧以先登子都射之顓故鄭伯使巫祝詛之按書無逸厥口詛祝疏詛祝謂告神明令加殃咎也以言告神謂之祝請神加殃謂之詛又周禮春官詛祝掌盟詛之祝號鄭司農云詛謂祝之使沮敗也然則詛射顓致叔者即請神加以殃咎也故漢書班婕妤傳飛燕說婕妤祝詛考問辭曰若鬼神有知不受邪佞之訴若其無知訴之何益是其證也。

### 古盟誓歃血狀況

晏子春秋崔杼既殺莊公而立景公。杼與慶封相之。却諸將軍大夫及顯士庶人於太公之坎上。令無得不盟者。以甲于列。環其內外。盟者皆脫劍而入。戟拘其頸。劍承其心。令自盟曰。書詞不與崔慶而與公室者。受此不祥。言不疾。指不至血者死。以指抹血歃口所殺七人。次及晏子。奉杯血仰天歎曰。嗚呼。崔子爲無道而弑其君。不與公室而與崔慶者。受此不祥。俛而飲血。按歃者飲也。左傳僖二十五年。宵坎血加書。僞與子儀子邊盟者。注掘地爲坎。瀝牲血坎中。加盟書其上。又周禮秋官司盟。掌盟載之法。注盟者書詞於策。殺牲取血。坎其牲加書於上而埋之。謂之載書。卽左傳昭十二年所謂坎用牲加書也。茲言太公之坎上者。言於太公廟爲坎也。指不至血者。言以指抹血歃於口也。此所謂却盟。與哀十五年。太子與五人介。與緞從之。迫孔惺於廁。強盟之。十六年。太子使五人與豬從己。却公而強盟之。性質同也。夫既知爲人所不欲。而猶強使之盟。似一盟卽永不敢背者。則當時人之心。理忠厚實過後人也。

### 若天子之合盟及列國會盟則執牛耳不以綴

周禮天官玉府。若合諸侯。其其珠槃玉敦。注珠槃以盛牛耳。尸盟者執之。敦盛血。又夏官戎右。盟則贊牛耳。桃茢。疏尸盟者既以珠槃盛牛耳。更以玉敦盛耳血使歃。戎右執桃與茢。祓除不祥。此天子合諸侯之盟也。夫以天子之尊。儘可命令諸侯。使從其令。而必以盟。是盟更重於天子之命。可知也。

天子合諸侯而盟。其執牛耳者。自爲天子之屬。若諸侯與諸侯盟。則以尊者執牛耳。是以常有爭執。故哀十七年。武伯問於高柴曰。諸侯盟。誰執牛耳。又定八年。晨師將盟。衛侯於鄆澤。趙簡子曰。羣臣誰敢盟衛君者。涉佗成何曰。吾能盟之。衛人請執牛耳。成何曰。衛吾溫原也。焉得視諸侯。將歃。何捷衛侯之手。及衛侯怒。按注云。盟禮。尊者蒞牛耳。主次盟者。衛君與皆大夫盟。臣當執牛耳。晉人恃其強。背禮侮衛君也。然無論天子合諸侯。諸侯與諸侯。凡盟必歃血於口。左傳襄九年。鄭子孔曰。與大國盟。口血未乾而背之。可乎。又史記平原君傳。毛遂謂楚王左右曰。取雞狗馬之血來。遂奉銅盤跪進。楚王曰。王當歃血而定從。既畢。歃左手持盤血。右手招十九人曰。公等相與歃此血於堂下。卽盟時。尸盟者以次以手抹血於口也。

古重視卜筮

卜用龜。以火灼龜。視其兆。而定吉凶。說文兆。龜坼也。蓋以火灼龜板。上現坼文。卽以此坼文定吉凶。史記趙世家所謂兆絕而後好。文帝紀兆得大橫是也。在夏商時。卜蓋重于筮。周時卜筮並重。其卜詞有千二百之多。然左傳云。筮短龜長。似周人心理。亦以卜爲重。故凡得大龜者。謂之寶。積以玄纁。藏于太廟。論語藏文仲居蔡。山節藻梲。甚貴重也。有大事則啓之。漢以後用者少。唐咸用之。唐以後載籍則不見。蓋失傳久矣。

筮用蓍草。枚長二尺或五尺七尺。筮時用五十枚。去一四十九枚。三揲成一爻。十八揲成六爻。周易卽其



筮詞。又有連山易歸藏易。先儒謂爲夏殷易。今不傳。

### 周設卜筮專官

周禮春官大卜下大夫卜師上士二人。卜人中士八人。又筮人中士二人。夫掌卜之官。尊至大夫。其重視爲何如。是以周時凡事必卜。冠婚喪祭祭牛皆卜而後定。大事更可知。其見于儀禮春秋傳國語者。不可勝數。至戰國已少。秦漢尤少。以此見迷信心理。愈古愈甚也。

### 至戰國遂有賣卜爲業者以迄於今

莊子支離疏者。鼓筴播精。足食十人。注。鼓筴。音箴。揲蓍也。足食十人。言賣卜可養十人也。又高士傳。嚴君平垂簾賣卜成都市。日得百錢自給。卜訖則閉肆下簾。又史記日者傳。司馬季主卜於長安東市。又漢書張禹傳。禹爲兒至市。喜觀於卜相者前。久之頗曉其別蓍布卦意。是皆以卜相爲業。開肆得錢以自給。爲春秋以前所未有。又前定錄。宣平坊王生善易筮。李相國揆往問之。王生每以五百錢決一局。而來者雲集。是卜資之昂。爲唐以前所未有也。

### 古相術

春秋時以威儀音聲相人。即可決其休咎。其見於左傳者。如鬬伯比謂屈瑕舉趾高心不固。必敗。後果敗死。又晉侯見魯成公不敬。季文子曰。晉侯必不免。果陷圍卒。又晉士貞伯謂鄭伯視流而行速。必不能久。

果死。又叔向謂單子視下言徐無守氣矣。決其將死。是以威儀相也。又楚子上謂商臣鑿目而豺聲。必爲亂。魯臧文仲謂齊君語儉必死。楚子文謂越椒熊虎之狀而豺狼之聲。必滅若敖氏。叔向母聞伯石啼聲曰。是豺狼之聲也。必喪羊舌氏。後皆驗。是以聲音相也。而皆惡徵而善徵先見者。如文元年王使叔服來會葬。公孫敖聞其能相人也。見其二子曰。穀也豐下。必有後於魯國。後果驗。又韓詩外傳。衛姑布子卿善相。迫孔子而視之五十步。從而望之五十步。謂子貢曰。得堯之顙。舜之目。禹之頸。皋陶之喙。必聖人也。從前視之。盎盎乎似有土。從後視之。高肩弱脊。此惟不及四聖也。此又以行步時左右前後氣象相也。

至戰國秦漢相術能以紋理知休咎

春秋時之相。皆按理而決。至戰國則益進。戰國之時。最著者爲梁唐舉。荀子相人古有姑布子卿。注相趙襄子孔子。今之世梁唐舉。注相李兌蔡澤。觀人形狀顏色。知其吉凶妖祥。此仍有理可憑也。至韓非子云。今戰勝攻取之士不賞。而卜筮視手理者日賜。又周勃傳有縱理入口。法當餓死。後亞夫竟餓死。夫祇以文理相。則古所無也。又後漢班超傳。祭酒虎頭燕頤有飛而食肉相。常封侯萬里外。後果然。是其術較春秋益進矣。他若竇廣國衛青等。相者皆預知其封侯。而史失其詞。凡此皆不錄。錄其有相法者數則。以見其變遷。自此以後。以相人爲業者益多。與垂簾賣卜等。故不備錄。

古有巫官

周禮春官司巫中士二人。府一人。史一人。男巫無數。女巫無數。注。巫能制神之處。位次主者。疏。巫與神通。掌三辰之位次。又凡以神仕者無數。以其藝爲之貴賤之等。按國語云。古者民之精爽不攜貳者。而又能齊肅中正。則神明降之。在男曰覲。在女曰巫。聖人用之。使制神之處。位次主。是巫之來已久。其可考見者。世本云。巫咸始作巫。是自殷已有也。

### 古巫有事時之盛況

周禮春官司巫。掌羣巫之政令。若國大旱。則帥巫而舞雩。注。雩旱祭也。魯僖公欲焚巫尪。以其舞雩不得雨。疏。引春秋緯云。雩者呼嗟求雨之祭。按左傳僖二十一年。夏大旱。公欲焚巫尪。又檀弓云。魯穆公曰。吾欲焚尪而奚若。又云。吾欲暴巫而奚若。鄭注云。尪者面向天。冀天哀而雨之。又女巫云。旱暵則舞雩。凡邦之大。裁歌哭而請。注。崇陰也。又按論語云。風乎舞雩。是舞雩在郊外。值天旱。男巫則呼嗟向天。女巫則舞蹈。歌哭。觀天哀而有雨。苟天不雨。則或置巫日中而暴之。甚或並巫尪而焚之。若天之不雨。其咎端在巫者。在後世人君。值天不雨。或下詔罪己。意尙不失爲正大。古則歸咎於巫。其心理甚不可解。然當天旱。男女巫舞雩於郊外。歌哭舞蹈。其盛況爲後世所未有矣。

### 古巫能下神視神鬼

周禮司巫。凡喪事。掌巫降之禮。鄭注。降下也。巫下神之禮。今世或死既斂。就巫下禡。晉儀其遺禮。疏。禡當

家之鬼。蓋旣斂使巫降死者之神也。是下神之事。自周至東漢未革。又左傳成十年。晉侯夢大厲。壞大門及寢門而入。公覺召桑田巫。巫言如夢。又曰。不食新矣。後竟如言。又莊子。小巫見大巫。拔茅而棄。又吳志。張紘傳陳琳曰。足下與子布在彼。所謂小巫見大巫。神氣盡矣。又西陽雜俎。明皇東封歸至華山。見金天王道旁迎駕。明皇令巫視之。所言衣服處所皆同。又宣室志。韋皋爲西川節度使。張延賞壻。未達時。依延賞。頗遭白眼。有巫謂張夫人曰。韋郎有神護之。祿位過令公。是古巫能視神鬼。又古籍記載類此者甚多。未必盡妄。疑古巫實有一種學理相傳授。故周爲設專官。後代失其傳授。而山野鄉僻之巫。遂羣起爲騙矣。見今尤多。故不再述。

唐宰相堂飯常人食之卽死

中朝故事。宰相堂飯。常人多不敢食。鄭延昌在相位。一日其弟延濟來。值食次。遂同食。其弟一夕而卒。

以紙錢爲冥資之歷史

唐陳鴻陸仁蒨傳。仁蒨卽鄆人。大業初。江陵岑之象爲卽鄆令。延仁蒨教其子文本。仁蒨夙與冥官成景善。成景朝太山府君。過卽鄆。仁蒨令文本爲具食。並贈以金帛。仁本問是何等物。仁蒨曰。鬼與人異。異不如假。可以黃色塗大錫作金。以紙爲絹帛。云云。可證隋末尙無以紙爲冥資之事故。仁蒨教之。至唐則漸多。據言王勃在馬當山遇老人曰。吾有債十萬。可爲吾償之。後勃買冥資十萬焚之。段成式支諾皋云。乃

貨衣具鑿楮如期焚之。又具酒脯紙錢乘昏焚于道。又再生記。王掄妻夢掄已死。求錢三十貫。卽取紙剪爲錢。召巫者焚之。又五代史寒食野祭焚紙錢。宋史外戚傳李用和少窮困。居京師鑿紙錢爲業。按懸紙錢者卽諸泉記所謂鑿楮。蓋以圓鐵管中含鐵柱。打疊紙上卽成錢形。今猶用此法。但皆雜貨店爲之。無專以此爲業者。而宋時有之。想見古人之焚化多於今日也。

### 墓俑之歷史

孔子曰。始作俑者。其無後乎。以其象人而用之也。是自周時以木刻人殉葬。至晉六朝隋唐。則以泥塑人馬及各項什物殉葬。以便死者。今發掘者是也。至明清盡易以紙。所糊人馬什物大小與真者無異。視古之泥塑物。小不盈尺者異矣。此外又糊院宇居室。重樓傑閣焚之。則古所無也。



## 卷二十八

行唐尙秉和著

### 廁溷便旋

古廁溷制度 周制與泮茅廁同

周禮天官宮人掌王六寢之修爲其井溷除其不蠲去其惡臭鄭玄云井漏井所以受水潦蠲猶絜也詩云吉蠲爲饌鄭司農云溷路廁也玄謂溷豬謂雷下之池受著水而流之者疏云謂於宮中爲漏井以受穢又爲溷豬使四面流水入焉井溷二者皆所以除其不蠲潔又去臭惡之物按此等排穢之法頗與今日之泮茅廁相類漏井者卽上面受穢之管也水潦者洩溺也言爲井以受洩溺之穢而漏之於下也豬同豬者著水鄭謂溷豬爲雷下之池者卽上漏井之穢落於池中也受著水而流之者卽便旋已放著水盪穢使流出也其用意純與今之泮茅廁相同

周路上有官廁

周禮宮人爲其井溷鄭司農云溷路廁也後鄭雖不從其詁然可證古時路上皆有官廁與今正同

周廁有池坎

左傳成十年晉侯將食張如廁陷而卒。按此文杜注不詳釋。張者腹漲。故如廁道。據周禮井陘注。廁上有井下有蓄池。是凡廁皆下有極深之坑坎也。晉侯病甚。蓋跌於坎陷之中而卒也。又說文。穢。穢。賈逵注。周官械虎子也。廁行清。穢則行清內之空中者也。即廁內下掘之坎也。故晉侯陷其中而卒。金樓子云。漢燕王旦將敗。廁中豕羣出。夫廁內有豕。必爲深坑。豕不得出。豕出所以記異也。

又按今山西各處之廁。皆下掘坎深約六七尺。廣如之。而橫兩板於坎上。履之以洩溺。板即史記萬石君傳所謂廁輪也。下望黝然。深可沒頂。疑晉時遺制。故晉侯陷其中可致死。因誤倒入坎內。頭必向下也。

古不共廁

隨園隨筆云。士喪禮。隸人溷廁。注。古人不共廁。溷者填之也。是亦廁爲土坑之證也。

古廁有垣牆爲蔽又有馬桶

史記萬石君傳。建爲郎中令。洗沐歸謁親。入子舍。竊問侍者。取親中裙廁輪。身自洗濯。注。徐廣曰。輪。築垣短板。音住。謂廁穢垣牆隱於其側。據此是廁必有垣牆以爲隱蔽也。但自身自洗濯觀之。輪若爲垣牆。於洗濯之義甚不合。原說文廣韻玉篇等字書。皆訓輪爲築牆短版。版橫坎上。履以洩溺。易滂汙。故洗濯之。似非垣牆也。

徐廣又云。一讀輪爲資。言自洗滌廁資。廁資洩除穢惡之穴也。呂靜曰。穢。穢。穢器也。音咸豆。又孟康曰。廁



行清，竅行中受糞者也。東南人謂鑿木空中如曹，謂之廁。據此是廁者於地掘坎，小便於其中。踰者，卽今之馬桶。故石建爲糞洗濯。

由以上二說，廁踰雖未得確話，然由漢魏晉宋人注，可證明古廁有垣牆爲隱蔽。又以證漢魏時鑿木空中如曹，卽今馬桶，不過古時工拙不能如今製法，須鑿木爲之耳。

蓋廁者乃便旋之定所，故所在有之。左傳哀十五年，迫孔悝於廁，強盟之。又史記項羽本紀，沛公起如廁，高后紀，乃斷戚夫人手足，居之廁中。又逐產殺之，卽中府吏廁中，是廁必有垣牆或屏，備遺時人不見，故曰廁中也。以上廁

### 古便器狀況

周禮天官玉府，掌王之衣服衽席牀第及褻器。又內監執褻器以從。鄭注：褻器，清器，虎子之屬。按說文，械，褻器也。賈逵解周官，械，虎子也。古之受大小溲者，皆以虎子呼之。又按韓非子，趙襄子漆智伯頭爲溲杯，溲杯亦虎子也。且由說文觀之，凡今日之馬桶，小便壺，皆名虎子。後人但以小便器爲虎子者，誤也。以上便器

古謂小便器爲清。史記萬石君傳注：廁行清，竅行中受糞者也。又周禮內監執褻器以從。鄭注：褻器，清器。清者，小便。專方：廁內行之。史記范雎爲魏齊笞擊，雎佯死，卽卷以簀置廁中，賓客飲者醉，更溺雎，是其證。

久之遂謂小便器爲清。漢應劭風俗通云：扶風咸仲英家多怪，有孫女三四歲亡，求之不能得，二三日乃於清中溺內啼。又梁柳惲擣衣詩：踟躕理金翠，容與納宵清。宵清者洩器，言擣衣罷將睡，置清備遺也。

古遺時先以棗塞鼻

世說王敦初尙主如廁，見漆箱盛乾棗，本以塞鼻，王謂廁上亦下果食，遂至盡。按棗能禦臭，乾烈尤佳，故用以塞鼻。

古大遺時先脫衣至宋猶如此

世說石崇廁常有十餘婢侍列，皆麗服藻飾，置甲煎粉沈香汁之屬，無不畢備。又與新衣著令出，客多羞不能如廁。王大將軍往，脫故衣著新衣，神色傲然。按是必因遺時脫故衣，遺罷謂故衣著臭，不堪用，俾著新衣出，以示其富。非入廁必易新衣，方令遺也。又玉泉子：楊希古性潔淨，內逼如廁，必撤衣無所有，然後高履以往。又五燈會元：湛堂傳，師半夜特往登溷，方脫衣，悟卽提淨桶至，師曰：待我脫衣脫罷，悟復到。按湛堂北宋時人，是可證自晉至唐宋凡大洩皆脫衣也。蓋古人衣服寬博，不脫長衣，則大洩不能辦，亦猶清時服大禮服之難以大遺也。

更衣說

由世說及五燈會元攷之，古人大遺時必脫衣，因是而思及古所謂更衣，更衣之名始見於史記。衛皇后

傳云。武帝還過平陽主。飲酣起更衣。而注不釋其義。漢書灌夫傳。坐乃起更衣稍稍去。師古云。坐謂坐上之人也。更改也。凡久坐者皆起更衣。以其寒煖變更也。又東方朔傳。後迺私置更衣。師古云。爲休息易衣之處。又楊敞傳。大將軍光欲廢立。議既定。使大司農田延年報敞。敞唯唯而已。延年起至更衣。師古曰。古人延客。必有更衣之處。據師古所釋。更衣之義。祇爲坐久寒煖變更。然田延年詣楊敞。並非宴飲久坐。而亦至更衣。吾深疑更衣者。乃備客便旋之私處。不必如師古所言。祇爲寒煖更衣而設。如純爲更衣。他侍御尙可隨侍。惟其爲使旋。故雖以武帝天子之尊。起更衣。祇子夫侍。他侍御無入者。卽其證也。此有一確證。論衡四諱篇云。夫更衣之室。可謂臭矣。臭則爲廁無疑也。又田延年至楊敞家起至更衣。亦便旋也。因便旋時須脫衣。久之遂名其處爲更衣。必如師古所詰。似太拘也。

### 自六朝至宋大遺後以簪子拭穢並以水滌淨

大遺後以何物拭穢。古載記甚不詳。晉裴啓語林云。劉寔詣石崇如廁。見兩婢持錦囊。寔遽退笑謂崇曰。乃誤入卿室。崇曰。廁耳寔更往。向乃守廁婢所進囊是簪。北齊書。文宣帝令楊愔進廁簪。以簪拭穢。始見於此。又五燈會元。廣教院歸省禪師。僧問。如何是清淨法身。師曰。廁坑頭簪子。按簪者木枚也。古蓋紙貴。或無粗紙。故以木枚撥落餘穢。又洪堂傳。師半夜特往登溷。方脫衣。悟卽提淨桶至。師曰。待我脫衣。脫罷。悟復至。未幾悟供簪子。師滌淨已。召接淨桶去。是可證自六朝迄宋。大遺訖先用簪子拭穢。再以淨水洗。

滌脫衣著衣甚繁難也。

至元始以紙拭穢

元史后妃傳裕宗徽仁皇后事太后孝至溷廁所用紙亦以面擦令軟以進以紙拭穢始見於此若以前雖貴人亦用籌也今鄉里之民仍有用籌者餘則用紙者多

古不廁遺則有罰

左傳襄十年師慧過宋朝將私焉注小相者曰朝也慧曰無人焉又定二年邾莊公與夷射姑飲酒射姑私出闇乞肉焉奪之杖以敲之二月邾子在門臺臨廷闇以瓶水沃廷邾子望見之怒闇曰夷射姑旋小便焉命執之又世說新語謝萬在兄前欲索便器阮思曠叱其無禮是可證便旋必於廁且須無人古今一也

漢魏時侍中爲皇帝執虎子

西京雜記漢朝以玉爲虎子以爲便器使侍中執之行幸以從是以魏志蘇則傳注舊儀侍中親省起居故俗謂之執虎子則爲侍中同郡吉茂謂則曰仕進不止執虎子夫所謂舊儀者即漢官儀也

## 卷二十九

行唐尙秉和著

### 古取火法

古取火之法有三。一用木燧。二用金燧。三用石敲火。至清同治年尙如此。後秦西火柴入中國。敲火之法始廢。

### 鑽木取火法

自燧人氏見大鳥啄木出火。知木中藏火。因創鑽木取火之法。見卷一後世因之。數千年不改。禮內則。石佩木燧。注木燧鑽火也。左傳文十年。命夙駕載燧。又定二年。王使執燧象奔吳師。史記孫子傳。廬涓夜至斫木下見白書。乃鑽火燭之。是至周時鑽火之法仍大行。

然所鑽之木。須隨時改易。是以論語云。鑽燧改火。改火者據馬融注。周書月令有更火之文。春取榆柳之火。夏取棗杏之火。季夏取桑柘之火。秋取柞櫟之火。冬取槐檀之火。一年之中。鑽火各異木。故曰。改火。至必改之。故邢疏謂取木之色。與四時相配。而不言不改。不能得火。又周禮司烜掌行火之政令。四時變國火以救時疾。變亦改也。既曰救時疾。似別有意義。非不改不能得火也。又北史王劭傳。劭以上古有鑽燧改火之義。近代廢絕。上表請改火。是可證當時鑽火已不改木。又唐杜甫清明詩云。旅雁上雲歸紫塞。家

人鑽火用青楓。是楓木春日亦出火。又崔元翰時操舟衆工立湄岸濕櫓鑽火磨星紅。是凡木皆可出火。又以證鑽火之法。至唐仍不廢也。

鑽燧取火之巧法

淮南子。若以燧取火。疏之則弗得。遲也數之則弗中。疾也正在疏數之間。注得其節。火乃生。按今日春時。匠人鑽木。急遽則出火。茲云弗中。似古人以燧取火之法。今已不知。

至周時兼用金燧取火

周禮秋官司烜掌以夫燧取明火於日。注夫燧陽燧也。疏取火於日。故名陽燧。猶取火於木爲木燧也。又攷工記。轉人金錫半謂之鑿燧之齊。注鑿燧取水火於日月之器也。

按鑿燧卽夫燧。亦曰金燧。禮內則云。左佩金燧。注取火於日也。卽以金錫爲鏡。凹其面向日取火。故曰鑿燧。

漢末仍用金燧取火

魏志管輅傳注。君不見陰陽燧。在掌握之中。形不出手。乃上引太陽之火。下引太陰之水。嚙吸之間。烟景以集。苟精氣相感。縣象應乎二燧。

案陽燧卽周禮所謂夫燧鑿燧。內則所謂金燧也。陰燧卽秋官司烜所謂以鑿取明水於月也。明水祭祀

用之。非備人飲食。故下略焉。又案燧在掌握。其物甚小。故佩於腰以備用。而引火之法。各書不詳。今竟失傳。甚可惜也。

### 金燧取火之詳情

夢溪筆談云。陽燧面窪。向日照之。光皆聚向內。離鏡一二寸。光聚爲一點。大如麻菽。著物則火發。夢溪筆談爲宋沈存中著。是至宋仍有以陽燧取火者。惟天陰或夜則不能用。內則云。左佩金燧。右佩木燧。蓋有日時。以金燧取火甚易。無日則以木燧也。

按今日以凸面玻璃鏡。向日照之。則光聚如豆。以易然物置其下。頃刻即得火。古無玻璃用金鏡。蓋亦以易然物當焦點。而得火也。

### 魏晉後敲石取火

潘岳詩。煩如敲石火。劉勰新論。人之短生。猶如石火。是可證魏晉六朝。已以石敲火。至唐時敲石取火者尤衆。柳宗元詩。夜發敲石火。山林如晝明。白居易詩。深爐敲火煮新茶。韓昌黎詩。牧童敲火牛羸角。是其證也。

### 以石敲火之法

法以鐵片與石相撞。下藉以火絨。俾火星落於絨上。再以取燈北方土名即發燭接引之。即發燄。火絨者以艾或紙。

加以硝水揉之使軟。取燈者北方以褪皮麻楷破之。斷爲枚。長五六寸。塗硫磺於首。遇火卽然。當光緒初。火柴未盛行。取火之具有火鑪。縫皮爲包。安鐵爲刃。內裝火石一片。火絨一團。欲用火取火絨。豆許。放石上以刃撞之。頃刻卽得火。爲吸旱烟者不可離之物。後火柴大行。火鑪火石火絨等物遂漸廢。

### 發燭之歷史

北方以麻梗頭塗硫磺。用以發火。名曰取燈。南方則以松木或杉木。清高士奇天祿識餘云。杭人削松木爲小片。其薄如紙。鎔硫磺塗木片頭。分許。名曰發燭。史稱周建德六年。齊后妃貧者。以發燭爲業。案發燭卽今之取燈。是自六朝時已有。又宋陶穀清異錄云。夜有急苦作燈之緩。有知者。披杉條。染硫磺。置之待用。一與火遇。得燄熾然。旣神之呼。引光奴。今遂有貨者。易名火寸。按引光奴卽齊之發燭。然宋時實亦名發燭。嬾真子云。司馬溫公鄉居。看書至夜分。乃自罨火滅燭而睡。至五更初。公卽自起。發燭點燈著述。是其證。惟北方之發燭。用麻梗或用杉木。則不可知。蓋自以石敲火之法興。發燭爲引火所必須。故古今重之。

### 古鑽燧時代家家皆藏火種

古因得火之難。家家藏火種。備用。孟子踵門求水火無弗與者。又韓詩外傳。客謂蒯通曰。臣里婦見疑盜肉。其姑去之。恨而告於里母。里母曰。安行。今令姑呼汝。卽東蘊請火去婦之家曰。吾犬爭肉相殺。請火治



之。又于寶搜神記。桂陽太守李叔堅家犬有人行。又於竈前畜火。叔堅云。兒婢皆在田中。狗助畜火。可不煩鄰里。此何足怪。據是則家家藏火種備用。不必以燧也。

### 古汲水用瓶公共置之瓶常在井旁供衆用至唐有木桶

周易井卦。羸其瓶凶。左傳襄十七年。衛孫蒯田於曹隧。飲馬于重丘。毀其瓶。重丘人閉門而詬之。又揚子雲酒箴。子猶瓶矣。居井之湄。是可證瓶爲公共物。常置井側供衆用也。故孫蒯毀其瓶。重丘人皆詬之。又後漢鮑少君傳。拜舅姑禮畢。提甕出汲。又世說。魏文帝以毒置棗蒂中。令任城王食之。既中毒。太后索水救之。帝預勅左右毀瓶罐。太后徒跳趨井。無以汲。須臾遂卒。是可證自周迄漢魏。皆以陶器汲。尙無木桶也。陶器易毀。故揚子雲酒箴云。子猶瓶矣。居井之湄。一旦東<sub>同事</sub>礙。爲甕所輻。身提黃泉。骨肉爲泥。是其證。至唐有木桶。段成式劍俠傳。見老人方簍桶。乃出桶板一片。以桶汲。雖輻而不碎。較古便多矣。

### 古村聚會汲狀況

高士傳。管寧所居屯落。會井汲者。或男女雜錯。或爭井鬪鬪。寧患之。乃多買器。分置井傍。汲以待之。又不使知。來者得而怪之。問知寧所爲。乃各自責。不復鬪鬪。按今日村落。仍多會井汲。晨暮炊前。汲者最多。惟用木桶汲。甚速。古用瓶。懼毀汲甚緩。緩則易爭也。

### 古桔槔汲水狀況

莊子。子獨不見桔槔者乎。引之則俯。舍之則仰。又天地篇。子貢南遊楚。見漢陰丈人。抱甕而汲。子貢曰。有械於此。一日浸百畦。用力寡而見功多。夫子不欲乎。曰。若何。曰。鑿木爲機。後重前輕。挈水若抽。數加汰湯。其名曰槔。又說苑。衛有五丈夫。俱負缶而入井灌韭。終日一區。鄧析適下車。爲教之曰。爲機重其後。輕其前。命曰矯。終日灌韭百區。不倦。

按桔槔今日尙有。然井略深不能用也。用於河邊。或有泉之池邊最宜。若井則須極淺也。惟古祇灌園用之。今則尋常汲亦用之。

### 宋時之水車

蘇東坡詠無錫道中水車云。翻翻聯聯銜尾鴉。曄曄硃硃蛻骨蛇。按此卽今日之水車也。銜聯不斷。周而復始。有若蛇之蛻殼。讀此詩。知今制與宋制無異。今北方以順德真定定州保定各屬爲最多。天旱時遍野皆是。

### 民取材木及然料狀況

周以前凡山林藪澤。皆爲官有。山中林木許民斬伐。然必以時。至時民入山斬材。而出入有期限。恐其盡物。若非時斬材。則曰竊。故材木常足。而山不童。終春秋世。無買賣木材者。戰國以後。此制遂壞。至漢有雇山之刑。似材木伐取已無制限。自是北方之山。先童材木漸感不足。且水泉因以枯竭。雨暘亦不時。至今

日。遂。受。其。大。病。自。大。河。南。北。太。行。東。西。縱。橫。數。千。里。之。山。岡。盡。屬。不。毛。殊。爲。可。惜。而。自。周。以。後。三。千。年。來。凡。爲。國。家。者。無。人。慮。及。其。如。之。何。哉。

周禮地官山虞掌山林之政令。令萬民時斬材。有期日。凡竊木者有刑罰。按孟子曰。斧斤以時入山林。不。時。則。爲。竊。故。刑。罰。之。然。至。期。入。山。亦。非。漫。無。限。制。也。林衡云。若斬木材則受法於山虞。受法者必核其爲。何。事。斬。材。材。之。大。小。多。少。及。出。入。期。限。之。細。則。也。禮。王。制。云。草。木。零。落。然。後。入。山。林。注。十。月。之。中。也。卽。山。虞。所。謂。仲。冬。斬。陽。木。也。然。山。虞。尙。有。仲。夏。斬。陰。木。之。文。疑。仲。夏。民。無。暇。必。官。用。也。

### 守護山林之法

林衡云。掌巡林麓之禁令。而平其守。注。平。守。者。平。其。地。之。民。守。林。麓。之。部。分。按。林。麓。廣。大。祇。官。吏。守。望。萬。不。敷。用。竊。仍。不。免。乃。卽。以。林。麓。附。近。之。居。民。負。守。護。林。麓。之。責。平。均。其。地。與。民。區。分。部。守。而。巡。查。督。責。者。林。衡。也。力。省。而。功。多。矣。

### 古今然料之概況

時。愈。古。然。料。愈。多。隨。在。取。足。一。因。人。少。一。因。山。林。爲。官。有。不。許。私。入。山。取。材。木。故。植。物。蕃。衍。不。竭。其。源。三。代。以。後。山。林。之。法。不。講。民。任。意。入。山。取。材。十。山。九。童。人。口。蕃。殖。亦。益。多。用。愈。廣。故。古。之。所。棄。者。今。視。爲。珍。今。之。所。珍。者。古。皆。輕。視。也。

春秋時然料足常燒澤以裕租稅

管子齊之北澤燒光照堂上管子入賀曰國不能無薪而炊北澤燒農夫賣其薪一束十倍此租稅所以九月而具也按古之都市亦買薪而炊北澤爲官有都市之薪所自出燒之則都市富人皆買於農夫故其價十倍而租稅速具也

又常燒澤獵獸

韓非子魯人燒積澤天北風火南倚恐燒國哀公懼自將衆救火左右盡逐獸而火不救按此專爲獵獸而燒也不燒則蒲葦蒹葭爲麋鹿狐兔所宅不易得此以今日視之所得殊不償失而古不爾者以然料多無所用也

周已有木炭蓋皆富貴人用之

周禮天官宮人執燭供爐炭地官有掌炭官又禮記月令季秋之月草木黃落乃伐薪爲炭左傳邾子廢於爐炭爛遂卒又寺人柳熾炭於位按以炭取煖或炊飯簡潔而無烟勝於薪矣然見於傳記者皆富貴家用之蓋其值昂也

作炭須在山中

史記外戚傳竇廣國入山作炭晉時阮籍傳孫登常經宜陽山作炭人見之魏書刑罰志富民入山作炭

唐集異記王用入山作炭按作炭之法伐薪燒之燒透以土埋其燼而山者薪之所自出故恆入山

#### 六朝已發見石炭至隋漸有用者

水經注鄴縣冰井臺井深十五丈藏冰及石墨石墨可書又然之難盡亦謂之石炭至隋王劼上表請變火曰今溫酒及炙肉用石炭柴火竹火味各不同是至隋已有用石炭者然唐段成式酉陽雜俎記無勞縣石墨爨之彌年不銷以爲物異以是證唐燒石炭者仍少也

#### 至宋燒石炭者漸多

老學庵筆記北方多石炭南方多木炭而西蜀又多竹炭東坡志林言彭城東有石炭然宋時雖有燒石炭者並不重之蓋其時然料尙易於今日也

#### 晉唐以來貴人用木炭之侈

以草木作然料烟煤塵汙而炊飯烹茶味又不美於是古貴人皆用木炭晉書羊琇傳性豪侈屑炭作獸形以溫酒洛下豪貴競慕效之唐書德宗紀罷九成宮貢立獸炭又有鳳炭開天遺事楊國忠屑炭塑作鳳形又有煉炭劇談錄洛中豪貴子弟常饌必以炭炊往往仍不愜意僧聖剛者見而問之曰凡炭必先燒令熟乃可入爨謂之煉炭不然有烟氣至宋又有琴炭老學庵筆記承平時炭皆斲作琴形至於今山木皆盡木炭之產漸少強以樗材爲之求如昔年之炭身披白灰擲地作銅聲者幾絕迹矣

至清末石炭爲民生不可離之物

自唐以來，郡邑燒木炭，明清以來，木炭漸乏，稍稍用石炭，初只郡邑富人及食肆用之，農人仍然柴草，無用石炭者。至清末民生愈蕃，木植愈少，祇禾麻草柴，不敷炊爨，於是農家亦用石炭，雖貧民亦不能離，然石炭之礦，有時而盡，更數百年，必仍變易，論者懸想，謂必代以電氣，不知果如何也。

# 卷三十

行唐尙秉和著

古官吏休沐

今日放假

受杖

佩印

多訟

漢官吏五日一休沐

史記萬石君傳。每五日洗沐歸謁親。文選曰。郎官五日下午。又鄭當時傳。孝景時爲太子舍人。每五日洗沐。嘗置驛馬長安諸郊。存諸故人。請謝賓客。又日者傳。宋忠爲大夫。賈誼爲博士。同日俱出洗沐。正義云。漢官儀五日一假洗沐也。

按官吏洗沐。在周秦時不見。然漢制多沿秦。疑秦時卽有。載籍失之耳。洗沐亦名休沐。借洗沐之名。出署休息一日。蓋古官吏與後世異。旣入署。則日夜寢食於其中。至五日洗沐。然後得出。凡請賓訪友遊戲諸事。皆於是日行之。非若後世官吏散值卽歸私邸也。

病則以沐償郎官富者可買沐

漢書楊惲傳。郎官故事。令郎出錢市財用。給文書。迺得出。名曰山郎。移文移卽文書病盡一日。輒償一沐。或至歲餘不得沐。其豪富郎。日出遊戲。惲爲中郎將。罷山郎。師古曰。貧者實病。皆以休假償之也。按豪富郎日

出遊戲者出錢市沐。故可常不在署。其貧者病一日則償一沐。故終歲不得休。漢承秦制。輒不如秦。秦不開賣官。漢則入貲爲郎。而賣官矣。秦革封建制度。官吏或有休沐。然必不賣沐。漢則竟可以財市矣。此真古今之創聞。故太史公六國表敘云。學者見秦在帝位日淺。不察其終始。因舉而笑之。不敢道。此與以耳食無異。悲夫。太史公蓋深憤漢盡用秦法。且事事不如秦。而反詬秦也。今觀賣沐事。亦其一端已。

然宰相亦休沐

史記張蒼傳。王陵常救蒼不死。及貴。常父事王陵。陵死後。蒼爲丞相。洗沐。常先朝陵夫人。上食。然後敢歸家。又漢書張安世傳。休沐未嘗出。上官皇后傳。光霍光常休沐得出。桀常代光入決事。又孔光傳。沐日歸休。兄弟妻子燕語。又唐李德裕傳。因兵事。竟不得休沐。是自漢迄唐。凡宰相亦休沐。與郎吏同也。

宦官武士郡吏亦休沐

後漢蔡倫傳。每至休沐。輒閉門絕賓。魏志許褚傳。從士須他謀爲逆。憚褚不敢發。伺褚休下日。懷刃入。是宦豎及武士。皆有休沐也。又華歆傳。少爲郡吏。高唐爲齊名都。衣冠無不游行市里。歆爲吏。休沐出府。則歸家闔門。又梁習傳。注。劉類爲弘農太守。吏二百餘人。不與休假。是外吏。漢魏時亦例有休沐也。

自六朝至唐宋官吏皆有休沐

宋鮑照詩。三朝國慶畢。休沐還舊京。又梁劉孝綽有歸沐詩。贈任昉。是六朝時官吏仍休沐。惟隔幾日方



沐不詳。至唐劉禹錫詩云：五日思歸沐。三春羨衆還。又孟浩然詩：共乘休沐暇。同醉菊花杯。是唐時官吏仍五日休沐。與漢同。想六朝亦爾也。至宋明清。此制寢微。蘇軾詩云：天風淅淅吹玉沙。詔恩歸沐休早衙。是龍興節休沐。非五日休沐也。

#### 漢冬夏至放假

薛宣傳及日至休吏。賊曹掾張扶獨不休。坐曹治事。宣出教曰：日至吏以令休。所由來久。曹雖有公職事。家亦望私恩。意掾宜從衆歸。對妻子設酒殺請鄰里。一笑爲樂。師古曰：日至冬至夏至也。

#### 宋節假多至七日

漢時節假。觀薛宣傳只一日耳。至宋則多少不等。文昌雜錄云：祠部休假。元日寒食冬至各七日。上元夏至中元臘各三日。餘立春清明等節各一日。歲共七十六日。

閱明清載記及所目觀。官吏以端陽中秋二節爲例假。又至十二月二十日封印。正月二十日開印。此一月中皆休沐之期也。然宰相仍每日視朝召對。清多沿明制。蓋官吏每日入衙。每日歸邸。與漢時官吏常駐署中者異矣。

#### 魏郎官受杖須脫袴纏幘束縛

三國志注：黃初中韓宣爲尙書郎。常以職事當受罰於殿前。已束縛杖未行。文帝輦過。問此爲誰。特原之。

遽解其縛。時天大寒。宜前以當受杖。豫脫袴纏。面縛。及其原。幘腰不下。乃趨而去。按尚書郎爲清貴之官。乃在殿廷受罰。至脫袴露體。束縛手足。同於罪犯。受罰至此。亦云辱矣。然並未褫職。偶有過。以此罰之耳。古云。士可殺不可辱。茲所謂辱耶。非耶。然當時官吏亦安之者。似相沿已久。不足異也。

晉官吏受杖不脫袴

晉書王濛傳。濛補長山令。復爲司徒左西屬。濛以此職有譴。則應受杖。固辭。詔爲停罰。又世說桓公在荊州。欲以德被江漢。恥以威刑肅物。令史受杖。正從朱衣上過。桓式年少從外來。云向從閣下過。見令史受杖。上捎雲根。下拂地足。意譏其不著。公云。我猶患其重。夫曰杖從衣上過。是隔衣受杖。必不脫袴也。然必受縛。世說桓南郡好獵。麋兔偶騰逸。參佐無不被繫束。桓道恭時爲賊曹參軍。常自帶綿繩著腰中。玄問此何爲。曰。公獵好縛人士。會當被縛。手不能堪。芒也。是雖不脫袴露臀。而束縛仍不免也。又漢晉春秋云。向雄爲河內主簿。送犢牛。道喝死。太守吳奮召雄與杖。雄不受杖。曰。郡牛亦死。是理直。亦可不受杖也。

北齊時仍杖參佐

北齊書吳遵世爲大將軍墨曹參軍。從遊東山。有雲起。恐遇雨。使遵世與李業興筮之。曰。著賞絹十。不著罰杖十。遵世筮無雨。業興筮有雨。須臾雲散。二人各受賞罰。是雖戲亦杖也。

唐宋參軍簿尉判官仍受杖

杜甫送高三十五書記詩云。脫身簿尉閒。始與捶楚辭。宋蔡夢弼注云。適曾爲封丘尉。不得志。以謂唐時參軍簿尉受杖責也。又韓愈贈張功曹詩。判司卑官不堪說。未免捶楚塵埃間。是判官亦受杖也。又杜牧寄姪阿宜詩。一語不中治。鞭笞身滿瘡。是杖刑復兼鞭刑也。

曲渚紀聞。富丞相判汝州。黃山谷爲汝州葉縣尉。到官逾期。杖之。今按山谷還家呈伯氏詩云。強趨手版汝陽城。更責愆期被訶詬。法官毒整草目搖。丞相霜威人避走。卽指此也。

然唐宋時京曹不見有受杖者。至元明外官固杖。京曹亦杖。元史趙子昂爲兵部郎中。桑哥早到。六曹官後到者笞之。斷事官引子昂受笞。有解之者始免。鄧文原傳。轉運司凡五品以下官皆杖決。州縣無如之何。明史海瑞以操江杖御史之演劇者。而魏璫之廷杖大官。更無論矣。至清則官吏有罪。須褫職方受刑。不似前代之以微過受杖也。

### 古官吏佩印狀況

今官吏之印。皆函於匣。古印皆佩於肘。刻刻不離。自戰國以迄魏晉皆然。由今思之。凡印皆金質。終日繫肘上。有妨動作。甚可笑也。

周之時官吏有符節。不見有印。至戰國始有之。史記。蔡澤傳。懷黃金之印。蘇秦傳。佩六國相印。張耳陳餘傳。乃脫解印綬。推予張耳。耳不受。陳餘如廁。耳乃佩其印。高后紀。祿乃解印屬典客。夫曰佩曰解。可證印

無時不繫身也。此官吏也。又漢書霍光傳。適即持昌邑王手。解脫其璽綬。扶王下殿。昌邑王故爲天子。由是可證天子亦常常佩印。此等習慣。至晉而未已。世說周凱曰。今年殺諸賊。當取金印如斗大。繫肘後。是其證。至隋唐此等習慣遂已。

古拜某官卽與某官印以爲信不似後世受代始有印

漢書朱買臣傳。初買臣待詔。常從會稽守邸。會稽官吏至都住所。者飯食。及拜太守。買臣衣故衣。懷印綬。步歸郡邸。值上計時。會稽吏方相與羣飲。不視買臣。買臣入室與共食。食且飽。少見其綬。守邸怪之。前引其綬。帶視其印。會稽太守章也。守邸驚出。語上計掾吏。羣相驚駭。是可證甫拜官卽給與新印。到官後方收前太守印。繳京師或銷燬也。

古官吏多蝨

古士人衣服寬博。中衣蓋不常更換。而懶於沐浴。身垢與衣垢相接。故多蝨。習以爲常。視爲當然。不以爲穢。列子。紀昌學射於飛衛。懸蝨牖南而望之。夫物之小者多矣。而獨懸蝨。可證蝨之易得。又符子。齊魯爭汶陽之田。周豐曰。臣嘗晝寢。有羣蝨共鬪乎衣中。此春秋士人之多蝨。風俗通。趙仲讓爲大將軍。梁冀從事中郎將。冬日坐庭中。向日解衣裘。捕蝨。齊東野語。陳思王著論。得蝨者莫不劇之齒牙。而野老嚼蝨。此漢魏士夫之蝨。晉書王猛見桓溫。捫蝨而談。旁若無人。世說。顧和爲揚州從事。月旦當朝。停車州門外。周

侯詣丞相。歷和車旁。和覓蝨夷然不動。又嵇叔夜絕交書。性復多蝨。爬搔無已。南史邢邵傳。對客或解衣覓蝨。北齊書。邢之才位中書監。對客或解衣捫蝨。此西晉及六朝士夫之蝨。唐人志怪錄。揚州蘇隱夜臥。聞被下有人念阿房宮賦。掀被視之。無他物。唯有蝨十餘。墨客揮塵。王荊公召對時。蝨緣鬚上。上顧而笑。退朝王禹玉曰。屢遊相鬚。曾經御覽。夫蝨至沿緣鬚眉。則其多殆不可思議。此唐宋士夫之蝨。自宋以後。蝨之紀錄見於卿大夫者甚少。蓋漸以爲穢矣。



## 卷三十一

行唐尙秉和著

### 古貴賤之觀察

#### 古官吏暴民之習慣

左傳昭五年。楚公子棄疾如晉。過鄭。禁芻牧。樵採。不入田。不樵樹。不採菽。不抽屋。不強乞。誓曰。有犯命者。君子廢。小人降。按芻所以食馬。樵所以炊飯。樵樹者。斬樹爲薪。采菽者。採民間蔬菜。抽屋者。抽屋上椽爲薪。強乞者。強乞假於民。蓋春秋卿大夫旅行從者之常態也。在異國民尙不敢抗。本國可知矣。而棄疾嚴禁之。故鄭人喜也。又昭十三年。叔黹求貨於衛。淫蕩蕩者。注縱使不法也。此皆適外國虐民之證也。其在本國者。如說苑。楚文王伐鄧。使王子革。王子靈共掇菜。二子出探。見老丈人載畚。乞焉。不與。搏而奪之。又檀弓。季子皋葬其妻。犯人之禾。申詳以告曰。請庚。償也。之子皋曰。以吾爲邑。長於斯也。買道而葬。後難繼也。夫不與則強奪。葬踐人稼。事過而不償。民豈欲哉。乃竟安之。此皆居國內特貴爲暴也。又韓詩外傳。梁山崩。晉君召大夫伯宗。道逢輦者。以其輦服。行也。其道。伯宗使其右下。欲輦之。按輦者行路。豈預知遇大夫。及其既遇。或在狹途中。勢不能促避。乃遽欲輦之。古官吏之賤視民若此。

漢百姓逢官吏不下車卽罪之

後漢鄧晨傳注引東觀漢記曰晨與上共載出逢使者不下車使者怒將至亭欲罪之新野潘叔爲請得免是可證古百姓逢官吏如乘車不惟避之且須下車致敬也如不下車卽將至郵亭付亭長杖責又韓康傳使者徵韓康康辭安車乘柴車先發至亭亭長以韓徵君過方修道橋及見康以爲田叟也奪其牛是小吏如亭長亦虐民如此也

唐時百姓逢官吏不避則予杖

劍俠錄黎幹爲京兆尹時曲江塗龍祁雨觀者數千黎至老人植杖不避幹怒杖之又隋唐嘉話賈島初赴舉京師一日於馬上得句云鳥宿池邊樹僧敲月下門初欲作推字練之未定不覺衝尹衛時韓吏部權京尹左右擁至前島具告所以韓立馬良久曰作敲字佳矣又靈鬼志卿犯鹵簿罪應髡又諾皋記京宜平坊有官人夜歸入曲有賣油者張帽驅驢馱桶不避導者搏之是官人雖夜行坊曲中商民亦須避也

古官吏之威風

周禮秋官鄉士職三公若有邦事則爲之前驅而辟又遂士六卿若有邦事則爲之前驅而辟縣士若大夫有邦事則爲之前驅而辟注辟者令行人避也按秋官士師王燕出入則前驅而辟是以左傳成二年



齊侯自徐關入。見保者曰勉之。齊師敗矣。辟女子。注齊侯單身還。婦人不及避。是自國君。下至大夫。出皆辟人。故韓詩外傳。子路云。入夫子之門。內切磋仁義。外爲陳王道。心竊樂之。出見羽蓋龍旂。旂裘相隨。心又樂之。此以見官吏之榮寵。雖賢者亦忻羨也。

### 古官吏鹵簿卽今日出殯時道旁行列之儀仗

自漢唐以來。官吏出門有鹵簿。鹵簿者。卽與前陳列之儀仗。如旂幟刀矛檠戟之屬。分占道路兩旁。中不許人過。過則衝鹵簿有罪。是以賈島衝韓昌黎鹵簿被捕。至宋猶如此。宋歐陽修梅聖俞墓誌云。聖俞得疾。臥城東汴陽坊。朝之賢士大夫往問疾者。騶呼屬路不絕。城東之人。市者廢。行者不得往來。咸驚顧相語曰。茲坊所居大人誰耶。何致客之多耶。夫曰騶呼。則騶從傳呼。辟市人也。曰市者廢。則儀仗分列道旁。商賈不得陳列物品也。曰行者不得往來。則鹵簿過而行人斷絕也。其狀況與今日北平出殯時。陳列道旁之儀仗無異。至清時。凡宰相尙侍入朝。祇有三五騶從。而無鹵簿。惟九門提督出。鞭板紛列兩旁。傳呼警叫。略與殯儀相類。餘官雖京尹亦否也。若外官督撫出入儀仗。雖盛於京官。然較古亦遜也。

### 如失官儀則有罰

漢書。景帝六年詔曰。夫吏者民之師也。車駕衣服宜稱。亡度者或不吏服。出入閭里。與民亡異。令長吏二千石車朱兩轡。千石至六百石朱左旛。車騎從者。不稱其官服。下吏出入閭巷。亡吏體者。二千石上其官

屬三輔舉不如法令者。

按朱買臣傳。頃之傳舍吏。駕駟馬來迎。以太守應駕駟馬也。鮑宣傳。宣行部乘傳去。法駕一馬。舍宿郵亭。坐免歸。又後漢謝夷吾傳。遷鉅鹿太守。後以行春乘柴車。從兩吏。冀州刺史上其儀序失中。左轉下邳令。又韋玄成傳。侍祀孝惠廟。天雨淖。不駕駟馬而騎至廟下。削爵爲關內侯。是皆因不法駕而降黜也。

漢至六朝時以騎馬爲失官儀被劾

顏氏家訓。梁周宏正爲宜城王所愛。給一黑下馬。常服御之。舉朝以爲放達。至乃尙書郎乘馬則糾劾之。蓋自周至齊梁。官吏無騎者。騎則以爲失儀。祇駟從騎也。

唐宋官吏禁馬上食物禁入酒肆

朝野僉載。周張衡位四品。退朝見路旁蒸餅新熟。遂市一枚。馬上食之。被御史彈劾。降勅流外。又歸田錄。仁宗在東宮。魯肅簡公宗道爲諭德。偶私飲舍旁酒肆中。會有急宣。公至遲。囑中使以實對。真宗曰。卿何故私入酒家。公謝曰。臣家貧。無器皿。酒肆百物俱備。賓至如歸。適有鄉里親客自遠來。遂與之飲。然臣既易服。市人不能識也。上笑曰。卿爲宮官。恐爲御史所彈。又歸田錄。言事者奏李庶幾與舉子於餅肆中作賦。

按馬上食物。固失官儀。若易服而入酒肆。則誰識之。是以白行簡汧國夫人傳云。二肆陳列車盤。觀者甚

衆時生父由常州刺史入覲，與同列易服章潛往觀焉。易服則人不知其爲官，故雖出入里巷無所忌。彼魯宗道、李庶幾皆易服入市，乃亦遭彈劾，以是見自漢以來之重視官儀至宋而未已也。

此等官威至清中葉以後，外官仍舊，京官則漸漸打破。除步軍統領外，雖親王宰相入朝，路上無呵殿傳呼者。騶從之外，繖蓋俱無。官再卑者，更無論已。揆其用意，似以法定儀仗爲最俗，出入用之，有傷大雅。此亦人心自然之革命已。至入酒肆會飲，凡翰詹科道曹司，無不爲之。二品以上者則寡。至民國則一切解放，回想前代之官威，有如戲劇已。

### 古重視貴人之醜態

周禮地官：一命齒於鄉里，再命齒於父族，三命而不齒。注：凡農隙飲酒，鄉民雖卿大夫必來觀禮。齒于鄉里者，以年與衆賓相次也。齒于父族者，異姓雖有老，得居其上也。父族尙不敢不齒者，席于賓東，所謂僎也。按荀子云：一命齒于鄉，再命齒于族，三命族人雖七十不敢先，不敢先即周禮所謂不齒，徑居父族之上也。夫所謂父族者，有世父叔父焉，有伯叔祖父焉，有長於我之兄焉。官雖益高，親族長幼之序自若也。乃以爵尊之故，凡親族皆不能與之齒。此在朝廷之上，誠無如何，乃鄉飲亦如此焉，則古之重視人爵爲何如哉。

### 貴則親畏

史記蘇秦傳佩六國相印行過洛陽車騎輜重擬於王者周顯王除道使人郊勞蘇秦之昆弟妻嫂側目不敢仰視俯伏侍取食此以後世習慣例之秦雖貴昆弟妻嫂何至如是而不知周秦社會習慣實如是也。

漢雖家庭亦親不敵貴

史記高祖紀高祖五日一朝太公太公家令說太公曰皇帝雖子人主也太公雖父人臣也奈何令人主拜人臣後高祖朝太公擁篲迎門卻行高祖大驚下扶太公按史紀此蓋深譏帝之不學無術後世且引以爲笑談然身爲帝王而有父於古實無前例可引爲法則若以古貴貴之心理律之則家令之言未爲盡非高祖賞之亦未爲不當也。

又史記武安侯傳常召客飲坐其兄南嚮自坐東嚮謂漢相尊不可以兄故私撓史記此亦所以深譏武安然以周官三命父族不齒之說例之周正如此也蓋至漢時學者已漸漸打破崇拜人爵之迷夢知貴貴之不踰親親長長而有此微詞特俗人如武安輩尙不知耳。

古以官視爲榮

後漢光武紀光武爲舂陵侯家訟遭租於嚴光時宛人朱福亦訟租於光光止車獨與光武語不視福光武歸戲福曰嚴公寧視卿耶按光武創業爲帝賤時氣量宜度越常人矣乃以官視爲榮言之得意英雄

尙如此，常人可知。

唐貴賤不平等之醜態

玉泉子：章保衡常訪同人，方坐，李鉅新及第亦繼至。保衡以其後先，匿於幃下。既入，曰：「有客乎？」同人曰：「章保衡秀才，可以出否？」鉅新及第，甚自得意，徐曰：「出也。何妨？」保衡竟不出。洎章尙公主爲相，鉅新方爲山北從事焉。

按章李同客友人家，章即秀才，亦士人也。何至聞新進士來，即匿避帷下？及李問及，主人仍不敢令章即出見，必請命於新進士，商其可出否。此在今日，必遜謝歡迎其出矣。而不爾者，進士及第即爲官，秀才仍庶人。當時社會習慣，蓋以庶人與官同會，卽褻視官矣。故雖同客友人家，秀才必迴避進士。

豪貴見郡王則駭散

樵異記上明皇爲臨淄王時，曾戎服臂小鷹於昆明池，會有豪家子，盛酒饌，方宴。因疾驅直突會前，諸少年頗露難色。忽一少年持酒船令曰：「宜以門族官品備陳之。」酒及於上，因大呼曰：「皇祖天子父相王，某臨淄郡王也。」諸少年聞之，驚走四散，不復顧車服。

按諸少年必皆貴人也。宴飲時來一極貴之郡王，此在今日，必益致其敬恭，何至驚駭遽爲獸散如賊之懼捕，而唐時不爾者，以郡王之威嚴，非他大官可比，故駭散也。

士人不能與官人同宴

撫言彭伉滿賁俱宜春人伉妻又洪姨也伉舉進士及第洪猶爲秀才妻族爲置賀宴皆官人名士滿至命飯於後閣其妻憤然責之未數載洪一舉登第初伉嘗侮洪及洪及第伉方遊郊郭忽家僮馳報伉聞失聲墜驢驚洪之驟貴也

聞壻及第卽與女同席

因話錄趙琮妻父爲鍾陵大將琮以久隨計不第窮悴甚妻族益相薄雖妻父母不能不然也一日軍中高會州郡請之春設者大將家相率列棚以觀之其妻雖貧不能勿往然所服故弊衆以帷隔絕之設方酣廉使忽馳吏召將將甚恐旣至廉使曰趙琮非汝壻乎曰然曰已及第矣卽授所馳書乃勝也將遽以勝奔歸呼曰趙郎及第矣妻族大喜卽撤去帷帳相與同席以簪服慶遺焉

世態炎涼至此極矣當壻未第以衣弊故隔絕不與其女通及聞壻及第卽刻撤帷與女同席似忘其衣弊者且萬目睽睽在稠人廣衆中公然如此未聞有嗤之者則當時社會貴貴之念同也

唐宋時請貴人到宅飲宴後須往謝

五燈會元鵝湖智孚禪師傳侍者來請赴堂吃飯師曰我今日在莊吃油糰飽者曰和尚不曾出入師曰你但問取莊主者方出門忽見莊主歸謝和尚到莊吃油糰智孚爲唐末人是唐時貴人時方丈甚尊貴到宅飲

食過日須往謝也。又曲洧紀聞：杜祁公留守洛陽，有何平叔者，年七十餘，隱於城西南隅，蒔花種竹於園中，以詩酒自娛，從不入市。一日祁公便服獨遊，見園內花竹清幽，便入其中，值何飲酒，祁公問訊，即便共酌。何乃更炙茄餉客，歡譔樂甚。俄署中車騎來迎，旌旗拂路。歐陽永叔尹師魯等亦至，立侍於側。何曰：公等何人？何侍從之多也？答來迎相公：何乃知共酌者爲留守也。久之公辭歸，何曰：久不入官府，明日恕不往謝。又老學菴筆記：荆公少與孫少述相契重，及罷相歸高沙，亟往訪之。少述遂留荆公，置酒供飯，至暮乃散。荆公曰：退卽解舟，無由再見。少述曰：如此更不去奉謝矣。是宋時貴人過友人飲宴，雖非請來，亦須謝也。





## 卷三十二

行唐尙秉和著

### 歷代物價

周時糧每石值黃金二兩，每兩金值錢不足百文。

管子：黃金一斤，值食八石，按十六兩爲一斤，正合二兩一石，此非周時食貴，乃金價賤也。

又管子：今齊西之粟，釜百泉，則鎰二十也；齊東之粟，釜十泉，則鎰二也。按左傳：昭三年，齊舊有四量：豆區釜鍾，四升爲豆，各自其四，以登於釜；杜注：四豆爲區，一斗六升；四區爲釜，六斗四升，是齊定制。一斗六升爲區，四區爲釜，正六斗四升，乃管子曰：釜百泉，則鎰二十，似五倍鎰方爲釜，故注云：一斗二升八合爲鎰，豈區鎰不同歟？泉錢也，以一斗二升八合之粟，貴則值錢二十，賤則二錢，以此證古粟固賤，然亦因古錢貴故也。

又按齊粟，每石黃金二兩，每斗金二錢，每合金二分，則一斗二升八合，值金二錢六分。若與錢則爲二十，是黃金二錢六分，當錢二十，也是黃金一錢，值不足十文，一兩不足百文也。雖未能恰合，大概如斯矣。漢書食貨志：黃金重一斤，值錢萬；朱提銀重八兩爲一流，值一千五百八十，它銀一流值千，是爲銀貨二

漢金價貴銀價五倍

品案朱提縣所產銀最高。故重三斤餘。即當一斤金價。它銀則五斤價。方當一斤金價也。又一兩金值錢六百二十五文。比周加五倍。

漢時銀價

據食貨志朱提銀一流。值一千五百八十。八兩爲一流。是每兩銀易錢一百九十七文半也。是銀之最高者。尋常銀一流。值錢千。是每兩易錢一百二十五也。

元明清金銀錢之值

桐城吳先生日記云。元初中統時。每鈔一貫。折銀一兩。每鈔四貫。易赤金一兩。是金一兩當銀四兩也。洪武十八年。金一兩當銀五兩。永樂十一年。金一兩當銀七兩五錢。未幾金一兩復當銀十兩。至清乾隆金一兩。換銀十四兩九錢六分。嘉慶八年。換銀十五兩四錢一分。道光十二年。換銀十五兩七錢三分。同治十年。換銀十五兩五錢七分。十三年。換銀十六兩一錢七分。光緒二年。換銀十七兩八錢七分。五年。換銀十八兩一錢六分。十八年。換銀二十三兩七錢一分。二十二年。換銀三十一兩七錢。金價始暴漲。二十三年。換銀三十三兩九錢一分。蓋至光緒末年。金價隨世界爲轉移。故暴漲如是也。

兩漢之穀價米價

漢書食貨志。歲數豐穰。穀至石五錢。以一石穀舂米五斗計之。是一斗米值一文也。又明帝紀。歲比登稔。粟斛三十。十斗爲斛。是每斗三文也。是最賤之價值。其最貴者。史記平準書。物踊騰糴。米至石萬錢。是漢初兵革時之價。不足爲例。又食貨志。元帝卽位。齊地饑。穀石三百餘。民多餓死。又王莽時。青徐地人相食。米石二千。夫米至每斗二百。幾與清時相埒。無怪人相食。若穀石三百。每斗祇三十。較後代賤十倍矣。而民仍餓死。以此證漢時錢貴。過後代遠矣。

#### 唐時尋常米價每斗四十文

通鑑。符堅建元七年。歲大熟。斗米五錢。又唐貞觀十三年。大熟。斗米三錢。是皆不能爲定價。攷唐人聞奇錄。晉國公王鐸爲丞郎時。以江淮運米至京。每斗水陸費計七百。而京國米價四十。議欲不運米折價。是每斗米價四十錢。爲唐時尋常之米價。較清用銅錢時之米價賤十倍也。

#### 漢時地價及一金之值

漢書東方朔傳。故鄠鎬之間。號爲土膏。其價畝一金。按莊子逍遙遊。不過數金。注云。金方寸重一斤。爲一金。是每地一畝。值金十六兩也。又按公羊隱五年。百金之魚。注云。百金猶百萬也。古者以金重一斤。若今萬錢矣。公羊爲何休注。休漢人是漢一斤金。可當萬錢也。是亦以一斤爲一金也。然則鄠鎬上地。萬錢一畝。他則不及也。

### 漢中人產值十金

漢書文帝紀。嘗欲作露臺。召匠計之。直百金。上曰。百金中人十家之產。然則漢時中人產。平均値十金。據史記平準書注。漢時金四兩。直二千五百文。是一斤直萬錢。十金直十萬。是在後世錢賤之時。猶爲貧家。漢時不爾者。錢貴後世十倍也。

### 周時蘭草之貴

說苑。晏子曰。今夫蘭本。三年湛之以鹿醢。既成則易以匹馬。按蘭產於南方。中原氣候高燥。生殖不宜。古人培以鹿醢。使之開花。值敵匹馬。雖今世無此價。可證古人愛花。重於今世。

### 戰國時之錐價狸價

說苑。客說齊王曰。騏驥騄駼。倚衡負輓而趨。一日千里。此至疾也。然使捕鼠。曾不如百錢之狸。于將鑊鄒。拂鐘不鐸。試物不知。此至利也。然以之補履。曾不如兩錢之錐。按周時有迎貓之祭。似其時貓尚未馴。撥成爲家畜。故以狸捕鼠。狸形微大於貓。毛作蒼黑色。有紋。無他色者。其靈捷等於貓。而凶狠過之。故貓畏焉。常以數寸長之初生狸與貓。尙畏而不敢食。古以此捕鼠。似曾爲家畜。故值百錢。若補履之錐。祇值二文。此無他錢貴故也。

### 漢胡餅價

三國志注。趙岐遭家禍。詣北海販胡餅。孫寶碩過市。疑其非常人。問曰。自有餅耶。販之耶。岐曰。販之。寶碩

曰買幾何賣幾何曰買三十賣亦三十按唐沈既濟任氏傳有鬻胡餅者方張炭熾爐是即今日之燒餅也以漢時錢價之貴而值至三十疑非一枚也

### 漢唐酒價

漢書武帝紀賣酒升四錢是斗酒四十文也典論云孝靈帝末年有司湏酒斗值千文是東漢末酒價較西漢貴數十倍也至六朝訖唐則每斗三百文楊松玠談藪云北齊盧思道常言長安酒賤斗價三百唐杜甫詩云速來相就飲一斗恰有三百青銅錢是其證至王維詩新豐美酒斗十千李白詩金尊斗酒沽十千侈言酒美價昂耳非實錄也是唐時酒價幾十倍於漢矣此無他唐錢賤也

### 漢時一飯之價

風俗通曰太原王子廉一介不取常過其姊飯留錢十五文默置席下按漢時錢貴一飯十五文必美食也

### 六朝時木柴屋椽及木製魁碗價

齊民要術榆柴一束三文楊柳柴每載百文桐木榆木椽每根十文柳木椽每根八文木碗七文木魁二十文按魁卽盆也今河北人猶呼瓦盆爲瓦魁載者一車也

### 歷代奴婢之價

晏子春秋晏子之晉至中牟。睹弊冠反裘負芻息于塗側者。以爲君子也。使人問焉。曰我越石父。爲人臣僕於中牟。晏子曰。可得贖乎。曰可。乃脫左騶以贖之。是周時一奴價准一馬也。又王褒僮約云。從成都安志里楊惠買夫時戶下髡奴便了。決價萬五十。是西漢奴價萬五千也。又梁任昉奏彈劉整疏。寅以私錢七千贖奴當伯。奴名使上廣州去。後寅亡。整復奪取當伯充衆。是六朝時奴價錢七千。又云。整更奪取婢綠草。貨得七千。整兄弟及姊共分此錢。又不分。遂。劉寅子婢姊及弟各准錢五千文。不分。遂。是六朝時婢價亦七千。其次者則五千也。至世說所記。苻朗初過江。王咨議問中士奴婢貴賤。朗曰。謹厚有識者。乃至十萬。是憤激語。不足爲憑也。

晉時羊價

搜神記。宋定伯擔鬼至宛市。化爲一羊賣之。得錢千五百。當時石崇有言。定伯賣鬼。得錢千五。此事固荒唐。然足證明羊價也。

漢唐馬價

史記。平準書。物價騰躍。馬一匹百金。是極貴之價。可見賤時亦約十金。馬蓋莫貴于漢也。又集異記。寧王方集賓客鬻馬。牙人麴神奴呈二馬。皆神駿精采。問價。牙人曰。此一千緡。此五百緡也。王所乘皆千里馬。非普通馬價。又按鄭簡任氏記。鄭子如市。果見一人牽馬求售。告在左股。鄭子以六千買以歸。後告愈。售

三萬是賤則六千錢。貴則三萬錢也是普通馬價也。

### 唐時牛價

吳融冤債志。至時有人牽跛牛過。以四千買之。養六百日。甚肥健。同曲磨家。三牛暮卒。以十五千求買。是唐牛值十五千也。按清時中原牛肥大者。值三十餘千。倍唐時價。然唐時錢貴。况清時牛價亦有十五六千者。是古今牛價相等也。

### 唐驢價

西陽雜俎。開成初。東市百姓喪父。騎驢市凶具。驢忽曰。負君家力已足。南市賣。蘇家欠我五千四百。我負君數亦如之。可賣我。其人驚異。即訪蘇家果賣得五千四百。

### 唐時鷄子價。鷄價。竹筍。竹竿價

耳目記。新昌令夏侯彪之。初下車。問里正曰。鷄子一錢幾顆。曰三顆。乃取十千錢令買三萬顆。謂里正曰。吾未要。且令母鷄抱之。遂成三萬頭。鷄經數月長成。令更與我賣。却一鷄三十文。半年之間。成九十萬。是可證唐時一文錢可買三鷄卵。長成之鷄一隻值三十文也。清時一鷄卵三文。與唐較貴十倍。理應如是。至鷄一隻。清時普通值六七十文。較唐祇貴一倍。則不可解也。

又問竹筍一錢幾莖。曰一錢五莖。乃取十千買五十萬。令里正裁之。半年成竿。一竿賣一文。成五十萬。是

可證唐時一文錢可買筍五莖。一竹竿則值一文也。

唐鴨卵價

吳融冤債志。樂平許元惠家。蓄十餘鴨。忽多一黑鴨。日產一卵。凡誕三十卵。計其值恰三百錢。是每卵值十文也。按今之鴨卵值。倍於鷄卵耳。唐則一錢三鷄卵。十錢則三十枚。是鴨卵貴鷄卵三十倍也。古今之不同如此。

唐時糶價

酉陽雜俎。及市糶正當二千四百文。此可證唐時棺價。普通者二千餘錢也。

晉時賃牛車價

搜神記。高安婦蘇娥。有雜絹帛百二十疋。欲之旁縣賣之。從同縣男子王伯賃車牛一乘。直錢萬二千。載妾並絹。令婢致富執轡。按所謂旁縣。不知道里若干。斷非三五日所能往來。故值昂若是。又令婢執轡。是車主不執鞭隨。與今日異也。

唐鑊刀價

唐時鑊刀。每枚三十文。五燈會元。王南泉云。吾這茅鑊子。三十文買得。是其證。南泉唐時人也。

六朝布價



通志齊竟陵王子良上表曰。晉東渡初。絹布所直。十倍於今。官布一匹。直錢一千。及宋元嘉。匹直六百。今則入官好布。匹下百餘。是東晉初一匹直千錢。至齊一匹布直約百錢也。

#### 晉練價一匹一金

晉書王導傳。時庫中惟有練數千端。鬻之不售。而國用不給。導患之。於是乃與朝賢俱製練布單衣。士人翕然競服之。練價踊至一金。按煮熟之縑帛曰練。十六兩爲一金。一端一金。其值頗昂。但亦視一端丈尺若干。按宋書沈慶之傳。年八十。夢有人與兩匹絹。曰。老子今年不免。兩匹絹八十也。據是。是一匹絹四十尺。晉宋淳制當同。若如漢制十六兩爲一金。是金一兩祇買二尺半絹。古金卽賤。尙不至是。疑晉所謂一金。已如正字通所言。以二十四銖爲一金。卽一兩也。

#### 五代時之韓價

歸田錄。馮道與和凝同在中書。一日和問馮曰。公靴新買。其值幾何。馮舉左足曰。九百。和性褻急。遽回顧小吏云。我靴何得一千八百。因詬責久之。馮徐舉左足曰。此亦九百。於是哄堂大笑。然則五代時官靴。一千八百爲定價也。

#### 宋時造船價

老學菴筆記。建炎中。平江造戰艦。八艘者長八丈。爲錢一千一百五十九貫。四艘者長四丈五尺。爲錢三

百二十九貫。

唐牡丹花價及絹價筭價

白居易買花詩。帝城春欲暮。喧喧車馬度。共道牡丹時。相隨買花去。貴賤無常價。酬值看花數。灼灼百朵紅。淺淺五束素。是花足百朵者。值帛五匹也。唐時交易多以帛。至帛一匹值若干錢。尙未得確證。按杜甫憶昔云。豈聞一絹值萬錢。是天寶亂後之價。不足爲準。前定錄云。宣平坊李生善易筮。以五百文決一局。相國揆持一緹晨往。是一緹之值。必與五百文相當。有贏而無絀也。由是證唐一緹祇數百文。白詩所謂五束素者。殆不過三四千也。

唐馬醫價

諸皋記云。建初中。有人牽馬訪馬醫。云馬患脚。以二十鎰求治。是唐時醫馬價爲二十鎰。每鎰一百也。

唐竹籠價

吳融冤債志。乃令多買竹作籠。約盛五六斗者儲之。明年修廣陵城。每籠三十文。大獲利益。

宋緹價每疋千錢

老學菴筆記。承平時。鄆州田氏作泥孩兒。馳名天下。一對至直十緹。一床至三十千。一床者或五或七也。云云。然則一床約三對。一對正值十千。十千卽十緹之價。一緹正千錢也。宋承平時如此。宋去唐近。唐承

平時每繖必不及千錢。無怪杜詩以一絹值萬錢爲創聞也。然則唐宋時旅行以帛爲糧及以帛易物者其價值大概可比例得之矣。

### 唐宋時平民每年生活費

唐于遜靈應錄紙商陳泰供養一僧二年不倦。忽一日僧謂曰爾有多少口幾許金便足。陳曰弟子幼累二十口歲約一百緡粗備。據是每人五千錢卽足一年費。又東坡志林在嶺南每日費百文至朔日預將三千錢分爲三十提以畫又挂於壁上每日取百錢用之。按東坡在嶺南從者子過妾朝雲及僕役蓋有六七人之譜而每日祇需百錢卽可度日。每人日費十餘文月四五百年亦五六十與唐于遜所述者略同也。此雖貧民生活然在清同光間正用銅錢之時亦相去甚遠。若今日則不能比例矣。以是證唐宋時銅錢尙貴也。

### 明時米價及清乾隆時米價

明史王文傳請每米四石折銀一兩民以爲便是每石米直銀二錢五分也。又隨園隨筆云曾見正德二年吳縣申報米糶時價文書白米一石紋銀二錢。又見中文定公與其子書云吳下大荒米每石價貴至六七錢。又金鑿子云嘉靖癸丑京師大飢人相食米石二兩二錢。袁子才云是今日之平價也可見乾隆時米二兩餘一石也已十倍於明之平價若今日則五十餘倍於明矣。米價之不測如此。

1

2

3

4

5

6

7

8

9

## 卷三十三

行唐尙秉和著

### 稱呼

#### 歷代之稱呼天子

西漢稱天子曰縣官。霍光傳：禹曰：我何病？縣官非我家將軍，不得至是。又東平思王傳：今暑熱，縣官年少，持服恐無處所。張宴曰：不敢指斥成帝，謂之縣官也。東漢亦稱曰官家。雜事秘辛：官家重禮，緩此結束，當加鞠翟耳。又宋書后妃傳：廢帝欲酖王皇后，左右止之曰：若行此事，官便應作孝子。是又對皇帝可稱爲官也。

隋唐稱天子曰大家。海山記：隋文帝死，楊素既立煬帝，歸謂家人曰：小兒子吾已提起，教作大家，卽不知了當得否。唐李泌傳：上燒梨賜泌，潁王恃恩亦求，上曰：何乃爭此？潁王曰：臣等試大家心，何乃偏耶？又五代史唐家人傳：大家還魂矣，是對天子亦可稱大家也。

宋則稱皇帝曰官家。花蕊夫人詞：法雲寺裏中元節，又是官家降誕辰。又詞苑叢談：道君幸李師師家，不遇，至更初歸，愁眉淚眼，憔悴可掬。道君問故，師師奏言：邦彥得罪去，一杯相別，不知官家來，是亦對面稱

也。

按殿廷公見稱皇帝皆曰陛下。自兩漢迄明清皆然。至曰縣官曰官家曰大家皆私稱也。乃亦有對面稱者。蓋燕見親昵者無所不可也。

晉時僕稱主人曰官

世說謝太傅與王渾相惡。太傅卒。王往弔。督帥刁約不聽使前曰。官生平不見此客。又殷中軍妙解經脈。有常所給使。忽叩頭流血。言母抱病。若蒙官一脈。便有活理。是晉時僕稱主人皆曰官也。

唐僕媼稱男主人曰郎女曰娘子

白行簡李娃傳。生申喉發調。聞者欷歔。時生父亦易服私往觀。有老豎卽生乳母壻也。見生將認之而未敢。乃泫然流涕。生父問故。曰。歌者酷似郎之亡子。又獵狐記。僕曰。吾家郎君爲隴西觀察使。公子亦往隴西省親。祇娘子在家。未便留宿。容吾與娘子商。又劉無雙傳。王仙客以求親之事。聞於舅母。舅母曰。是我所欲也。卽當議其事。又數日有青衣告仙客曰。娘子適以親情事言於阿郎。阿郎云。向前亦未許之。恐是參差也。又因話錄。李逢吉家有婢好言夢。曰。昨夜爲郎君作夢不好。又夢遊錄。獨孤遐叔謂其妻死疾走入門。青衣報娘子夢歷方寤。其小女則曰。小娘子。昌黎祭女壻文。曰。致祭於小娘子之靈。又小說稱小娘子者尤多。其稱小兒則曰小郎。按今日僕媼稱男主人曰老爺。主母曰太太。唐之稱郎君稱娘子。亦猶是也。

歷代父母之異稱

左傳昭二十八年叔向曰。吾母多而庶鮮。吾慙舅氏矣。注言父多妾媵而庶子少也。是春秋亦稱父爲舅。又襄二十八年。盧蒲癸謀殺慶舍。盧蒲姜癸妻舍女曰。有事而不告我。必不捷矣。癸告之。姜曰。夫子謂父復莫之止。將不出。我請止之。又襄二十七年。成與彊怒將殺之。殺彊无告慶封曰。夫子言其父之身。亦子所知也。言封知其父。慶舍无告。又檀弓曾子曰。元起易簀。曾元曰。夫子之病革矣。是春秋時亦稱父爲夫子也。又史記高祖紀。上奉卮酒爲太上皇壽曰。始大人常以臣不能治產。又漢書霍光傳。光兄票驍將軍去病。過河東。迎父仲孺曰。去病不早自知爲大人遺體。是漢稱父爲大人也。至對外稱。西京雜記云。家君劉向以爲史佚教其子讀爾雅。又後漢袁隗妻傳。馬倫曰。家君獲此。亦其宜耳。又顏氏家訓。昔侯霸之子孫。稱其祖父曰家公。陳思王稱其父曰家父。母爲家母。潘尼稱其祖曰家祖。古人之所行。今人之所笑也。今南北風俗。言其祖父及二親。無曰家者。田里猥人。方有此言。

按莊子云。其往也。家公執席。世說云。有人問陳元方。足下家君何如。又謝公問王子敬。君書何如。君家尊。是秦漢魏晉時對朋友稱其父曰家。何況自稱。乃齊梁時以是爲可笑。無怪顏氏非之也。

若淮南子云。東家母死。其子哭之不哀。西家子見之。謂其母曰。社何愛速死。吾必悲哭社。江淮謂母爲社也。按此鄉里方言。俗稱亦猶今日閩人呼父曰郎罷。粵人呼母曰阿吉。北方呼祖父爲爺爺。祖母爲奶奶。

呼父爲爹。母爲孃。或呼父爲爸爸。母爲媽媽也。然爹孃之稱雖俗。亦最古。古樂府朝辭耶孃去。暮宿黃河邊。又杜甫兵車行。耶孃妻子走相送。是自晉唐已如此稱呼。耶者爹聲之轉。又南史始興王憺傳。詔徵還朝。始興人歌之曰。始興王。人之爹。赴人急。如水火。又韓愈祭女孃文。阿爹阿八。是爹稱自六朝及唐亦有也。又顏氏家訓。今世俗呼其祖考爲先亡丈人。疑丈當爲大。按此必已故之祖考。若尙在堂。則不合也。

稱人父母

史記聶政傳。嚴仲子曰。故進百金。爲大人粗糲之費。此大人謂聶政母也。是稱友人父母。亦曰大人也。又世說人間陳元方足下家君何如。又謝公謂王子敬。君書何如。君家尊。是稱友人父。亦可曰家。至六朝則加尊字。顏氏家訓。凡與人言。稱彼祖父母。父母。世父母。及長姑。皆加尊字。自叔父母以下。皆加賢字。按文章志云。或問子敬尊君書何如。可證顏氏說之不謬。此等習慣。至今不改。惟稱人伯叔父。或兄弟。多曰令。爲小異耳。

若對子字父則爲失禮

魏志司馬朗傳。九歲人有道其父字者。朗曰。慢人親者。不敬其親者也。客謝之。又常林傳。對子字父。是知禮乎。客亦謝之。按字所以表德。此在周時。不爲不敬。漢魏時文盛。則否也。

古伯父叔父之稱呼



顏氏家訓古今皆呼伯父叔父。今世多單呼伯叔。按左傳僖二十五年周王曰：「未有代德而有二王，亦叔父之所惡也。」又成二年周王使單襄公辭於晉，使曰：「其敢廢舊典以忝叔父。」又漢書王莽傳：「世父大將軍鳳病，師古曰：世父謂伯父也。」以居長嫡而繼統。又叔父成都侯商。又楚元王傳：「季父不吾取，吾取季父矣。」又項羽本紀：「其季父項梁是周。」及漢呼伯父，或爲世父，叔父，或爲季父，而皆父稱之證也。至單稱伯叔，晉初已如此。世說：王濟謂叔父王湛曰：「叔好騎乘，不。」武帝每見王濟，輒以湛調之曰：「卿家癡叔死未？」濟曰：「臣叔不癡。」又桓玄謂王楨之曰：「我何如卿第七叔？」是無論自稱人稱，皆單曰叔矣。顏氏以爲非者，婦稱夫弟亦曰叔。陳平傳：「嫂曰：有叔如此，不如無有。」若兄子祇稱叔，不稱父，則與嫂叔無別矣。漢世亦稱叔父爲大人。漢書疏廣傳：「廣謂兄子受曰：今宦成名立，不去懼有後悔。」受叩頭曰：「從大人議。」亦有字叔父者。史記爰盎傳：「兄子種謂盎曰：絲但日飲亡何。」絲者盎字。蓋漢時猶有古風也。

### 兄弟子至晉始稱爲姪

古稱猶子。禮記兄弟之子猶子也。蓋引而進之也。亦曰兄子。論語以其兄之子妻之。漢書疏廣傳：「兄子受。」袁盎傳：「兄子種。」鮮有稱姪者。釋名云：「姑謂兄弟之女曰姪。姪迭也。更迭進御也。禮內則注所謂夫人及兩嬖各有姪婦。」左傳：「臧宣叔娶于鑄，生賈及爲而死。」繼室以其姪是也。故字從女。乃至晉始稱兄弟之男子曰姪。顏氏家訓云：「兄弟之子已孤，與他人言對孤者前呼爲兄子弟子，頗爲不忍。北土人多呼爲姪。晉世

以來始呼叔姪。今呼爲姪。於理爲勝云云。是至晉始以姪爲兄弟子之專稱。故晉書王濟傳云。濟才氣抗邁。於叔父湛略無子姪之敬。北史李郁傳。兄瑒卒。撫育孤姪。歸於鄉里。至唐宋則尤以爲確稱。不可更僕數矣。

或曰左傳云姪其從姑。史記田蚡傳云。蚡侍酒嬰所。跪起如子姪。是古稱姪亦同於後世。豈知姪其從姑者。正姪娣從姑嫁。此本筮詞。彷彿而已。不得以事應懷公爲證。史記田蚡傳之子姪。姪乃姓之訛。漢書作子姪。師古曰。姓生也。言同子禮。若己所生。師古於史漢攷訂至精。設史記爲姪字。師古早言之矣。是皆後人之妄改史文也。又公羊諸侯娶一國。則二國往媵之以姪娣。從姪者何。兄之子也。是專謂女也。故爾雅釋親云。女子謂累弟子爲姪。而於宗族則無姪稱。此其證也。

婦稱夫族今古之不同

爾雅婦稱夫父母爲舅姑。禮內則婦事舅姑是也。至漢則稱舅爲丈人。顏氏家訓。漢時婦對舅稱丈人。古樂府詞。先述三子。次及三婦。婦是對舅姑之稱。其末章云。丈人且安坐。調絃未遽央。古者子婦供事舅姑。與兒女無異。故有此言。亦稱姑曰大人。舅姑曰公姆。焦仲卿詩。五日斷一匹。大人故嫌遲。勤心養公姆。是也。至六朝則呼舅爲丈人。公顏氏家訓。今北間婦人呼舅爲丈人公。是也。按今世婦人對人稱舅曰公公。姑曰婆婆。至當面呼皆從夫。不知始於何時。與古異矣。

至稱夫之兄。爾雅云：兄曰兄公。郭璞注云：今俗呼兄鐘，語之轉耳。是兄公之稱。至若未改，稱夫之弟，則曰叔。史記陳平傳：嫂曰：有叔如此，不如無有。夫之姊妹，則曰姑。漢焦仲卿詩：新婦初來時，小姑初扶牀。今日被驅遣，小姑如我長。唐新婦詩：未諳姑食性，先遣小姑嘗是也。蓋必加小字者，以別於舅姑之姑。稱夫兄弟之妻，周時曰娣姒。晉曰妯娌。左傳子容之母走謁諸姑曰：長叔姒生男。爾雅：長婦謂稚婦爲娣，婦謂長婦爲姒。郭注：今或曰妯娌是也。至於今婦稱夫兄曰大伯，弟曰小叔，姊妹則曰大姑、小姑。兄弟婦皆曰妯娌，然對面呼仍皆從夫。

### 甥與母族之稱呼

爾雅謂我舅者，吾謂之甥。詩大雅：韓侯取妻，汾王之甥，傅姊妹之子曰甥。廣韻：外甥也。甥稱母之父母曰曰外祖，曰外祖母。此古今通稱也。至六朝則去外爲家。顏氏家訓：河北士人皆呼外祖父母爲家公、家母。江南田里間亦以家代外，非吾所識。是其證。稱母之兄弟曰舅。詩：我送舅氏，曰送渭陽。左傳：以伯舅年耄，老加勞。漢書王鳳傳：以元舅輔政，舅之稱以迄於今，無有改易。稱母姊妹則曰姨。母左傳：繼室以其姪，穆姜之姨子也。注：穆姜，姨母之子，與穆姜爲姨。昆弟又會真記：夫人鄭氏，生之姨也。姨稱亦迄于今。稱母姪，則曰中表。晉書山濤傳：濤與宣穆后有中表親。中表者，卽表兄弟。徐鉉和表弟包穎詩云：平生中表最相親。是其證。然古祇曰中表。至唐則直稱曰表兄、表弟。杜甫有贈表弟詩。蘇軾有飲饒表兄程正輔詩。以迄

於今。外家稱呼。皆大致不改。惟世俗稱外祖有曰老爺者。外公者。外祖母有曰老老。曰外婆者。皆方言俗呼。又南北普通稱舅母爲妯娌。殊不得其解。然集韻已言之。其由來久矣。

壻與妻族之稱呼

古稱女夫曰甥。孟子帝館甥於貳室是也。春秋時則稱曰壻。左傳文八年。晉侯使解揚歸匡戚之田於衛。且復致公壻池之封。注。晉公之壻名池也。壻之名至今不改。至壻稱婦父。爾雅曰外舅。漢時則曰婦翁。後漢第五倫傳。明帝戲倫曰。聞君爲吏。獨婦翁。翁者父稱。漢書金日磾傳。日磾二子。皆爲上弄兒。擁上項。日磾見而目之。兒走且啼曰。翁怒。是其證。故陳後主曰。婦父乃是翁比。女夫乃是兒例。奈何不敬。通鑑特載其言。今世田野有如此稱者。則人笑之。而不知正與古合也。自六朝始呼爲丈人。野客叢書云。后山送外舅詩。丈人江淮英。稱婦翁爲丈人字俗。然字則遠矣。僕觀三國志注。獻帝舅車騎將軍董承句下。承於帝爲丈人。古無丈人之名。故謂之舅。裴爲宋元嘉時人。呼婦翁爲丈人。已見此時。至唐則以丈人爲通稱。楊詹事憑柳子厚婦翁也。子厚祭文直呼爲丈人。是其證。後又謂丈人爲泰山。西陽雜俎。明皇封泰山。張說爲封禪使。說女壻鄭銓本九品。封禪後獨遷五品。並賜緋衣。黃繡綽曰。此乃泰山之力也。此一因也。又有謂因東岳有丈人峯。世遂謂丈人爲泰山。此又一因也。至今日則又由泰山轉而爲岳父。因岳父呼妻母曰岳母。對人稱則曰家岳。曰家岳母。其不妥蓋甚於古稱外祖母曰家也。

壻稱妻兄弟及壻與壻稱

晉書阮瞻傳內兄潘岳每令彈琴唐書李益盧綸大歷十才子之傑出者綸於益爲內兄又文中子有內弟之喪不飲酒食肉內弟內兄之稱至今不改至女兄弟則曰姨左傳莊十年蔡哀侯娶于陳息侯亦娶焉息媯將歸過蔡蔡侯曰吾姨也止而見之此姨稱之最古者迄於今則又曰大姨小姨以別於母姨至壻與壻相稱古謂曰亞爾雅兩壻相謂曰亞注詩曰預預姻婭漢謂爲友壻漢書嚴助傳家貧爲友壻富人所辱師古曰友壻同門之壻晉謂爲僚壻郭璞爾雅注今江南呼同門爲僚壻是也宋謂爲連袂潛確類書范仲淹鄭戩皆自小官布衣選配李參政昌齡女爲連袂又李晉卿有二女將死語家人曰長女配王樂道次女配滕元發足矣二人遂爲連袂後又由連袂而轉爲連襟嬾真子江北人呼連袂爲連襟至今仍之妻族稱呼以此與婦翁爲最繁矣

唐謂及第進士爲先輩

自古皆稱高年耆舊爲先輩如吳志闕澤傳澤州里先輩丹陽唐固又魏志陶謙傳注郡守張磐同郡先輩又舊唐書孔穎達傳隋煬帝集諸郡儒於東都令國子秘書與之論難穎達最年少而先輩宿儒皆爲之屈是隋時尙如此乃至唐中葉則稱先輩者爲及第進士而非老稱王維詩爲學輕先輩何能訪老儒北夢瑣言王凝知舉司空圖第四人登科王謂衆曰今年榜帖爲司空先輩一人而已是所謂先輩

實後輩也。按填言之說，仍微不合。先輩實進士及第之專稱。雲溪友誼云：牛僧孺被舉，常投贊於補闕劉禹錫。禹錫對客塗竄其文曰：必先輩期至矣。又北里志：楊萊兒傳進士趙光遠一見溺之。及應舉，自謂必取。萊兒亦大爲誇於賓客，指光遠爲一鳴先輩。是皆應試前祝其及第爲先輩也，非普通後輩之稱。

## 卷三十四

行唐尙秉和著

### 奴婢傭賃

周盜賊妻子沒爲奴婢可上市買賣

周禮秋官司厲掌盜賊之任器貨賄其奴男子入於罪隸女子入於舂棄按罪隸者隸司空爲役舂棄者言女子力弱充舂米炊食之職是官奴婢皆由盜賊沒入故可買賣周禮質人掌成平也市之貨賄人民牛馬注人民奴婢也疏言奴婢則非良人而罪人也蓋官家奴婢多而賣於民間民間復可以奴婢上市而買賣之與牛馬同

亦有因饑寒而鬻爲奴婢者故多可贖

晏子春秋晏子之晉至中牟睹弊冠反裘負芻息於塗者以爲君子也使大問焉曰我越石甫爲人臣僕於中牟晏子曰何爲至此曰不免凍餒之累是以爲此也晏子曰可得贖乎曰可乃脫左騾以贖之按此自鬻爲僕也其契約或若干年或終身或可贖不可贖故晏子問之又檀弓子柳之母死子碩請具子柳曰何以哉子碩曰請粥庶弟之母又史記陳軫傳故賣僕妾不出里巷而售者良僕妾也又淮南子魯人

有爲妾於諸侯。有能贖之者。取金於府。此皆因貧自鬻爲婢妾。主人又因貧而轉鬻於人。故多可贖也。

漢奴婢狀況

漢魏時奴婢有三種。一因罪沒入者。二因貧而爲者。三被掠賣爲奴婢者。因罪因貧。自周有之。掠賣則周時所無。以此見周時社會較後世不紊亂。其鄉政善也。

其因罪沒入者。如外戚世家。薄姬原魏豹妾。魏豹平。輸織室。又如吳志潘夫人傳。父爲吏坐法死。夫人與姊俱輸織室。又魏志高柔傳。營士資禮近出不還。營以爲亡。沒其妻及男女爲官奴婢是也。其因貧者。如高祖紀。民以餓自賣爲官奴婢者。詔皆免爲庶人。又干寶搜神記。漢崔永父死不能葬。因自賣爲奴。又魏志楊俊傳。王象少孤。特爲人僕隸。見使牧羊。而私讀書。被箠楚是也。其被掠賣者。如外戚世家。寶廣國年四五歲時。家貧爲人所略賣。傳十餘家。其家不知其處。又魏志楊俊傳。爲人所略作奴僕者。凡六家。俊皆傾財贖之。又史記樂布傳。爲人所略賣。爲奴於燕是也。按略賣之事。不惟春秋時無之。卽戰國亦不見。蓋周時鄉政之善。爲後世所未有。凡作姦犯科之事。無所容藏。一易地卽自困。故絕無此事也。

漢奴婢之多空前絕後

有以上三因。漢奴婢之多。爲自古所未有。其見於史者。如陸賈傳。陳平以奴婢百人遺陸生。武帝紀。發官奴婢三萬人苑中養馬。貢禹傳。諸官奴婢十餘萬人。戲游無事。哀帝紀。詔諸侯王列侯公主吏二千石及



豪富民多畜奴婢田宅亡限。令有司條奏諸王奴婢二百人。列侯公主百人。關內侯吏民三十六。過品皆沒入官。誠以其時富人如蜀卓王孫僮客八百人。程鄭亦數百人。卓文君嫁司馬相如。王孫分與僮百人。又季布傳。乃髡鉗布。并其家僮數十人之魯朱家所賣之。夫一賣卽至數十人。少分卽至百人。則當時社會奴婢之在豪富家者。誠不可以億計也。故哀帝下詔限之。然蜀志糜竺傳。祖世貨殖。僮客萬人。是東漢末此風仍未已也。

#### 漢時賣奴婢衣以繡衣置市上關中

賈誼傳。今民賣奴者。爲之繡衣絲履偏諸緣。牙繡內之關中。服虔曰。關賣奴婢關。按衣以鮮服者。飾其貌使姣好易售也。內之關中者。懼其逸去與閑牛馬同也。蓋市官特爲置關而稅之也。

#### 惟買賣奴婢者多故價有定準

漢書食貨志。田宅奴婢價爲減賤。又毋將隆傳。傳太后使謁者買將官婢。賤取之。復取執金吾官婢八人。隆奏言賈賤。請更平直。是可證當時奴婢皆有定價。與牛馬五穀同。故有價貴賤之感覺。又可證奴婢卽財貨。故陸賈傳。謂其子曰。侍者十人。寶劍直百金。過汝十日而更。所死家得寶劍車騎侍從者。是以奴婢與車馬寶劍並爲貨財也。

#### 漢爲奴婢開一線生機

自周以來主可殺奴。史記田儼傳。儼陽爲縛其奴。從少年之縣廷。欲謁殺奴。服虔曰。古殺奴皆當告官。是不過告以殺之之故耳。非告官判其可否也。殘酷極矣。至漢文帝四年五月。詔免官奴婢爲庶人。哀帝時。又詔官奴婢五十以上。免爲庶人。魏志齊王芳。詔官奴婢六十以上。免爲良人。是以宣帝時。京兆尹趙廣漢。脅魏丞相夫人。賊殺侍婢事。可見是時。雖丞相殺侍婢有罪。又食貨志云。除專殺之威。又王莽時。詔敢炙灼奴婢者。論如律。免所炙灼者爲庶人。又詔除奴婢射傷人棄市律。又詔民有被略爲奴婢。自認者。免爲庶民。自此以後。專殺者禁。炙灼者禁。五十以上。可得自由。始有奴婢亦人之感覺。若漢以前。則視爲當然也。至晉時。奴亡。祇黥其面。西陽雜俎云。晉令。奴亡。黥兩眼。再亡。黥兩頰。三亡。橫黥目下。皆長一寸五分。不能殺也。

然自唐以來。不免箠笞之苦。撫言云。有奴事蕭穎士十年。笞箠備至。祇不敢專殺耳。至於炙灼侍婢。以在閨房之內。官家不易知。雖今日不免。吾每聞其聲。每徬徨慘痛。恨不使其主人。卽身受其苦。嗚呼。此等惡習。何日革除淨盡耶。

### 唐仍有官奴婢

次柳氏舊聞。玄宗幸太子宮。見使用無妓女。令高力士選民間女五人進之。力士曰。掖庭中故衣冠以事沒人者不少。宜可備選。又劉無雙傳。以父曾爲朱泚僞官。置大辟。無雙沒入掖庭。又因話錄。天寶末。蕃將

阿布思伏法，其妻配掖庭。是唐罪人妻子，仍淪爲官奴婢也。惟據史傳所載，祇掖庭有之，他衙署不見。蓋較漢時少多矣。餘民間所有奴婢，大概皆因貧而爲也。

### 唐脫奴婢籍名從良

唐蔣防霍小玉傳：長安有媒鮑十一娘者，故薛駙馬家青衣也。折券從良，十餘年矣。久劉無雙傳：蒼頭塞鴻云：某已得從良客戶。又隋唐嘉話：京兆韋衰有奴名桃符，有胆力，每征討必從。衰以久經驅使，乃放從良。是蓋因自古凡爲奴婢者，皆罪人，非良人，故以脫奴籍爲從良。豈知因貧自鬻者，原本良人，非罪人，從良云者，殊不公允也。

### 唐時仍貧則賣僮僕

白行簡李娃傳：生囊中盡空，乃鬻駿馬及其家僮。歲餘資財，僕馬蕩盡。是唐時仍以奴爲資財也。

### 歷代奴婢價

晏子以一騶贖越石父，是春秋一奴價可抵一馬。漢王褒僮約：買奴便了，價萬五千。梁任昉彈劾劉整云：以錢七千贖奴當伯。取婢綠草貨得七千，是奴價以六朝時爲最賤。且男女價相若。唐以後卽少見，蓋奴漸少矣。然婢仍多，且婢價較奴價日貴也。

### 古奴僕之服裝

古奴婢皆青衣。通鑑懷帝被虜，青衣行酒，是奴而青衣。霍小玉傳：鮑十一娘者，故薛駙馬家青衣也，是婢而青衣。光武紀：彭寵爲其蒼頭所殺。注：秦謂奴爲蒼頭，以別於良人。又梁武帝詩：平頭奴子擎履箱。李白詩：平頭奴子搖大扇。蒼者黑也，平頭者言奴所服之帽不許有屋，卽今日戲劇所服之平頂奴帽是也。故一望而知爲奴。又韓愈詩：一奴長鬚不裹頭。一婢赤脚老無齒。摹繪奴婢之狀況如目覩矣。

古奴僕之忠主

古奴僕之忠於主人者甚衆，茲舉一二以見梗概。後漢書李善傳：善，清陽人，本同縣李元蒼頭也。元家病疫相繼死，唯孤兒續生，始數旬，奴婢謀殺之而分其財產。善負孤兒潛逃，親自哺養，乳爲生漚，續十歲歸告奴婢於長吏，收殺之。光武間，拜善爲太子舍人，遷日南太守，轉九江太守。又凍水紀聞：王逵者，屯田郎中李曇僕也。旣而曇父子俱坐事繫獄，親友無敢餉問之者。逵旦夕守臺門，給飲食四十餘日。曇貶恩州，諸子流嶺外，逵哭送之。旣而曇死，逵爲治喪，朝夕哭奠如兒子。他若唐之墨崑侖紅線，亦忠義之尤著者也。

自宋以來，惟聞買婢。老學菴筆記云：都下買婢，謂未嘗入人家者爲一生人，喜其醇謹是也。不聞買奴。至清末並買奴亦禁，然至今不能斷絕，冤苦時聞，或再數十年可與奴一律絕迹乎？

傭與客作

傭與僮僕異。古所謂僮僕皆奴也。奴不能自由。傭有短傭。有長傭。短傭或一日。或二三日。長傭或以月計。以年計。計時受值。皆可自由。自春秋有之。說苑甯戚爲商旅。賃車以適齊。賃者僱也。僱卽傭也。至戰國漸多。史記荊軻傳。高漸離變姓名爲人庸保。匿作於宋子。齊世家。湣王子法章爲莒太史敫家庸。范雎傳。臣爲人庸賃。庸與傭通。注云。謂庸作受僱也。至漢魏益多有爲農家傭者。如陳涉傳。常與人傭耕。兒寬傳。時行貨作。帶經而鉏。梁鴻傳。爲人賃舂。有傭於商家者。如樂布傳。窮困賣庸於齊。爲酒家保。杜根傳。爲宜城山中酒家保。有傭於學校者。如兒寬傳。詣博士。受業。孔安國。貧無資用。常爲弟子都養。師古曰。主給烹炊也。世說服虔。匿姓名爲崔烈門人。賃作食。有傭於官署者。如班超傳。家貧常爲官傭書。其期最短者。謂之客作。高士傳。夏馥既誣入黨。錮乃改服易形。入林慮山中。爲治工客作。魏志。焦先者。隱士也。餓則出爲人客作。飽食而已。尤自由也。蓋古士人。身體健壯。而質樸。故窮則爲傭。以自給。不以爲恥。六朝以後。士風華靡。雖困鮮肯爲傭以求活。祇世說記袁宏爲人傭運租。此亦士人習尚之一小變也。

### 古待遇傭耕者狀況

韓非子。夫賣庸而播耕者。主人費家而美食。調選也布而求易錢者。非愛庸客也。曰。如是耕者且深。耨者熟耘也。庸客致力而疾耕。盡巧而正畦陌者。非愛主人也。曰。如是羹且美。錢布且易云也。按今日田家待遇傭工。年節以酒肉犒賞。春夏以巾布餽贈。傭者尙輒有煩言。不知數千年前情狀已如此也。



## 卷三十五

行唐尙秉和著

### 治病難痊

古醫病之法。周禮天官疾醫瘍醫獸醫。言之詳矣。而黃帝內經素問及史記扁鵲傳。尤能闡發其精理。茲俱不錄。錄其治法爲後世所無者數則。以及古社會於醫者之情況。

#### 古以口吮疽

史記吳起爲將。與士卒分勞苦。卒有病疽者。起爲吮之。卒母聞而哭之。人問其故。母曰。往年吳公吮其父。父戰不旋踵而死。今又吮其子。妾不知死所矣。是可證古社會皆以口吮疽。故起施之士卒。期得其死志。蓋疽熱必有膿血。以手攪之則痛。不如以口吸收血易淨盡。且不痛也。

#### 古以舌舐痔

莊子宋人曹商使秦歸。以得車多驕。釋莊子曰。吾聞秦王有病。召醫破癰潰瘡者。得車一乘。舐痔者得車五乘。所治益下。得車愈多。子豈治其痔耶。按說文舐以舌取物也。痔後病也。增韻隱創也。是痔者肛門之病。今所謂痔創漏創也。而以舌舐之。今雖貴人不能有是也。莊子謂所治益下。下莫下於斯矣。

古爲小兒剔首攔瘞

韓非子。夫嬰兒不剔首則腹痛。不攔瘞則浸益。剔首攔瘞。必一人抱之。慈母治之。注嬰兒癰瘞。常搗剔勿使滋益。按注說非也。剔首攔瘞。自爲二事。嬰兒頂門多不潔。故剔除之。至不剔則腹痛。今已不曉其義。瘞者癰也。搗者擠其膿血也。非與剔首爲一事。又彈瘞者痛。夫癰至成熟腫起。破之潰之。法至多矣。乃必彈之。以試其熟否。則後之所嗤也。

至漢時吮癰已嫌其穢

史記佞倖傳。文帝常病癰。鄧通常爲帝啗。音信吮之。文帝不樂。從容問通曰。天下誰最愛我者乎。通曰。宜莫如太子。他日太子入問疾。文帝使啗癰。啗癰而色難之。夫吸膿血於口中。乃天下之至穢。雖以父子之親。有不能勉強者。故後世爲之者少也。

古皆官醫

周禮天官醫師。掌醫之政令。聚毒藥以供醫事。凡邦之有疾病者。疔瘍者。造焉。則使醫分而治之。歲終則稽其醫事。以制其食。十全爲上。十失一次之。十失二次之。十失三次之。十失四爲下。觀是則周時所謂醫皆官醫也。藥亦官家所備。蓋其時士民既無醫學。亦無藥劑。故政府設專官。以供民求取。然釋經文。似皆就醫而無往醫。若疾重而不能造者。其如之何。此一疑問也。又有疾醫。今之內科也。瘍醫。今之外科也。獸



醫。今之獸醫也。惟食醫專掌飲食。爲今之所無。

### 至春秋末始有以醫爲業者

史記扁鵲傳。既傳長桑君禁方。爲醫。或在齊。或在趙。在趙者名扁鵲。診趙簡子病。過邯鄲。聞貴婦人。卽爲帶下醫。過洛陽。聞周人愛老人。卽爲耳目痺醫。入咸陽。聞秦人愛小兒。卽爲小兒醫。秦太醫令李醯自知伎不如扁鵲。使人刺殺之。是可證庶人初有以醫爲業者。而伎過官醫。故官醫妬之。若後世則不勝其妬矣。

其在漢初。則齊人太倉公。診脈知人生死。行遊諸侯。不以家爲家。或不爲人治病。病家多怨之者。被告得罪。少女緹縈上書願以身代者。是也。其伎與扁鵲等。漢末則華佗。佗之師爲長沙太守張仲景。仲景名機。華佗聞機名。特詣長沙拜謁。機盡以其術傳之。其著述。今祇存傷寒論。餘外科書盡佚。此皆以士人專精醫術。是以漢書杜延年傳云。昭帝末。徵天下名醫。可見業醫者多。不似春秋前之必爲官醫也。

### 中醫退化之故。因自古賤醫

中國醫術。古發明。若是之精。魏晉以降。復失傳者何也。以中國社會。自古賤醫。論語云。人而無恆。不可以作巫醫。醫與巫並稱。其賤可知。列子云。雖乞兒馬醫。不敢侮也。以馬醫與乞兒並。其輕可想。史記李廣傳。以良家子從軍。如淳曰。謂非醫巫商賈百工也。是爲醫。卽非良家。魏志華佗傳云。佗本作士人。以醫見業。

意嘗自悔。悔醫賤於士也。世說殷浩妙解經脈。有常所給使。忽叩頭流血。言其母病。浩感其誠。爲診脈處方。一劑便愈。遂燒其秘方。恐人知其能醫而賤視也。夫社會風尚如此。讀書士人。誰肯爲醫。其肯爲者。學業類不足以輔之。故古人費千辛萬苦而得之者。後之人皆不能傳也。

### 周時防疫之法

古防疫之法。至爲精密。如杼井菽室。以灰水攻蠃蟲。而離疫尤爲大觀。秦漢以後。遺法皆廢。獨離禮尙存。以近於遊戲也。

### 以蜃炭攻蠃蟲

周禮秋官。赤髮氏掌除牆屋。以蜃炭攻之。以灰洒毒之。凡隙屋除其蠃蟲。按周時無石灰。而以蜃殼燒灰。其功用與今石灰同。灰洒者。蓋以灰和水。洒於屋隙。毒死蠃蟲。蠃蟲者。蚤蝨之屬。可爲傳染疫病之媒介。故殺之。自周時卽研究至此。可謂密矣。

### 菽室防疫

管子當春三月。菽室燠造。注燠謂火以乾之也。三月之時。陽氣盛發。易生瘟疫。楸樹鬱臭。以辟毒氣。故燒之於新造之室。以禳祓。按說文菽蕭也。是艾草之屬。茲注云楸樹。是以菽爲楸也。新造之室。濕氣亭蓄。易生瘟疫。燒菽使乾。兼以殺疫。則室可安居。

至春則淘井易水

管子鑽燧易火。杼井易水。所以去茲同滋毒。注春時之井。當杼之以易其水。去滋長之毒。按方言杼。柚作也。土作謂之杼。水作謂之柚。據此則杼井者。必淘掘井土。使易新水。以舊水過冬。有亭毒也。清時北方人家。至春必淘井。蓋猶仍周制。亦所以防疫。

儺疫

周禮夏官方相氏。掌蒙熊皮。黃金四目。玄衣朱裳。執戈揚盾。率百吏而時儺。同儺以索室驅疫。注方相者。方想言可畏怖也。方想蓋漢語也。冒熊皮者。以驚毆癘疫之鬼。如今懸頭也。時儺四時作。索度同搜也。按說文懸醜也。如今之顛頭。徐鍇注。方相四目也。卽鄭所謂懸頭。然則漢之懸頭。卽周之方相。必黃金四目。執戈盾者。古以爲厲有鬼。月令云。季春命民儺。有大陵積尸之氣。與民爲厲。是其證。方相氏家。遂室毆鬼。見此凶威。自驚怖逃去。是以孔子恐並驚其室神。遇鄉人儺。則朝服立阼階。俾廟神有所依附。今鄉里疫重。輒然爆竹以衝散疫氣。猶是理也。

漢儺年祇一次以十二月臘祭前一日爲儺期

張衡西京賦。爾乃卒歲大儺。毆除羣厲。方相秉鉞。巫覡操筭。乘續偃子萬童。丹首玄製。桃弧棘矢。所發無集。飛礮雨散。剛瘡雄鬼必斃。煌火馳而星流。逐赤疫於四裔。

按文選注引續漢書曰。大儺謂逐疫。選中黃門子弟百二十人。爲儺子。皆赤幘皂首。逐疫禁中。蓋禁中地小。祇百二十人卽足。若國民逐疫於都市。則非萬童不足以示威。又注引漢舊儀。歲十二月。使方相氏蒙虎皮。黃金四目。玄衣丹裳。執戈持盾。率百隸時儺。索室驅疫。以桃弧革矢。且射之。以赤九五穀播酒之。然則漢儺裝飾與周同。儺子萬人。且必以童。並以赤九五穀。到處播酒。其繁盛則較周或過也。惟查月令仲秋季冬季春皆儺。漢祇十二月儺。禮儀志云。先臘一日大儺。謂之逐疫。是儺與臘並行也。

唐儺疫之盛況

樂府雜錄。儺用方相四人。戴冠及面具。黃金爲四目。衣熊裘。執戈揚盾。口作儺儺之聲。以除逐也。右十二人。皆朱髮。衣白畫衣。各執麻鞭。辨麻爲之。長數丈。振振聲甚厲。口呼各凶神名。振子豆百。小兒爲之。衣朱褶。青襦。戴面具。以晦目爲之。按面具者。漢以木。禮儀志。百官官府各以木面獸。是刻木爲之。後世以紙糊戴於首。使猶惡。可怖。卽周禮之黃金四目。亦假面具也。不然。如何能以黃金爲目。目胡能四哉。又周儺漢儺。皆玄裳。唐則衣白衣而畫之。更被以朱髮。狀尤可畏。又以麻鞭振響。亦古所無。振子卽漢之儺子。振子豆者。蓋令儺子洒豆打鬼也。

宋儺疫

老學菴筆記。政和中大儺。下桂府進面具。比進到稱一副。初訝其少。乃是以八百枚爲一副。老少妍醜。無

一相似者，乃大驚。至今桂府作此者，皆致富。按一副卽八百枚，是凡儼者，無不帶面具也。又夢華錄，除夕禁中大儼，用皇城親事官，戴假面，繡畫色衣，執金槍龍旗，以是證宋儼比唐尤奇麗。蓋久視爲遊戲矣。

#### 古防疫已用隔離法

漢書平帝紀，民疾疫者，舍空邸第，爲置醫藥。按疫起傳染最速，舍之空邸，使與家屬隔離。自漢已如此也。又曾子固越州救菑記，春大疫爲病坊，募僧二人，視醫藥飲食，是亦用隔離法防疫。但病者無人敢看護，僧家慈悲，故募以侍疾也。



## 卷三十六

行唐尙秉和著

### 賦稅力役戶籍

賦役之制。通志等書詳矣。茲所述者。多可驚駭之事。令人知百姓之不易爲。自古而然。而非其詳制也。又後世習焉不察。多謂三代賦役輕於後世。雖班固亦如此。豈知孟子之稱述三代。對戰國立言耳。今一追想其實況。民困亦甚也。茲編正比較其實事也。

#### 周賦稅過後世

漢書食貨志。周時有賦有稅。稅謂公田什一。賦謂車馬甲兵士徒之役。按孟子云。夏后氏五十而貢。殷人七十而助。周人百畝而徹。其實皆什一也。什一者。謂十取其一也。戰國亂世。不能爲準。若漢初。則十五取一。漢末及東漢。則三十取一。過三代遠矣。供車馬甲兵士徒之役者。按周禮地官。縣師若將有軍旅。會同作其衆庶及馬牛車輦。又鄒長則以旗鼓兵革帥而至。是以遂人以歲時登記夫家衆寡。及六畜車馬。必登記者。備賦之也。不但此也。委人職云。掌斂野之賦。斂薪芻。凡疏材。木材。凡畜聚之物。注疏材。草木有實者也。畜聚之物。瓜瓠芋葵。禦冬之具也。是正賦正稅以外。尙斂及薪芻蔬果。以備賓客師旅之用。由今思

之。周民負擔之重。及其被擾情況。殆過於後世。蓋封建之過也。

### 周即有人口稅

周禮天官大宰。以九賦斂財賄。鄭玄云。賦謂口率出泉也。今之算泉。疏以九賦斂財賄者。此賦謂口率出泉。其處有九。故云九也。又地官閭師職。凡無職者。凡夫布。注使出一夫口稅之泉。按泉者錢也。天官外府。掌布之出入。注布泉也。藏曰泉。行曰布。口率者。以口爲率。家有若干口。即出若干泉。漢曰算。算口出錢。今外洋有人頭稅。係以頭計。茲則以口計也。於正稅。正賦以外復稅及人口也。

### 周稅居宅

周禮載師。凡任地國宅無征。後鄭云。國宅凡官所有宮室。吏所治者也。夫經特云國宅無征。是民宅征也。然民宅征率。經無明文。疑下云園廛二十而一。即民宅征率也。民宅亦名廛。非必商賈。遂人夫一廛。田百畝。注廛城邑之居。又詩胡取禾三百廛兮。傳一夫之居曰廛。是廛即民宅。園廛二十稅一。即民宅二十稅一也。以故先鄭云。國宅城中民宅無稅。而後鄭不從之。誠以一夫之廛與田。皆受之官。皆常有稅。特宅稅輕於田稅耳。

### 周已斂布帛

孟子有布縷之征。有粟米之征。有力役之征。君子用其一而緩其二。是周時已征及布帛也。



總周時之稅有田稅宅稅口稅車馬甲兵薪芻布縷菜蔬等稅凡後世所有者周無不有之周所有者後世或無也

### 漢田稅輕於周

周田稅十取一公羊傳所謂天下之中正什一行而頌聲作也至漢初則十五稅一孝惠元年詔減田租復十五稅一是也後三十而稅一王莽傳漢氏減輕田租三十而稅一是也王莽廢至光武而復建武中詔田稅三十稅一復西漢舊制是漢之田賦較周輕數倍矣

### 漢人稅百二十錢

高祖紀初爲算賦如淳曰漢舊儀民年十五以上至五十六出賦錢人百二十爲一算爲治庫兵車馬按周之口率錢不詳其確數又不詳其年若干方出口錢即使輕於漢然另有車馬甲兵之賦漢則以此賦治車馬甲兵則漢仍輕於周也

### 至武帝復稅小兒年二十三錢

漢算雖稅人然祇稅成童以上之男子尙未若周以口爲率至武帝用兵始算口並嬰兒亦稅之貢禹傳禹以爲古民無賦言不稅人周宣晚出禹未見算口錢起伐四夷重賦於民民產子三歲則出口錢故民重困生子輒殺甚可悲痛宜令兒七歲去齒乃算詔從之其口賦若干據昭帝紀母收四年五年口賦注如淳曰漢儀注

民年七歲至十四，出口賦錢二十三，二十錢食天子，三錢補車騎馬，是蓋貢禹奏請以後之定制。若以前則兒三歲卽出錢，且不論男女，祇有口卽稅錢，誠以民至十五乃算，其十五以前不算，甚爲疏漏。然以齔齡之年而使出錢，則無名故名曰口，又幼童難出整算，故祇賦二十三。在當時計臣可謂滴水不漏矣。又按貢禹請年二十乃算，茲漢儀仍言至十四，是十四以前出二十三，以後出百二十也。詔從其七歲，未從其二十也。又景帝詔民年二十乃傅，禹所請乃復景帝舊制也。

武帝復稅人家藏錢及六畜

武帝紀初算緡錢。李斐曰：緡絲也。以貫錢千錢爲一貫，出算二十也。是百分稅二也。夫人家藏錢難以稽核，稅者必少，故元鼎元年詔民告緡者，以其半與之。觀此則其稅之不當，且難斂錢可知矣。而用以擾民，則有餘，真可謂拙而少功。又昭帝紀毋斂今年馬口錢，是養馬亦出稅也。

魏晉復兼稅布縷以迄于明

通典魏武初平袁紹，令收田租畝粟四升，戶絹二匹，綿二斤。晉初畝租米三升，戶輸絹三匹，綿三斤。按中原地畝收穀不過四五斗，今稅粟米三四升，以二穀一米計，是幾十取二也。稅莫重於是矣。又西漢無稅絹絲之事，自魏晉開其端，至六朝隋唐後兼稅麻布及麻，自木棉興，至元明於布絹絲綿之外復稅木棉。若干斤皆實物，故歷朝復有絹布匹長幅寬及重量之規定，然胥吏上下其手，繁瑣擾民之狀況可知矣。

至清代始將布疋絹帛之稅一概革除而田稅亦輕于往古也。

### 民役

自春秋以來凡國家築城浚河築路修造宮室官署無不役民爲之此役於工者也。瞭望烽燧守埃關塞此役於兵也。在國民對於國家爲當然義務然使之不時或太過如秦築長城隋開汴河不世建築雖賴以成而民亦叛之。今將漢以前役民概略略述以覘古社會狀況至漢以後詳制自有專書。

### 周赴役免役期限及自然免役之人

周禮地官鄉大夫以歲時登其夫家之衆寡辨其可任者國中自七尺以及六十野自六尺以及六十五皆征之。注征者給公上事也。疏七尺者韓詩外傳云二十行役故知此七尺爲二十六尺者年十五論語可以託六尺之孤鄭注云六尺年十五以下故知十五是遠郊年十五卽赴役至六十五免國中年二十赴役六十而免也。此定制至春秋猶守之左傳襄三十年晉悼夫人食與人之城杞者絳縣人或年長矣與於食後問知其年七十三矣趙孟召之而謝過焉遂仕之而廢其輿尉是過免役之年而役之故罪其王者鄉大夫又云其舍者國中貴者賢者能者老者病者是自然免役之人也。

### 周役民年祇三日而弗與食

王制用民之力歲不過三日又周禮司徒均人豐年則公旬用三日焉中年二日無年一日由是證役時

不惟不與值。且并不與食。如公家與食。則無豐歉之計較。彼胥倖夫人之食與人者。以爲其母家築城。偶食之以爲犒。非常食之也。

漢赴役期免役期

高帝紀。蕭何發關中老弱未傅者悉詣軍。如淳曰。律年二十三傅之。漢儀注云。民年二十三爲正。一歲爲衛士。一歲爲材官騎士。習射御騎馳戰陣。年五十六衰老。乃得免爲庶民。就田里。今老弱未嘗傅者皆發之。未二十三爲弱。過五十六爲老。師古曰。傅著也。言著名籍。給公家徭役也。據是。是漢初民年二十三始充役。至五十六而免也。至景帝時改爲二十。景帝紀。令天下男子年二十始傅。師古曰。舊法二十三更舊制也。

漢兵役一月戍邊役三日然可僱人代役

昭帝紀。元鳳四年正月。詔三年以前逋錢未出更賦未入者皆勿收。如淳曰。更有三品。有卒更。古者正卒無常也。皆當迭爲之。一月一更。是謂卒更也。有踐更。貧者欲得顧更錢者。次直者出錢僱之。月二千。是謂踐更也。以是證漢民每年有常兵一月義務。如不赴直。卽出錢二千。令前卒代也。如淳又云。有過更。天下人皆直戍邊三日。亦名爲更。律所謂徭戍也。然不可人人自行三日戍。又行者當自戍三日。不可往便還。因使往。一歲一更。諸不行者。出錢三百入官。官以給戍者。是謂過更也。漢因秦法而行之。後遂改易。有謫乃

戍邊一歲耳。以是證漢戍邊義務。每人歲三日。其實不能行。因自內地至邊塞。或數百里。或數千里。行數月。始至三日。即更徒勞往返。於勢不便。故使往者。歲一更。其不往者。則與往者以錢。然錢交官。官蓋不全與戍者。若全與。則一年得三萬六千。可致富。官蓋以此爲聚斂之法耳。故逋者多。

#### 漢役平等

昭帝紀。雖丞相子。亦在戍邊之列。又蓋寬翹傳。身爲司隸。子常步行。自戍北邊。

#### 六朝時從軍自買鞍馬

木蘭詩。軍書十二卷。卷卷有爺名。阿爺無大兒。木蘭無長兄。願爲市鞍馬。從此替爺征。東市買駿馬。西市買鞍轡。南市買轡頭。北市買長鞭。朝辭爺孃去。暮宿黃河邊。夫從軍已苦。從軍而自買鞍馬。尤非富人不辦。也是等詳細狀況。史皆不詳。賴詩歌傳寫。略知其梗概。而歎古社會狀況之難。與今等也。

#### 古從軍戍邊之慘狀

自唐以前。皆徵兵制。除貴人外。皆有當兵義務。非若後世募兵。多無室家。故一遇戰事。則生死難卜。遠戍邊塞。則多年不歸。征夫有離鄉之悲。思婦有久曠之怨。臨行送別。哭泣悲號。至爲慘痛。此等狀況。惟於詩歌中見之。他不能親切也。

古遠戍。其衣皆由家寄。官家蓋負輸送之責。而不爲製衣。故最動思婦之恨。宋謝惠連擣衣詩云。紈素既

已成。君子行未歸。裁用笥中刀。縫爲萬里衣。盈篋自余手。幽絳候君開。腰帶準疇昔。不知今是非。又唐杜甫。擣衣詩。亦知戍不返。秋至拭清砧。已近苦寒月。况經長別心。寄辭擣衣倦。一寄塞垣深。用盡閨中力。君聽空外音。又陳陶詩。可憐無定河邊骨。猶是深閨夢裏人。讀此三詩。知古社會幽怨之婦多矣。

其述從軍送別者。如杜甫新婚別。結髮爲妻子。席不暖君床。暮婚晨告別。無乃太匆忙。妾身未分明。何以拜姑嫜。是必當時社會有此事。故有此詠。又垂老別云。男兒既介冑。長揖拜上官。老妻臥路啼。歲暮衣裳單。孰知是死別。且復傷其寒。是垂老而從軍。無子可知。妻何以爲情。其悲傷與新婚等。又兵車行。車轆轤。馬蕭蕭。行人弓箭各在腰。耶娘妻子走相送。塵埃不見咸陽橋。牽衣頓足攔道哭。哭聲直上千雲霄。夫有妻有子。是中年而從軍者。乃家屬哭送。哭聲震天。不有詩史。後世孰知古社會有如此慘狀哉。

### 戶籍

古以有口賦。故戶籍冊也最重。漢魏以後無口賦而徵兵。故戶籍仍重。其謂中國人戶口數不確者。乃清以來現象耳。若唐以前。則人口數不惟真確。即男女有徵管者。籍必實也。其死亡之率。更真確不待言矣。非若後世之視爲具文也。

### 周有戶籍專官

周禮秋官司民。掌萬民之數。自生齒以上。皆書於版。異其男女。登下其死生。又地官遂人以歲時登其夫

家之衆寡。國中自七尺以及六十。野自六尺以及六十五。皆征之。其捨者國中貴者賢者能者服公事者。老者疾者皆捨。以歲時入其書。夫曰自生齒以上。皆書。是民間生兒。無論男女。必報官也。曰登下其生死。是無論男女長幼。凡病死。必報官也。曰七尺六尺以及六十六十五。皆征之。是庶民年歲。官家皆有冊記。雖欲避而不能也。

#### 周戶籍上親屬必詳

大戴禮記。古者殷屬。爲成男成女名屬。升於公門。注殷衆也。成者成人者也。名姓名。屬親屬。是一戶之內。除家主外。其長幼親屬。皆登於籍也。

#### 漢唐造戶口冊時。無論男女老少。皆入城查看

漢唐戶口籍。詳於後世。夫人而知之。至其登記時。如何情狀。史不言之。若不詳攷。不知其擾民其嚴厲。至於如此也。攷後漢禮儀志。仲秋之月。縣道皆案戶比民。又江革傳。母至歲時。縣當案比。革以母老。不欲搖動。自在轅中輓車。不用牛馬。唐章懷注云。案比者。驗以比之。猶今貌閱也。按婦人旣不能給役。婦而老。尤無用。乃年年校閱其相貌。以憑登記。老婦如此。少婦可知。女子如此。男子可知。卽此一端。古社會庶民之多事。過於後世也。乃自漢迄唐。慎重如出一轍。誠以人人相貌。皆有特別標識。或小有改易。年年校閱。登記詳悉。如犯法而逃避。則易於緝獲也。

唐戶口冊登記之標識種種

唐開元二年交河柳城二縣戶口冊冊式如表式。首填戶主姓名。次填親屬。大戴禮所謂殷屬也。其親屬之中。無論男女。有皆必書。有誌必書。書胥者如右足跛。左目眇等。書誌者如耳下有瘤。面何部有黑子。及面白面赤面黑等是也。是冊爲新疆布政使王晉卿先生得之迪化古墓中。原爲一畫。繪一松。松下立一女鬼。糊於墓牆上。高約五尺。寬一尺六七。背一分厚。皆戶口冊紙。今迪化正唐交河柳城二縣地。王維詩所謂瀚海經年別。交河出塞流是也。迪化空氣乾燥。故紙經千年不壞。縣印大與今等。先生曾借余觀之。故得其詳如此。



## 卷三十七

行唐尙秉和著

### 行旅

#### 周會盟時旅野狀況

周禮天官掌舍。掌王會同之舍。設陞極再重。設車宮。轅門。棘門。爲帷宮。設旌門。注陞極者。聯三木交互。以爲遮列。車宮者。次車爲藩牆。轅門者。仰車以轅表門。棘門者。以戟爲門。帷宮者。張帷幕以爲宮室。旌門者。樹旌於門也。按古會盟不於都邑。於曠野。故以車爲垣牆。以轅爲門。張帷幕以爲宮室。左傳昭十三年。晉合諸侯於平丘。子產子太叔相鄭伯以會。子產以幄幕九張行。子太叔以四十。至日。命外僕速張於除。於除地。是其證也。此國君與卿大夫之旅行。雖齋攝多。輜重爲累。然有車馬。有僕役。所至有官邸。尙能任之。若士庶旅行。則其難有三。

#### 一古無鬻食者。凡旅行須自行擔糧。

莊子逍遙遊。適百里者宿春糧。適千里者三月聚糧。又胙餼篇。某所有賢者。羸糧而從之。又庚桑子曰。今吾才小。不足以化子。子胡不南見老子。南榮趺羸糧七日七夜。至老子之所。按羸者擔也。列子云。商丘開

因假糧荷春之子華之門。春者竹器。所以盛糧。荷亦擔也。倘中途糧匱。則不得食。列子韓娥東之齊。糧匱過雍門。鬻歌假食。又論語孔子在陳絕糧。從者病。莫能興。此皆旅行自行裹糧之證也。

一旅行須攜釜鬲自行炊飯

古裹糧旅行。飯須自炊者勢也。自炊則須攜釜鬲。史記蔡澤傳。去之趙。見逐。入韓魏。遇盜。奪釜鬲於途。又孟子。孔子接淅而行。是皆攜釜鬲旅行。自炊之證。蓋春秋時雖有逆旅。而不鬻食。客至假釜鬲爲炊。少則可。衆則有時不給。故必自攜始便於用。夫釜鬲尙須自備。則匕箸碗勺之類。更不待言。以是證古行李之繁多。過今日十倍。

一旅行無節傳則即時入獄

客無驗者。逆旅不納。僉以爲商君之法。豈知自成周卽如此。周禮地官大司徒。令無節者不行於天下。注無節不行。所以防寇姦。又比長職。徙于國中及郊。則從而授之。若無授無節。則唯圜土也納之。又司關。則以節傳出內之。又掌節。凡通達於天下者。必有節。此其事可於韓非子證之。韓非子云。溫人之周。周不納。客主客。問之曰。客也。對曰。主人。問其巷人而不知也。吏因囚之。是旅行而無驗。卽納圜土。又史記孟嘗君傳。昭王旣釋孟嘗君。卽馳去。更封傳。變姓名以出關。關法。鷄鳴而出客。孟嘗君恐追至。客之居下坐者。能爲鷄鳴。而鷄盡鳴。遂發傳出。按更封傳者。書僞姓名於傳上。其入關時所給之真傳。爲孟嘗君。茲恐見阻。故

易僞名。是無節傳。卽不能出入關。又商君傳。商君亡。欲舍客舍。舍人不知其商君也。曰。商君之法。舍人無驗者坐之。驗者證也。亦傳也。是無傳。並不能宿逆旅。然則古旅行之艱難。飲食猶其次也。

### 春秋戰國客店之情狀

周時行旅。除官吏出使。商賈運輸外。旅客蓋甚稀。而官吏所至。駐官邸。周禮遣人所謂十里。有廬。三十里有宿。五十里有候館。是也。故以逆旅爲業者少。然亦有之。國語陽處父如衛。返過甯。舍于逆旅甯嬴氏。說苑鄭桓公東會。封於鄭。暮舍於宋東之逆旅。逆旅之叟從外來曰。客將焉之。莊子。陽子之宋。宿於逆旅。逆旅人有妾二人。是皆非官設。而自以逆旅爲業者也。又莊子。孔子之楚。舍於蟻邱之漿。注司馬云。謂逆旅舍以菰蔣草覆之也。李云。謂舍於賣漿家。是蓋業逆旅而兼賣漿。故孔子舍之。又陽子居至梁。遇老子於中道。至舍進盥漱巾櫛。與老子語。其往也。舍者迎將。其家公執席。其返也。舍者與之爭席矣。是尤私人業逆旅業之證。又史記商君傳。亡至關下。欲舍客舍。舍人曰。舍人無驗者坐之。是商君頒布客舍規程。不得貪受報而宿無驗之客。其爲商業尤顯然。第其時雖有客店。似不賣食。故客仍須自炊。漿者飲料。如今之賣茶非食也。

### 周貴人旅行時祖道犯軼之盛況

祖道者。祭道也。風俗通云。共工之子曰脩。好遠遊。舟車所至。足迹所達。靡不窮覽。故祀以爲祖神。祖者徂

也。往也。詩云韓侯出祖。左氏傳襄公將適楚。夢周公祖而遣之。又按詩大雅仲山甫出祖。箋云祖者犯軼之祭。犯軼者按周禮夏官大馭掌馭王路也。以祀及犯軼。王自左馭馭下。祝登受轡。犯軼遂驅之。注行山曰軼。犯者封土爲山象。以菩音阜芻棘柏爲神主。既祭則以車轢之而去。喻無險難也。王自左馭者大馭既下車祭軼。王暫執轡祭訖馭登車取王手之轡遂驅而速行也。又按詩大雅云取蕭祭脂取粢以軼脂與粢乃祖道之祭品。以是證祖道在先既祖則以車轢神主及土山以行。故曰犯軼也。按祖神風俗通以爲祖者祖也。而漢書疏廣傳祖道供張東都門外注云祖者送行之祭。一說黃帝之子縈祖好遊遠死於道後人以爲行神故出行必祭之而飲於其處是以祖爲人名似較應劭訓祖爲往說爲勝。

周送行必飲餞

詩大雅申伯行邁王餞於郿。箋云祖而舍軼飲酒於側曰餞。又聘禮乃舍軼飲酒於其側。注大夫道祭無牲牢酒脯而已。故祭畢又於旁飲酒以餞別也。是自王及卿大夫送別者皆飲酒。又詩邶風出宿於沛飲餞於禰。女子有行遠父母兄弟是女子送別亦飲饌也。

漢魏時旅行

其官吏旅行則舍宿都亭。史記司馬相如傳往舍都亭。嚴延年傳母止都亭不肯入。或止鄉亭。鮑宣傳舍

宿鄉亭。人皆非之。是也。或止傳舍中。尹翁歸傳。是日移病不聽事。因入臥傳舍。何武傳。武行部必先詣舉宮見諸生。然後入傳舍。傳舍與都亭皆官。設有官。掌之。專備官吏過往。魏相傳。御史大夫桑宏羊客。詐稱御史止傳。丞不以時謁。客怒縛丞。師古曰。傳謂縣立傳舍。是可證非官不許入。故詐稱御史。又官吏入傳舍。傳舍須供飲食。龔勝傳。勝辭官歸里。詔行道舍傳舍。縣次具酒肉食。從者及馬。是因勝既罷官。特詔仍以官吏待遇。又光武紀。至饒陽。官屬皆乏食。光武乃自稱邯鄲使者入傳舍。傳吏方進食。食使從者饑爭奪之。是皆傳舍供給官吏飲食之證。以故廉潔自好者。則不入傳舍。魏志張既傳注。每行縣飭吏攜餼。自刈草食馬。不宿亭傳是也。

漢客店仍不賣食客仍自炊

漢官吏旅行。有傳舍。有都亭。殊無所苦。若士庶旅行。較周時少便者。商設逆旅。似漸多。後漢黃憲傳。潁川荀淑。至潁陽。遇憲於逆旅。又郭泰傳。每行宿逆旅。輒躬洒掃。及去後。人見之曰。此必郭有道宿處也。又世說。鄭玄欲注春秋傳。尙未成。時行與服子慎遇客舍。又魏武詩。逆旅整設。以通商旅。可證其時旅店已漸多。惟仍不具食。後漢周防傳。父揚少孤危。常修逆旅。以供客。而不受其報。是不賣房值耳。若具食而不受報。焉有此力。又魏志胡質傳注。爲武威太守。子威以家貧無車馬。自驅驢單行。拜見父。告歸。質賜絹一匹。爲道路糧。每至客舍。自放驢。取樵炊爨。食畢復隨旅進道。夫食畢復行。非夜可知。設客舍而售食。萬無日。

中。小。憩。之。時。必。自。炊。以。俟。時。而。少。行。路。也。

漢初旅行仍須持傳但祇過關用

漢書文帝紀十二年除關無用傳張宴曰傳信也若今過所也如淳曰兩行書繒帛分持其一出入關合之乃得過謂之傳也時承平久故過關廢傳至景帝四年七國反詔諸關復用傳出入自是迄漢末不廢甯成傳詐剽傳出關終軍傳步入關關吏予軍繻軍問此何爲吏曰爲復傳也復返還當以合符軍曰大丈夫西遊終不復傳棄繻而去及軍爲謁者建節出關關吏識之曰此使者乃前棄繻生也張宴曰繻符也若券契亦傳也由終軍傳證之可見未至關時旅行卽不用傳傳祇過關用又以證官吏雖過關不用傳也

至漢末凡官民旅行皆用傳否則廚傳不留

王莽傳吏民出入持布錢以副符傳不持者廚傳勿舍關津苛留師古曰舊法行者持符傳卽不稽留乃更令持布錢與符相副乃得過也廚行道飲食處傳置驛之舍也按此廚傳疑卽客舍非傳舍傳舍非官吏不得入龔勝告歸特詔令傳舍是其證又莽傳大司宮士夜過奉常亭亭長苛之告以官名亭長醉曰甯有符傳耶是官吏舍官舍須以符傳爲憑茲渾言吏民不持傳廚傳勿舍是庶民無傳者廚傳不敢留卽官吏無傳亦不敢留也觀師古注是爲漢舊法莽不過副以布錢耳是漢末旅行艱於漢初也

後漢過關符傳須向官家買

西漢時符傳無賣者。終軍傳。關吏予軍繻。是至關卽予傳之證。至東漢。則賣傳以爲斂財之法。郭丹傳。後從師長安。買符入函谷關。注符卽繻也。又東觀記。丹從宛人陳洮買入關符。是符傳亦可轉賣也。

東漢時旅行有符傳則到處護送

高士傳。申屠蟠與濟陰王子居同在太學。子居病卒。蟠卽負其喪至濟陰。遇司隸從事於河羣之間。從事義之。爲符傳護送。蟠不肯。投傳於地而去。按從洛陽至濟陰。東行不過關。然從事特與以符傳。云護送者。蓋有符傳卽可舍亭驛。免宿逆。旅行路益便也。

五代時旅行仍用傳

徐鉉稽神錄。道士張謹。旣失書囊行李。將及潼關。時秦隴用兵。關禁甚嚴。客行無驗。皆見刑戮。因不敢東渡。是至五代有事時。行路仍用傳也。

漢魏送別時之祖餞

漢書疏廣傳。廣及兄子受。上書乞骸骨。歸里。公卿大夫故人邑子。設祖道。供張東都門外。送者車數百輛。注祖者。送行之祭。因饗飲也。又劉屈氂傳。貳師將軍李廣利。將兵出擊匈奴。丞相爲祖道。送至渭橋。是送別兼飲饗與周同也。惟不言犯軼。似其時祇祭祖神也。

六朝時客店始賣食

世說王敦爲逆，晉明帝乃持金鞭著戎服騎馬，陰察地勢，未至十餘里，有客姆居店賣食，又魏書崔光傳，光弟敬友，置逆旅於肅然山南，大路之北，設食以供行者，是可證凡逆旅皆不設食，獨敬友設食，以便行人，故史特書其異，隋唐以來，客舍旗亭，皆賣飲食，行旅勞頓，所至如歸，與古異矣。

六朝時送別須啼泣，否則謂爲寡情

世說周叔治作晉陵太守，周侯仲智往別，叔治以將別，涕泗不止，仲智悲之曰：斯乃婦人，與人別，惟啼泣，便舍去。周侯名顯獨留，與飲酒，言語臨別，流涕拊其背曰：奴好自愛。又顏氏家訓：別易會難，古人所重，江南餞送，下泣言離，有王子侯梁武帝弟，出爲東郡，與武帝別，帝曰：我年已老，與汝分張，甚以惆悵，數行淚下，侯遂密雲言不雨，赧然而去，坐此被責。北間風俗，不屑此事，歧路言離，歎然分首，然人性自有少涕淚者，腸雖欲絕，目猶爛然，如此之人，不可強責。

按江淹別賦云：黯然銷魂者，惟別而已矣。狀送別之情，最爲親切，乃黯然銷魂則可，而必強以下淚，則外貌也。彼李陵送蘇武詩曰：攜手上河梁，日暮欲何之。其悲痛豈祇下淚而已哉？乃六朝人以是爲送別儀式，且以是而見責，其前乎六朝如漢魏，後乎六朝如唐宋，皆未有也，真特殊之風俗已。

唐宋時旅行已大便，惟唐仍以帛爲路費



明清以來，旅行者皆持銀，沿路易銅錢用之。若唐以前皆以帛爲糧。家語：孔子之剡，與程子相遇，傾蓋而語。命子路取束帛贈程子，是贈路費也。魏胡質與其子絹一匹，爲道路糧。見是魏晉時亦以帛充路費。至唐尤甚。鄭哲才鬼記：資玉妻曰：君不合居此，宜速命駕。常令君有絹百匹，言訖，贈絹百匹而別。又酉陽雜俎：秀才權同休下第，游蘇湖間，遇疾貧窘，困褊垢衣，授僕曰：可以此少辦酒肉。予將會村老，丐少道路資也。乃具牛肉旨酒。村老皆醉飽，獲束緇三千。又稽神錄：謹得行李，更詣主人，遺絹數匹，乃得歸。又劉無雙傳：古押衙爲其擔子一馬五匹，絹三百匹，五更便發，是皆以絹爲旅費也。用銀者絕少。蓋行路裹糧，萬不能多，而古代金銀賤，亦難以多帶。惟帛則輕而易舉，行旅最便。故古視帛與錢幣等，不曰幣帛，則曰錢帛。卽今久不用帛，俗語猶曰財帛，是其證。宋元以來，用者漸少，明清則皆以銀換錢，無以帛爲糧者。



## 卷三十八

行唐尙秉和著

### 兵事

周時以鼓進兵以金退兵

左傳哀十一年吾聞鼓而已不聞金矣。注鼓以進兵金以退兵。不聞金言將死也。按莊十年戰於長勺公將鼓之。劓曰未可。齊人三鼓。又韓詩外傳趙簡子卒中牟畔之。葬五日襄子圍中牟。圍未匝而城自壞者十丈。襄子擊金而退之曰吾不乘人於危。又墨子越王焚舟失火。親自鼓其士而進之士蹈火死者百餘人。王擊金而退之。是皆以鼓進兵以金退兵之證。想見古戰時聲勢之浩大也。金者今俗謂之鑼。

漢戰時仍用金鼓

漢書韓信傳信建大將旗鼓。鼓行出井陘口。大戰良久。於是信耳乘旗鼓走水上軍。趙空壁爭旗鼓。又李陵傳鼓聲不起。又聞金而止。又光武紀鉦鼓之聲聞數百里。蓋仍以鼓進兵以金退兵也。

古戰時主將可對面語

春秋時戰陣之間仍不廢禮讓。如晉卻至見楚子必下。免胄而趨風。欒鍼餽子重以飲。雖大戰之時餽遺

不絕。至漢初漢王與項王臨廣武而語。又蜀志關羽傳注。羽與魏將徐晃夙相愛。遙共語。但說平生不及軍事。徐晃見下馬宣令曰。得關雲長頭者賞千金。羽驚怖謂晃曰。大兄是何言耶。由是證之。古兵陳相距甚近。故能對語。若稍遠則語不能聞矣。故漢王數項王以十大罪。項王怒伏弩射中漢王也。

### 礮之沿革

前漢甘延壽傳。投石絕等倫。注。張宴曰。范蠡兵法。飛石重十二斤。爲機發行二百步。按此卽礮也。蓋以大木激石。飛至敵所。故廣韻云。機石也。是以字從石。又按後漢袁紹傳。曹操發石車。擊袁紹。軍中呼爲霹靂車。唐章懷注云。卽今拋車。又唐書李密傳。以機發石爲攻城具。號將軍爲礮。是至唐仍石礮也。至金元時。火銃興。遂又本其法而爲火礮。法以銅鐵爲巨銃。內實火藥。然以發彈。明紀太祖與陳友諒戰於鄱陽湖。礮碎。御舟是也。自洋槍興而火銃廢。大礮術亦愈精。於是明清以來所鑄之土礮。又廢。今沿邊之地所廢置者是也。其餘戰器。刀矛以外。惟弓箭用之最久。自三代至清不廢。其製造之術爲極精。外觀亦最華美可愛。乃至今無習之者。不惟射術亡。其製造弓箭之絕技亦亡。甚可惜也。

### 烽燧報寇警

烽燧報寇警。法最迅速。自三代至明清。數千年不廢。清咸豐時。太平亂。猶用此法。凡大道十里一墩。高約四丈。有警則以次傳烽。頃刻可達數百里。而狼煙最佳。狼煙者。蒼狼屎然之。其煙冲天。風不能動。尤可俾

遠方望見。自鐵道興。官路廢。墩鋪五里一鋪亦燬。惟沿長城仍有此遺蹟耳。然狼煙之發明。唐以前無有。

墨子築郵亭者。圍之高三丈以上。令特殺爲辟梯。亭一鼓。寇烽警亂。烽傳火以應之。至主國止。其事急者。引而上下之。烽火以舉。輒五鼓。傳又以屬之。言寇所從來者少多。且弇還去來。屬次烽勿罷。望見寇。舉一烽。入境舉二烽。射妻疑爲舉三烽。藍郭會舉四烽。二藍郭會舉五烽。按墨子善守。其言築亭之法。及舉烽規矩。詳矣。至烽燧之形。則未言。

漢書賈誼傳。斥候望烽燧不得臥。文穎曰。邊方備胡。作爲土櫓。櫓上作桔槔。桔槔頭兜零。以薪草置其中。常低之。有寇卽火然。舉之以相告。曰烽。又多積薪。寇至卽然之。以望其煙。曰燧。張宴曰。晝烽夜燔燧。師古曰。晝燔燧。夜舉烽。又按司馬相如傳。邊郡之士。聞燧舉燔燧。孟康曰。燧如覆米箕。懸著契臯頭。有寇則舉之。燧積薪有寇則然之。

按櫓者樓也。土櫓者。卽墨子所謂郵亭。明清時之墩臺也。兜零者。廣雅云。籠也。卽孟康所謂覆米箕。略如箕懸桔槔頭。有寇則高舉。使遠處易望見。墨子不言桔槔。然曰引而上下之。則亦懸桔槔也。惟置薪草於兜零中。而然之。不並然兜零乎。抑兜零爲鐵製物乎。至於烽燧之分。史記索隱云。烽主晝。燧主夜。魏張宴亦曰。晝烽夜燧。誠以白日不能見光。故以烽煙告警。夜能見光。不能見煙。故然燧。使起火光。以報警。而師古則謂晝燧夜烽。實烽燧爲一物。皆須然薪而後起煙起火光。不過晝以煙爲識。夜以火光爲識耳。

至唐則焚狼糞爲烽煙

無論烽燧。在漢魏時皆然。薪爲之。至唐造烽煙之法益精。西陽雜俎云。狼糞煙直上。烽火用之。蓋煙直上則能望遠。否則爲風吹倒。遠處難見。法誠善也。自此以後。遂名烽燧爲狼煙。宋史曹翰傳。先是虜至。必舉狼煙。翰分遣人舉煙直上。虜疑有伏。引去。然此必白晝用。夜則仍然燧爲光。且以證古時狼多。若今日雖深山亦不易得若干狼糞爲用也。

歷代驛傳之狀況

古人交通迅速之法。惟恃驛傳。凡官文書來往。緊急報告。皆賴之。法定若干里爲一驛。凡車馬上路疾馳。至驛而更。以休人馬。故傳遞迅速。春秋時名曰遽。左傳僖三十三年。且使遽告於鄭。定二年。鄭公孫黑將作亂。子產在鄆聞之。懼弗及。乘遽而至。亦名曰駟。文十六年。楚子乘駒會于臨品。是也。至漢名曰傳。高帝紀。田橫懼。乘傳詣雒陽。英布傳。王怒欲捕赫。赫上變事。乘傳詣長安。如淳曰。四馬高足爲置傳。四馬中足爲馳傳。四馬下足爲乘傳。一馬二馬爲軺傳。急者乘一乘傳。如如淳說。傳以四馬爲最多。而亦有六馬者。袁盎傳。將乘六乘傳。會兵滎陽。注六乘者六馬。蓋事愈急。馬愈多。漢又名置。劉屈氂傳。時上避暑甘泉宮。丞相長史乘疾置以聞。師古曰。驛也。按風俗通。漢改郵爲置。增韻云。步傳曰郵。馬傳曰置。蓋春秋時人不能騎馬。故祇有傳車。至漢人能騎馬矣。而官吏仍不騎行。又其時往來文書仍竹簡。書囊堆積。非車不能。

載。而官吏有急事。亦常乘傳。故仍有傳車。凡置馬。謂之驛騎。自馬遞興而車傳漸少。自晉初紙多而文書簡省。馬亦可遞。故尤迅速。元馬哥婆羅遊記云。元世祖時。自塞外闢大道。直達西域。東西數萬里。凡傳遞文書。二十五里爲一站。騎馬搖鈴。到站卽更易。傳遞迅速。朝發夕至。此皆馬遞也。至於清。惟官吏往來。蒙古者。有傳車。馳行沙漠中。謂之台站。餘內地大路。每三十里一驛。盡馬遞。故每行官道。輒聞鈴聲。驛馬絡驛不絕。至光緒末。郵政興。而驛馬始廢。





## 卷三十九

行唐尙秉和著

### 歲時伏臘

凡歷代歲首皆爲令節，士民和會，古今如一。茲編不論論歲首以外時節之沿革，蓋無論士農工商，終歲勤動，無娛樂之時，則精神不活潑。古之人於是假事以爲娛樂，原以節民勞和民氣，亦卽所謂張弛也。此其義也。乃執者往往以時節酒食歡娛，祭賽迷信，謂爲無理而欲刪除之，豈知古人用意，乃假時節以爲娛樂，非娛樂之義在時節也。時節者乃人爲，故自古及今有沿革，有轉移，有風俗習慣，習慣既久，便視爲當然，不能究其所以然。

#### 其在周時則假祭神爲娛樂期

禮記郊特牲，唯爲社事，單出里。注：事，祭也。單，同。出里者，里人盡出祭也。按古二十五家爲一里，里必有社，年分兩季祭之，有春祭，月令仲春擇元日，命民社。元日者，甲日也。有秋祭，周禮春官社之日，蒞卜來歲之稼。注：秋祭也。祭之日，椎牛宰羊，里人盡出，祭罷而分其肉，則社日之不治事，酒食燕樂，手舞足蹈，可知矣。而一年兩舉，其在仲春者，以民將勞動而爲之，在秋後者，以民勞動既久而爲之，皆具深意，非漫然也。

其次爲蜡。禮雜記子貢觀於蜡。孔子曰。賜也樂乎。對曰。一國之人皆若狂。賜未知其樂也。子曰。百日之蜡。其勤稼穡有百日之勞。一日之澤。非爾所知也。張而不弛。文武弗爲也。弛而不張。文武弗爲也。一弛一張。文武之道也。按郊特牲。蜡也者。索也。歲十二月合聚萬物而索也。饗之也。是舉於歲終。一年祇一次。其詳細狀況。及其禮節。今已不得知。第觀子貢所云。一國之人皆若狂。則當時社會以是日爲唯一之娛樂期。殆與社日同也。

至戰國仍以社臘爲唯一令節

韓非子秦昭王病。百姓爲之禱病。愈。殺牛塞禱。公孫衍出見之曰。非社臘之時也。又豕身三蝨相與訟。一蝨曰。若不患臘之至而毛之燥耶。是可證社臘時殺牛宰豕之多。爲社會大酺之唯一令節。臘卽蜡也。說文冬至後三戌爲臘。祭百神。

社臘外周重上巳節

周禮春官女巫。掌歲時祓除疾病。鄭注。以漢三月上巳修禊當之。然不甚明確。惟風俗通引韓詩曰。三月桃花水之時。鄭國之俗。三月上巳。於溱洧兩水之上。執簡招魂。祓除不祥。是三月上巳爲周時令節。士民遊春。祓禊水上。娛樂可知。鄭建國在春秋初。在列國爲最後。鄭如此。列國可知。再證以周禮。上巳爲令節無疑矣。

兩漢時所行之節令

一爲上元。漢志：執金吾掌禁夜行，唯正月十五，勅許弛禁，謂之放夜。一爲三月上巳，衛皇后傳：帝祓霸上還。孟康曰：祓，除也。從霸水上自祓除。今三月上巳也。又後漢周舉傳：六年三月上巳，商大會賓客，譙于洛水。又周禮春官女巫：鄭注：如今三月上巳如水上之類，是漢以三月上巳爲節也。故後漢禮儀志云：是月上巳，官民皆潔於東流水上，官民皆出，其盛可知。一爲伏臘。東方朔傳：久之伏日，賜從官肉。大官丞日宴不來，朔獨拔劍割肉曰：伏日當早歸，夫曰早歸，可見伏日皆歡娛譙飲。又嚴延年傳：母從東海來，欲從延年臘，是可見以臘爲令節。又楊惲傳：歲時伏臘烹羊烹羔，又元后傳：至漢家正臘日，獨與其左右相對飲酒，是益可證社會至伏日臘日酒食醉飽之娛樂。一爲日至。薛宣傳：及日至，休吏。賊曹掾張扶獨不休，宣出教曰：日至吏以令休，由來已久。曹雖有公職事，家亦望恩私，意掾宜從衆歸，對妻子，設酒殽，請鄰里一笑爲樂。注：日至冬至夏至也。夫至日至而官吏且休沐，社會可知。一爲社日。陳平傳：里中社，平爲宰，分肉甚均，蓋其歡娛仍與周同也。

漢末之寒食

總漢家之令節爲上元、上巳、爲伏日、臘日、春社、秋社、夏至、冬至。其見於史者，共有八日，皆社會遊宴飲樂之時。至七月七日彩女穿鍼，見西京雜記。五月五日浴蘭湯，見大戴禮。五月五日賜羣臣梟羹，見漢書。以

及後漢劉玄傳立秋日驅樓皆未敢必社會以是日爲娛樂之期故不詳惟至後漢末忽爲介子推而有寒食之節鄉民無知演爲風俗政府迭禁之而其風至唐宋仍不已禁火三日甚無謂也

後漢書周舉傳太原一郡舊俗以介子推焚骸有龍忌之禁至其亡月咸言神靈不樂舉火由是士民多中輟一月寒食老小不堪舉言盛冬去火殘損民命使還溫食又魏武帝令聞太原上黨西河雁門冬至後百五日皆寒食云爲介子推北方沍寒之地老少羸弱將有不堪之患令到禁絕火如有犯者家長半年刑是寒食在漢末初起祇太原上黨諸郡未普及於中原各郡且自周舉傳觀之祇子推亡月一月寒食自魏武令觀之則自冬至起至清明皆寒食變本加厲又觀周舉傳是子推亡於冬月胡爲寒食至清明始已又胡爲至唐宋全國皆然風俗推移有不可思議者然則寒食節在漢末最爲苦境也

魏晉六朝之佳節

世說華歆蜡日集子姪譙飲竹書戴洋傳陳瞻問洋人言江南常有貴人顧彥先周宣珮是不洋曰顧不及臘後果以十二月十七日卒十九日臘按蜡臘皆祭百神其義一也飲於此日集子姪譙飲可證仍爲令節也又十九日臘可見臘仍無定日仍於冬至後三戌爲之也

社臘外則以上已爲最重晉書夏統傳會三月上巳洛中王公已下並至浮橋士女駢填車服燭路觀此則上已爲社會最繁華之節但沈約宋書云魏以後但用三月三日不復用已蓋社會習慣已重三月三

日三日與上巳期相距甚近故併上巳節於三日非若周時之專用三月上巳而忽視三日也

蓋自秦漢以來漸重三月三日文選有顏延年三月三日曲水詩序注引齊諧記曰晉武帝問尙書虞翻曰三月曲水其義何摯曰昔秦昭王三日置酒河曲見有金人出二漢相沿皆爲盛集據此是自漢以來已重三月三至曹魏以與上巳近遂卽於是日修禊而廢除上巳故宋顏延年有三月三日曲水詩序齊王元長亦有三月三日曲水詩序皆於曲水修禊而皆於三月三是其證也至是日之繁盛盡見於沈休文三月三日詩詩云麗日屬元巳年芳具在斯開花已匝樹流鶯復滿枝洛陽繁華子長安輕薄兒東出千金堰西臨雁鶩陂清晨戲洛水薄暮宿蘭池元巳卽上巳實是日未必爲巳日仍沿舊稱耳又庾信有三月三日華林園馬射賦亦一證也

### 六朝時至冬至卽拜節

顏氏家訓已孤而履歲及長至之節無父拜母無母拜父又云南人冬至歲首不詣喪家按以冬至與歲首並稱可見其重相等不詣喪家者不赴喪家賀節也長至卽冬至拜父拜母亦拜節也是六朝時視冬至更重於前

其次則重九亦重太平廣記晉宣帝於九月九日賜羣臣桑落酒晉書孟嘉爲桓溫參軍九日遊龍山風吹帽落南宋書武帝爲宋公在彭城九日登項王戲馬臺至今相承爲故事而謝靈運謝宣遠皆有九日

從宋公宴戲馬臺詩。又陶淵明嘗九月九日無酒。坐東籬下。摘菊盈握。又南史。齊武帝立商飴館於孫陵寺岡。世呼爲九日臺。秋九日車駕幸焉。是六朝之重九。與三月三日同。惟三日則近水修禊。九日則擇地登高。三日則漢舊俗重九。則魏以後始行也。

其他若人日。見薛道衡詩。七月七日都人皆曝衣。郝隆則仰臥於庭。曝腹中書。又七月七日當晒衣。諸阮庭中爛然。皆見於世說。然社會似不以是爲娛樂之期。又寒食端午中秋。在六朝時見於文人歌詠者亦少。似其時不甚重也。

惟梁簡文帝有看燈賦。殆上元夜也。蓋上元承歲首娛樂之時。而值月夜。自漢以來。金吾卽放夜三日。六朝想當益盛。惟其時燈油無植尙貴。故帝賦有南油俱滿。西漆爭然之語。夫爲燈戲而至於然漆。則後世所無也。

### 唐宋之令節 上元燈火之大觀

古人精神之活潑。遠過後人。其魄力之偉大。尤非後人所可比。卽如上元燈火。其布景之奇麗高遠宏大。在唐代固覺絕後人。卽宋時亦非今人所能辦。其唐宋燈火。見於詩歌者。如王珪詩。雙鳳雲中扶輦下。六龍海上駕山來。又向子諲云。紫禁煙花一萬重。鰲山宮闕隱晴空。玉皇高拱雲霄上。人物嬉遊陸海中。又蘇味道詩。火樹銀花合。星橋鐵鎖開。又李商隱詩。月色燈光滿帝都。香車寶輦溢通衢。讀此數詩。唐燈火

之影。及和樂之聲。如耳聞目覩矣。蓋鼇山鳳輦。不惟排列雲空。並能浮搖上下。其宏大固可驚其技藝之精能。亦可佩至其高度。據開元遺事。上在東都。結綵綵爲燈樓。二十間。高一百五十丈。又雍洛靈異小錄。唐時元夜。寺觀街巷。燈明若晝。山高百餘丈。又天寶遺事。韓國夫人造百枝燈。高八十丈。照數十里。查唐時尺。與今尺正同。高至百五十丈。幾一里。真驚人矣。此長安東都之盛也。此外如開元天寶遺事云。明皇移仗上陽宮。葉法善言。西涼府燈。亦亞於此。令上閉目。已在霄漢。俄而及地。觀燈果然。以鐵如意質酒。爲驗。又幽怪錄。明皇於正月望日。問葉天師。四方何處極麗。對曰。無踰廣陵。帝曰。何術觀之。師曰。可。俄而紅橋起殿前。帝步而上。俄頃至廣陵。士女皆仰望曰。仙人現。五色雲中。是西北涼州。東南廣陵。燈火皆亞於兩京也。

宋時燈火。其見於宋詩者。王安石云。別開閭闔壺天外。特起蓬萊陸海中。想見空中樓閣之佈置。程漢金陵元夕云。三山火照瓊花發。人在南天白玉京。想見空中山島之崢嶸。王磐云。夾路星毬留去馬。燒空火樹亂歸鴉。讀此詩。知宋上元燈火。不亞於唐。至元夜狀況之見於紀載者。如容齋隨筆。西京正月十五前後。各一日看燈。宋增爲五夜。因錢氏納土。展至十八。又程史。宋宣和中張燈。有夫婦相失者。婦至端門。飲賜酒。竊懷金杯。衛士察知。送御前。婦口占詞。有竊取金杯作證明之句。上喜以杯賜之。命黃門引歸。又王韶幼子案。元夜觀燈。爲姦人負去。兒覺其異。納珠帽於懷。適內家車過。案攀轡大呼。賊駭逸。內人抱置之。

膝擁至上前上問誰氏具道所以。上歎其早慧。賜壓驚金犀錢果。值鉅萬。此皆因元夜都城人馬擁擠。山崩海沸。故至夫婦相失。幼子被劫。又以證宋時皇帝觀燈時出至端門。與民同樂。仍與唐同。故是等小事。輒爲皇帝所見。隨時處分。得民歡心。內家者宦官也。

唐宋之清明節

按杜甫詩。三月三日天氣新。長安水邊多麗人。足見唐三月三日赴水上修禊之盛。然吾疑祇都邑士人及富貴人家爲之。在社會未必普遍。其普遍社會。雖鄉曲不遺者。乃清明之寒食也。其普遍殆與歲首同。然元旦上元日至社臘等日。純爲社會娛樂之節。獨清明時值春和。芳草遍地。天涯遊子。最動歸思。而柳綠桃紅。士女踏春。不忘和樂。其趣味介乎娛樂非娛樂之間。而唐宋時尤甚。分述於後。以見當時風俗。一禁火。禁火之俗。先起於并州各地。見後漢書周舉傳。及魏武帝令。均見前周舉已移書介子推廟。曰寒食一月。老小不堪。今則三日而已矣。是後漢中葉已創行三日禁火。乃觀魏武令仍不止三日。其所以如此者。據荆楚歲時記。介子推三月五日爲火所焚。國人哀之。每歲春暮不舉火。謂之禁煙。犯之則兩靨傷田。觀此則愚民迷信有所畏忌。故周舉三日之約。不能卽行。至六朝則斷火一日。齊民要術云。之推忌日斷火羹醴而食之。名曰寒食。蓋清明節前一日是也。至唐則於清明前三日禁火。至第三日晚。則由宮內出火賜近臣。韋莊詩所謂內官初賜清明火。韓偓詩所謂日暮漢宮傳蠟燭。輕煙散入五侯家。歐陽修詩所



謂火禁開何晚。禁火仍風雨者是也。故過清明則曰新火。杜甫詩。朝來新火起新煙。賈島詩。暗風吹柳絮。新火起廚煙。東坡詩。寒食清明都過了。石泉槐火一時新。因曾斷故曰。新初祇起於并州。後漸普遍全國。風俗推移之不可思議如此。

一寒食。鄴中記。并州俗爲介子推斷火。冷食三日。作乾粥。今之糗是也。蓋旣斷火卽冷食。而冷食以甘者爲佳。故唐宋至清明社會賣餠者獨多。宋之問詩。馬上逢寒食。春來不見餠。李商隱詩。粥香餠白杏花天。劉筠寒食詩。餠市喧簫吹。宋祁詩。簫聲吹暖賣餠天。又集異記。工部尙書邢曹進討叛。飛箭中肩。鏃不可拔。有胡僧曰。何不灌以寒食餠。如法應手清涼。是可證餠多於寒食。賈故有專名。蓋餠最便於冷食。可塗餅餌。製餅餌。沃各種酪食。故寒食前爭蓄之。白居易詩。留餠和冷食。張文昌寒食內宴詩。廊下御廚分冷食。歐陽修詩。多病正愁餠粥冷。足見當時寒食之苦。况而寒食二字。自唐以來。遂變爲節名。余幼時讀詩。每問先生清明何以有二名。先生曰。前二日爲寒食。末日爲清明。今已不寒食。而有其名。無怪汝疑也。或問蜜與糖亦味甘。唐宋時胡不食。答曰。蜜值昂。白糖自大歷前未有。宋雖有。值仍昂。非社會所通用。若餠則米製。價最廉也。

一祭墓。自漢以來。墓祭與廟祭並重。而庶人尤重。至唐則以寒食爲定期。唐書開元勅。寒食上墓。禮經無文。近代相傳。浸以成俗。宜許上墓。同拜掃禮。觀此則寒食祭掃。至早起於隋唐之間。隋以前蓋無有。至唐

中葉而大盛。柳子厚與許京兆書。近世禮重拜掃。今已缺者四年矣。每遇寒食。則北向長號。以首頓地。想田野道路。士女遍滿。阜隸傭丐。皆得上父母邱墓。馬醫夏畦之鬼。無不受子孫追養者。讀此書。則唐時祭掃之盛。如在目前。其祭品則田家多持麥飯。五代史。唐家人傳。妃臨死呼曰。何不留吾兒。使每歲寒食持一盂飯。洒明宗墳上。又宋夏竦詩。漢寢唐陵無麥飯。是其證。其焚化則紙錢。五代史。寒食野祭焚紙錢。宋史外戚傳。李用和少窮困。居京師。鑿紙錢爲業。范成大寒食詩。烏啄紙錢風。孫蕙蘭詩。明朝又是清明節。愁聽人家買紙錢。然唐時王勃焚陰錢十萬。爲老叟償債。見於樵言。想亦用以祭墓也。

一清明各種遊戲。曰打球。酉陽雜俎。荊州百姓郝惟諒。寒食日與其徒郊外蹴鞠。北里志。張住住傳。幼與龐佛奴有結髮契。及將筮。其家拘束嚴。稀得見之。後佛奴因寒食爭球。故偏其窗以伺之。又大唐新語。清明新進士開宴於曲江亭。又有月燈閣打毬之戲。白居易詩。蹴毬塵不起。潑火雨初晴。韋莊詩。隔街聞築氣毬聲。又上相閑分白打錢。白打者兩人對踢也。曰關鷄。唐人東城老父傳。玄宗在藩邸時。樂民間清明節。關鷄戲。李山甫寒食詩。錦袖關鷄喧廣場。是也。曰鞦韆。古今藝術圖。北方人寒食爲鞦韆戲。以習輕蹻。又天寶遺事。宮中至寒食節。競築鞦韆。嬉笑爲樂。韋莊詩。滿街楊柳綠絲煙。畫出清明二月天。好是隔簾花樹動。女郎撩亂送鞦韆。又蘇軾詞。牆裏鞦韆牆外道。曰野宴。開元天寶遺事。長安士女。清明日遊春野步。遇名花則設席藉草。以紅裙遞相插挂。以爲宴幄。又夢華錄。京師清明日四野如市。芳樹之下。園圃之

內羅列杯盤，互相酬酢。又歲華記：都人遊賞，散布四郊，謂之踏青。然則寒食時，人民之嬉游娛樂，不惟城邑，且遍於四郊。其精神之活潑，後之亂世固未有。即承平之日，亦未見古今民族精神之衰旺。由此可以攷見矣。

### 唐宋之社日

凡節除歲首外，皆隨風俗爲盛衰。獨社日自三代迄南宋數千年間，行之不替。在中國歷史上，可謂最古最普遍之佳節。乃自元以後，此風頓已蓋蒙古主政八十餘年間，中國舊風俗爲其所蹂躪，因以滅亡者不知凡幾。社日亦其一端也。推原其故，必因社日全國鼎沸，簫鼓喧填，恐民衆起事，嚴爲制止及禁之既久，遂忘其事。於是以數千年之故俗，竟爾革除，可不悲哉！可不痛哉！

### 婦女停鍼線歸寧

張籍吳楚歌詞：今朝社日停鍼線，起向朱樓樹下行。墨莊漫錄：今人家閨房，遇春秋社日，不可組紉，謂之忌作。故周美成秋蕊香詞云：聞知社日停鍼線，是自唐迄宋，婦女至社日皆休假。又夢華錄：社日婦女皆歸娘家，外舅姨舅皆以新葫蘆爲遺。俗云：宜良外甥，是婦女至是日皆歸寧也。

### 社日簫鼓飲讌之盛況

韓愈詩：願爲同社人。鷄豚宴春秋。張翥詩：桑柘影斜春社散，家家扶得醉人歸。杜甫詩：明年大作社，拾遺

還在否。陸游詩。社日取社猪。燔炙香滿村。周子諒詩。鷄豚上戊家家酒。鶯燕東風處處花。讀此詩。則唐宋時社日飲食醉飽之樂。有若目覩。劉禹錫詩。楓林社日鼓。梅堯臣社日詩。樹下賽田鼓。壇邊祠肉鴉。范成大詩。社下燒錢鼓似雷。日斜扶得醉人迴。青枝滿地花狼籍。知是兒孫鬪草來。讀此詩。則祭社時簫鼓沸大之聲。有如其聞矣。而一年兩舉。故燕子有春社來。秋社去之語。凡節日有定日。惟社臘無定日。周用甲曰。漢用午日。魏用未日。唐以來用戊日。

唐宋之端午中秋

自漢以來。至五月五日故事獨多。蓋以此日爲陽極之日。風土記。端者始也。正也。五日午時爲天中節。故作種種物能辟邪惡。在漢時以五絲絲繫臂。名長命縷。見於風俗通。在晉時作赤靈符著心前。可辟兵。見於抱朴子。然故事雖多。在社會似不爲娛樂之節。至唐則漸盛。一競渡。荆楚歲時記。俗以五日爲屈原投汨羅日。傷其死。故以舟楫拯之。其舟輕謂之飛鳧。一鬪草。歲時記。五日四民並鬪百草。故有鬪百草之戲。又劉公嘉話。謝靈運鬚美。臨刑施爲南海祇洹寺佛像鬚。唐中宗朝。安樂公主五日鬪百草。欲廣其物。令馳騎取之。由此二事。可證唐時端午日民間之娛樂。又舊唐書。孫伏伽諫曰。太常官司。於民間借婦女裙襦五百餘具。充妓服。擬五月五日於元武門遊戲。非所以爲子孫法。夫必社會於是日。游戲然後官司設。游戲於元武門。與民同樂。至若飲菖蒲酒。剪艾爲人懸門戶上。以角黍相餽遺。雖其來已久。然至唐則家

家如是。宋仍與唐同。不具述。

至八月十五夜。在唐時雖有玩月故事。在社會視之。似無若何興趣。不惟不能與寒食等。並不能與端午同也。其見於唐人小說者。除集異記。異聞錄。唐逸史。記明皇入月宮。服仙丹。宣室志記。周生梯雲取月事外。餘事甚少。而唐詩除王建今夜月明人盡望。不知秋思在誰家。最馳名外。餘如杜工部李太白白香山韓昌黎柳河東等。吟詠中秋者。偶有之。而不甚著。是其證也。至宋時似盛於唐。太宗紀。八月十五日爲中秋節。三公以下獻鏡及承露盤。又膳夫錄。汴中秋節。食中秋翫月羹。是可證已以中秋爲節令。故大臣有獻而翫月羹。成爲汴京風俗。又晏殊中秋詩。苦吟含翰久。清宴下樓遲。是中秋宴飲之證。然閱龐元英文昌雜錄。記祠部休假節。有立秋七夕。秋分重陽。而無中秋。是社會仍不以是日爲令節。而端午則休假一日。可見宋時中秋。尙不能與端午等也。

### 唐宋之重陽

重陽故事。在唐時多於中秋。詩人歌詠者。亦倍蓰中秋。是亦重陽盛於中秋之證也。蓋時至重九。天高氣清。最宜登高眺望。唐書。王勃過鍾陵。九月九日。閩都督大宴賓客於滕王閣。又韋綬傳。綬爲集賢學士。九日宴羣臣於曲江。王維詩。遙知兄弟登高處。共把茱萸少一人。是其證。而俗食蒸糕。歲時雜記。二社及重陽皆食糕。而重陽爲盛。以棗爲之。或加以栗。聞見後錄。劉夢得作九日詩。欲用糕字。以五經無此字。輟不

復爲是以宋子京九日食糕詩云。麤館輕霜拂暑袍。稷粢花飲闕分曹。劉郎不敢題糕字。空負詩家一代豪。而茱萸菊花橙橘爲此節之點綴品。說賈唐太宗九日在蓬萊殿。賜羣臣橘。西京雜記。九日佩茱萸。飲菊花酒。張說有九日進茱萸山詩。東京夢華錄。都下重陽酒家。皆以菊花縛成洞戶。飲者皆以菊花插帽簷而去。故劉景文九日與東坡詩云。四海共知霜鬢滿。重陽曾插菊花無。是以菊插帽之證也。

唐謂冬至前一夜爲除夜宋謂冬住

老學菴筆記。陳師錫家享儀。謂冬至前一日爲冬住。與歲除夜爲對。余讀太平廣記三百四十卷。有盧頊傳。是夕冬至除夜。乃知唐人冬至前一日。亦謂之除夜云云。蓋至宋已以冬至除夕與歲暮除夕同名。廢而不用矣。故放翁云云。又按是夕冬至除夜之語。見唐張謩尸媚傳。記范陽盧頊家婢小金事。太平廣記偶引之。非盧頊傳也。放翁蓋未見尸媚傳耳。

唐宋之七夕與中元

七夕白日曝衣。夜陳瓜果。祀牛女二星。士女月下穿鍼乞巧。備見唐宋小說與詩歌中。蓋織女嫁牽牛。牽牛負天帝錢十萬不償。帝罰之。祇七夕許與織女渡河相見。自漢時卽有是說。淮南子云。七夕烏鵲填河成橋渡織女。是其證。故古詩有迢迢牽牛星。皎皎河漢女。盈盈一水間。脈脈不得語之句。以事涉情戀。動人慕思。雖明知爲附會。歷代稱說而不已。然不如中元節之盛。中元爲佛生日。唐宋時佛教盛。故至七月

十五卽有孟蘭會之設。而開元四年竟於中元夜。許京師張燈。見於唐會要。而戎豈有中元日開元觀觀樂詩。足見其社會點綴。猶勝於中秋也。又東京夢華錄。中元買冥器綵衣爲孟蘭盆。挂搭冥錢衣服焚之。是宋時仍與唐同也。

#### 宋時節令輕重之等差

文昌雜錄云。祠部休假歲凡七十有六日。元日寒食冬至各七日。是此三節最重。上元夏至中元下元臘各三日。是爲次重。節立春人日中和節春分社清明上巳立夏端午初伏中伏立秋七夕末伏社秋分授衣重陽立冬各一日。是爲再次重。節其中授衣節不知爲何日。然似非中秋。又寒食與清明並列。不知如何分別也。

#### 明清時之端陽中秋

說薈嘉靖時有張積中者江陰人。爲禮部書吏。窮困不能歸。至五月五日。書吏皆歸家度節。令積中在署值日。并贖資數千。以爲酒食之費。是可證明時值端午節。官吏皆休假飲譫。社會可知。又野史。元至正二十六年夏。卽有八月十五殺韃子之謠。至中秋夜果數省同時起事。各縣蒙古人同時被戕。蓋中秋人民無不夜飲。飲既醉。乘酒興爲之。又按元時各縣皆設豪官。肆虐於民。至今父老有十家養一韃之傳說。平日敢怒而不敢言。至中秋人民乘酒醉之餘。不約而同。同時起事。是可證自明初以來。人民中秋夜飲譫。

普遍全國。

至清則以端午中秋與歲首並稱三節。至時則商賈歇業。百工休假。官吏士民。於前一日即衣冠賀節。端午糴子。中秋月餅。餽遺紛紜。凡錢債至五月節。八月節。必清結。謂之節關。而中秋視端午尤重。即鄉僻小民。必飲酒食肉。與元旦同。方之往古。惟六朝之冬至。可以彷彿。餘則無此盛也。社會風俗推移之不可思議如此。

其他若社臘。若正月初七爲人日。社會久已不知。惟上元有燈火。然唐宋時所謂鼃山星橋空中樓閣之觀。久已絕迹。三月三日。士流偶有修禊者。市民已不曉其義。清明節謁墓祭掃而已。久不寒食。故無賣餠者。若打毬鞦韆蹴鞠闢雞遊戲之舉。春日廟會。或有爲之者。而不於寒食。獨七夕以牛女故實。人尙知之。然晒衣乞巧之舉。已無。中元節仍有爲盂蘭會者。小兒剪綵放燈而已。九日登高。亦士流爲之。與修禊等。獨臘月初八日之臘八粥。社會頗普遍。或盛於宋時。

臘八粥起宋時見夢華錄也。



## 卷四十

行唐尙秉和著

### 遊戲

#### 打毬 古戲失傳之一

打毬古名蹴鞠。史記扁鵲傳。處後蹴鞠。注打毬也。漢書藝文志。有蹴鞠經。可見其戲甚古。荆楚歲時記云。按劉向別錄。寒食蹴鞠。黃帝所造。以練武士。本兵勢也。或云起於戰國。鞠與毬同。古人蹴踢。以爲戲也。自漢以來。好此戲。善此戲者甚多。皆不錄。述其可考見當時打球情狀者。

#### 打毬之時節及其規矩

自隋唐以來。打毬多於春日。而寒食爲此者尤多。白居易詩云。蹴毬塵不起。潑火雨初晴。是其證。其詳在歲時伏臘中。事物紺珠云。毬兩人對踢。爲白打。三人角踢。爲官場。毬會曰員社。故韋莊詩。內官初賜清明火。上相閑分白打錢。蓋打毬時。以錢爲賭也。

#### 至宋打毬仍賭物

繫穢雜記。熙寧間。神宗與二王打毬子。上問二王。欲賭何物。徐王曰。臣不別賭物。若贏時。只告罷了新法。

是宋時打毬，仍賭財物，特勝負規則不詳耳。

漢時打毬窟室中

漢書戚夫人傳，呂后斷夫人手足耳目，使居鞠域中。師古曰：如蹋鞠之域，謂窟室也。又史記驃騎傳，而驃騎尙穿域蹋鞠。徐廣曰：穿地營域，是漢時皆鑿地爲域，而打毬其中，蓋以毬易他適，追逐爲勞，穿地爲域，則有限制也。

古毬製造之法

揚子法言，按也革爲鞠。史記霍驃騎傳注，索隱云：鞠戲以皮爲之，中實以毛。正義云：今之打毬也。按中實以毛，則輕而易起，外輓以革，則堅實不壞。一毬可用數年，且輕重適宜，不惟無走氣之嫌，亦無太輕之弊。故抵力足而起落靈敏。當光緒中葉，同學有皖人陳某者，善此技，其球係自製，用棉絨一撮，外以粗棉線纏爲圓形，徑約二寸餘，外不用皮，尤爲靈敏。打時有緩有急，緩則呆立如木鷄，平舒左臂或右臂，毫不抑揚。其球上下若掌與地相吸，然如欲過右或左，蓋手掌稍用力，即飛落一邊，換手打之，而身仍呆立不動。如此久之，忽而冲天，忽而左右一打一易，至尤急時，則身隨毬舞，蹈作勢，毬隨身旋轉飛舞，或穿袴下，或繞臂纏項纏股，不知其毬之胡以隨身不墜如此也。疑卽古蹴鞠之遺法，而今人無述之者。

至隋唐有毬塲與漢異

漢打毬在地域中。至隋唐則有毬塲。隋唐嘉話。駙馬楊慎至油灑地。以築球場。唐書劉悟傳。卽徙軍山東。開毬塲。韓偓詩。帝宴文思毬塲。夫旣曰塲。必其地寬廣平坦。便於蹴鞠。有若今日運動塲。觀唐僖宗宴於毬塲。塲內必有樓閣。以爲觀毬遊戲之所也。

#### 唐大臣皆善於馬上擊毬

金華子云。周侍中竇高中令駢起家。神策打球軍將。而擊拂之妙。天下知名。李相國領鹽鐵在江南。春時酒樂方作。乃使人傳語曰。在京國久聞相公打球盛名。如何得一見。竇乃輟樂命馬馳驟于綵塲中。都灑城樓下瞰。見其懷挾星球。揮擊應手。夫球可懷挾。則不甚大。又騎馬馳驟。則是擊球於馬上。馬上打球。爲後世所無。蓋已失傳久矣。

#### 至宋有毬門

五燈會元。石門云。莫來攔我毬門路。又宋史禮志。打毬本軍中戲。太宗令有司詳定其儀。三月會鞠。大明殿有司除地。監木東西爲毬門。高丈餘。首刻金龍。下施石蓮花座。加以采繡。左右分朋主之。以承旨二人守門。衛士二人持小紅旗唱籌。御龍官錦繡衣持哥舒棒。周衛毬塲。按此毬門架木爲之。東西各一。與今日足毬塲之毬門正同。想亦打入門者勝也。故有守門者有持旗唱籌者。唱籌蓋記入門之次數。以多少分甲乙定勝負。創始於宋歟。自隋唐如是歟。不敢定也。

唐宋有毬杖

酉陽雜俎有河北軍將常於毬塲中累錢十餘走馬以擊鞠杖擊之一擊一錢飛起六七丈又云以鞠杖擊田彭郎折足是唐有毬杖宋史樂志打毬樂隊四色窄袖羅襦繫銀帶裏順風脚簇花幘頭執毬杖又儀衛志毬杖金塗銀裏又錄異記蘇校書善製毬杖外混於衆內潛修真每有所闕卽以毬杖干於人得酬金以易酒按以杖打毬唐以前不見據錄異記不惟宮中用杖社會亦用杖蓋鞠戲又變矣至以杖擊鞠之狀後人亦無從懸揣祇酉陽雜俎云韋行規少時行城西日暮風雨忽至乃下馬負一樹見空中有電光相逐如鞠杖以是見鞠杖旋轉飛舞如空中電光也又云某多力趨鞠高至半塔想見打球之高至清以杖打毬之法又失只學校網毬以拍打毬甲乙往來擲打中隔以網落地者負宋之毬杖或亦類是歟

按毬戲自清以來卽失傳鮮有能之者後學校興毬戰起其技術規則皆傳自泰西其器亦購自泰西而中國固有之蹴鞠法無能之者然天下大矣未必果失傳也大力者登高一呼必有應者至中國舊法所製之毬果加研究必能適用且工省價廉亦杜塞漏卮之一也

彈碁 古戲失傳之二

彈碁之戲古蓋未有物原云劉向作彈碁庾信象戲賦注云彈碁之制始自漢成帝帝好蹴鞠羣臣以爲

過勞。帝曰：可用其意同者以爲代。劉向乃作彈碁以獻之。是此戲確起於西漢。劉義慶世說謂彈碁始自魏宮內，爲妝奩戲者誤也。

### 碁數及碁局形狀

後漢書梁冀傳：善彈碁。注引藝經曰：彈碁兩人對局，以白黑各六枚，先列碁相對，更先彈也。局以石爲之，方五尺，中心高，又蔡邕彈碁賦：豐腹斂邊，中隱四企。是兩人對局，各用碁六枚，或黑或白，局必以石者，取其消而易行，若木則澀也。中心高故曰豐腹，腹高故四邊下斂而低，隱者隔者，中高故兩邊子相隔不相見，企者仰視，四邊低故仰望中心也。李義山詩：玉作彈碁局，中心最不平。必不平者，欲因難見藝也。故魏文帝最擅名此碁數及碁局之概略也。

### 彈碁規則勝負及其巧妙

世說：魏文帝善彈碁，用手巾角拂之，無不中。有客自言能，帝使爲之。客箸葛巾角，低頭拂之，妙踰於帝。是可證兩人對彈，以我碁中彼碁，則勝。兩人皆中，中多者勝，否則負。又藝經云：列碁相對，更先彈之，是可證彈時互爲後先。如此次甲先彈，再則乙先彈也。然彈局中心隆起，用力猛則超過不能中，緩則難越，凸坡仍不能中。又兩邊碁子爲中心隱隔，雖相直而不相見，彈中尤難。故蔡賦又云：不遲不疾，如行如留，放一敵六，功無與儔。皆言其善彈，惟所謂放一敵六者，已不能詳其故。又梁簡文彈碁論有完五全六，八反

四角之說尤不能解。然則其概略雖得其詳細節目則無從盡得也。

彈碁至宋已失傳

中國古藝術一亡於五胡亂華。再亡於唐末五代之亂。至宋而僅存者更亡於蒙古。如彈碁小技。唐末猶能見於李義山之吟詠。乃至宋而失傳。老學菴筆記云。呂進伯作考古圖。謂古彈碁局如香爐。蓋謂其中隆起也。李義山詩。玉作彈碁局。中心最不平。今人多不能解。以進伯說考之。粗可見。然恨其藝之不傳也。云云。今遍加考索。義山詩能解矣。而蔡賦及梁簡文所論。仍不能盡通。則欲復其術無由也。

鬪草 古戲失傳之三

漢以前亦不見。物原云。始於漢武。荆楚歲時記。五月五日。四民並鬪百草。有鬪百草之戲。又歲華紀麗。端午結廬蓄藥。鬪百草。繅五絲。在唐時爲最盛。劉賓客嘉話云。謝靈運美鬚。臨死日。施爲南海祇洹寺。摩詰像鬚。唐中宗朝安樂公主。五日鬪百草。欲廣其物。令馳騎取之。又恐爲他所得。因剪棄其餘。由此徵之名爲鬪草。實所鬪不祇百草。蓋以物罕而類多。爲他人所無者爲勝。是以劉禹錫詩云。若共吳王鬪百草。不知應是欠西施。昌黎城南聯句。盤繩覲娥嫠。鬪草擷瓊瑤。杜牧詩。鬪草憐香蕙。簪花間雪梅。吳融詩。數錢紅帶結。鬪草舊樹盛。范成大青枝滿地花狼籍。知是兒童鬪草來。司空圖明朝。鬪草多應喜。剪得燈花自掃眉。是無論男女兒童皆爲之。至宋仍盛。蘇轍夫人閨詩。尋芳空茂木。鬪草得幽蘭。晏幾道詞。鬥草贏多。

裙欲卸。周必大詩。陌上花開人鬥草。甕頭酒熟客傳觴。惟觀各家吟詠。不必五月五日。似爲之於春日者多。婦女兒童尤多。壯夫爲者似少也。然其詳細規則。輸贏節目。究以品類多爲勝乎。抑以物罕爲貴乎。祇兩人爲抑多人亦可爲乎。旣名鬥草。如謝鬚非草。附於草上。爲草之點綴品乎。抑鬚徑爲一草乎。今則茫然矣。

藏鉤 古戲失傳之四

辛氏三秦記。漢昭帝母鉤弋夫人。手拳而有國色。先帝寵之。世人藏鉤之戲。法此也。又宋書符瑞志。漢武趙婕妤家在河間。生而兩手皆拳。不可開。武帝巡幸河間。望氣者言此有奇女子氣。召而見之。武帝自披其手。卽時伸得一玉鉤。由是得幸。號拳夫人。由是漢世有藏鉤之戲。又周處風土記。義陽臘日。爲藏鉤之戲。分爲二曹。以校勝負。若人偶卽敵對。人奇卽奇人爲游附。或屬上曹。或屬下曹。名爲飛鳥。以齊二曹人數。一鉤藏於數手中。曹人當射知所在。一藏爲一籌。三藏爲一都。按李義山詩。隔座送鉤春酒暖。分曹射覆蠟燈紅。送鉤卽送至曹中使藏也。藏在上曹卽下曹射之。在下曹卽上曹射之。二句詩全詠此也。又採蘭雜志。古人以每月十九爲下九。每值九置酒爲婦人歡。至夜爲藏鉤諸戲。有忘寐達旦者。又西陽雜俎。成式嘗於荊州藏鉤。每曹五十餘人。又云藏鉤剩一人。來往於兩朋間。謂之餓鴿。想見古人宴會之樂也。

射鉤之巧法

西陽雜俎舉人高映善意彊十中其九同曹鉤亦知其處當時疑有他術訪知映言但意舉止辭色若察因視盜也又山人石旻尤妙打彊與張又新兄弟夜會張藏鉤於巾篋中旻曰盡張空拳左眼有頃鉤在張君幞頭左翅中惟所謂鉤者今已不知其形式藏而射得其賞罰若何又所謂游附許射鉤否其細則今更不能知

格五 古戲失傳之五

漢書吾丘壽王傳年少以善格五召待詔蘇林曰博之類不用箭但行梟散劉德曰格五碁行籙法曰籙白乘五至五格不得行故云格五師古曰卽今戲之籙也按莊子駢拇篇問穀奚事則博籙以遊注引吾丘壽王善格五待詔卽博塞也是格五之戲自戰國已行又後漢書梁冀傳善格五注引鮑宏籙經云籙有四采籙白乘五是也至五卽格不得行又說文行碁相籙謂之籙亦格五也觀師古注可證格五至唐猶盛行惟其詳較彈碁尤不明了觀各家注似祇行碁不擲投而蘇林所謂不用箭但行梟散籙經以籙白乘五爲四采皆莫知其義又至五而格勝負如何亦無及之者蓋其亡尤久也

博 古戲失傳之六

世本桀臣烏曹作博是此戲起於夏時乃至宋而失傳宋李易安打馬圖序云長行葉子博塞彈碁世無傳者是自宋博已失傳故古人所言有絕對不能解者蓋博之事甚複雜而歷代有改變又古人所爲各



經祇詳器具不詳規則故能知其粗迹不能悉其細目

### 博之定名

古博亦用碁故後人往往謂博卽弈宋孫奭孟子弈秋疏解弈字云論語陽貨第十七不有博奕者乎而解弈爲博也云云此實大誤查論語博奕不惟何妄注未以弈爲博卽邢昺疏亦祇云博六箸十二碁也古者烏曹作博圍碁謂之弈云云亦未以弈爲博此等誤解皆由博用碁而起故疑博與弈碁爲一事豈知左傳曰弈者舉碁不定不勝其偶公羊傳南宮長萬與閔公博博自博弈自弈判然兩事安得以論語並舉遂疑爲一事乎

在漢以前皆曰六博因每人投六箸行六碁以箸碁爲主而得名也在漢以後曰樗蒲曰五木以五投爲主而得名也

### 博具考 箸 碁 五木

楚辭云琕蔽象碁有六博些王逸注投六箸行六碁故爲六博也蔽簿箸琕蔽者以玉飾之也又說文樗局戲也六箸十二碁後漢書注引博經云用碁十二六碁白六碁黑故古皆云六博戰國策臨淄甚富其民無不六博蹋鞠史記滑稽傳六博投壺易林野鳥山雀來集六博晉書張重華傳六博得梟者勝徐陵玉臺新詠序博齊姬心賞窮於六箸似以碁箸爲主要具而名之也

自博變爲樗蒲。六博之稱較少。多名曰樗蒲。漢馬融有樗蒲賦。樗蒲者博之變名。而五木最重。樗蒲經云。古者烏曹作博。以五木爲子。山堂肆考云。樗蒲以五木爲子。晉書劉毅傳。喝五木成盧。世說桓溫厲色擲去五木。國史補用骰五枚擲之。李習之集有五木經。注云。樗蒲古戲。其投有五。以木爲之。故呼爲五木。是以五木爲樗蒲主要具而名之也。然則箸也。棊也。五木也。習博之重要具。故緣以得名。茲分述其形象如下。

箸之形象後又名箭矢策子

西京雜記。許博昌善陸博。寶嬰好之。相與游處。法用六箸。以竹爲之。長六寸。徐陵玉臺新詠序。爭博齊姬。心賞窮於六箸是也。亦名曰箭。列子。擊博樓上。其箭長五寸。其數六。漢書吾丘壽王傳。格五。注云。六博之類。不用箭。是可證博必用箭。箭卽箸也。後亦名曰矢。晉書胡貴妃傳。嘗與帝樗蒲。爭矢。傷帝指。五木經云。矢百有二十是也。亦名曰子。國史補云。法三分其子。爲三百六十。是子卽矢。矢卽箭。箭卽周秦之箸。名雖變。而用則同。蓋戲時得若干彩。卽投若干箸。以爲標識。五木經云。皆玄曰盧。厥策十六。注云。十六策者。行馬時便以此數矢而隔之。是可證得盧卽投十六矢。以爲志。又以證五木經之策卽矢也。

棊之形象

酉陽雜俎云。依六博棊形。頗似枕狀。說苑荀息曰。臣能累十二棊子。加九卵其上。南史王僧虔傳。臣能累

博棊十二不墜。夫棊上可加卵。其大可知。至晉唐則曰馬。世說袁耽投馬絕叫。國史補人執六馬。五木經馬策二十。厥色五。凡擊馬及王采皆又投。注云行馬。古者人用六棊。故曰行六棊。此云人執六馬。云行馬。實一物也。

### 五木形狀

五木經云。檮蒲五木判玄白。注其投有五。故呼五木。初以木爲之。後以牙角判半也。合其五投。並上玄下白。故曰玄白判。又云。厥二作雉。背雉作牛。注取二投於白上。刻爲鳥。背鳥皆刻牛。國史補云。其骰五枚。分上爲黑。下爲白。黑者刻二爲牛。白者刻二爲雉。夫所謂骰五枚者。卽五木也。五投也。依五木經。雉牛相對。見二牛卽不見二雉。見二雉卽不見二牛。依國史補。不必相對。不對則可全見。然十采之中。並無二牛。二雉同見者。知五木經是國史補。非也。

### 博關

以上博具。曰箸曰箭曰矢曰策。曰子爲一物。曰棊曰馬爲一物。曰五木五投五骰音頭爲一物。尙有一物。蓋施於局上者。曰關。五木經云。矢百有二十。設關二。問矢爲三。注云。間別也。刻木爲關。彫飾之。每聚四十矢。又馬出初關。非王采不出關。國史補云。法三分其子爲三百六十。限以兩關。人執六馬。關之用不見於他書。五木經雉牛注云。雉牛逢敵必鬥。雖矢馬關亦皆角逐。以關與馬矢並。其重可知。觀經云。馬出初關。非

王采不出關。似關。所以防遏行馬。非擲得貴彩。馬行不能出也。

采名考

采名亦曰博齒。楚辭呼五白些。王逸云。五白博齒也。晉書葛洪傳。不知棋局幾道。博蒲齒名。列子樓上博者射明瓊。注明瓊今之投子。初以木後飾以玉。故曰瓊。又鮑宏博經。所得頭謂之瓊。瓊有五采。頭者骰也。投也。三字音同。故互用也。皆博齒也。世說桓公與袁粲道博蒲。粲道齒不合。宋史張昭遠傳。一擲六齒皆赤。是可證木之頭刻有采名。視采名以定勝負。以其頭類齒。故亦曰齒名也。

齒名言人人殊。惟五木經及國史補相同。且甚詳悉。博蒲經云。有雉梟雉犢。爲勝負之采。博經云。瓊有五采。刻一畫者謂之塞。二畫者謂之白。三畫者謂之黑。一邊不刻者。五塞之間。謂之五塞。山堂肆考云。有梟盧雉犢塞。爲勝負之采。博頭有刻梟形者。爲最勝。盧次之。雉犢又次之。塞最下。二經之言太略。肆考以五采若全刻於五木者。尤誤。全黑爲盧。自六朝及唐皆如此。盧之反卽五白。非刻於梟頭。肆考以五采當五木。全屬想像之詞。

五木經云。博蒲五木。玄白判。厥二作雉。背雉作牛。注以雉犢爲彩者。謂其悍戾。逢敵必鬪。以求勝也。雖矢馬關亦皆角逐防遏之義也。王采四。盧白雉牛。毗采六。開塞塔禿。擲擲。注毗賤也。采義未詳。全爲王駁爲毗。皆玄曰盧。厥筴十六。皆白曰白。厥筴八。雉二玄三曰雉。厥筴十四。牛二。

各本皆作三作三則  
六投矣依國史補改

白三曰犢

厥筭十。雉一牛一。

各本皆作二  
依國史補改

白三曰開。厥筭十二。雉如開。厥餘皆玄曰塞。厥筭十一。雉白各二玄一曰

塔。厥筭五。牛玄各二白一曰禿。厥筭三。白二玄三曰擲。厥筭二。

國史補云。其骰五枚。分上爲黑下爲白。黑者刻二爲擲。白者刻二爲雉。擲之全黑乃爲盧。其彩十六。二雉三黑爲雉。其彩十四。二擲三白爲擲。其彩十。全白爲白。其彩八。四者貴彩也。開爲十二。塞爲十一。塔爲五。禿爲四。梟爲二。擲爲三。

二書所言彩名彩數皆同。惟五木經以擲爲𦵏采第六。國史補以梟爲賤彩第五。爲小異耳。

其齒名見於漢前者曰梟。韓非子戰國策言之曰五白。楚辭言之。尙有一齒見於列子。列子樓上博者射明瓊。張中反兩擒魚而笑。注擒魚。骰采之名。漢以前齒名可考。見者祇如此。若盧雉等名。皆起於漢以後。漢以前有無不敢定。至擒魚祇列子言之。漢以前亦少見。梟與五白至唐仍存。梟之用前後雖殊。五白則今古皆貴。以是二者爲最久矣。

以上所述者曰箸曰碁曰馬曰關曰五木曰骰皆博具也。曰梟曰五白曰擒魚。漢以前所見之博齒名也。曰盧白雉牛四。貴采曰開塞塔禿擲梟四。賤采。漢以後博齒名也。博具旣明。然後其戲法可得而述。

### 對局人數

公羊莊十三年。南宮長萬與宋閔公博。史記吳王濞傳。吳太子侍皇太子博。爭道不恭。皇太子引博局提

殺之。信陵君傳：公子與魏王博，博經六碁白，六碁黑，是皆以二人對局也。楚辭分曹並進，道相迫些。王逸注云：言分曹列耦，並進技巧，投箸行碁，轉相道迫，使不擇行也。是人可多，但分爲兩曹，故云列耦也。故世說桓溫請袁耽代戲，二人齊叫，袁既擲，桓卽不擲，敵家頃刻失數百萬，是仍兩人對局，但桓與袁爲曹耦，與楚辭同也。至東晉末，則可多人共局。晉書劉毅傳：在東府聚博，蒲餘人皆得贖，毅後擲得雉，劉裕最後又得盧，是共局在三人以上。至唐，則可五人對局。五木經云：馬策二十，厥色五。注：大率戲時，不過五人，五色者各辨其所執也。國史補所謂人執六馬也，是共局可五人也。

古得梟則倍贏食子

楚辭成梟而牟。注：牟，倍勝也。史記魏世家：王獨不見博之所以貴梟者，使則食，不便則止矣。正義云：博頭有刻爲梟形者，擲得梟合食其子，若不便則餘行也，是得梟則倍贏，可食他人子也。子卽箸卽矢也。惟戰國策云：夫梟碁之所以能爲者，以散碁佐之也。夫一梟之不勝五散，亦明矣。又焦氏易林云：三梟四散，主人勝客，今皆不能通其義。

然旣勝則殺梟

韓非子：齊宣王問匡倩曰：儒者博乎？曰：不也。博貴梟，勝者必殺梟，是殺所貴也。儒者以爲害義，故不爲也。又家語：儒者不博，爲其兼行惡道故也。按梟爲惡鳥，故古人多方殺梟。然博得梟則勝，旣勝而殺之，過河

拆橋於義有害。行害義之事。是行惡道也。故不爲。然梟如何殺。其規則則不能詳。自漢至西晉。仍貴梟。漢張衡傳。咸以得人爲梟。注。猶六博得梟勝。又晉書張重華傳。謝艾曰。梟遊也。六博得梟者勝。今梟鳴牙中。尅敵之兆。是自漢迄西晉。仍以梟爲勝采。

#### 東晉貴盧雉唐以梟爲最賤

晉書劉毅傳。喝五木成盧。世說桓公樗蒲失數百斛米。求救於袁耽。耽在艱中。便云大快。我必作采。卿但大叫。卽脫其衰。服共出門去。旣戲。袁形勢呼袒。擲必盧雉。二人齊叫。敵家頃刻失數百萬。是時已以盧雉爲上采。蓋樗蒲以盧雉爲最貴。不貴梟。故自樗蒲興而盧雉之名大著。梟名遂寂。而呼盧喝雉之聲。訖唐尙盛。杜甫詩。咸陽客舍一事無。相與博塞爲歡娛。憑陵大叫呼五白。袒跣不肯成梟盧。韓愈詩。梟盧叱迴旋。以梟與盧並。仍沿古稱。詩歌用故事。則然耳。實唐時以梟爲賤采中之賤者。前采名節已詳之矣。

#### 盧雉牛白四王采等級攷

晉唐貴盧雉。然盧雉二采。又孰勝乎。是亦規則之一也。考南史宋武帝與顏師伯樗蒲。帝得雉大悅。後師伯得盧。帝失色。師伯遽斂手曰。幾得盧。是可證盧勝雉。故帝失色也。又貴采中之牛。較盧雉又孰勝。考晉書劉毅傳。後在東府聚樗蒲。大擲一判。贏至數百萬。餘人竝黑憤。惟劉裕及毅在後。毅次擲得雉。大喜。褰衣繞牀叫曰。非不能盧。不事此耳。裕因按五木久之曰。老兄試爲卿答。旣而四子俱黑。一子轉躍不定。裕

厲聲喝之。即成盧焉。是可證雉不如盧。憤不如雉也。

又五白在古爲最貴。雖梟不如楚辭成梟而牟。呼五曰些。注梟二爲珉采。牟勝也。勝梟必五白。是敵人成梟。故呼五白以求勝敵人。見朱子集注。與王逸注異。

蓋自六朝以來。盧爲最貴。無能上之者。故南史李安人討晉安王勛。所向克捷。事平。明帝大會新亭樓。勞諸軍主。樽蒲官賭。安人五擲皆盧。帝大驚。驚其得采之最上。可證此時五白絕不能勝盧。又五木經述王采曰。盧白雉牛。以五白居第二。國史補述貴采曰。盧雉牛白。以五白第王采之末。若證以劉毅傳及南史。則五木經非國史補。是何者。毅傳明言盧最貴。雉次之。憤又次之。可證憤之下方爲五白。若如五木經之次序。雉之上尙有五白。有盧何爲大喜乎。此確證也。杜甫云。憑陵大叫呼五白。用楚辭耳。非最上采也。

各項規則考

國史補云。三分其子三百六十。限以兩關。人執六馬。其骰五枚。貴采得連擲。得打馬。得過關。餘采則否。

五木經云。矢即子百有二十。設關二。間矢爲三。

注每聚四十矢

凡擊馬及王采皆又投。

注擊馬則打敵人子也。打子得雉。王采自專。故皆許重擲。王采

累得累擲之。變則止。

馬出初關疊行。

注謂達可以疊馬。即許疊也。如不要疊。亦得重馬。被打着尤苦。

非王采不出關。不越坑。

注馬出關。亦自專之義也。名爲落坑。義在離

出。故用王采能出。

入坑有謫。

注其所罰隨所約。並輪合坐。

行不擇策馬。一矢爲坑。

注謂矢行。致馬落坑也。亦有馬不可均融數奇。而入坑者。

按入坑出坑。爲國史補所未言。注云。名爲落坑。義在難出。故用王采能出云云。於一矢爲坑。及矢行致馬





雙陸 古戲失傳之七

事始博陸采名也。六隻骰子皆六。朝野僉載。貝州潘彥好雙陸。泛海遇風。船破。左手持雙陸局。口銜雙陸骰子。二日不捨。是雙陸亦有骰子。惟用六。與樗蒲異。又樗蒲尙有馬有箭。雙陸則有籌。集異記。則天命梁公與張昌宗雙陸。公就局。則天曰。以何賭。公對曰。爭先三籌。賭昌宗所衣毛裘。疑所謂籌。卽樗蒲之箸。是蓋從博變通而爲者。又宋洪遵有譜雙序云。弈棋象戲。家徹戶曉。至雙陸打馬。葉子視明瓊爲標的。非圖牒無以得彷彿。雙陸最近古。號雅戲。以傳記考之。獲四名。曰握槊。曰長行。曰婆羅塞。曰雙陸。蓋始于西竺。流於曹魏。盛於梁陳魏齊隋唐之間。

今觀其圖局上各列小杵十五枚。白與黑相錯。而下有門。疑卽樗蒲之關。小杵則所謂馬。所謂槊也。而北雙陸與南雙陸又微不同。至所謂打馬者。又與雙陸不同。李易安有打馬圖經。圖較雙陸尤複雜。而馬以能過函谷關爲勝。自宋以後。爲之者少。疑今日打馬將是沿其名也。

弈碁 古戲僅存之一

左傳襄二十五年。今甯子視君不如弈碁。弈者舉棋不定。不勝其耦。注。弈圍棋也。疏云。方言。圍棋謂之弈。自關東齊魯之間。皆謂之弈。說文。弈從廿。言竦兩手而執之。棋者所執之子。圍而相殺。謂之圍棋。不勝其耦者。謂舉子下之不定。故不勝也。

後人以博用碁有白黑有局有道而弈碁亦有白黑有局有道於是誤以博弈爲一事豈知博弈祇十二六白六黑弈棋則三百以其多故能圍若人執六碁如何能圍甚不同也博物志云堯作圍棋教丹朱或曰舜作教商均世本云桀臣烏曹作賭博圍棋莫能定其原起然左傳已言之則其戲之古可知若起於堯舜至今已四千年仍守而不失毫無變易則可慶也

### 古碁局狀況及攻守之法

馬融圍棋賦三尺之局分爲戰鬥場先據四道兮保角依傍緣邊遮列兮往往相望班固弈旨云局必方正象地則也道必正直神明德也碁有黑白陰陽分也駢羅列布效天文也四象旣陳行之在人蓋王政也又吳韋躍論所務不過方罫之間方罫者棋道一縱一橫故成方界形然則古碁局形狀正與今同惟稍大耳

按今圍棋先下四子於四角白黑相錯謂之四柱卽孟堅所謂四象旣陳馬融所謂先據四道也此本無關係故日本不著四柱子中國必著者遵古義也日本雖不著然前四子亦先據四角與豫著者等也中國古戲祇此尙存原狀又所謂保角依傍緣邊遮列古著子法亦與今同邊角易活易作眼故爭據之宋淨山禪師云肥邊易得瘦肚難求亦謂此也

### 古今棋局道數及棋子數目考

今棋局縱橫各十九道。若漢魏時則十七道。邯鄲淳藝經曰：棋局縱橫各十七道，共二百八十九道。白黑子各一百五十枚，共三百子。韋曜論枯棋三百，所志一枰之上，是漢魏時枰爲十七道。至唐增爲十八道。柳子厚柳州山水記其始登者，得石枰於上，黑肌而赤脈，十有八道，可弈是也。至宋時爲十九道。比漢時縱橫各多二道。五燈會元：歐陽文忠請浮山禪師以碁說法，浮山云：縱橫十九路，迷悟幾多人，是其證。十九道則用子各一百八，共三百六十一子。蓋當期之日，故今日弈者算輸贏，皆以一百八十起算。山谷詩：枯棋三百共一樽，仍沿韋曜語也。惟由十七道增至十九道，不知始於何人，尙待考也。

惟棋子有數百之多，故三國志記王粲觀人圍棋，局壞，粲爲覆之。棋者不信，以杷覆局，另以他局爲之，不悞一道。以著其強記。若今日善弈者，亦能覆局，然皆由下子時如何布局，如何攻守，無一子不啞心瀝血而來，故可覆其子。術淺者不能也。若粲則純以記憶得之，故罕有也。

古以兩眼爲活，一眼爲死之證

鄴侯外傳云：方若棋局，圓若棋子，動若棋生，靜若棋死。至如何生，如何死，古書均不言其故。惟黃山谷詩云：湘東一目誠堪死，天下中分尙可持。言祇得一眼，則棋死也。兩眼則生矣。又馬融圍棋賦：離離馬目，兮連連雁行，馬目卽雙眼也。

打劫

凡圍棋爭一子可來回相殺而劫敵人他處使其不暇顧此而我得復殺此子者曰劫此法亦甚古晉書阮簡爲開封令有劫賊外白甚嚴簡方圍棋長嘯吏曰劫急簡曰局上劫亦甚急此古亦打劫之證

### 受子

凡兩人強弱不能相敵則強者讓弱者一子或兩子或三四子於未戲之先先使著幾子於局上名曰受子此例於魏晉時不見至宋則有之荆公詩話蘇子瞻云太宗時有賈元者侍上棋太宗饒元三子元常輸一路太宗知其挾詐謂曰此局復輸當撈汝既而滿局不死不生太宗曰更圍一棋勝賜汝緋衣不勝當投泥中既而局平不勝不負太宗曰我饒汝子是汝不勝命抱投之水乃呼曰臣握中尙有一子太宗大笑賜以緋衣

### 古圍棋皆賭物

吳韋曜弈論曰或賭及財物東坡志林張懷民與張昌言圍棋書字一紙勝者得之負者出錢五百作飯山堂肆考楊大年與西廳參政侍郎弈棋輸紙筆硯三物墨宣毫適盡但送紙與端硯是自三國時至宋皆賭物惟所賭亦雅不似博之純以財也

### 弈棋爲諸戲之王

凡戲皆取其熱鬧圍棋則取其寂靜凡戲皆用氣力圍棋獨運心思黃山谷云心似蛛絲遊碧落身如鰗

甲化枯枝。可謂窮形盡相矣。故晉支公以爲手談。王坦之謂爲坐隱。嗜之者多。屬幽人精之者。推爲國手。石幢花影。古刹偏多。夜雨秋燈。書齋每有。或疏簾清簟。嘿爾旁觀。或流水長松。鏗然落響。其韻味之冷靜幽僻。絕非執斧市井之所能領略。故歐洲人絕不喜之。扶桑國知其韻味。至古今弈棋故事。多不勝舉。祇資談助。無關考核。因並略而不述焉。

象戲 古戲僅存之二

今日之象棋。在古均名象戲。古所謂象棋。皆以象牙爲飾。猶象車。象箸。象牀也。說苑雍門子謂孟嘗君曰。燕則門象棋而舞鄭女。楚辭琨蔽象棋。皆謂六博棋。加以象飾也。蔡邕彈棋賦。列象棋。彫華麗。則謂彈棋。皆非象戲。象戲之名。始見於干寶搜神記。記云。巴邱人家有園橘。大如盎斗。剖之有二叟。象戲於其中。然象戲情形。晉時莫有詳者。至周武帝作象戲經。後人遂以爲武帝創也。

北周時象戲爲日月星辰

北史王褒傳。武帝作象經。命褒注。引據賅博。甚見稱賞。同時庾子山承旨作象戲賦。亦云。臣伏讀象經。是武帝創此戲。並著象經以爲說明也。惟繹庾賦。與今象戲迥不相同。賦云。局取諸乾。仍圖上玄。月輪新滿。日暈重圓。坤以爲輿。剛柔舒卷。若方鏡而無影。似空城而未居。是取象於天地日月也。又云。促成文之畫。亡六龜之圖。馬麗千金之馬。符明六甲之符。是取象於龜馬也。又從月建而左轉。起黃鐘而順行。是又取

象於十二月順六律以行也。故宋李昉太平御覽云。象戲周武帝所造。而行棋有日月星辰之目。與今所爲不同。是可證周武之所造久已失傳。

### 唐象戲略與今同

牛僧孺玄怪錄。寶應元年。汝南岑順於呂氏故宅。夜聞鼙鼓聲。介冑人報曰。金象將軍傳語。與天那賊會戰。順明燭以觀之。夜半後東壁鼠穴化爲城門。有兩軍列陣相對。部位既定。軍師進曰。天馬斜飛度三止。上將橫行擊四方。輜重直入無迴翔。六甲次第不乘行。於是鼓之。兩軍俱有一馬斜去三尺止。又鼓之。各有步卒橫行一尺。又鼓之。車進。須臾砲石交下云云。因發掘東壁有古塚。有象戲局。車馬俱焉。

按今日象戲橫九道。豎十道。中爲黃河。河南北各五道。兩家列陣相對。每家有二車列於最下層之兩邊。次爲兩馬。次爲兩象。次兩士。將居中。其橫第三道與馬相直者。兩邊又各有一砲。五卒列於第四道。當一隔一道左右各一。又隔一道守邊卒各一。牛僧孺所言天馬斜飛度三止者。卽今所謂馬走日字角也。輜重直入無迴翔者。卽今車走直路也。各有步卒橫行一尺者。卽今步卒祇許行一道也。砲石交下者。卽今砲可隔子擊物也。此唐與今同者也。其微異者。唐之軍師可發命令。似今日之將。然今日之士居將左右。似亦可傳達命令。不知唐之軍師卽今將。抑卽今之士也。至於今之將。不許出城。唐之將則橫行四擊。今之將被虜則輸。若能橫行四擊。則不能被虜。此其不同者。抑唐時以軍師爲主。另有上將乎。又所謂鼓。

今亦無之。知今之象戲，又與唐微不同矣。

然牛僧孺所言，乃古塚局。古塚既爲住宅，總須數百年，則其物爲六朝爲隋爲唐初不定也。至確爲唐時者，白居易詩云：「鼓應投壺馬，兵衝象戲車。」是唐戲有車有象有兵，大致與今同。惟鼓爲今所無。

宋有七國象戲

晁補之有廣象戲圖序，司馬光有古局象碁圖，其局分七國。王居中，秦居西方，楚韓居南方，東方齊魏，北方燕趙。一國用十一子，用各色爲別，可合從，可連衡，後又有改爲三國者。不知始於何時。余幼時尙見有此戲，今則絕迹矣。

色子戲 古戲僅存之三

此戲創自宋朱河，後訛爲豬窩。李易安打馬圖序，所謂豬窩族鬼，鄙俚不堪者是也。卽今之擲色子。朱河則名曰除紅，有譜。楊維禎有除紅譜序，除紅者以一紅爲主，而餘三爲客，取象於徑一圍三。據其凡例，凡除紅以四骰音頤擲之，以四紅爲主，除一四紅，但以餘五色計之，自八點以下，皆爲罰色，十三色以上，俱爲賞色，俱不必賽。自九點以至十二點，俱爲賽色。凡賽色點數相同者，謂之趕上，賞一帖。凡賽色多一點者，謂之壓倒，賞二帖。少二點三點者，止罰一帖。

按今之擲色子，用三骰。宋則用四骰。今骰子一點及四點皆紅色，餘皆黑色。宋則四點爲紅色，餘則分五



色。今骰除二骰點相同者。餘一骰若爲一點則罰。若相同之二骰亦爲一點則勝。爲六則賞。皆不賽。宋則除四紅一骰。計餘三骰之點。八以下輸。十三以上贏。皆不賽。今骰自二點至五點皆賽。宋則自九點至十二皆賽。今賽色只趕上卽贏。宋則分等級。今骰三骰點相同。名曰報子。皆贏。宋骰四骰點相同。亦贏。惟今骰擲得一二三名猪尾。二三四名踰。皆輸。三四五名花。三五四五六名大順。皆贏。皆不賽。則除紅所無也。蓋此戲純取古六博中之五投變化用之。惟博齒祇用兩頭。此則用六面耳。

#### 牙牌 古戲僅存之四

今之牙牌戲最盛行。曰推牌九。曰打天九。曰頂牛。賭博用之。曰牙牌神術。卜筮用之。而推牌九最盛。豪富之家。至一推數十萬。實其戲甚不古。宋始有也。

諸事音考云。宋宣和二年。有臣上疏設牙牌三十二扇。共計二百二十七點。按星辰布列之位。譬天牌二扇。二十四點。象天之二十四氣。地牌二扇四點。象地之東西南北。人牌二扇十六點。象人之仁義禮智。發而爲惻隱羞惡辭讓是非。和牌二扇八點。象太和元氣。流行於八節之間。其他名類。皆合倫理。庶物器用表上貯於御庫。疑繁未行。至高宗時始詔如式。班行天下。以是證宋以前未有。惟當時祇說明造牌意義。至其用法。並未分疏。至高宗時且班行天下。疑非純用於戲者。如純爲戲具。下詔班行。雖荒淫之朝。無此政體也。

鬥鷄

鬥鷄之戲最古。紀渚子爲周宣王養鬥鷄。見於列子。左傳季郕之鷄鬥。郕氏介其鷄。季氏爲之金距。注。撝芥子播其羽也。或曰以膠沙播之爲介鷄。是等求勝之法。爲後來所未覩。史記袁盎傳。盎與閭里相浮沈。鬥鷄走狗。後漢梁冀傳。好鬥鷄走狗。唐李林甫傳。在東都爲擊毬鬥鷄戲。五代史。王彥章曰。亞次鬥鷄小兒耳。是自周迄五代。皆尙此戲。至鬥鷄之時。則以清明節爲最盛。東城父老傳。唐明皇在藩邸時。喜民間清明鬥鷄。故韓愈鬥鷄聯句云。天時得清寒。地利喜爽塏。清明正清寒之時。最宜此戲也。宋元以後。此戲漸稀。今遂絕迹。至臂鷹走狗。歷代有之。皆弋獵之事也。

古捕蟬戲

呂氏春秋。燠蟬者。務在明其火。振其樹而已。火不明。振柳何益。按今之捕蟬者。於黑夜置籠燈樹下。而撼其樹。蟬受震向燈而飛。因捕之。而周時卽如此。行之數千年。此用火捕蟬也。淮南子謂之耀蟬。又莊子。仲尼適楚。出於林中。見尙儂者承蜩。猶撥之也。孔子曰。巧乎。曰。吾執臂若槁木之枝。天地之大。萬物之多。而唯蜩翼之知。吾不反側。不以萬物易蜩之翼。何爲而不得。注以竿黏蟬曰承。按今日仍有以竿黏蟬者。法以黽膠黏於竿頭。或黏鳥。或黏蟬。潛以竿拂之。黏其羽卽得。此以竿黏蟬也。蓋自古小兒最愛蟬。論衡充爲小兒。與儕儻遊戲。儕儻好掩雀捕蟬。充獨不肯。以小兒愛蟬之故。因常有。

捕○蟬○入○城○市○售○賣○者○清○異○錄○唐○世○京○城○遊○手○夏○月○捕○蟬○貨○之○唱○曰○只○賣○青○林○樂○婦○妾○小○兒○爭○買○以○籠○懸○窗○戶○間○亦○有○驗○其○聲○長○短○爲○勝○負○者○謂○之○仙○蟲○社○是○自○周○秦○迄○漢○唐○皆○以○蟬○爲○戲○至○於○今○不○改○其○樂○



## 卷四十一

行唐尙秉初著

### 古家庭狀況

#### 食飯次數

莊子適莽蒼者三餐而返。腹猶果然是。每日三餐之證也。又戰國策士三食不厭。而君鵲有餘食。三食者三餐。饜飽也。故陸游詩疾行逾百步。健飯每三餐。三餐者一晨餐。詩朝食于株。左傳我姑剪滅此而朝食。世說羊孚與謝益壽相好。常早往謝許。未食。俄而食下。是晨起早餐也。蓋古人皆鷄鳴而興。若至日出則爲宴起。故晨時須飯。彼韓昌黎答東野詩。朝餐動及午。夜吟恆達卯。狀東野之貧困慵懶耳。非朝餐至午始食也。又呂氏春秋云。旦至食。亦其證也。

一中餐。漢書淮南王傳。帝使爲離騷傳。旦受詔。日食時上言晨受詔。至日中午飯時。書已成而奏上也。又蕭望之傳。太官方上晝食。又宋書江夏王義恭傳。諸王食皆五盞盤。義恭恃寵。常求須臾食。日中無筭。算得未嘗噉。夫所謂午飯晝食。日中菓食。皆中食也。卽周禮天官膳夫所謂燕食也。燕食者。鄭玄云。謂日中與夕食。又五燈會元。黃山谷晨粥午飯。是自周至宋朝食。午食未嘗改也。

一晚餐戰國策。晚食以當肉。南史齊明帝紀。帝性儉約。大官進御食。有裹蒸。帝十字畫之曰。可四片破之。餘充晚食。又唐薛用均集異記。及家暝矣。入門方見其親與弟妹張燈會食。又唐書柳玭傳。戒子孫曰。先君非速客不二羹。歲夕食訖。荀瓠而已。又說苑趙簡子曰。吾門客千人。朝食不足。暮收市征。暮食不足。朝收市征。是皆晚食之證。晚食近睡。故柳玭先人只訖荀瓠而止也。又五燈會元。黃山谷晨粥午飯。過午卽不食。不食晚飯也。佛律也。

古人早起

內則子事父母。鷄初鳴。咸盥漱。婦事舅姑。鷄初鳴。咸盥漱。以適父母舅姑之所。又男女未冠笄者。鷄初鳴。咸盥漱。昧爽而朝。又凡內外鷄初鳴。咸盥漱衣服。歛枕簟。洒掃室堂及庭。布席各從其事。唯孺子早寢。宴起。唯所欲食。無時。又文王世子。文王之爲世子。朝於王季。日三。鷄初鳴而衣服。至於寢門外。是周初皆鷄鳴而起也。至春秋時。趙武晨興將朝。尙早。坐而假寐。見於左傳。鷄旣鳴矣。朝旣盈矣。又三歲爲婦。靡室勞矣。夙興夜寐。靡有朝矣。箋云。朝。朝如此。見於毛詩。其早起仍與周初同。此等習慣。歷六朝訖唐不改。宋書后妃傳。江數讓婚表云。召必以三晡爲期。遣必以日出爲限。夕不見晚魄。朝不識曙星。言公主必日出方令起。故不識曙星。斯可證不爲駙馬者。皆戴星而起也。又玉泉子。鄭餘慶罷相。間居。一日召郎舍會食。衆以鄭公望重。平旦皆集。又幽怪錄。杜陵韋固少孤。思早娶。客有以前清河司馬潘明女爲議者。來旦期。龍興寺

門且往斜月尙明按今日京朝官請客早餐若平明也。且者明卽往豈不可笑卽有事與友人期明朝相見亦豈能戴月而往而唐時不爾者以社會習慣皆早起也雖所言皆士大夫家然士夫如此農商可知今無論士人卽鄉舍農人祇農忙時可黎明起若鷄鳴而起除元旦一日外他無有也此亦民氣朝暮之一證也

### 晨起爲父母進盥洗狀況

禮內則家子家婦鷄初鳴咸盥漱適父母舅姑之所問衣寒煖疾痛疴痒而敬抑搔之進盥長者奉槃少者奉水請沃盥盥卒授巾問所欲而敬進之嘗而後退此成人且有室者之責也若男未冠女未笄者亦鷄鳴起昧爽而朝問何飲食矣若已食則退若未食則佐長者視具此只贊助長者事親而非其專責若再幼而爲孺子則不必早起唯所欲也

### 古浴身詳狀

禮玉藻浴用二巾上絺下綌音零出杆音零履蓐席連用湯履蒲席衣布唏身乃履進飲按絺精故用以拭上身綌粗故用以拭下身出杆者出浴盆也蓐草澀可刮垢故履之連用湯者再以湯淨身也身淨履蒲席衣布以俟身燥而進履凡浴後必渴故進飲

### 古沐浴頤面洗足次數

內則五日則燂湯請浴。三日則燂湯請沐。其間面垢燂潘請澣。足垢燂湯請洗。

按浴浴身也。沐沐頭上髮也。古人留髮上覆以巾。易垢膩。故至三日必沐。沐後常風晞髮使乾。其詳盡在首服中。若浴身則可少緩。故五日爲之。其間者三日五日之間也。潘者米汁。燂者溫也。言日日洗面及足。不似沐浴之隔三日五日爲之也。

古今沐浴去垢法之變遷

周時洗衣以灰水。內則衣垢和灰請澣是也。沐髮澣面則以米汁去垢。內則沐稷而澣梁是也。至漢仍用米汁。史記外戚傳。丐沐沐我。注。沐米潘也。潘卽米汁。左傳使疾而遺之潘沐是也。至晉有澡豆。見于世說。然以王敦之貴。尙不識爲何物。竟以爲飯倒著水中而飲之。可見世俗尙無此物。至唐陸暢娶貴人女。亦不識澡豆。沃水服之。以爲食辣麵。見酉陽雜俎。貶誤門。至宋王荊公面黑。夫人爲置澡豆。荊公不用。是唐宋時洗面用澡豆者仍少。第古之所謂澡豆。與後世異。王敦以爲乾飯而飲食之。陸暢則以爲食辣麵。是唐與晉亦異。然究爲何質。造成作何形狀。今已不能揣知。又以證石鹼之發明最晚。說文雖有鹼字。皆詁作鹵。本草綱目始言山東濟甯出石鹼。可澣衣。蓋在明時。至清遂有鵝胰豬胰肥皂等名。去垢之劑遂大備矣。

古家庭婦女嬉戲日期



古人精神最活潑。其男子至歲時伏臘則游戲娛樂。女子亦然。社日停鍼線。端午鬪草。藏鉤既詳於時節。游戲各門中。乃漢時婦女每月復有二日爲嬉戲確期。漢焦仲卿妻詩云。初七與下九。嬉戲莫相忘。下九者。據探蘭雜志云。九爲陽數。古人以二十九日爲上九。初九日爲中九。十九日爲下九。每月下九置酒爲婦人之歡。名曰陽會。蓋女子陰也。待陽以成。於是夜爲藏鉤諸戲。有忘寐達曙者。據是證。每月十九日爲下半月嬉戲之期。前半月嬉戲期則初七也。七亦陽數。此等取義頗似周人。疑仍周之遺俗。蓋婦女終歲炊爨紡績織布組紉。無日夜不工作。較男子尤勤苦。故於每月擇二日具酒食。息勞動。游戲歡娛。以酬其苦。焦仲卿爲廬江郡府小吏。並非富貴之家。乃亦如此。足證當時社會皆然。且以見古人調濟勞逸之妙用也。

### 古以牽牛娛小兒

左傳哀六年。鮑子曰。汝忘君之爲孺子牛。而折其齒乎。而背之也。注。孺子茶也。景公嘗銜繩爲牛。茶牽之。頓地折齒。按今日家人娛小兒之法。無所不至。而老人爲之者少。齊景公生茶之年。約已五十。乃猶銜繩爲牛。使小兒牽之。呼叱以爲戲。以是見古人活潑氣象。至老不息。

### 漢以來婦女皆學樂

古家家有樂器。不惟男子能奏樂。婦女尤人人能奏樂。故古家庭之樂。迥非後世可比。史記萬石君傳。石

奮對高祖曰。家有妹能鼓琴。漢書楊惲傳。家本秦也。能爲秦聲。婦趙女也。雅善鼓瑟。元后傳。相者言政君當大貴。名后父。心以爲然。教書學鼓琴。又司馬相如傳。卓王孫有女文君。新寡好音。相如以琴心挑之。夫琴者至高之樂。而最難能。漢時婦女皆能之。觀焦仲卿詩。十三學織素。十四學裁衣。十五彈箏篴。十六學詩書。似學樂爲女子一定課程。是以自魏晉六朝。以迄唐宋。士大夫家庭。除本爲歌妓外。其夫人姬妾。或彈箏篴。或吹簫。或擲笛。或彈琵琶。見於詠歌及雜記者。不可勝數。自朱熹女子無才便是德之說興。南宋元代。尙未受其影響。及至有明。方孝孺胡廣等本朱熹之說。演而爲嚴氣正性。於是家庭音樂。不爲女子能之。視爲不正。卽士夫能之。亦目爲不材也。而古人活潑性情。節調勞逸之妙用。全失而反響。遂生爲孔聖唯一之罪人。

古育嬰方法

禮內則。子生男子懸弧於門左。女子設帨於門右。三月之末。擇日剪髮爲髻。注。髻遺髮也。疏。所留不剪也。又子能食教以右手。今仍教小兒右手使箸。能言男唯女俞。六年教之數與四方名。七年男女不同席。不共食。八年出入門戶。及卽席飲食。必後長者。始教之讓。九年教之數日。注。朔望六甲。十年出就外傳。居宿於外。學書記。衣不帛襦袴。注。爲太暖。傷陰氣。禮率初。注。故。朝夕學幼儀。請肄習簡諒。也。按周時育嬰之法。大致與今同。惟幼儀必習。爲今日所忽略。蓋洒掃應對。古人爲小學一定課程。所謂履

端於始。禮慎厥初也。簡諒者注謂所書篇數。猶今小兒寫仿影也。

### 古賀生兒

史記盧縮傳。高祖盧縮同日生。里中持羊酒賀兩家。又世說元帝生子。普賜羣臣。此漢晉賀生兒也。至唐尤甚。樵異記。明皇何后愛弛。乘間泣曰。三郎獨不念何忠脫紫半臂換斗麵。爲生日湯餅耶。湯餅者宋燭冥子云。長命麵也。人家生兒。作湯餅會。祝兒長生也。按劉禹錫詩云。憶爾懸弧日。余爲座上賓。舉筯食湯餅。祝詞添麒麟。又唐書李林甫舅姜虔生子。手書賀曰。聞有弄麀之慶。故東坡賀人。生子詩云。甚欲去爲湯餅客。惟愁錯寫弄麀書。用劉禹錫詩及林甫故事也。又北史高澄尙馮翊公主。生兒爲湯餅之會。是湯餅之名。六朝已有。

### 小兒束髮狀況

詩。總角丱兮。注。總束其髮以爲兩角。玉藻。童子束髮朱錦。蓋古人自幼留髮。而髮皆上梳。分左右束爲兩角。使不下披。此式最久。至明皆如此也。不以朱束髮。必有服者。

### 試兒

顏氏家訓。江南生兒一弄。爲製新衣。盥浴裝飾。男則用弓矢紙筆。女則用刀尺鍼縷。並加飲食之物。及珍寶服玩。置之兒前。觀其發意所取。以驗貪廉。智愚。名爲試兒。按此純爲迷信心理。小兒何知。視其物之可

喜者取之。自然之理。荀子云。今以百金與搏黍示小兒。小兒必取搏黍。棄百金。何者可愛也。今以不可愛之物與珍玩並陳。則十九必取珍玩。胡能驗哉。然此法。今仍有行之者。似不詳審也。搏黍者。鳥名也。至育兒之法。玉藻云。童子不裘不帛。內則云。不帛襦袴。襦袴皆裏衣。帛則太暖。注云。傷陰氣。實有至理。若裘則尤不宜。今富貴人家童子。往往犯此而反不健。致疾因以害兒。

古屋內冬日取煖之法

木炭自周時有之。月令。草木黃落。乃伐木爲炭。冬日卽燃以取煖。周禮天官宮人。執燭共爐炭。左傳。邾子自投於床。廢於爐炭。遂卒。是裝炭於爐。可移徙取煖。亦有爲竈熾炭者。呂氏春秋。衛靈公天寒鑿池。宛春諫曰。天寒傷民。公曰。寒乎。宛春日。公衣狐裘坐熊席。阪隅有竈。是以不寒。又左傳。昭十年。初元公惡寺人柳欲殺之。及喪。柳熾炭於位。將至則去之。是於屋隅築竈以取煖。又熾炭於坐處。古席地。使地溫也。漢晉以後。其法益精。又於炭火上罩以薰籠。既可防火險。又可倚以取煖。唐人詩所謂斜倚薰籠坐到明是也。又白居易詩。紅泥小火爐。是取煖而兼烹茶溫酒之用。而皆燒炭。於是晉羊璠作獸炭。唐楊國忠作獸炭。洛中子弟作煉炭。以次起矣。

家庭捕鼠之歷史 周貓爲野畜

鼠爲害於家庭最烈。而古尤甚。古雖王家。牆皆版築。無磚石。易作穴。古無貓。詩。麀鹿嘯嘯。有熊有羆。有貓

有虎。以貓與野獸並列。足證周時貓尚爲野畜。未馴爲家畜。故蜡祭迎貓。詩曰。穹窒熏鼠。又曰。洒掃穹窒。穹窒者。箋云。鼠穴也。又韓非子云。社鼠燬之則焚木。灌之則塗墮。足見當時畏鼠之烈。

### 周以狗捕鼠

古於熏灌之外。則以狗捕鼠。因捕鼠之故。有以相狗爲專業者。相其能與否也。周禮秋官犬人。凡相犬牽犬者。屬焉。呂氏春秋云。齊有善相狗者。其鄰假以買取鼠之狗。期年乃得之。畜數年而不取鼠。以告相者。相者曰。此良狗也。其志在麋麋鹿豕。而不在鼠。欲其取鼠也。則梏之。其鄰梏其後足。狗乃取鼠。又莊子徐無兒。吾常相狗也。又參同契。狸犬守鼠。又晉書。劉毅傳。既能搏獸。又能殺鼠。何損於犬。是皆古以犬捕鼠之證也。

### 以狸捕鼠

次則用狸。狸者狐類。詩豳風。取彼狐狸。爲公子裘。是也。微大於貓。而能食貓。貓見之。則不敢動。故貓亦曰狸奴。其皮青黑而作波文。無他色者。法言所謂辯人狸別。其文萃也。故至今仍以爲裘。性尤嗜雞。鄉間名曰雞豹子。後人因貓亦名狸奴。輒疑狸卽貓者。誤也。本草云。狸有數種。有斑如貓。而圓頭大尾者。爲貓狸。善竊雉鴨。舊爲野獸。在周時曾馴爲家畜。用以捕鼠。莊子驂騑騑。一日千里。捕鼠則不如狸狴。韓非子。令鷄司夜。使狸捕鼠。皆用其能。說苑。騏驎騑。一日千里。此至疾也。然使之捕鼠。曾不如百錢之狸。是狸

能捕鼠。故有賣者。又孔叢子。孔子彈琴。見狸作猫者。方捕鼠。又呂氏春秋。以狸致鼠。以冰致蠅。雖工不能。是皆以狸捕鼠之證。惟狸性凶狠。雖能捕鼠而害亦多。故至漢卽不畜之。淮南子。狸執鼠而不可脫。同託於庭者。爲搏鷄也。蓋是時馴猫之事已告成功。故卽捨狸。

最後用猫

猫之馴爲家畜。不知確始於何時。東方朔云。飛鴻驊騮。天下之良馬。然用以捕鼠於深宮之中。曾不如跛猫。是西漢時已以猫捕鼠。再證以淮南子之不畜狸。必是時馴猫之事已告成功。猫雖勇毅而性溫良。畜之久而無弊。故漢晉時雖甚少。至唐時其族卒大繁。遂爲家畜不可離之物。與鷄狗同。而狸復變爲野畜。然在魏晉時。殊不多見。如世說。魏武愛子倉舒。墮額。憂鼠嚙其衣。簡文帝對客。有大鼠登牀。謝虎子上屋薰鼠。苦鼠之事。見於載記者甚多。而不言貴猫。足證此時猫族華乳尙未繁。至唐則家有戶育。敍樓記云。猫一名狸奴。張搏好猫。一曰東守。二曰白鳳。三曰紫英。四曰祛憤。五曰錦帶。六曰雲圖。七曰萬貫。每視事退至中門。則數十頭曳尾延頸。盤接而入。唐書。高宗王廢后傳。我後爲猫。武后爲鼠。我當嚙其喉。而韓愈有猫相乳記。又俗以猫洗面。過耳有客至。見酉陽雜俎。尤足徵社會皆有。與今日同。今人家偶無猫。則鼠立猖獗。以是知古鼠禍之烈。乞之其鄰。而宋黃山谷乞猫詩。最馳名。詩云。秋來鼠輩欺猫死。窺囊翻盆攪夜眠。聞道狸奴將數子。買魚穿柳聘衙蟬。又陸游贈猫詩。裏鹽迎得小狸奴。盡護山房萬卷

書宋以後吟詠者益多。蓋自貓族大繁後，而鼠禍立輕。此亦家庭治安上之一大紀念也。

### 古婦人見男子則以帳自蔽

家語孔子見南子，隔幃開環佩，粲然風俗通。泰山太守李張舉六孝廉，函封未發，張病物故。夫人於柩前下帷，見六孝廉，皆書謝道韞傳。夫弟獻之，常與賓客談議，詞理將屈，道韞遣婢白獻之曰：「欲爲小郎解圍，乃施青綾步鄣自蔽。」申獻之前議。又會稽太守劉柳聞其名，請與談議，道韞素知柳名，亦不自阻，乃簪髻素褥，坐於帳中。柳束脩整帶，造於別榻。是自周迄晉，凡婦人見外客，皆以帳自蔽也。乃對家中男子，亦隔以帳。鄴洛鼎岐記：盧虔後妻元氏，升堂講老子道德經，虔弟元明隔紗帳以聽之。是嫂叔也。古嫂叔不親授受，則有之。更隔以紗帳，不太拘乎？乃至唐婦人出入，亦擁以幃。天寶遺事：寧王有樂妓寵姐，善歌而色美，客不能見。李白醉戲曰：「王何惜示于衆？」乃設七寶花帳，召寵姐歌於帳後。又物怪錄：轎車入中門，白衣姝一人下車，侍者以幃擁入，是又懼座上客及門外男子窺見也。

### 古家庭對於各項禽蟲之徵驗

西京雜記：樊將軍噲問陸賈曰：「自古人君受命，各有瑞應，信乎？」賈曰：「有之。」夫目闕即眼，得酒食，燈火華得錢財，乾鵲噪而行人至，蜘蛛集而百事嘉。小既有徵，大亦宜然。故目闕則呪之，火華則拜之，乾鵲噪則饅之，蜘蛛集則放之。况天下大寶乎？又酉陽雜俎：貓洗面過耳有客至。

按貓洗面者以舌舐其掌使潤再以掌拭面使淨過耳者拭面時過耳上也乾鵲者蓋南方此本迷信之事而家庭日所常有每見貓洗面則曰有客喜鵲鳴燈花結喜蜘蛛下則曰報喜惟眼跳則惡之與漢不同耳

謂嚏噴爲人道之歷史

終風詩曰願言則嚏言夫不見禮願言我而嚏也鄭康成箋云今俗人嚏云人道我此乃古之遺語也云可證自周迄漢皆謂嚏噴爲人說我也又漢藝文志雜占十八家三百一十卷內嚏耳鳴雜占十六卷是嚏可占吉凶也宋嬾真子云俗說以人嚏噴爲人說是宋時仍有此俗語至今不息家庭婦女只要嚏即云某人說我以無理俗語三千年仍舊可謂久矣



## 卷四十二

行唐尙秉和著

### 社會雜事

#### 古以頭戴物歷史

孟子斑白者不負戴於道路矣。斑白者言鬚髮白黑相間也。負以背負物。戴以頭戴物也。古敬老。幼者於道路遇老者。必代爲負戴也。又漢書朱買臣傳。買臣擔束薪行。且誦書。其妻亦負戴相隨。是自周迄漢。皆以頭戴物也。

按今中國人無以頭戴物者。惟高麗有之。凡中國人之以肩挑以背負者。無不戴之於頭。卽汲水之桶。挹水之盆。無論男婦。皆惟頭是賴。巍巍然不傾不欹。不溢不墜。中國人見之。反詫其能。怪其拙。不知我古人盡如此也。然所以能平穩者。賴有一物。薦於頭上。又所戴之物。恆至百餘斤。亦須有物。護持頭骨。使不受創。其物維何。則簪數也。

簪數者。據漢書東方朔傳。迺覆樹上寄生。令朔射之。朔曰。是簪數也。郭舍人曰。果知朔不能中也。朔曰。生肉爲膾。乾肉爲脯。著樹爲寄生。盆下爲簪數。師古曰。簪數戴器也。以盆盛物。戴於頭者。則以簪數薦之。今

賣白團餅人所用者是也。寄生者，芝菌之類，淋潦之日，著樹而生，形周圍似窠數。

按寄生者，夏日大樹雨淋後生耳，色白形圓中薄而窠數者，或以氈或以絮，亦輪厚而中薄，置頭上高低正平，兩物之質不同而形則如一，頭若戴盆，薦於頭之上，盆之下不惟頭不受創，且能平穩，故曰盆下爲窠數。此所覆本是寄生，朔能射其形，不能射其名，初曰窠數，此亦如管輅射枇爲梳之類，及舍人說其不中，朔乃提出寄生，若曰非窠數即寄生也。宋劉敞不明文義，反謂師古說不通，最可笑也。

又楊惲傳，鼠不容穴，銜窠數也。注，盆下之物，有飲食氣，故鼠銜之。據是則以盆盛飯或羹，今以兩手舉者，漢時盡以頭戴，又據師古注，今賣白團餅人所用者，知唐時仍戴物也。

### 髮辮之歷史

中國自古髮皆上挽，而夷狄髮皆下被。左傳有被髮而祭於野者，論語吾其被髮左衽矣，禮記東方曰夷被髮文身，西方曰狄被髮朱身，是周時夷狄髮皆下垂，被於項領。至漢時稍進化，則編髮。漢書終軍傳，殆將有解編髮削左衽而蒙化者焉。西南夷傳，自桐師以東北至葉榆，名爲僇昆明，編髮。又晉書東夷傳，肅慎氏俗皆編髮。又宋史宗澤傳，見編髮者盡誅之，編髮即髮辮，是自漢迄遼金四夷皆髮辮。然自五胡亂

華，拓拔魏遼金統中國北部，蒙古更進而一統，訖未能將編髮之風改易中國舊式。自朱明亡，滿人入關，滿人即肅慎氏之苗裔，不惟將數千年衣冠制度盡行更革，且強迫華人將頭髮四

周雍去留其中下垂編之被於背上此種醜態甚於髡刑因不樂從而被殺者至數千人而遺民耆老舊臣因避此禍竄身海外隱匿於山陬海澨者不可勝數此一變也及至清末近三百年不惟愚民莫知其從來卽卿大夫亦頗忘其固有後學生赴外國留學髮辮垂垂外國人嗤之名曰豚尾學生歸來始述其醜不可言於是資政院議決許國民剪去髮辮然當時雖有詔令實卿大夫無一剪去者民國元年厲行剪髮凡官吏無一有辮者然髡者十八九無定式此又一變也

### 古敬老狀況

古最重老故國家有養老之禮見於禮經者甚詳因之社會亦敬老孟子斑白者不負戴於道路矣言民知禮讓行路時遇老人無論識與不識卽代爲負戴也又漢書食貨志入者必持薪樵輕重相分斑白不提携又地理志魯地爲周公子所封其民有聖人之風地濱洙泗其民涉渡幼者扶老而代其任俗旣益薄長老不自安與幼少相讓故曰魯道衰洙泗之間斷斷如也夫至於相讓則有痕迹故曰俗薄若淳美之時少者視爲當然老者視爲固然不驚異也此等風俗至漢猶存故國家時有賜肉賜帛賜米賜絮之詔令魏晉以降漸爾稀薄蓋人口日繁老者益多不勝其養而社會之優容老者雖至今不免也

### 漢魏時刼質

今俗曰綁票

漢書趙廣漢傳。富人蘇回爲郎。二人劫之。有頃廣漢將吏叩堂戶。曉賊曰。京兆尹趙君謝兩君無得殺質。又魏志夏侯惇傳。呂布遣將僞降。共執持惇。責以寶貨。軍中震恐。惇將韓浩乃勒兵屯惇營門。召軍吏諸將皆案甲當部不得動。諸營乃定。遂詣惇所。叱持質者曰。汝等凶逆乃敢執劫大將軍。復欲望生耶。且吾受命討賊。寧能以一將軍之故而縱汝乎。因涕泣謂惇曰。當奈國法何。促召兵擊持質者。持質者惶遽叩頭言。我但欲迄資用去耳。浩數責皆斬之。惇既免。太祖聞之謂浩曰。卿此可爲萬世法。乃著令自今已後。有持質者。當并擊。勿顧質。由是劫質者遂絕。

按此事裴注引孫盛曰。光武紀。建武九年盜劫陰貴人母弟。吏以不得拘質追盜。盜遂殺之也。然則合擊者。即并擊乃古制也。自安順已降。政教陵遲。劫質不避王公。而有司莫能遵奉國憲者。浩始復斬之。故魏武嘉焉。按今後漢書。光武紀無此事。而陰皇后傳有九年盜劫殺后母鄧氏及弟。訢之語。蓋一事也。

觀此則後漢之時。王公皆被劫。頗類於今日之津滬。蓋劫質勒贖最盛之時也。不贖則殺質。今名曰擄票無不與今同。而古人遇此事。不惟禁贖。且質與盜並擊。使盜無所得。則源絕矣。若遇劫而贖。是獎盜也。愈獎愈多。若擊盜而願質。是縱盜也。愈縱愈肆。故夏侯惇以大將軍之尊而被劫。其部下亦毅然不願。何者犧牲少而影響大。不如是不能絕其源。後世法律師其意亦著令禁贖。然在國家立法。以合擊爲最優。而在家屬私情。則捨質爲不忍。故有被劫不敢告官者矣。此盜風之所以益肆也。

## 古租宅狀況

魏晉以前租宅住者不多見。至六朝則多。北史邢劭傳僦租也。小屋與染工爲鄰。又劉昉傳。使妾賃屋沽酒當壚。至唐時士大夫僦屋以居者不可勝數。乃有祇租一日者。白行簡李娃傳。生至李娃舊宅。門扃鑰甚密。生大駭。詰其鄰人曰。李本租而居。約已周矣。第主自收。姆徙居。不知其處。生復回宣陽以詰其姨。既至叩扉食頃。有宦者出曰。此崔尙書宅。昨者有一人稅此院。云遲中表之遠來者。未暮去矣。是僅租一日也。故徐積詩云。賃屋爲無楊子宅。休官非爲武昌魚。李洞詩。稅房兼得調猿石。租地仍分洛鶴泉。蓋至唐宋租宅而居。遷徙靡定。其狀況已與今同。

## 煖房

今人移新宅。戚友恆送酒食會飲宅中。名曰煖房。亦曰溫鍋。蓋以新宅尙未經人住。集多人譟飲其中。以爲厭勝。而唐時卽有之。唐王建宮詞云。太儀前日煖房來。又輟耕錄。今之入宅爲遷居者。鄰里釀金治具。過主人飲。謂曰煖屋。亦曰煖房。是此俗自唐至今行之已千餘年。

## 歷代貸錢利息 周息五釐

其在周時。政府貸錢於民者。息祇五釐。周禮泉府。凡民之貸者。以國服爲之息。鄭玄曰。以其於國服事之稅爲息。假令貸萬泉。期息五百。按載師云。凡任地國宅官署。無征。園廩二十而一。是國服之息也。鄭云。貸

萬泉。錢也。期一年。息五百。亦二十取一也。卽年息五釐也。

漢普通息二分急則十分

史記貨殖傳。庶民農工商賈率亦歲萬息二千。百萬之家卽二十萬。是貸息爲二分。蓋普通無事。私人與私人借貸如此。及吳楚兵起。長安中列侯封君。行從軍旅。齎資。同貸。子錢家。卽放債者。子錢家以關東成敗未決。莫肯予。惟毋鹽氏出捐千金貸。其息十之三月。吳楚平。一歲之中。則毋鹽氏息十倍。是急則可至十分也。至王莽時。凡貸民錢治產業者。旣受息歲十一。復取其所贏。又變年息而爲月息。令市官貸民錢。收息百月三。是政府貸民錢。月息三分也。

中保人爲債權者奔走狀況

後漢桓譚傳。今富商大賈。多放錢貸。中家子弟。爲之保役。保作中。趨走與臣僕等勤。收稅與封君比入。是以衆人慕效。不耕而食。按今之放債者。亦有中保人。日趨附其門。且有因以起家者。飲食醉飽。猶其餘事。證以桓譚所言。今古如出一轍。又樊宏傳。年八十餘終。其素所假貸人。問數百萬。遣令焚削文契。文契者債權之證。中保所取予。削者漢用竹簡爲契也。

漢貧民租地種每年租率

漢書食貨志。貧民租富民田種。租十五。卽每畝收十斗。以五斗與地主也。今名曰分種。糧與薪皆分之。然

分種者少，納租者多，租率十之二三，無及半者，是租率古重於今也。

### 斫莖

莖者草也，馬牛所食之芻秣也。草長必斫之，使細短，然後便於應用。漢書尹翁歸傳有論罪輸掌畜官使斫莖，不中程，輒笞督極者，至以鈇自斫而死。又世說陶侃幼時家極貧，孝廉范逵過宿，時大雪，母湛氏斫柱各半爲薪，劉諸薦以爲馬草。

按薦者，席下所鋪草也。鈇者，斫草之刀。古罪人嘗使斫莖舂米，然有程限，不中程則笞也。

### 古以磨麵爲業

周時無論爲米爲麵，皆以碓舂成，後乃以磨爲麵粉，捷於舂碓數倍。日久遂有以此爲業者。蜀志許靖傳，少與從弟劭俱知名，而私情不協，劭爲郡功曹，排擯靖不得齒敍，以馬磨自給。按給者養也，以馬磨自給者，必爲人磨五穀，得報酬以自養也。唐吳融冤債志，同曲磨家，二牛暴卒，後世業此者尤多，自機器磨興，此業漸廢，然山僻之邑，仍不絕也。

### 古有以磨鏡生光爲專業者

古用銅鏡，鏡始鑄成，固必磨而後生光，然用之久，光仍退，故有以磨鏡爲專業者。淮南子明鏡之始下型，模也，矇然未見形容，及其粉以玄錫，磨以白旃，毡也，髮眉微毫，可得而察。唐聶隱娘傳，忽偵磨鏡少年至。

門女曰。此可爲我夫。父不敢不從。遂嫁之。其夫但能淬鏡。餘無他能。又雲溪友誼有胡生者。家貧。少爲磨鏡。鍍釘之業。是皆以磨鏡淬鏡洗鏡爲專業。沿街售藝。以自給者也。又世說補。徐孺子事江夏黃公。黃公歿。欲會葬。無資。以自致。乃以磨鏡具自隨。所在取直。然後得達。按磨鏡具。卽淮南子所謂白旃玄錫諸物也。玄錫者。水銀也。

自玻瓈鏡興。而銅鏡始廢。玻瓈在古時爲至寶。本草云。本出頗黎國。故名。玄中記。大秦國有五色玻瓈。以紅色爲貴。梁四公記。扶南人來賣碧頗黎鏡。內外皎潔。向日視之。不見其質。按此卽今日之玻瓈鏡也。在六朝時珍異。若是。又唐書。貞觀十七年。拂菻國遣使貢赤玻瓈。又宋史。大中祥符八年。注輦國貢碧玻瓈。是在宋時仍視爲至寶。迄蒙古混一西域。來者益多。至明代番舶交通。運輸愈衆。於是以水銀塗其背。製爲照鏡。皎潔精瑩。卽四公記所謂向日視之。不見其質也。價廉物美。於是明清以來。銅鏡遂絕迹。

### 歷代養蜂攷

蜂能爲蜜造蠟。人利賴之。然自周時。不見以畜蜂爲業者。有之。自漢始。中國人自古輕實業。漢以前卽有之。亦無人紀載也。故數千年來。畜蜂之事。毫不進步。至可慨嘆。攷高士傳。姜歧當延熹中。橋玄爲漢陽太守。召歧。歧不就。遂隱居。以畜蜂豕爲業。教授者滿天下。營業者三百餘人。夫旣云教授。則姜歧必創有新法。於蜂之性情嗜好居處。以及採割分房並防患之法。研究詳悉。著爲書說。然後可憑以教授。而其書不



傳其法。遂亡。至晉張華博物志云。遠方諸山。出蜜蠟處。以木爲器。開一小孔。以蜜塗器內外。令遍。春月蜂將生育時。捕取兩三頭。著器中。宿夕飛去。尋伴來。經日漸益。遂停其中。此不知爲岐遺法否。其所謂木器。頗類於今日之蜂箱。但此祇爲分房之一法。姜岐所教授者。當不止此。又陰陽變化錄云。蜂每歲三四月。生黑色蜂。名曰將蜂。又名相蜂。和蜂不採花。但能釀蜜。按此卽蜂王。爾雅翼。蜂以千百數中有大者爲王。爲蜂羣之主。一羣中不能有二王。有二則鬪而分出。而張華博物志亦未言及。蓋姜岐之教授法。至晉已全亡。然分房之法。訖未失傳。五代潘昉蜂詩云。今歲分成第幾房。剝松爲屋蜜爲糧。剝松者自古蛇鼠最爲蜂害。故古人爲蜂造屋。皆剝木爲之。屋成塗以蜜。備新蜂來爲糧。法略與張華同也。

#### 明劉基養蜂之詳法

郁離子云。靈邱丈人喜養蜂。歲收蜜數百斛。蠟稱之。於是富比封君。丈人卒。其子繼之。未期月。蜂有舉族去者。陶朱公問其故。鄰叟曰。昔者丈人之養蜂。剝木以爲蜂之宮。不緘不漏。其置也疏。蜜有行。新舊有次。五五爲伍。一人伺之。視其生息。調其暄寒。時其墮發。蕃則縱之析之。寡則與之裒之。不使有二王也。去其蛛蝥虻蜉。彌其土蜂蠅豹。夏不烈日。冬不凝澌。其取蜜也。分其贏而已矣。不竭其力也。於是故者安。新者息。

按宮不緘漏者。恐蛛蠅土蜂等爲害也。土蜂大於蜜蜂。不惟食其蜜。並食其子。蕃則析之者。卽春日分房。

也。一房祇一王。惟此與爾雅翼言之。他書未有也。

蓋古人得蜜之法有二。一則畜蜂。一則採野蜂蜜。博物志遠方山郡僻處。出蜜蠟。所著皆絕巖石壁。非攀緣所及。採者於山頂以籃輿自懸下。乃得之。又段成式酉陽雜俎。蜀中有竹蜜蜂。好於野竹上結窠。窠與蜜並紺色。甘倍常蜜。是皆野蜂蜜也。賈島詩鑿石養蜂休買蜜。亦致野蜂也。

今仍有野蜂。惟家蜂蜜色黃。野蜂蜜色白。白蜜爲古所未有。古記載皆言蜜爲紺色。卽崖蜜。野蜜亦未有言白色者。今河北密雲昌平阜平綠山諸邑所產蜜皆白色。而皆野蜂蜜。其白如脂。其味含各種花香。較黃蜜尤佳。而家蜂無白者。不知其故也。又今北平市上所有蜜皆白者。白可搗糖霜。黃則不便。故蜜雲古北口等處所產白蜜。盡爲北平市收去。至其出賣。則每十兩不過二三兩真蜜而已。今西法興。以木箱養蜂。蜜則隨釀隨採。故其味甚薄。若中國法。一年祇春時採蜜一次。故其味之甘濃。勝洋蜂數倍。釀之久。與不久故也。西洋人從未嘗過此味厚之蜜。反以爲僞。又蜜過夏則結晶。味尤甘。而西洋人尤以爲僞。真可笑也。

### 糖之歷史

古味甘食料曰飴。曰餹。曰蜂蜜。皆液質而色黃。惟蔗糖則白似霜。甜似蜜。不液而沙。取搗使而潔白可喜。於飴蜜而外。別有風味。真食品中無上之寶也。然唐以前無之。唐以前所謂糖。皆飴餹。揚子方言。餹謂之

糖。說文糖飴也。是其證。至六朝。竿蔗汁爲糖。齊民要術云。竿蔗汁如飴餠。名之曰糖。是仍與餠無異。又云。煎而曝之。既凝而冰破如塼。食之入口消釋。時人謂之石蜜。是六朝時已有冰糖。仍無沙糖。攷北史。眞臘國傳。飲食多酥酪沙糖。史書此者。以沙糖爲中國所無。又攷唐書。摩揭陁國傳。貞觀二十一年。始遣使者自通於天子。太宗遣使取熬糖法。卽召揚州上諸蔗。柞瀝卽榨如其劑。色味愈西域遠甚。又老學菴筆記。聞人蒞德言沙糖。中國本無之。唐太宗時外國貢至。問其使人此何物。云以甘蔗汁煎。用其法煎成。與外國者等。唐以前書傳。凡言糖者皆糟也。據此。是沙糖始於唐初。或曰。易林有飯皆沙糖之語。豈知糖乃糠之訛。宋本不如此也。漢焉有沙糖哉。然唐初所謂沙糖者。蓋紅沙糖也。尙無白糖霜。此有確證。宋王灼糖霜譜云。唐大曆間。有僧號鄒和尚者。不知從來。跨白驢登嶺山。結茅以居。須臾米薪菜之屬。卽書付紙。繫錢遺驢負至市。人知爲鄒也。取平直。挂物於鞍。縱驢歸。一日驢犯山下黃氏蔗田。黃請償於鄒。鄒曰。汝未知蜜蔗爲糖霜。利常十倍。試之果信。如貞觀時卽有白沙糖。到大曆幾二百年。此糖霜胡能取十倍利乎。故唐初仍無白糖。

按說文云。窖。地室也。今謂地窖。藏酒曰窖。窖蔗者必以蔗藏於地窖。蔗受濕蒸。其汁外浸。遇冷而成霜。其白如雪。其甜如蜜。在初發明時。必利十倍。然此法用蔗多而得糖少。至宋時卽將紅沙糖復熬之。使變爲白沙糖。以迄於今。其詳盡在王灼及洪邁糖霜譜中。實北宋時糖霜已盛行。東坡送僧圖寶詩云。冰盤薦

琥珀何似糖霜美，山谷有寄糖霜詩，是其證。

漢冬日藝蔬之法

今日嚴冬，一切園蔬皆有鮮者，法掘地數尺深，而覆屋其上，屋北低南高，仰其簷，使能受日光，又恐其受風也，簷之下至地皆爲窗，糊以紙，而於簷室內點鑿爲炕，炕之上覆土尺餘，和以糞，種各蔬，炕之端生煤火，使炕上土皆暖，雖蔓生之黃瓜，亦可結實，與夏日無異，而其法實創始於漢時，漢書召信臣傳，太官園種冬生葱韭菜茹，覆以屋廡，晝夜燼蘊火，待溫氣乃生，信臣皆奏罷之，是其法發明最早。

乃至魏晉又失傳，晉石崇與王愷鬥富，冬日恆食韭萍齏，王愷百計不得其法，後賄其侍者，云合麥苗韭根，擣之，因冬月無韭，麥苗可僞韭葉，加以韭根，則有韭味，是可證晉時無以溫室藝蔬者，不然奢侈如石崇等，常有鮮韭矣，尙以麥苗作僞哉，知其法久已失傳。

漢織錦法

西京雜記，霍光妻遺淳于衍蒲桃錦二十四匹，散花綾二十五匹，綾出鉅鹿陳寶光家，寶光妻傳其法，霍顯召入其第，使作之，機用百二十鐸，六十日成一匹，匹直萬錢，按此卽今日之提花也，提花用多鈞爲之，卽鐸也，織錦藝術，在漢已發達若此。

古殺猪後以火燎毛

今殺豬後，割其後腿，用鐵條從割口挺入其腹，遍攪之，再以口吹氣於其腹中，令全身鼓漲，然後縛其口，使勿洩氣，再以湯洗之，用捲刃刮去其毛，使皮膚雪白。若古則殺豕後，先以火燎其毛，莊子云：「濡需者，蟲也。」擇疏鬣自以爲廣宮大囿，奎蹄曲隈，乳間股脚，自以爲安宮利處，不知屠者之一旦鼓臂布草操煙火，而已與豕俱焦也。又韓非子：「三虱相與訟，爭肥磽之地。」一虱過之曰：「若亦不患臘之至而毛之燥耶？」夫曰布草操煙火，曰毛之燥，則既殺而以薪燎其毛也。燎毛之後，其垢汗如何去，而古書不詳。至六朝時，仍用燎毛之法，而去垢則詳。齊民要術音衙：「煮豬肉法，淨燂豬訖，更以熱湯遍洗之，毛孔中卽有垢出，以草痛揩，如此三遍，疏冷令淨，四破于大釜煮之。」按說文：「燂，火熱也。」燎其毛也。既燎更洗，以熱湯揩以薪草，去其垢污，然後煮之法，亦善矣。然仍不如今日之潔。今日之法，始于何時，則難攷也。

### 自古狐爲祟

狐之爲祟，自漢魏以來，小說家所載，不知凡幾，誠怪獸也。而周以前亦不能無有。自虞初志亡，周以前社會詳情俱湮沒不傳，於是狐史亦不詳。然時時見於經史，詩爲鬼爲蜮，毛傳：「蜮，短狐也。」以狐與鬼並列，其幻可知。又莊子：「步仞之丘陵，巨戰無所，隱其形，而孽狐爲之祥，祥者變異之氣也。」又戰國策：「狐假虎威。」又史記陳涉傳：「令吳廣之近所旁叢祠中，夜篝火，狐鳴曰：『大楚興，陳勝王。』」於是人多指目勝，足見秦時社會久以狐爲妖，故假狐言以惑人，此周秦之狐祟也。

其見於漢魏者。干寶搜神記。董仲舒下帷講誦。有客來詣。舒知其非常。客又云欲雨。舒曰。巢居知風。穴居知雨。卿非狐狸。卽是鼯鼠。客化爲老狸。又魏志管輅傳注。輅遠鄰數患失火。一日有書生宿其家。主人盛設。書生疑之不敢寢。持刀倚積薪假寐。歟有一小物。手中持火。以口吹之。生驚。舉刀斫。正斷其腰。視之乃一狐。自此無火患。此狐祟之見於漢魏者也。自晉以後。狐祟之見於傳記者。汗牛充棟矣。茲皆不錄。

### 古吹火用排

今人家炊飯。治工冶鐵。用風匣扇火。古則用排。世說鍾季士先不識嵇康。往詣之。康方大樹下鍛。向子期爲佐鼓排。康揚椎不輟。

按排者吹火器。亦名曰輔。音應玉篇云。輔韋囊。可以吹火令熾。鼓者。蓋伸縮韋囊令進氣也。然可以水激。後漢杜詩傳。造水排。鑄農器。注云。治者爲排。以吹炭。今激水鼓排。卽水碓也。又魏志韓暨傳。爲監冶。謂者。作水排。利益三倍。是可證以水激輔。使扇風吹火。亦如水碓。水磨以水激輪。使磨旋轉也。不過水排但取其能吹火使熾耳。而省人力。故利三倍。至唐時仍用輔。薛昭幻影傳云。乃遣崔元亮市汞一斤。入瓦鍋。蓋一方瓦。疊炭埋鍋。輔而焰起。又牛嶠靈怪錄。見一革囊。喘若輔囊。是其證。若今之風匣。不知始於何時。法以木板塞匣內。更以鷄毛粘於板之四周。以塞罅漏。而安雙柄於板上。俾通於外。來回拉之。風從口出。凡人家及鐵工竈邊。無不用之。而排遂少見矣。

## 飲茶之歷史

周時飲料有六。白水漿醴涼醫醴。見於周官漿人所掌。醴者甜酒。涼者冰水。醫者梅漿。涼與醫卽今日之酸梅湯。而鎮以冰者也。想當時社會款客聯歡。卽以此六飲。而不及茶。然周時實有之。詩採茶薪樗。又予所採茶。野客叢書云。世謂古之茶。卽今之茶。不知茶有數種。惟檟茶之茶。爲今之茶。爾雅釋木。檟苦茶也。注葉可作羹飲。今呼早采者爲茶。晚茶者爲茗。周禮有掌茶之官。然自周迄秦。社會飲者殊少見。至西漢王褒僮約云。烹茶盡具。又武陽買茶。是西漢人漸有飲者。三國時吳主孫皓每宴饗飲酒。以七升爲率。羣曜不能飲。皓密賜茶。苾以當酒。然至六朝時飲者尙少。世說王濛好飲茶。人至輒命飲。士大夫皆患之。云今日有水厄。又洛陽伽藍記。齊王肅不食羊肉。及酪漿。常食蠅魚羹。渴飲茗汁。高帝曰。羊肉何如魚羹。茗飲何如酪漿。肅曰。羊比齊魯大邦。魚比邾莒小國。惟茗飲不中。與酪漿作奴。夫以飲茶爲水厄。可證晉時士夫嗜茶者十不有一。以飲茗汁不飲酪漿爲可怪。又以證北齊時社會普通皆飲酪漿。仍嗜茶者少也。王肅亦以違衆。故遜其詞曰。茗爲酪奴也。清異錄云。茶至唐而始盛。然自陸羽以前。春日茶發芽。採之而已。烹之而已。與淪蔬而啜者無異也。及陸羽作茶經。創製茶法。烹茶法。於是茶事益精。家置而戶有。國家至推茶稅。則當時社會用茶之多。可想矣。待至宋製造益精。迭見於歐陽蘇黃諸詩人歌詠。其狀況略與今同。

古掃地菰帶卽用黍穰

左傳襄二十九年。楚人使公視櫟。乃使巫以桃茢先被殯。楚人弗禁。既而悔之。杜注。茢。黍穰也。孔疏。檀弓云。君臨臣喪。以巫祝桃茢執戈。惡之也。鄭玄云。桃鬼所惡。茢。菰。可掃不祥。君臨臣喪。禮有此法。茢是帶。蓋以桃爲棒也。毛詩傳曰。亂爲茢。茢。菰謂亂穗也。杜云。茢。黍穰者。今世所謂習帶者。或用亂穗。或用黍穰。二者皆可爲之也。

按亂者。萩屬。陸機詩疏。亂或謂之萩。至秋堅成。則謂之茢。故其穗可以爲帶。黍穰者。黍穗。秋老實落。縛其稍爲帶。今北方人家多如此。無以萩葦穗爲帶者。而古則兼用之。

古帶之長短與今同

曲禮凡爲長者。養之禮。加帶於箕上。又管子弟子職。執箕膺。搯箕舌。厥中有帶。以是證古帶長不過二尺。正與今同。至孔疏所謂以桃爲棒。似今日掃院之帶。以木柄縛帶尾。可遠掃。亦可高拂也。

魏晉宮殿榜額皆墨書

世說章仲將能書。魏明帝起殿。欲安榜。使仲將登梯題之。旣下。頭髮皓然。又太極殿始成。時王子敬爲謝公長史。謝送版。使王題之。王有不平色。語使云。可置著門外。後謝語王云。題之上殿何若。昔魏朝章仲將諸人。亦自爲也。王曰。魏祚所以不長。乃罷。按題額。後世皆刻木爲之。魏晉時有刻石。尙無刻木。故題殿額。



皆墨書，以是證社會榜額，無不墨書也。

### 古待遇乳母之重

漢武帝乳母，賜良田美宅，所言無不聽。見褚補史記滑稽傳中。是漢人之重視乳母也。韓昌黎有乳母墓銘，曰：入韓氏乳其兒，愈遂老韓氏。又曰：及見所乳兒，愈舉進士第，歷官員外郎、河南令，生二男五女。時節慶賀，輒率婦孫列拜進壽。夫對乳母自稱曰兒，稱其妻曰婦，子曰孫，其重視乳母等於骨肉。又老學菴筆記：東坡主試，李方叔下第，其乳母年七十大哭曰：吾兒遇蘇內翰主試不第，他復何望？遂自縊死。是亦在李氏養之終身者，故關係若是之切。是唐宋皆重視乳母，不與僕媼等，蓋爲兒而食其乳以生，其恩不與尋常等，故古人皆厚報之，養之終身，不令其去。今人情涼薄，兒長則視乳母若路人者，非也。

### 古練帛之幅廣幅長

周禮內宰淳制注云：淳，幅廣，制幅長。天子巡狩，制幣丈八尺，淳四咫。同咫八尺疏云：四咫三尺二寸，幅太廣，四當爲三。古三四積畫，故易誤。三咫則二尺四寸也。

按周用律尺，每尺當清時工部尺八寸二分，周幅廣三尺二寸，正清工部尺二尺五寸。若裁尺不過二尺二寸，正與今綢緞之幅廣相同。若二尺四寸，祇當今裁尺一尺六寸，則太窄矣。疏疑四咫爲三咫者，誤也。且鄭時書四字已不積畫，與三字迥不同。有漢碑可證，然則周時帛每端長一丈八尺，幅廣三尺二寸，合

今尺長一丈四尺餘廣二尺四寸餘也。

六朝時布帛匹長四十尺幅廣二尺二寸

宋書沈慶之傳年八十夢得絹兩匹曰老子今年不得活兩匹絹八十尺也由是證六朝時一匹絹四十尺也又通志賦貢門魏天平初綱絹不依舊式興和三年各頒海內悉以四十尺爲度是北朝帛長亦四十尺也至幅廣據通志云魏舊制絹布皆幅廣二尺二寸長四十尺爲一匹而南朝幅廣則不詳想亦同也。

唐帛匹長仍四十尺廣尺八寸布幅廣亦八寸長五丈爲一端

通志唐武德二年制絹爲匹布爲端布絹皆闊尺八寸絹長四丈爲匹布長五丈爲端至開元八年復申舊制不得因兩不足而加尺至德宗建中年復據大歷定制凡尺皆以鉅黍爲准是唐布帛長廣始終不變也。

## 卷四十三

行唐尙秉和

### 平民仕進

自周至六朝，官人之法，大致以選舉。自隋唐迄明清，官人之法，大致以科舉。選舉者，以德行為先，以材藝爲輔。自周秦迄兩漢，只能敦品勵行，習藝明經，無不脫穎而出，故人人自勵，樹立聲名，乃行之久而弊生。魏晉六朝，尙門第，貴簪纓，而平民受擠，於是變選舉而爲科舉。科舉者，始於隋，開塲命題，較閱文藝，文藝及第，賜進士出身，與以官，謂曰進士科。以文藝爲先，以德行為後，然歷隋唐五代宋元明清千餘年，不廢者，以科舉比較最爲公允，而平民可從此有出路也。故孤寒之士，亦爭自琢磨，不能在他途與貴族競爭者，則致力於科舉。其選舉科舉詳制，盡在通攷通典中。茲所述者，乃歷代平民對於仕進之致力及社會對於仕進者之感想也。

#### 周時選舉以三物

周雖封建，然鄉大夫遂大夫及其所屬，又司馬司寇司徒所屬，亦取之平民，非所有官吏，盡世襲也。周禮地官五州爲鄉，使之相賓，又曰以鄉三物事也，教民而賓與之。一曰六德，智仁聖義忠和；二曰六行，孝友

睦嫺任恤。三曰六藝。禮樂射御書數。注興猶舉也。教成鄉大夫推舉其於三事之尤賢者。能者。以飲酒之禮賓之。興於太學而授官也。又曰。三年則大比。是賓興之禮。三年一舉也。後世科舉。每三年一次。本周禮遺意也。

漢平民仕進之法 有以富得官者

漢書張釋之傳。以訾同貲爲騎郎。如淳曰。漢注貲五百萬。得爲常侍郎。又司馬相如傳。以訾爲郎。師古曰。以貲多得爲郎也。又景帝後二年詔曰。今訾算十以上。迺得官。廉士算不必衆。有市籍不得官。無訾又不得官。朕甚憫之。訾算四得官。毋令廉士失職。貧夫長利。應劭曰。古者疾吏之貪。衣食足。知榮辱。限訾十算。乃得爲吏。十算十萬也。賈人有財。不得爲吏。廉士無訾。又不得官。故減訾四萬。

按常侍郎官較尊。侍從皇帝。故必有貲五百萬。方得爲。若普通官吏。有家貲十萬。卽得爲也。然廉士有貲十萬者少。故減爲四萬也。是無論何官。必有家貲四萬者。方得爲也。

蓋當時風俗。爲官者富人居多。而郎官尤甚。所謂貲郎也。楊惲傳。郎官故事。令郎出錢市財用。給文書。又任安傳。有詔募擇衛將軍舍人。以爲郎。將軍取舍人富給者。令具鞍馬絳衣玉具劍。欲入奏之。後趙禹爲選任安田仁。衛將軍見此兩人貧。意不平。是當時郎官俸入。不能自給。而郎署公用又多。資之於郎官。貧者尤不辦。故張釋之曰。久宦減仲之產。司馬相如免官歸家。徒四壁。可證漢時京曹年年賠累。與清代同。

故喜富人。

有由郡縣吏爲大官者

漢時古道猶存，只敦品勵行，即可被選爲縣吏。淮陰侯布衣時，貧無行，不得推擇爲吏。許靖爲許劭所排，不得齒敍，是其證。及得爲吏，樹立聲名，自然遷秩。如張敞以鄉有秩補太守卒史，察廉爲甘泉倉長，鮑宣初爲鄉嗇夫，任安爲亭長，是由縣吏以次遷擢。陳萬年爲郡吏，察舉至縣令，趙廣漢爲郡吏，州從事，擢爲平準令，是皆由郡吏以次遷擢，而其初皆平民也。以上略述二人以見例。

有以文學入仕者

孤寒下士，他不能有所作爲，惟恃讀書爲出路。如賈誼，河南守聞其秀才，召置門下。後吳公爲廷尉，卽薦爲博士，又疏廣以好學徵爲博士，又鄭崇爲郡文學史，梅福爲郡文學，補南昌尉，是皆以文學起家。自博士有弟子員，弟子能明一經以上者，內則爲郎侍，外則爲郡掾。如睦弘以明經爲議郎，諸葛豐以明經爲郡文學，是皆以明經而貴顯。自武帝詔舉賢良文學之士射策，如董仲舒、公孫弘，嚴助、馬宮、何武，並以射策得貴顯。而嚴助一擢卽爲中大夫，朱買臣、吾丘壽王、主父偃、終軍之屬，並以上書得貴顯。而朱買臣亦一擢卽爲中大夫，自此孤寒讀書之士，始奮迅起矣。

有以品行得舉者

馮唐以孝著爲郎中署長京房蓋寬饒杜鄴師丹並以孝廉爲郎而後漢李善本民家奴以救主故卽徵爲太子舍人自是以後孝友義俠蒸爲風氣三公及州郡聞名爭相辟舉無不彰顯者故東漢風俗較西漢尤良。

魏晉六朝尙門第平民進取難

自魏陳羣創九品官人之法於是州郡皆置中正以定其選擇六朝皆承用其法然自魏晉以來尙門第塞俊之士得上品甚難世說周伯仁母本汝南民家女謂伯仁兄弟曰我所以屈節爲汝家作妾爲門戶計耳汝若不與吾家親親者吾亦不惜餘年伯仁等悉從命由此李世在世得方輻齒遇又陶侃少時家酷貧同郡范逵舉孝廉投侃宿于時冰雪在地室如懸磬而逵僕馬甚多侃母既截髮易米斫柱爲薪劉席薦爲馬秣人人饜足明旦去侃追送百里許逵感其賢始薦於張夔羊晫諸人後晫爲十郡中正舉侃爲鄱陽小中正始得上品由是觀之在晉時平民進取已不易如斯也若貴族子弟幾見如是哉又通攷晉時州有大中正郡國有小中正皆掌選舉吏部選人必下中正徵其人居及父祖官名夫徵父祖官名卽上門第之證故南齊書云鄉舉里選不覈才德其所進取以官婚胄籍爲先遂令甲族以二十登仕後門平民以三十試吏平民與貴族不平等若是又北齊辛術傳管庫必擢門閥不遺鑑衡之美一人而已言不專取門閥也又北周蘇綽傳懲魏齊之失罷門資之制察舉精愼言置門閥不論也

以尙門閤之故策士時出種種醜態

通攷北齊選舉多沿後魏之制。凡州縣所舉秀才貢士廉良。天子服乘輿。出坐於朝堂中。檀而課試之。秀才孝廉方正。各以班草對。字有脫誤者。呼起立席後。書有濫劣者。飲墨水一升。文理猛浪者。奪席脫容刀。蓋既尙門閤。則貴游子弟進而寒士受擠。不論才藝。則執袴少年多。而詩書之士少。故有如是種種醜態也。

隋唐以來進士科之榮貴

進士科始於隋。而大盛於唐。唐貞觀時。有秀才明經進士三科。而秀才科尤高。後以舉不中第。卽反坐其州長。由是廢絕。祇明經進士二科。而明經科較易取。故世所貴者。唯進士科。據言云。進士科始於隋大業中。盛於貞觀。搢紳雖位極人臣。不由進士者。終不爲美。其都會謂之舉場。通稱謂之秀才。投刺謂之鄉貢。得第謂之前進士。互相推敬。謂之先輩。俱捷謂之同年。有司謂之座主。京兆府考而升者。謂之等第。外府不試而貢者。謂之拔解。將試相保。謂之合保。造請權要。謂之關節。激揚聲價。謂之還往。既捷列名於慈恩寺塔。謂之題名。大宴於曲江。謂之曲江會。

進士科榮貴之由

在選舉時代。終假人力以進取。惟進士及第。則全由考試文藝所致。不假人力。首試以時務策及經義。次

試以常代法律條教及小學中說文字林算學中周髀五經算等書後更兼試詩賦雖當時尙有門第餘習及權要聲氣之弊而孤寒下士亦往往得售在社會心理似進士科全以文學得官視他途進身之假力於人者有仙凡之殊有清濁之異又應試得售今日白衣明日朱紫在社會耳目尤以爲榮故雖鄉曲之士亦父諭其子兄勉其弟以讀書

唐新進士曲江大宴之盛況

據言新進士曲江大宴先期牒教坊請奏上御紫雲樓垂簾觀焉公卿家率以是日擇塔傾城縱觀鉅車珠幕櫛比而至既徹饌則移樂泛舟都爲恆例夫新進士大宴至請皇帝臨觀則其鄭重可知又何怪社會以是爲榮哉

故進士放榜謂登科記爲千佛名經見進士及第以泥金書帖附家信報喜謂之泥金信狀元

及第謂曰奪錦標

見古今詩話

劉禹錫寄劉侍郎放榜詩云禮闈新榜動長安九陌人人走馬看一日聲名遍

天下滿城桃李屬春官孟郊及第詩曰昔日齷齪不足誇今朝放蕩思無涯春風得意馬蹄疾一日看遍長安花又紀事詩云元和十一年李涼公榜三十三人皆取寒素時有詩曰元和天子丙申年三十三人同得仙袍似爛銀衣似錦相將白日上青天觀此三詩唐時社會之艷羨及第進士可謂極矣

唐舉人考試規矩及入棘闈情況



紀事詩云。唐舉人試日。許燒燭三條。韋承貽題詩於壁云。褒衣博帶滿塵埃。獨上都堂納卷回。蓬巷幾時聞吉語。棘籬何日免重來。三條燭盡鐘初動。九轉丹成鼎未開。殘月漸低人擾擾。不知誰是謫仙才。又薛能詩云。白蓮千朵照廊明。一片昇平雅頌聲。更報第三條燭盡。南宮風景寫難成。夫曰報三條燭盡。是燭盡不交卷則逾限也。曰鐘初動則是曉鐘已動也。以是知唐試進士。以一日一夜爲限。

### 唐社會待遇新進士之醜態

玉泉子。韋保衡常訪同人。方坐李鉅新新及第亦繼至。保衡以其後先匿於幃下。旣入曰。有客乎。同人曰。韋保衡秀才。可以出否。鉅新新及第甚自得意。徐曰。出也。何妨。保衡竟不出。及韋上公主爲相。鉅新方爲山北從事焉。是秀才遇新進士於友人家。卽須迴避。又謠言云。彭伉滿貲。俱袁州宜春人。伉妻又湛姨也。伉舉進士及第。湛猶爲縣吏。妻族爲置賀宴。皆官人名士。貲至命飯於後閣。其妻憤然責之。是白衣卽不得與官人同席。宴後湛亦一舉登第。伉初嘗侮湛甚。時伉方跨驢縱遊郊郭。忽有家僮馳報。伉聞失聲而墜。是進士及第。可使姻戚之有宿嫌者。懼而墮驢。又因話錄。趙琮妻父爲鍾陵大將。琮以久隨計不第。窮悴甚。妻族益相薄。雖妻父母不能不然也。一日軍中高會。州郡請之春設者。大將家相率列棚以觀。琮妻雖貧。不能勿往。然所服故弊。衆以帷隔絕之。設方酣。廉使召大將。旣至。曰。趙琪非汝壻乎。曰。然。曰。已及第矣。大將遽持榜歸白家人。曰。趙郎及第矣。妻族大喜。卽撤去帷帳。相與同席。以簪服慶遺焉。是其壻不及。

第。則。以。與。貧。女。同。席。爲。恥。及。既。及。第。則。又。以。與。貧。女。同。席。爲。榮。也。然。士。雖。進。士。及。第。終。身。坎。珂。者。多。矣。而。社。會。榮。視。若。是。似。一。種。迷。信。也。

惟唐考試之法尙疏不盡公允

玉泉子云。翁彥樞蘇州人。應進士舉。有僧與同鄉里。出入故相國裴坦門下。以年輩雖中門不禁其出入。坦持文柄入貢院。子勛質日議榜於私室。其子奪進退。僧聞之熱矣。歸寺而彥樞訪焉。僧曰。公成名須第。幾人彥樞謂僧戲已。謾應曰。第八人足矣。卽復往裴宅。二子議如初。僧忽張目曰。侍郎知舉耶。郎君知舉耶。卽歷數其權豪私仇。予奪去取之由。全榜人名不差一人。勛等大懼。問僧所欲。曰。有鄉人翁彥樞。第八人及第足矣。榜發彥樞果及第。又撫言云。高緒知貢舉。誠門下不得受請託。及入闈。裴思謙持仇士良宦官關節。非狀元及第不可。錯不得已。許之。又廣陵記。王維以公主力爲舉首。此皆由考法疏闊。故舞弊易也。

不過唐時雖通關節。播聲氣。而及第之人。仍多名士。倘子弟不文。雖豪宗右族。亦恥之。而不爲。彼王維雖由關節進。因其文采素爲妓王所賞拔。故樂爲延譽於公主。卽裴思謙由宦監進身。而狀元及第後。宿平康里。詩云。銀釭斜背解明璫。小語低聲喚玉郎。從此不知蘭麝貴。夜來新惹御爐香。此詩馳名千古。故仇士良肯爲盡力。非若後世之無所挾。而徒以勢力進取。又以證唐世之文章爲極盛。苟文采不足。徒憑勢。

力得第。無論何人。皆以爲辱也。

至宋考試之法始密不能徇私

唐祇制科糊名。進士科皆亮卷。故弊端百出。至宋將試。卷糊名。使主試者莫知誰何之文。通考云。景德四年。命晁迥知貢舉。滕元晏封印卷首。先是。雍熙二年。殿試糊名。至是用之。禮部。迨明道二年。而天下州郡無不用之。而又恐主試者之認識筆迹。則又將試文。滕錄以易字體。通考云。景德八年。始置滕錄院。凡試卷經爛封官封卷後。付吏錄本。監以內侍二人。京官校對訖。復送封印院。始送知貢舉。定去取。自糊名滕錄之法。興於是。主試者雖門生故吏。無能爲力。老學菴筆記云。東坡知貢舉。李方叔被黜。其乳母年七十。大哭曰。吾兒遇蘇內翰知貢舉。不及第。他復何望。遂閉門自縊死。緣方叔爲東坡門生。東坡主試。而方叔不第。故以爲絕望。豈知試卷自糊名。滕錄後。雖親子弟。亦無從摸索。其法實已大公。自此以後。凡平民求進取者。只致力於文學。不患不達。故歷元明清行之千年而不改。及清末春秋兩圍。竟廢滕錄而不用。不知此爲防弊之唯一良法。幸科舉廢耳。設沿襲至今。其弊不可勝言矣。

明清以來。平民進取之法。大概有三級。由童子應縣試。府試。再應學政試。取中者曰生員。卽秀才也。由秀才應省鄉試。取中者曰舉人。第一名曰解元。由舉人再應會試。取中者曰貢士。第一名曰會元。貢士經殿試。取列一甲第一名者曰狀元。一甲二名曰榜眼。三名曰探花。一甲祇三人。次爲二甲。皆賜進士出身。次

爲三甲。賜同進士出身。再分別授以官。凡一省置舉政一人。考試童生。甄別秀才。凡舉人科進士科。每三年一舉行。舉人科曰鄉試。合一省秀才試之。進士科曰會試。合天下舉人試之。鄉試恆在八月。曰秋闈。所謂槐花黃。舉子忙。故有攀桂折桂等名也。會試恆在三月。曰春闈。所謂春風得意馬蹄疾。故有探花簪花諸故事也。凡秀才每縣取中有定額。舉人每省取中有定額。大省百餘人。小省或不到百人。進士每科有定額。其甲榜不過三百人。而每省復有定額。大省得中二十餘人。小省十餘人。故雖荒陬僻壤。文化較低者。亦不至脫榜也。此明清以來。平民進取之大略也。

## 卷四十四

行唐尙秉和著

### 妓

古。之。所。謂。妓。與。後。世。稍。異。論。語。齊。人。饋。女。樂。史。記。貨。殖。傳。鄆。邳。女。子。彈。弦。跕。躑。游。媚。富。貴。徧。諸。侯。之。後。宮。漢。張。禹。後。堂。所。蓄。皆。妓。也。而。皆。爲。女。樂。故。世。說。云。殷。仲。文。勸。武。帝。蓄。妓。帝。曰。吾。不。解。聲。又。魏。武。遺。令。於。銅。雀。臺。上。設。匡。牀。施。繡。帷。每。月。朔。十五。令。諸。妓。向。牀。前。作。伎。樂。又。謝。太。傅。攜。妓。遊。山。絲。竹。陶。寫。宋。蕭。琳。有。聽。妓。詩。梁。簡。文。帝。有。聽。夜。妓。詩。又。十。六。國。春。秋。石。虎。鄭。后。原。晉。僕。射。鄭。世。達。家。妓。唐。書。太。平。公。主。傳。供。張。聲。妓。與。天。子。等。順。宗。紀。貞。元。十。一。年。放。後。宮。女。妓。六。百。人。是。皆。以。妓。爲。樂。之。證。不。然。王。公。貴。人。及。天。子。宮。中。所。蓄。曰。姬。妾。可。矣。胡。必。名。之。曰。妓。曰。妓。則。聲。樂。也。茲。所。述。者。非。貴。人。家。所。蓄。之。妓。乃。社。會。以。妓。爲。業。者。也。

#### 唐時妓女聚居之地及妓院佈置之清雅

自唐以前營業之妓載籍不詳至唐始有詳記而北里志則妓史之班馬也志云平康里入北門東回三曲卽諸妓所居之聚也妓中有錚錚者多在兩曲中曲其循牆一曲卑瑣妓所居頗爲二曲輕斥之其兩曲中者門前通十字街初登館閣者多於此竊遊焉二曲卽巷中居者皆堂宇寬靜各有三數聽事前後

植花卉。或有怪石盆池。左右對設小堂。垂簾茵榻。幃幌之類。稱是。諸妓皆私有所指占。聽事皆彩版以記。諸帝后忌日。按記忌日者。例禁歌舞。譙宴於忌日也。

假母

今之養家

之狀況與今同

北里志。妓之母多假母。

原注云。俗呼爲爆炭。不知其因。

亦妓之衰退者爲之。無夫其未甚衰者。悉爲諸邸將輩主之。或

私蓄侍寢者。亦不以夫禮待。

原注云。多有游惰者。於二曲中爲諸娼所養。號爲廟客。不知所謂。

按今日妓之假母。俗呼爲老爆子。蓋仍沿

唐時爆炭之稱。爆炭者。言其鞭撻穉妓。威怒爆發。如炭之爆也。亦曰鴛母。蓋爆之訛。至其所象之侍寢者。今日拚頭。亦曰靠家。唐顧客之稱。訖不得其義。

唐妓之來歷及受虐情形

北里志。諸女自幼丐有。或傭其下里貧家。常有不調之徒。潛爲漁獵。亦有良家子。爲其家聘之。以求厚賂。誤陷其中。無以自脫。初教之歌令而責之。其賦甚急。微涉退怠。則鞭撻備至。皆冒假母姓。咸呼以女弟。女兄。爲之行第。

按今日妓女皆由假母買貧家女。自幼調習歌曲。及其稍長。則責其斂錢。稍不如程。則鞭扑交至。今古鴛母。如出一轍。

唐妓捐錢始能出遊

北里志。諸妓以出里艱難。每兩街保唐寺有講席。多以月之八日。相率率聽焉。皆納其假母一緡。然後能出里。其於他處。必因人而遊。或約人與同行。則爲下婢而納資於假母。故保唐寺每三八日。士子極多。蓋有期於諸妓也。亦有樂工聚居其側。或呼召之。立至。每飲率以三釵。繼燭卽倍之。

妓從良仍不悛

北里志。楚兒傳。楚兒字潤娘。往往有詩句可傳。近以退幕爲萬年捕賊官郭鍛所納。置於他所。潤娘狂逸特甚。及被拘繫。仍未能悛。鍛主繁務。又有正室。至潤娘館甚稀。每有舊識過其所居。多於牕牖相呼。或使人詢訊。或以巾箋送遺。鍛乃汾陽裔孫。爲人異常凶忍。每知必極笞辱。潤娘雖自痛憤。而不少革。嘗一日自曲江與鍛行。前後相距數十步。鄭光業時爲補袞。道與之遇。楚兒出簾招之。光業亦使人傳語。鍛知之。曳至中衢。擊以馬笞。聲甚冤楚。觀者如堵。光業遙視之。甚驚悔。且慮其不任矣。光業明日。特過其居偵之。則楚兒已在臨街牕下弄琵琶矣。駐馬使人傳語。潤娘持彩箋送光業詩云。應是前身有夙冤。不期今世惡姻緣。蛾眉欲碎巨靈掌。鷄肋難勝子路拳。祇擬嚇人傳鐵拳。未應教我踏金蓮。曲江昨日君相遇。當下遭他數十鞭。光業取筆於馬上答之云。大開眼界莫言冤。畢世甘他也是緣。無計不煩乾偃蹇。有門須是疾連拳。據論當道加嚴箠。便合披緇念法蓮。如此興情殊不減。始知昨日是蒲鞭。

按今日妓女從良者。仍風靡不已。舊習不悛。未幾下堂仍操舊業者有之。蓋妓女在妓院風狂成性。乍入

人家有如牢獄。難以久安。乃如潤娘者。走筆和答。詩詞敏妙。直與文人學士相埒。可謂大雅不羣矣。乃以所適非人之故。不甘寂寞。仍招蜂引蝶。念舊輸情。不知已身之已脫籍妓也。甚矣結習之難忘。

黠妓自高聲價以斂錢

北里志。天水仙哥。字絳真。住南曲。善談謔。能歌令。姿容平常。而蘊藉不惡。劉覃登第年十六七。閉衆譽。天水亦不知其妍醜。每辭以他事。重難其來。覃則增繒不已。會天水實有所苦。不赴召。覃殊不信。有戶部府吏李全者。能制諸妓。居里中。覃聞召吏至。授以銀花檣。逕入曲追天水。入兜輿中。至則蓬頭垢面。涕泗交下。褰簾一視。即使昇回。

又雲仙雜記。史鳳宣城妓也。待客有差等。最上者有迷香洞。神鷄枕。鎮蓮燈。次則交紅被。傳香枕。下則不可見。以閉門羹待之。使人傳語曰。請公夢中來。馮垂客宣城。罄囊有錢三十萬。盡納之。得至迷香洞。按天水等伎倆。至今娼妓祖述其法。而執縛子弟。墮其術中者。今古如一。豈不異哉。又史鳳曰。請公夢中來。謔亦甚矣。若後世必有人痛懲之。而宋時遊人。熟視不怪。今古習尚之不同若是。

唐時妓院之危險

自來妓院爲危險地。卿士大夫入其中。而被劫被辱者。不可勝數。乃唐時竟至殺人。北里志。王金吾相國起之子。曾遊北曲。遇有醉而後至者。遂避之牀下。俄頃又有仗劍後至者。以爲金吾也。因梟其首而擲之。



曰。來日更呵殿入朝耶。遂據其牀。金吾獲免。又裴晉公嘗狎遊。爲兩軍力士十餘輩凌轢。勢甚危窘。公潛遣介召同年胡證尙書。證皂貂金帶突門而入。主人上燈。胡起取鐵燈臺。擲去枝葉而合其跗。台足橫置膝上。卽改令曰。凡三鍾引滿一遍。三臺酒須盡。不得有酒灑。犯令者一鐵躋。羣惡叩首乞命而遁。按妓院爲不名譽之地。在其中雖被殺。亦無聲訴者。而被刼被辱者。更喑默不言。猶憶光緒三十年冬。有名妓謝珊瑚者。寓李鐵拐斜街。某貝子往遊。貂裘金表玄狐斗蓬等物。爲惡少刼奪。席捲而去。亦忍痛不言。至妓女爲刼賊掠去勒贖。惡少因一語不合。搗毀什物咆哮肆威者。尤衆。及三十一年巡警部立。警察滿街。刼賊既不敢肆行。偶遊客發怒。搗毀什物。則妓院立呼警察來處罰。於是妓院治安。始有保障。千餘年不改之狀況。至此一變。此亦志北里者之一大紀念也。

唐京妓與外妓謹肆不同然遇貴人皆須行參謁禮

北里志。牙娘居曲中。亦流輩翹楚者。性輕率。惟以傷人肌膚爲事。故硤州夏侯表中澤。相國少子。及第中甲科。宴集因醉戲爲牙娘批頰傷面。次日期集師門。同年皆竊視之。表中因厲聲曰。昨日子女牙娘抓破澤面。同年皆駭然。主司裴公贊俯首而哂。不能舉者久之。又云。比見東洛諸妓體裁。及諸州飲妓。固不倖矣。然其羞七箸之態。勤參請之儀。或未能去也。若北里之妓。公卿與舉子。其自在一也。朝士金章者。始有參禮。按惡妓風狂。專以打人取樂者。今古皆有。至貴人入妓院。受諸妓參謁。殆唐人獨有風俗。若後世貴

人治遊者愈貴則愈諱之。誠以游戲之地而忽行參禮得毋施之非其人行之非其地乎。

唐宋時官妓

以上所述皆私妓以歌舞自由營業厭則從良乃唐宋時又有所謂官妓營妓蓋一類也。或曰始於管仲以管子有女閭三百之語。或曰始於漢武以漢武外傳有置營妓以惠軍吏無室家者之語。此皆不可信。漢魏時軍中宴饗之事多矣不見有妓祇貴人第內宴饗有之。東晉時士夫放蕩極矣乃見於世說者謝安可遊山挾妓官吏公譙從不見其呼召官妓是晉宋時尙無也。故謂營妓始於管子者固無稽。即謂始於漢武者亦非信史。官妓之有蓋起於唐天寶以後。此有一徵。凡唐載記所謂某與官妓狎某喜營妓某皆天寶以後人以前則無有也。

凡官吏宴飲則召官妓侑酒

撫言楊汝士尙書鎮東川其子知溫進士及第開宴汝士命營妓人與紅綾一匹又東臬雜錄東坡自錢塘被召過京口林子京作郡守有會坐中營妓出牒鄭容求落籍高塋求從良又清波雜志東坡在黃岡每用官妓侑觴羣妓爭持紙乞歌詞是唐宋官吏祇有宴會無不召妓蓋其時士風不似後來之拘執視聲妓絲竹爲固有之事兼其時官吏多文人學士妓女之風流文采又足以副之故觴詠所至則湖山生色歌詞傳播則今古蜚香自蒙古興此風漸衰自洪武起懸爲厲禁於是古人所恃以舒寫勞瘁活潑精

神之事。至清末遂剷除無餘。而文化之低落隨之。出軌之反動以起。則以疏導失宜之故也。

### 官妓皆由私妓選拔

本事詩韓滉鎮浙西。戎旻爲部內刺史。郡有妓善歌。色亦閑妙。旻情屬甚厚。滉聞其名。召置籍中。是不敢留。餞於湖上。爲歌詞以贈之。且曰。至彼首歌是詞。旻至。韓爲開筵。自持杯令歌。果唱戎詞曰。好是春風湖上亭。柳條藤蔓繫離情。黃鸝住久渾相識。欲別頻啼四五聲。曲旣終。滉曰。戎使君於汝寄情耶。妓竦然起曰。然。淚隨言下。韓卽歸之。

以是證當時官妓皆由私妓選拔而來。蓋一入官籍。卽不能自由。且往往受官吏之虐。魏泰詩話云。呂士隆知宣州。好畧官妓。會杭州一妓到。士隆喜之。一日郡妓犯小過。欲畧之。妓曰。不敢辭。但恐杭妓不安耳。乃捨之。梅聖俞因作莫打鵬詩以戲之。又古今詩話。蘇子瞻守錢塘。有官妓李秀蘭。天性慧黠。善於應對。一日湖中有宴會。羣妓競集。惟秀蘭不至。督之良久方來。子瞻已恕之。坐中一倅怒其晚至。詰之不已。子瞻爲作賀新涼。使歌以侑酒。倅怒頓止。觀是二事。則官妓受虐之種種情形。可推想矣。

### 有能脫籍者同輩皆羨之

快雪堂東坡帖云。杭州營籍周韶。多蓄奇茗。嘗與君謨鬥勝之。韶又知作詩。子容過杭。述古飲之。韶泣求落籍。子容曰。可作一絕。韶援筆立成曰。隴上巢空歲月驚。忽看回首自梳翎。開籠若放雪衣女。長念觀音

般若經。韶時有服衣白。一坐嗟歎。遂落籍。同輩皆有詩送之。二人者最善。胡楚云。淡妝輕素鶴翎紅。移入朱闌便不同。應笑西園舊桃李。強勻顏色待東風。龍觀云。桃花流水本無塵。一落人間幾度春。解佩暫酬交甫意。濯纓還作武陵人。固知杭人多惠也。

按周韶原唱。以鸚鵡自況。故曰隴上。產隴西。曰雪衣女。雪衣女楊妃所蓄鸚鵡。見外傳。胡楚以花卉起興。以桃李自比。其欣慕周韶。悲傷自己。不能脫籍之意。溢於言外。讀之令人憐。故楚詩尤佳也。然觀東皇雜錄所記。鄭容求落籍。高瑩求從良。見前。以是證落籍不定從良也。只脫官家羈絆耳。

唐宋名人與官妓之眷戀

凡唐宋名人。不惟宴飲呼妓侑酒。其戀戀寄情於官妓者。亦不諱也。古今詩話。元稹廉訪浙東。喜官妓劉採春。題詩曰。因循歸未得。不是戀鱸魚。是戀官妓不歸也。又麗情集。元稹使蜀。籍妓薛濤有才色。往侍焉。後登翰林。寄以詩。又云灼灼錦城官妓也。御史裴質與之善。裴召還。灼灼每以紅綃聚淚爲寄。是旣歸。仍念官妓不捨也。又古今詩話。韓魏公爲陝西安撫使。李師中過之。李有詩名。席間爲官妓賈愛卿賦詩曰。願得貔貅十萬兵。犬戎巢穴一時平。歸來不用封侯印。只問君王覓愛卿。又吹劍錄。范文正守饒。喜妓籍中一小鬟。旣去。以詩寄魏介曰。慶朔堂前花自栽。使移官去未曾開。年年常有別離恨。爲託春風幹當來。介遂買以遺公。是見官妓而心欲。雖隔多年。必設法以致之也。又以證韓范皆名儒。亦不諱此也。又詞苑

叢談。周邦彥方在李師師家。道君忽至。邦彥伏牀下。備聞道君謔語。乃隱括其事。成少年遊。他日師師歌之道君大怒。因遷謫邦彥。押出國門。是君臣同戀一妓而相妬也。又青箱記。魏仲先與寇萊公同遊陝郊。僧寺留題。後復行到。公詩已用碧紗籠。仲先詩塵昏滿壁。時有從行官妓頗慧。以衣袖拂之。仲先徐曰。若得時將紅袖拂。也應勝似碧紗籠。萊公大笑。又后山詩話。司馬溫公爲武定從事。同幕私幸營妓。而公諱之。適會僧廬。王荊公往迫之。妓踰垣去。荊公集句戲之曰。年去年來來去忙。暫偷閒臥老僧房。驚回一覺遊仙夢。又逐流鶯過短牆。野客叢書云。錢文僖公留守西京。梅聖俞尹師魯歐陽公同在幕下。一日宴集。歐與所眷妓後至。錢責妓云。涼堂午睡。失金釵。猶未見。錢曰。若得歐推官一詞。當爲償汝。歐卽席成臨江仙。錢令公庫償釵。是長官與屬以妓爲戲。雖遊寺亦不離官妓。甚或幽會於僧房也。至其他文人如黃山谷與瀘南官妓盼盼相戀。秦少游在蔡州。與營妓婁婉甚密。周邦彥在姑蘇。與營妓岳楚雲相戀。更不可勝數也。

### 唐宋時妓界之文采

麗情集。長安有娼女曹文姬。尤工翰墨。爲關中第一。時號書仙。又天寶遺事。長安名妓劉國容。有姿色。能吟詠。與進士郭昭述相愛。後昭述授天長尉。與國容相別。詰旦赴任。國容使女僕賁短書云。歡寢方濃。恨鷄聲之斷愛。恩情未洽。歎馬足以無情。使我勞心。因君減食。再期後會。以結齊眉。是妓而富於文詞。

北夢瑣言。江淮間名妓徐月英。送人詩曰。惆悵人間萬事違。兩人同去一人歸。生憎平望橋頭水。忍照鴛鴦相背飛。又抒情集。韋蟾廉訪鄂州。罷任。賓僚盛陳祖席。蟾遂書文選句云。悲莫悲兮生別離。登山臨水。送將歸。以箋毫授賓從。請續其句。座中皆不能屬。有一妓泣然曰。武昌無限新栽柳。不見楊花撲面飛。座客無不嘉歎。是妓而能詩。而武昌妓之續句。爲學士大夫所不能者。而妓能之。且出語敏妙。當塲刺譏。想當時坐客皆赭顏也。又楚兒與鄭光業。見前。走筆和答。鄭詩尙不如楚兒。卽周韶胡楚之詩。在士夫亦爲難能也。

能改齋漫錄。杭之西湖有一倅。閑唱少游滿庭芳。偶誤舉一韻云。畫角聲斷斜陽。妓琴操在側云。山抹微

雲。天連衰草。畫角聲斷。譙門非斜陽也。倅因戲曰。爾可改韻否。琴卽改作陽字韻云。山抹微雲。天連衰草。

畫角聲斷斜陽。原作譙門。暫停征轡。原作倅。聊共飲。原作引。離觴。原作尊。多少蓬萊舊侶。原作事。頻空。原作回。回首煙靄茫

茫。原作粉。孤邨裏。原作斜陽外。寒鴉萬點。原作數。流水遶空牆。原作帑。魂傷。原作銷魂。當此際。輕分羅帶。暗解香囊。

原作香囊暗解。羅帶輕分。謾贏得。秦樓薄倖名狂。原作存。此去何時見也。襟袖上空有餘香。原作染。喻痕。傷心處。長城望

斷。燈火已昏黃。原作黃。昏。

試以琴操改韻與少游原唱較。幾不能判其孰爲主賓。則琴操之工於填詞。其才誠爲不可及。故東坡極

賞之。泊宅編云。杭妓琴操善應對。東坡善之後。因遊西湖。戲琴云。我作長老。爾試參禪。問云。何謂湖中景。

答曰。落霞與孤鶩齊飛。秋水共長天一色。何謂景中人。答曰。裙拖六幅瀟湘水。鬢聳巫山一段雲。何謂人中意。答曰。隨他楊學士。鼉鼓鮑參軍。如此究竟如何。坡云。門前冷落車馬稀。老大嫁作商人婦。琴操大悟。卽削髮爲尼。

此皆略舉一二。以概其餘。其他見於載籍者。尙多如煙霧也。蓋其時妓女。無不知書。其高者。能吟詠。通詩歌。可與文人學士相和答。次亦無不通文。故詩詞脫手。立可付歌。能定其聲。知其意。久之。遂習與俱化。以是證古妓界文學。亦高出後世也。